


Diža' güen che
ancho Jesucristo



New Testament in Zapotec, Zoogocho (MX:zpq:Zapotec,
Zoogocho)

Diža' güen che ancho Jesucristo

New Testament in Zapotec, Zoogocho (MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
de7d40fb-3909-53d8-8bea-744cf1ce0e41

Contents

San Mateo	1
San Marcos	44
San Lucas	70
San Juan	114
Hechos	147
Romanos	186
1 Corintios	203
2 Corintios	219
Gálatas	229
Efesios	236
Filipenses	242
Colosenses	246
1 Tesalonicenses	250
2 Tesalonicenses	254
1 Timoteo	256
2 Timoteo	261
Tito	265
Filemón	268
Hebreos	269
Santiago	283
1 Pedro	288
2 Pedro	293
1 Juan	296
2 Juan	300
3 Juan	301
Judas	302
Apocalipsis	304

DIŽA' GÜEN DAN' BZOJ SAN MATEO

ẖozxtao' Jesucriston'

(*Lc. 3:23-38*)

¹ Nga nyoj la bene' gosac ẖozxtao' Jesucriston' chzolaon len da' ẖozxta' ocho Abraham. Le Jesúsen' goque' xi' in diaža che da' David, na' da' Davin' goque' xi' in diaža che da' Abrahanna'.

² Abrahanna' goque' ẖa Isaac, na' Isaaquen' goque' ẖa Jacob, na' Jacoben' goque' ẖa Judá len yezica' chle bene' biše' ca'. ³ Judán' na' Tamar gosaque' ẖaxna' Fares na' Zara. Na' Faresen' goque' ẖa Esrom, na' Esronna' goque' ẖa Aram. ⁴ Na' Aranna' goque' ẖa Aminadab, na' Aminadaben' goque' ẖa Naasón, na' Naasónna' goque' ẖa Salmón. ⁵ Salmónna' na' Rahab gosaque' ẖaxna' Booz. Na' Boozen' na' Rut gosaque' ẖaxna' Obed. Na' Obeden' goque' ẖa Isai. ⁶ Na' Isain' goque' ẖa rey David, na' rey Davin' goque' ẖa Salomón. Na' xna' Salomónna' goque' xo'ol da' Urias cate' za' yeca'a rey Davin' le' par gaque' xo'ole'.

⁷ Na' Salomónna' goque' ẖa Roboam, na' Roboanna' goque' ẖa Abias, na' Abiasen' goque' ẖa Asa. ⁸ Na' Asan' goque' ẖa Josafat, na' Josafaten' goque' ẖa Joram, na' Joranna' goque' ẖa Uzias. ⁹ Uziasen' goque' ẖa Jotam, na' Jotanna' goque' ẖa Acaz, na' Acazen' goque' ẖa Ezequías. ¹⁰ Na' Ezequiasen' goque' ẖa Manasés, na' Manasésen' goque' ẖa Amón, na' Amónna' goque' ẖa Josias. ¹¹ Josiasen' goque' ẖa Jeconías len yezica' chle biše' ca' gosenita' ca' tiemp caten' bene' Babilonia ca' gosezene' bene' Israel ca' na' goseche' ẖoxje' legaque' Babilonian'.

¹² Gwde goc ca', golje Salatiel xi' in Jeconíasen'. Na' Salatielen' goque' ẖa Zorobabel. ¹³ Na' Zorobabelen' goque' ẖa Abiud, na' Abiuden' goque' ẖa Eliaquim. Na' Eliaquinna' goque' ẖa Azor. ¹⁴ Na' Azoren' goque' ẖa Sador, na' Sadoquen' goque' ẖa Aquim. Aquinna' goque' ẖa Eliud. ¹⁵ Na' Eliuden' goque' ẖa Eleazar, na' Eleazaren' goque' ẖa Matán. Na' Matánna' goque' ẖa Jacob. ¹⁶ Nach Jacoben' goque' ẖa José ben' goc bene' che María. Na' Marian' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca' tiemp che da' David bžinte ca' tiemp caten' gosezene' bene' Israel ca' goseche' ẖoxje' legaque' Babilonia, lecze gosac yežta' diaža chen', na' ca' tiempen' bžinten ca' žan' golje Criston' ben' gwlej Diosen' cont yedenabi'e, gosac yežta' diaža chen'.

Can' goc cate' golje Jesucriston'

(*Lc. 2:1-7*)

¹⁸ Na' quingan' goc cate' golje Jesucriston'. Ba naquen gwšagna' Marian' len José, na' za' ca' a Josén' le' par gaque' xo'ole' cate' gocbe'ede' ba noa' Marian' bdao'. Goc ca' dan' ben Spiritw che Diosen' cont bhendao' bdao' na' lo' le'e. ¹⁹ Na' Joséna' ben' ba naquen si'e Marian' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marian' šižize cont nono gacbe'e na' cont bi gwsie' le' zto'. ²⁰ Šlac chone' xbab gone' ca' gwtase' na' to angl bene' gwse'la' Xancho Diosen' blo'elagüe' le' lo' bišgal. Na' gože' le':

—José, le' goljo' lo' diaža che da' rey David. Bitw žebo' si'o Marian' par gaque' xo'olo'. Spiritw che Diosen' benen cont no'e bdao' na'. ²¹ Na' sane' to bi' byo dao' na' gwsie' o labe' Jesús, le' len' yeqe'e xto'la' bene' gualaż che' ca' bene' yesejnilaže' ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwne'de' yelen', bene' can' gož angl che Xancho Diosen' le', jaxi'e Marian' liže' par goque' xo'ole'. ²⁵ Perw bi gwzoalene' le' ca' xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

2

Magos ca' jasene' Jesúsen'

¹ Ca' tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. ² Na' gosenabde' bene' lo' ciudad' gose'ene':

—*žCan' rey che bene' Israel, ben' ba golje? Nežeto' ba golje', le' ba ble'eto' beljw chen' cate' blan' lažto' dan' zoa gan' chla' gwbiž. Na' za'to' gonxento'ne'.*

³ Cate' gwneze' rey Herodesen' can' gosenen', gocchgüe' tole, na' lecze ca' yogo' lo' bene' lo' ciuda' Jerusalénna'. ⁴ Nach reyna' btobe' yogo' lo' bžox gwnabia' che chio' bene' Israel na'

lecze yogo' bene' ca' chososed chosolo'e dan' bzoj da' Moisésen'. Na' gwnabde' legaque' gan' naquen galje Criston' ben' gwlej Diosen' cont yedenabi'e. ⁵ Nach gose' bene' ca' Herodesen':
—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.
Le to bene' Belén gaque' bene' gwnabia', na' le' güia ne'e nación Israel čhian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyanen' besele'ede' bla' beljon'. ⁸ Nach gwsele' legaque' Belénna', gože' legaque':
—Le šja'ac na' le šjaydilw bidao'na' tcho'a. Na' cate' yezelebe' le yeda yedyedixjue'ele neda' cont lecze ša'a šjexena'be'.

⁹ Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' biña' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen. ¹⁰ Na' magos ca' besyebede' juisyw cate' besele'ede' beljon' da' yoble. ¹¹ Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marian'. Nach bosozoa xibgaque' gosonxene'be'. Na' gosesaljo caj čhegaquen' gosebeje' oro, yal na' to nechw da' chla' zix' da' nzi' mirra na' gosoen' chebe'. ¹² Na' šlac ne' nita' magos ca' Belénna', Diosen' gwdixjue'ede' legaque' lo' bišgal bich yesyedie' gan' zoa rey Herodesen'. Da'nana' besyeque'e yeto nez yoble jaya'ac laže'.

Bosoxnje' ja'aque' Egipto

¹³ Na' cate' ba besyeya'ac magos ca', to angl čhe Xancho Diosen' blo'elagüe' Josén' lo' bišgal, na' gože'ne':

—Gwyas, gwče' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque' yeza'le, le Herodesen' ba nžie' bia' yeyiljue' bidao'na' cont got'e'be'.

¹⁴ Nach ne' ze bxin' gwyas Josén', gwče'e bida'ona' len xna'ben' zja'aque' Egipton'. ¹⁵ Nach gosenite' Egipto na'ze šlac bžin' ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': "Čhixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

¹⁶ Na' rey Herodesen', cate' gočbe'ede' gosonle' magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw che' ca' par jasete' yogo'lo' bi' byo che'en dao' zelao bi' chop ize, bi' ca' gosalje Belénna' na' yezica'chle yež ca' zjanyechj' zjambi'i Belénna'. ¹⁷ Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

¹⁸ Nente ši'i' bene' Ramá, chesebežchgüe' nita'chgüe' yeļa' güine'.
No'ole ca' zjanaque' xi'in' diaža čhe da' Raquel chesyeyaše' chesyegüine'de' čhe xi'inda'ogaque' ca', na' bitw chesaclaže' no yeyoexenlaže' legaque', le ba gosatben'.

¹⁹ Cate' got Herodesen', Josén' ne' zoe' Egipton'. Nach to angl čhe Xancho Diosen' blo'elagüe' Josén' lo' bišgal, na' gože'ne':

²⁰ —Gwyas, beče' bidaon' len xna'be'na' na' le šjaya'ac Israel. Ba gosat bene' ca' besyeyiljw bidao'na' cont yesote'be'.

²¹ Nach gwyas Josén' beče'e bidaon' len xna'ben' jaya'ac lažgaque' Israel. ²² Perw Josén', cate' bende' Arquelao bezoe' chnabi'e latje čhe da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo' bišgalen' bi' cheyala' šjaya'aque' distritw Judean', san šjaya'aque' gan' mbane distritw Galilean'. ²³ Da'nana' besyežine' ciuda Nazaret na' jassenite'. Na' dan' jassenite' Nazaretan' goc can' bosozoj da' bene' goso'e xtiža' Diosen' cani', gosene': "Yososi'e Jesüsen' bene' Nazaret."

3

Juan ben' bzoa bene' nis gwdixjue'ede' diža' güen čhe Diosen'

(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa bene' nis gwyeje' latje daš gan' mbane distritw Judean'.
² Na' gwdixjue'ede' bene', gože' legaque':

—Le yetinje xtoła'le ca', le ba bžin' ža cate' Diosen' ben' zoa yaban' nabi'e yichjlaždao' bene' yosozenague' che'.

³ Čhe Juanna' bzoj da' Isaíasen' caten' bzoje' Xtiža' Diosen' cani', gwne':

Bena' chne' ziže' latje dašen', že':

"Le gonšagüe' yichjlažda'olen' cont soale lez gwzenagle čhe Xančhon' cate' yide'.

Le cuejyichj' da' malen' chonle cont yichjlažda'olen' gaquen ca to nez da' ba gosonšagüe'."

⁴ Na' Juanna', xalane' goquen de yiša' xa camello. Na' da' bčhej lsinen' goquen de yid, na' gwdagüe' biše'zo len šina' beser yixe'. ⁵ Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nyechj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. ⁶ Na' cate' gosexoadole' bi da' xinj zjanone', Juanna' bzoe' legaque' nis lo yegw Jordánna'.

⁷ Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—iLe'e nacchgualē bene' zgot na' bene' gwxiye'! ¿Chaquēle guac yelale lao castigw dan' seła' Diosen' caten' gone' yela' justis che benachen'? ⁸ Še da' li ba betinjēle xtola'len', cheyala' gonle da' nac güen cont yesache'e bene' ba boša' yichjlažda'olen'. ⁹ Na' bitw gonle xbab gaquēle Diosen' bitw gone' le'e castigw che xtola'len' lagüe dan' nacle xi'in diaža che da' Abrahamna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahamna'. ¹⁰ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. ¹¹ Neda' da' li chzoa' le'e nis neče ba betinjē xtola'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' bene' ca' bi yeson can' chazlaže' Diosen', sełe' legaque' lo yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. ¹² Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sełe' legaque' lo yi' gabilen' dan' cbi cheyol chentit.

Cate' gwzoa Jesúsen' nis

(Mr 1:9-11; Lc 3:21-22)

¹³ Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' le' nis. ¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lol dan' non Diosen' mandadw gac. Nach gwčheb Juanna' bzoe'ne' nis. ¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. ¹⁷ Na' gosende' gwne' Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže' chgüeda' che'.

4

Goclaže' gwxiyen' co'oyelan' Jesúsen' gone' da' mal

(Mr 1:12-13; Lc 4:1-13)

¹ Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao choa ža choa yel, na' cate' gwde da' choa žana' gwdone'.

³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojczē Xtiža' Diosen' žan: “Gague yela' guagw na'zen' chyažje chio' benach cont gac bancho, san lecze chyažjecho yogo'lol diža' dan' ža Diosen'.”

⁵ Nach gwche' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe, ⁶ na' gožen le':

—Še len' naco' dogualje Xi'in Diosen', nga boslažo' cuino', le nyojczēn le'e Xtiža' Diosen', žan:

Seła' Diosen' bene' ca' zjanac angl che' yesaclene' le', na' yesoxe' le' cont bi chego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan chegaquen. ⁹ Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczēn le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to čhope angl čhe Diosen' jasaclene' le'.

Jesúsen' gwzologü'e chyixjue'ede' diža' güen čhe Diosen' distritw Galilea
(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya. ¹³ Na' gwze'e yež Nazaretan' jasoe' ciuda Capernaum dan' čhi' cho'a nisdaon' do gan' zjachi' distritw dan' zjanzi' Zabulón na' Neftalí. ¹⁴ Na' dan' jayzoe' ciudan' goc can' gwna da' Isaias ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešla'ale nisdaon' na' yegw Jordán,

¹⁶ nčhol yichjlaždao' bene' ca' že' na'. Perw Diosen' gwsele' to bene' gwlo'o to be'ni' xen lo' yichjlažda'ogaquen'. Gosaque' ca bene' guat len yichjlažda'ogüen' le gosone' da' malen', perw bena' gwseła' Diosen' ba bocobe' yichjlažda'ogaquen'.

¹⁷ Cana' gwzoloao Jesúsen' gwdixjue'ede' gwne':
—Le yetinje xtola'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

Jesúsen' gwleje' tap bene' gwxen beł cont gosaque' txen len le'
(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' čhe Galilea cate' ble'ede' čhope bene' gwxen beł, Simón Pedro na' bene' biše' Andrés, na' zjanite' chosožale' yixjw dan' chesezende' bełen' lo' nisa'. ¹⁹ Nach gože' legaque':

—Le šo'o len neda'. Nacle bene' gwxen beł, na' chbejle beł lo' nis, perw na'a gona' cont gaxle bene' yesyechoje' lo' da' malen'.

²⁰ Na' la' gosebejyichjte' yixjw chen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e to lo' barcw len xagaque', chesyeyonšagüe' yixjw čhegaquen'. Na' lecze gox Jesúsen' legaque' šja'aclene' le'. ²² Na' la' gosontie' barcon' lo' na' xagaque' Zebedeon' na' ja'aclene' Jesúsen'.

Jesúsen' bsed blo'ede' bene' zan
(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' bene' ca' zjaže' to to yodao' čhe chio' bene' Israel. Na' gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe'. ²⁴ Na' doxen nación Siria gwxoa diža' yogo' da' güen da' ben Jesúsen'. Nach bene' Siria ca' jasesane' yogo' bene' chesacšene lagüe'na', bene' chese'e zan yižgüe', bene' chesey chesela, bene' zjajo'o zjanyaz da' xigüe' yichjlažda'ogaque' len bene' chesaz šon na' bene' natsi' cuerp čhegaquen'. Na' beyone' legaque'. ²⁵ Na' zan bene' gosao' le', bene' za'ac distritw Galilea na' distritw Decápolis, na' bene' za'ac ciuda Jerusalén, na' bene' za'ac yezica'chle yež da' zjachi' distritw Judea, na' bene' za'ac yešla'a yegw Jordán.

5

Diža' dan' bsed blo'e Jesúsen' to lo ya'a
(Lc. 6:20-23)

¹ Na' Jesúsen' cate' ble'ede' bene' zan zjanžag, na' gwloe' gwchi'e to lo ya'a. Na' bene' ca' zjanaque' le' txen gosebigue' gan' čhi'ena'. ² Nach gwzoloao bsed blo'ede' legaque', gwne':

³ —Mbalaz zoa le'e chabe'ele chyažjele gaclen Diosen' le'e, le ba chzenagle čhe Diosen' cont čhnabi'e yichjlažda'olen'.

⁴ Mbalaz soa le'e chacyaše'laže'le, le Diosen' yeyoe'xenlaže' le'e.

⁵ Mbalaz zoa le'e chzejwlaže'le len Diosen' na' len beñachen', le gon Diosen' cont gac lo' na'le doxen yežlion' can' gwne'.

⁶ Mbalaz zoa le'e chzelaže'čgualle gacle bene' güen len Diosen', le ba cheyon Diosen' le'e bene' güen lagüen'.

⁷ Mbalaz zoa le'e cheyaše'le bene' yoble, le lecze ca' Diosen' yeyaše' yeži'ilaže'de' le'e.

⁸ Mbalaz zoa le'e ba nacle bene' laždao' xilaže', le šjayzoale txen len Diosen'.

⁹ Mbalaz zoa le'e čhego'ole yela' čxnenlaže' čhe bene' chesediže, le Diosen' ne' nacle xi'ine'.

¹⁰ Mbalaz zoa le'e chosočhi' chososaca' bene' le'e lagüe' dan' čonle' dan' nac güen lao Diosen', le chzenagle čhe Diosen' cont čhnabi'e yichjlažda'olen'.

¹¹ 'Na' mbalaz soale še dan' chejnilaže'le neda' chesezi'diža' bene' le'e na' chososaca'zi'e le'e na' chosoxie' diža' güenlaže' chele. ¹² Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxxta'ocho len da' bene' ca' goso'e xtiža' Diosen' cani'.

Naccho ca zede' na' ca be'ni' len bene' že' yežlio nga

(Mr. 9:50; Lc. 14:34-35)

¹³ 'Le'e nacle ca zede', le zede' chaclenen cont bi cuiayi' no yid bela', na' le'e chonle cont benačen' cbi chesontequē' da' mal. Perw še zeden' bich bi xzi' naquen, čnacxe goncho cont yeyaquen xzi' da' yoble? Na' bich bi zacan', lete cho'onchon na' gwlej gwšošj bene' len. Na' le'e še cbich gonle can' chazlaže' Diosen', nacle ca zede' dan' bich bi xzi' naquen.

¹⁴ 'Na' le'e nacle ca be'ni' dan' chaclenle bene' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze bene' chesele'eden'. ¹⁵ Notno gwguala' to yi' na' gwdosen' to caj, san chde'en le'e ze'e cont chsenin' len yogo' bene' že' lo' yo'ona'. ¹⁶ Na' ca nac le'e, cheyała' soateze soale gonle da' güenna' cont yesele'e bene' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

¹⁷ 'Bitw gaquale še neda' za'a zedeyena' cont ley dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani' bich yesonen žin. Za'a cont gac can' ža yogo'lol Xtiža' Diosen' dan' bosozoj bene' ca'. ¹⁸ Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'lol dan' nžia' bia' Diosen' gac. ¹⁹ Da'n'an' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele bene' yoble bi yosozenague' čen, Dios ben' zoa yaba chnabi'e ne' bi nacle bene' blao len le'. Na' note'tezle še gonle can' žanna', na' še lecze gwlo'ele bene' yoble yesone' ca', Diosen' ben' zoa yaba chnabi'e ne' nacle bene' blao len le'. ²⁰ Chnia' le'e, bene' fariseo ca' na' bene' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clcl ca' che bene' ca', bitw yežinle yaban' gan' zoa Diosen' chnabi'e.

Da' malen' choncho še chža'a lježcho

(Lc. 12:57-59)

²¹ Na' lecze bsed blo'e Jesúsen' legaque' gože'ne':

—Ba nezele can' bzejni'i Moisésen' bene' ca' gosenita' cani', gwne': "Nono gotle. Na' še no got ljež benače', justis ca' yesechoglagüe' che' cheyała' gate'." ²² Na' neda' žia' le'e, note'tezle še chža'a ljež benačhle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson' bene' blao ca' chesenabia' nación Israel' chechon' castigw chele. Na' note'tezle še chado'diža' lježle, zaca'czen' yeseła' Diosen' le'e lo' yi' gabil.

²³ 'Cheyała' soacho binlo len ljež benačcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, ²⁴ na'ze cheyała' gwcua' anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjanasen' dan' ba gwlejele cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo' na' bene' ca' yososeyjue' le'e ližya. ²⁶ Da' li žia' le'e, bitw yebeje' le'e še biņa' chixjwle doxen dan' čala'le.

Da' malen' choncho še chzoa xtocho

²⁷ 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele." ²⁸ Na' neda' žia' le'e, note'tezle še čhna'le to no'ole na' chzelaže'lene', ba naple doła'. Le tozczce ca malen' ba chonle lo' lažda'olen' len dan' chon bene' chzoa xtoe'.

²⁹ 'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo' yi' gabilen' neče len. ³⁰ Na' še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clcl ca cuiayi'le lo' yi' gabil' neče len.

Bene' ca' zjanšagna' bitw cheyała' yesyele'e

(Mt. 19:9; Mr. 10:11-12; Lc. 16:18)

³¹ 'Lecze nezele ley dan' bzoj da' Moisésen' žan: "Note'teze bene' yele'e len no'ol che', cheyała' chas to yiš ga güen' diža' le besyele'ena'." ³² Na' neda' žia' le'e note'teze bene' chele'e len no'ol che', len neztede' no'ole čen' bitw naque' to no'ole chzoa xtoe', chone' cont gague' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozczce ca da' xinj gone' len dan' chon bene' chata'lene' no'ol che bene' yoble.

Jesúsen' bzejni'ide' cheyala' güe'cho diža' li

³³ 'Na' lecze ba nezele can' bzejni' da' Moisésen' da' xozxta' ocho ca': "Cate' gwzoale testigw Xancho Diosen', cheyala' gonle con can' ba gwnalen.'" ³⁴ Perw neda' zia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e. ³⁵ Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalėna' zoan testigw chia' cho'a diža' li", le naquen ciuda che Dios ben' naque' la'zelagüe bene' chnabia'. ³⁶ Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. ³⁷ Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

*Bitw co'olaz'e'cho bene' chesegue'ede' chio'**(Lc. 6:29-30)*

³⁸ 'Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'." ³⁹ Perw neda' zia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. ⁴⁰ Še to bene' chagüe' xya na' che'nde' que'e xcamisle, le güe' latje que'e len xadon' chelen'. ⁴¹ Na' še to bene' blao gone' byen šejlenene' gua'le yoa' chen' do gašj hor, le šejlene' le guan' chop ca'te'le. ⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

*Cheyala' gaquecho bene' chgue'e chio'**(Lc. 6:27-28, 32-36)*

⁴³ 'Na' lecze ba nezele ley chelen' žan: "Cheyala' gaquele bene' migw chele na' gue'ele bene' chgue'ede' le'e." ⁴⁴ Perw neda' zia' le'e, cheyala' gaquele bene' chgue'ede' le'e, na' cheyala' nabele Diosen' gac güen che bene' chesezi'diže' le'e. Le gon binlo len bene' chesegue'ede' le'e, na' le yol güiz Diosen' cont gac güen che bene' ca' chososacazi'e le'e. ⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chšenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. ⁴⁶ Še chaquele šinze bene' chadde' le'e na' bi chaquele bene' yoble žbix'chen' chbezle gon Diosen' da' güen chele? Con can' cheson bene' güechixjw ca' chonle, bene' ca' žale zjanaque' bene' xi'achgua. ⁴⁷ Na' še con chguaple tiox bene' biše' lježle ca'ze žchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'. ⁴⁸ Cheyala' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6*Jesúsen' blo'ede' naquen' cheyala' goncho da' chazlaže' Diosen'*

¹ 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. ² Da'n'an' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li zia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. ³ San le'e, še bi da' gwnežjwle to bene', le gwnežjon šižize. ⁴ Gonlen ga cbi yesacbe'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

*Bsed blo'e Jesúsen' nac cheyala' yol güižcho Dios**(Lc. 11:2-4)*

⁵ 'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li zia' le'e, ba gosacxenczen' lagüe da' chesone' ca', perw Diosen' bitw gone' ga gac güen chegaque' še ca'. ⁶ Na' cate' yol güižle Diosen', le yeyo' o lo' yo'o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

⁷ 'Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. ⁸ Bitw gonle can' chesone'na'. Ca nac Xacho Diosen', cate' za' nabelenen' ba neczede' bi dan' chyažjele.

⁹ Quinga yol güižlene':

Xato' bene' zoa yaba, chnabto' yogo'lol bene' yesonxene' le'.

¹⁰ Zelaže'to' nabi'o yichjlaždao' yogo' neto' be'nač.

Gacša can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, be'ščan ŋa'a.

12 Na' bezi'xenšca cheto', le lencze neto' chezi'xento' che ljež beňachto' bite'teze da' chesonde' neto'.

13 Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli tocanē.

Ca'czen' gacšca.

¹⁴ Na' še chezi'xenle che ljež beňachlen' bite'teze da' chesonde' le'e, ľecze Xacho Diosen' ben' zoa yaban' yezi'xene' xtoľa'len'. ¹⁵ Perw na' še le'e bi chezi'xenle che ljež beňachle, ľecze ca' Xacho Diosen' bitw yezi'xene' chelen'.

Jesúsen' bzejni'ide' nac goncho gwbas

¹⁶ Cate' le'e gonle gwbas cont gonxenle Diosen', bitw gon cho'alaolen' ca che bene' chegüine'chgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li zia' le'e, ba gosacxcncze' lagüe da' chesone' ca', perw Diosen' bitw gone' ga gac güen chegaque' še ca'. ¹⁷ San le'e cate' gonle gwbas, le gwpa'a yichjle na' le chib cho'alaole. ¹⁸ Le gon ca' cont bi yesache'e bene' chonle gwbas, san gacbe'e toz Xacho Dios ben' zoa len chio' la'czľa' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Baľ da' zjade yežlio nga chesaljen be dao' chesagwban', na' yebalen chesezen xche'en, na' ľecze chaš bene' gwban na' yeseque'en. ²⁰ San le gaque Diosen' cont gone' da' šagüe' da' güen chele da' bi te chen cate' yežinle yaban' gan' zoe'na', da' bi šo'ba', na' nēca sen xche'en, na' nēca gac šo' bene' gwban yeseque'en. ²¹ Le gan' de dan' chaquelen' na' zoa yichjlažda'olen'.

Žia yejlaochi cont chle'echo

(Lc. 11:34-36)

²² Žia yejlaole cont chle'ele. Še bitw bi chaquen, chle'eczele binlo. ²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' ľicze ľeca nchol yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw

(Lc. 16:13)

²⁴ Notno gac gon žin len chhope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonēn' to chž'a'alaže'ze. Ľecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwni'a.

Diosen' chapši'e xi'ine' ca'

(Lc. 12:22-31)

²⁵ Da'nān' zia' le'e, bi gacžejlaže'le bi da' ye'ej gagwle šlac mbanle, na' ľecze ca' bi gacžejlaže'le che xalana'le. Zaca'ch yela' mban chelen' ca' yela' guagw. Ľecze ca' cuerp chelen', zaca'chen ca' xalana'le. ²⁶ Le gon xbab ca' nac be ca' zjažia xil ben' chesaš lo be', bitw chesazba', bitw cheselapba', nēca zoa da'a xoa' chēgacba', perw na' Xacho Diosen' ben' zoa yaba chguagwczē'ba'. ĩNacchle zaca' le'e ca' be ca' zjažia xilen'! ²⁷ Na' nē tole bi gac yoston' cuinle gašje metr še con cue' yichjle tonle.

²⁸ Na' žbixchen' chbec yichjle xalana'le? Le gon xbab ca' nac yej ca' da' zjaze yixe' chesecha'oczen'. Bibi žin chesonēn, nēca chesaljen do. ²⁹ Na' zia' le'e, da' rey Salomón gocue' lache' güen juisyw, perw bitw bežinlaže' xalane'na' ca' yela' xdan che yej ca'. ³⁰ Diosen' none' xdan da' ca' ze yixēn' la'czľa' to chop žaze nitan' na' chosozeyen'. Nacchxe gon Diosen' len le'e gwlecze yichje' gone' yogo' da' chyažjele, le'e late' lasze chejle'le che'. ³¹ Da'nān' bitw cuēc yichjle che bi dan' chyažjele, nāle': "žBin' ye'ej gagwcho na' bin' gacwcho?" ³² Bene' ca' bi chesonxene' Diosen' con chesoe'laže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nēzczede' bi da' ca' chyažjele. ³³ Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. ³⁴ Bitw cuēc yichjle che bi dan' gac gwxe güižj, le decze da' cuēc yichjcho tža tža. Da'nān' to to ža con cuēc yichjcho che dan' chac ca hora'.

Bitw zaca'cho nacho zjanap bene' doľa'

(Lc. 6:37-38, 41-42)

¹ 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. ² Can' chosbaga'le bene' žale zjanape' dola', ľecze can' yosbaga' Diosen' le'e ne' naple dola'. Con can' chonle len bene', ľecze can' gon Diosen' len le'e. ³ ĽBixĉhen' chna'le beb dao' dan' yo'o lo' yejlao bene' ľježle na' bi chacbe'ele naquech beb xen dan' yo'o lo' yejlaolen'? ⁴ Na' še le'e yo'o to da' xench lo' yejlaolen' ľnacxechen' che'le bene' ľježen': "Ben yebeja' beb dao' dan' yo'o lo' yejlaguon'?" ⁵ ĽBene' güexoayag! Žgua'te'le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' ľježle.

⁶ 'Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca cheson bal beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošoše' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le gonczen'

(Lc. 11:9-13; 6:31)

⁷ 'Še žan bi da' chyažecho, chñabchon. Še žan to da' chaclaže'cho želecho, chyljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'. ⁸ Na' note'tezle še bi da' chñabelene', gonczen'. Na' še bi dan' che'nele nezele, gwzejni'icžden' le'e. Na' še žan chaclaže'le gac to da' gac, yol güižle Diosen' can' chon to bene' chnie' cho'a puert, nach Diosen' gone' cont gaccen.

⁹ 'Na' le'e xa bidao', še xi'inle nabebe' le'e yetextil Ľgwnežjwlebe' to yej? ¹⁰ Na' še nabbe' yid bel gagwbe', Ľgwnežjwlebe' to be xigüe'? ¹¹ Ľa' nacle bene' mal, nezele chnežjo xi'inle to da' güen. Nachxe güen gon Xacho Diosen' ben' zoa yaban' len bene' chñab lagüe'na' bi dan' chyažjde'.

¹² 'Na' con yogo' da' güen da' chaclaže'le yeson benachen' len le'e, ľecze ca' cheyała' gonle len ľegaque', le can' zejen da' nyoj le'e ley dan' bzoj da' Moisésen' na' dan' bosozoj da' bene' ca' goso'e xtiža' Diosen' cani'.

Nez da' yežin yaban' zaca'leben ca to nez las

(Lc. 13:24)

¹³⁻¹⁴ 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyała' gonle byen šo'le nez güenna' ľa'czla' chaquele naquen ca to nez las, to nez zdebe, le nez malen' chežinen gabil gan' saca'zi'le toľi tocaņe. Na' nez güenna' chežinen yaba ga banle toľi tocaņe.

Dan' choncho chlo'en bin' yo'o lo' yichjlažda'och

(Lc. 6:43-44)

¹⁵ 'Cheyała' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' bene' güen. Perw zjanaque' bene' laždao' xi'a na' chesaclaže' yosožiyae'le'e. ¹⁶ Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyała' gacbe'ele bene' ca' yeseziye'e le'e cate' le'e'le dan' chesone'na'. ¹⁷ Yag dan' nac yag güen, frut güencze chbian, na' yag da' bi nac güen, ľecze frut da' bi nac güen chbian. ¹⁸ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ¹⁹ Na' yogo'te yag frut da' bibi chbia, chog xan yaga' len na' gwzeyen'. ²⁰ Na' can' nac dan' cheson to to bene', nezecho še zjanaque' bene' güen o bene' mal.

Gague yogo' bene' yesyežine' gan' zoa Diosen' chnabi'e

(Lc. 13:25-27)

²¹ 'Bene' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Bene' ca' cheson can' chazlaže' Xa' Diosen' ben' zoa yaban', ľegaczen' yesyežine' yaban' gan' zoe'na'. ²² Cate' žin ža yosodie' cuent lao Diosen', bene' zan yesi'e neda': "Xana', goclen neto' na'a, le ba gwdixjue'eto' xtižo'na'. Na' ľecze ca' bza' bzetjto' lao' bebejto' da' xigüe' ca' žjajo'o zjanyaz yichjlaždao' bene'. Na' ľecze bza' bzetjto' lao'na' bento' da' zan yela' guac." ²³ Perw na' yapa' ľegaque': "Bitw nombi'a le'e. Le šjaya'ac ca'ale le'e bene' güen da' xinj'."

Chope bene' na' yo'o da' chon to toe'

(Mr. 1:22; Lc. 6:47-49)

²⁴ 'Bene' chzenag xtiža'na' na' chone' can' žia'na' zaca'lebde' ca to bene' sina' bene' ben ľiže' na' gwdixjue' lenen len yej gual. ²⁵ Na' goc yejw zil juisyw na' betj yegw gwyechjen ľiže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej.

²⁶ Na' bene' chzenag xtiža' na' perw bitw chone' can' žia' na', zaca' lebde' ca to bene' tont bene' bzoa ližen' lo yox. ²⁷ Na' goc yejw zil juisywna' na' betj yegon' gwyechjen liže' na' na' gwyechj be bdono'. Nach ližen' bebixen gwžiyain'.

²⁸ Na' cate' beyož be' Jesúsen' diža' ca', bene' ca' že' na' besyebande' can' bsed blo'eden'.

²⁹ Le can' bzejni' ide' nachbia' neзде' cayanen' nac xbab che Diosen', gague bzejni' ide' can' chosozejni' i bene' ca' chososed chosolo' e ley dan' bzoj da' Moisésen'.

8

Jesúsen' beyone' to bene' che'ede' yižgüe' dan' nzi' lepra

(Mr. 1:40-45; Lc. 5:12-16)

¹ Bene' zan zesyenagüe' Jesúsen' cate' beyetje' ya' ana'. ² Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe' na' gože' ne':

—Xana', še chaclažo' guac yeca'o yižgüe' dan' che'eda'.

³ Nach Jesúsen' bli ne' e na' gwxonen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'. ⁴ Nach Jesúsen' gože' le':

—Notno yo'o can' ba beyona' le'. Con gwyej jaña' bxoza' cont le'ede' bach beyacdo'. Na' bnežjw da' cheyla' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yeseņezde' ba beyacdo'.

Jesúsen' beyone' xmos to soldadw

(Lc. 7:1-10)

⁵ Na' cate' bežin Jesúsen' Capernaum to xan soldadw bene' Roma la' bšagte' le'. Na' gota' yoede' Jesúsen', ⁶ gože' ne':

—Xana', xmosan' die' ližan' chacsenchgüede'. Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona' ne'.

⁸ Perw na' xan soldadoa' gože' ne':

—Xana', bitw naca' bene' zaque' par sa'o liža' na'. Ngateze ben mandadw yeyac xmosan' na' yeyaccze'. ⁹ Neda' zoa bene' chnabi'e neda', perw lecze nita' soldadw chia' na' chnabi' gaca' ne'. Cate' chapa' toe': "Gwyej", na' cheje', na' cate' chapa' yetoe': "Da", na' chide', na' cate' chapa' xmosa': "Da' nga gono'", na' chonen'. Nan' nežda' con nao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' bebande' na' gože' bene' ca' zjanagüe' le' na':

—Da' licze žia' le'e, ne toze bene' Israel biña' šejnilaže' chgüe' neda' ca benga bi naque' bene' Israel. ¹¹ Žia' le'e, bene' zan za'ac doxen yežlion' šjasyenite' txen len da' xozxta' ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'. ¹² Na' ca nac bene' nación Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da' nan' sele' legaque' lo' yi' gabil gan' nac choj na' yesebežyaše' na' yesagwxetje laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso' na', con can' chejli' o gac che'.

Na' xmos xan soldadoa' la' beyactede'.

Jesúsen' beyone' taobi' in che Pedroa'

(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi' in che Pedroa' die' yo'e da' la. ¹⁵ Jesúsen' bežue' ne' e na' la' bechojti' da' lan'. Nach la' gwyaste no' olen' bšini' e da' gose' ej gosagüe'.

Jesúsen' beyone' bene' zan

(Mr. 1:32-34; Lc. 4:40-41)

¹⁶ Na' cate' ba gwxin, besežin bene' gan' zoa Jesúsen' zjanchi'e bene' zan zjajo'o zjanyaz da' xigüe' yichjlažda' ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene. ¹⁷ Bene' ca' cont goc can' ža Xtiža' Diosen' dan' bzoj da' Isaiás che' cani', žan: "Le' na' yeque' e yela' chžaglao checho na' yeque' e yogo' yižgüe' chechon'."

Can' gož Jesúsen' bene' ca' gosaclaže' yesa'ogüe' le'

(Lc. 9:57-62)

¹⁸ Gwde na' ble'e Jesúsen' ba besežin bene' zan zjanyechjde' le', nach bene' mandadw len bene' ca' zjanaque' le' txen cont yeselague' yešla' a nisaon'. ¹⁹ Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsen' na' gože' ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' neda' na' lec̄ chesyēžin xišna' be dao' ca' zjazoa x̄il, be chaš le'e yaba, perw bibi xišna' neda' de ga yezi'laža', neda' naca' ben' gwsel̄a' Diosen' golja' beṇach.

²¹ Na' bchoj yeto ben' naque' Jesúsen' txen na' gože'ne':

—Xana', sa'lēna' le' perw za' got x̄a'. Beṇšca latje zgua'tec šjajcuaša'ne'.

²² Jesúsen' gože'ne':

—Yo'o len neda'. Bene' ca' zjanac yichjlažda'ogüē' ca che bene' guat, legaque' guaccze yosocuaše' yezica'chle bene' guat.

Jesúsen' bcueze' to be' bdonon' lo' nisdao'

(Mr. 4:35-41; Lc. 8:22-25)

²³ Beyož be' Jesúsen' diža' ca', gwyo'e lo' barcon' len bene' ca' zjanaque' le' txen. ²⁴ Na' šlac zej barcon' lo' nisen' gwzolaog wyečj̄h to be' bdonon' na' nisdaon' leze chas chatan' na' gwzolaog cheyož nis lo' barcon', perw ba chtas Jesúsen'. ²⁵ Nach bosyosbane' le' gosi'ene':

—iXanto'! iBosla chio'! iBach chbiayi'cho!

²⁶ Nach Jesúsen' gože' legaque':

—iBixchen' chžebtecle ca'? iNacxechen' bi chejle'le chia'?

Na' gwyase' na' gwdile' be' bdonon' len nisdaon', na' la' gosebe'žiten. ²⁷ Na' bene' ca' zjanaque' Jesúsen' txen besyebande' can' bene'na', nach gose' lježgaque':

—iNoxe benga? lente be' bdonon' na' len nisdaon' chosozenaguen che da' že'.

Chope bene' Gadara zjajo'o zjanyaze' da' xigüē'

(Mr. 5:1-20; Lc. 8:26-39)

²⁸ Na' besežine' yešla'a nisdaon' gan' chi' laž bene' Gadara ca'. Na' cate' bechoj Jesúsen' lo' barcoa' bosošag chope bene' le', bene' zjajo'o zjanyaz da' xigüē' yichjlažda'ogaque'. Bene' quinga ba nite' capsantw na' gosacchgüē' bene' znia juisyw len bene' chesyēžague' na' gague no chac ta tnez. ²⁹ Na' bososye'e gose'e Jesúsen':

—iBixchen' chgoša' chlaže' chio' len neto', Jesús? Naco' dogualje Xi'iq̄ Dios. iZao' gwsaco' neto' na'a cate' biṇa' žin ža si'to' castigw?

³⁰ Na' gała'ze chesaš zan coš chesagwba'. ³¹ Nach da' xigüē' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwsel̄a' neto' gan' nita' coš ca' na' beṇ latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeytjeses coš ca' le'e ya'a gan' nita'ban', na' jasełažo'ba' lo' nisdaon' ga gosatba' gose'ejba' nis.

³³ Na' bene' ca' chosoyoe' cošen' besele'ede' dan' ba goquen na' bosyoxonje' jasyeže' bene' lagüē' yež yogo' can' ba goquen' na' can' ba besyeyac bene' ca' goso'o gosaz da' xigüēn' yichjlažda'ogaquen'. ³⁴ Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

9

Jesúsen' beyone' to bene' bi chda šla'a ni'a ne'e

(Mr. 2:1-12; Lc. 5:17-26)

¹ Nach Jesúsen' beyo'e lo' barcon' len bene' ca' zjanaque' le' txen besyelaque' yešla'a nisdaon' par besyēžine' Capernaum gan' ba gwzoacze' sša. ² Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo cam dao'. Cate' gocbe'e Jesúsen' le' gosejnilaže'ne' nach gože' bene' güē'na':

—Bebe xi'ina'. Ba bezi'xena' xtolon'.

³ Na' bał bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güē'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca Dios." ⁴ Jesúsen' gocbe'ede' ca nac da' cheseza'laže', na' gože' legaque':

—iBixchen' chza'laže'le ca' lo' yichjlažda'olen'? ⁵ Še yapa'ne': "Ba bezi'xena' xtoło'na'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nacbja' še napa' yela' guac gac can' gwnian'. ⁶ Perw neda' naca' bene' gwsel̄a' Dios golja' beṇach gwlo'eda' le'e na'a zoa' yežlio nga napa' yela' gwnabia' cont yezi'xena' xtoła' benachen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjajde' liže'. ⁸ Na' bene' ca' besele'ede' can' goquen' besežebchgüē'. Na' gosonxene' Diosen' dan' be'e yela' guac che Jesúsen'.

Jesúsen' gwleje' Mateo cont goque' txen len le'
(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gweylene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan bene' güechixjw na' len yebale bene' güen da' xinj na' len bene' ca' zjanaque' txen len le'. ¹¹ Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxechen' ben' chsed chlo'ede' le'e che'ej chagwlene' txen bene' güechixjw na' yebale bene' güen da' xinj?

¹² Na' cate' Jesúsen' bende' xtiza'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed. ¹³ Le šjased bi zeje Xtiza' Diosen' dan' nyojen Zan: “Chaclaža' yeyaše' yeži'laže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinjen'.

Gosenabde' Jesúsen' bixchen' bene' ca' zjanaque' le' txen bi gosone' gwbas
(Mr. 2:18-22; Lc. 5:33-39)

¹⁴ Nach bene' ca' chesone' txen len Juan ben' bzoe' bene' nis gosebigue' lao Jesúsen' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsen' legaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

¹⁶ 'Nono zoa bene' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen. ¹⁷ Na' lecze nca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole bene' gwdane' xe'
(Mr. 5:21-43; Lc. 8:40-56)

¹⁸ Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

¹⁹ Na' gwzoža' Jesúsen' na' gwche'e bene' ca' zjanaque' le' txen ja'aclene' bene' gwnabian'.

²⁰ Na' šlac zja'aque' liž bene' gwnabian' zej to no'ole nagüe' legaque', bene' ba goc šižinw iz chzoe' gwba'o', na' bene' byen gwbigue' cože' Jesúsen' gwdane' lox xen'. ²¹ Le bene' xbab lo' yichjlažda'ogüen', gwne': “Con še ba gwdana' xen' nach yeyacda'.” ²² Na' gweychj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

²³ Cate' bžin Jesúsen' liž bene' gwnabian' na' ble'ede' bene' zan zjaže' chesone' sšag chesebežchgüe' na' ba nita' bene' chosocuež bžejo par yosocuaše'be'. ²⁴ Na' gože' legaque':

—Le yechoj ngale. Bi' no'ole daon' biña' gatbe', san chtasben'.

Na' bene' ca' hosoxiže' gosonle' che'. ²⁵ Na' beyož bešaše' yogo'lol bene' ca', nach gwyo'o Jesúsen', bexae' taca' bi' no'ol guaten', na' beyasbe'. ²⁶ Na' ca' nac yela' guac dan' ben Jesúsen', gwxo ca' diža' chen yogo' yež dan' zjachi' do na'.

Jesúsen' beyone' čhope bene' lchol

²⁷ Cate' beza' Jesúsen' len bene' ca' zjanaque' le' txen, ja'aclen čhope bene' lchol legaque' na' gosene' zižje:

—Le' naco' xi'in diaža che da' rey David, beyaše'laže'šca neto'.

²⁸ Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' lecze goso'o bene' lchol ca'. Nach Jesúsen' gože' legaque':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca nac dan' ben Jesúsen' len legaque'.

Jesúsen' beyone' to bene' bi goc nie'

³² Na' cate' besyeya'ac bene' ca', la' besežinte bene' yoble zjanchi'e to bene' bi goc nie', na' yo'o yaz da' xigüen' yichjlažda'ogüen'. ³³ Jesúsen' bebeje' da' xigüen' na' la' benete bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

³⁴ Perw na' bene' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

Jesúsen' cheyaše' cheži'ilaže'de' benachen'

³⁵ Na' Jesúsen' len bene' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' čhegaque' ca', gwdixjue'ede' diža' güen can' nabi'a' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe' na' bite'teze da' chesac čhegaque'. ³⁶ Na' ble'ede' ba besežag bene' zan na' beyaše' beži'ilaže'de' legaque', le gobce'ede' chesaczejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'. ³⁷ Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenague' che Diosen' zjazaca'lebe' ca to coseš xen da' chyažjen yedoben. ³⁸ Da'n'an' le nabe Xancho Diosen' seła'che' bene' yesaclene' chio' yotobcho coseš chen'.

10

Jesúsen' gwleje' bene' šižinw ca' gosaque' txen len le'

(Mr. 3:13-19; Lc. 6:12-16)

¹ Jesúsen' botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebeye' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac čhegaque'.

² Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan, ³ na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo, ⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo na' ben' besegue'ede' le'.

Jesúsen' gwsele' bene' šižinw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria. ⁶ Le šja'ac gan' že' bene' Israel bene' ba zjambiyai' dan' bitw na' yesombi'e Diosen'. ⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag che'. ⁸ Le yeyon bene' chesacšene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e yela' guac chen' cont gonle' da' quinga, da'n'an' le gaclen bene' na' bibi gwchixjwlene'.

⁹ Bitw gua'le mechw de oro, de plata o de cobre šlac co'ole nez. ¹⁰ Na' neca gua'le bzod, o yeto xcamisle, neca gua'le yel, na' neca goxe'le xis da' gwchiše'le. Ca nac le'e chonle xšinan' zaca'le par goñ bene' da' ye'ej da' gagwle gan' seła' le'ena'.

¹¹ Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teže soale. Cate'ch žin ža šejle ga yoble, cana'ch yeza'le. ¹² Na' cate' žinle liže'na', le gwguape' tiox, na' le nablaze' soa cueze' binlo len yichjlažda'ogüe'. ¹³ Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwnablaze'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwnablaze'len'. ¹⁴ Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nachbia' bi checa'ale čhegaque'. ¹⁵ Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesa'le'chde' cnel ca bene' Sodomán' na' bene' Gomorran'.

Gac da' saca'zi'cho

¹⁶ 'Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nan' cheyala' gacle bene' yo'ochgua xbab na' bene' xenlaže' len legaque'. ¹⁷ Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnabia' ca' cont yesot yeseyine' le'e lo' yodao' chegaquen'. ¹⁸ Nach lecze dan' chejnilaže'le neda' nita' bene' yeseche'exoxje' le'e do lao rey, do lao nochle bene' gwnabia'. Na' can' güe'lenle legaque' xtižan', lecze can' güe'lenle xtižan' len bene' bi zjanaque' bene' Israel. ¹⁹ Perw cate' yesezene' le'e na' yeseche'e le'e lao bene' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyala' nale. ²⁰ Le gague le'eczen' nele, san Spiritw che Xacho Diosen' gonen ga nale bin' cheyala' nale.

²¹ 'Cana' bał beñach yesechje' yesone' bene' biše' golje' lo na' bene' yesote' legaque', na' nita' bene' yesone' xi'ingaque' lo na' bene' yesot legache', na' nita' bene' yesone' xaxne'e lo na' bene' yesote' legaque'. ²² Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. ²³ Še bene' že' to yež yosyolague' le'e, le yeza'teze na' yeyjele ga yoble. Bina' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwseła' Diosen' golja' beñach.

²⁴ 'Ca nac cate' to bene' chsede' len to maestrw, bitw nacho naque' bene' blaoch ca maestrao'. Na' to mos bitw naque' blaoch ca xanen'. ²⁵ Con cheyala' chazlaže' ben' chseda' še yežinlaže' gague' ca maestrw che' na' cheyala' chazlaže' mosen' še yežinlaže' gague' ca xanen'. Neda' naca' Xanle, na' bene' chesegue'ede' neda' chesene' chona' txen len Beelzebú dan' nac xan yogo' da' xigüe', na' naquechxe yesene' che le'e nacle neda' txen.

*Cheyala' žebcho castigw dan' gon Diosen' che bene' güen da' xinj
(Lc. 12:2-9)*

²⁶ 'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenežden'. ²⁷ Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'iden'. ²⁸ Bitw cheyala' žeble bene' ca' yesot le'e. Legaque' bitw gac bi yesonde' yichjlažda'olen'. Cheyala' žeble Diosen', le len' nape' yela' gwnabia' cont gwziaye'e cuerp chelen' len yichjlažda'olen' lo yi' gabilen'.

²⁹ 'Nezecho byine dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje. ³⁰ Na' ca nac chio', chaquechgüe Diosen' chio' na' nezte'de' bał yiša' yichj to tocho žia. ³¹ Da'nan', bitw žeble, le zaca'chle clcl ca zan byin dao' ca'.

*Cheyala' güe'cho diža' len bene' ye'cho legaque' nombia'czcho Jesucriston'
(Lc. 12:8-9)*

³² 'Na' note'teze bene' še cho'e diža' len beñachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen. ³³ Na' note'teze bene' še cho'e diža' len beñachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

*Yesedile bene' neče dan' bid Jesús'en'
(Lc. 12:51-53; 14:26-27)*

³⁴ 'Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'. ³⁵ Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'. ³⁶ Bene' lo' yo'oze yesegue'e lježe'.

³⁷ 'Note'tez bene' še chaquechde' xe' o xne'e clcl ca chacde' neda', bitw zaque' gone' txen len neda'. Lecze ca' še chaquechde' xi'ine' clcl ca neda' bitw zaque' gone' txen len neda'. ³⁸ Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gague' neda' txen še ca'. ³⁹ Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocanē.

*Bene' ca' yesenita' mbalaz cate' yesyežine' yaba
(Mr. 9:41)*

⁴⁰ 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'. ⁴¹ Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca' mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'. ⁴² Note'teze bene' gwnežjue' la' to xiga'ze nis ye'ej bene' chejnilaže' neda', la' gwnežjuen' bene' bi naque' bene' blaoc, da' liče gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesúsén'
(Lc. 7:18-35)

¹ Cate' beyož ben Jesúsén' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwsela' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsén', ³ jaseže'ne':

—žLen' naco' ben' chbezto' sela' Diosen', še cheyała' cuezchto' yid bene' yoble?

⁴ Nach Jesúsén' gože' legaque':

—Le šjaya' ac na' le šjayež Juanna' doxen da' ca' ba ble'ele na' da' ca' ba benele. ⁵ Ba ble'ele chona' cont chesyel'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'. ⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsén' be'lene' bene' ca' zjandoben' xtiža' Juanna', gože' legaque':

—žNacxe nac ben' jale'ele latje dašen'? žČhaque' quil ca'ale? Bi naque' ca'. ⁸ žNac naque' caten' jale'elne'? žNyaze' lache' šagüe'? žše bitw? le bene' zjanyaz lache' šagüe' nite' yo'o güenchgua ca no liž bene' gwnabia'. ⁹ žNoxen' jale'ele? žto ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'. ¹⁰ Čhe benga nyojen le'e Xtiža' Diosen', žan:

Neda' Dios sela' to bene' cuiagalüe' laguo' güe'e xtižon'
cont cate' šejo' ba zjanita' bene' yosozenague' čhio'.

¹¹ Da' li žia' le'e notoch no beňach na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' čhe Diosen' cont nabia' Diosen' yichjlažda'ogüen', la'czla' naque' bene' la'zelagüe' bene' bibi zaca', ba chejni'ichde' čhia' clél ca Juanna'.

¹² 'Gwzolaon caten' Juanna' gwđixjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'. ¹³ Na' lecz gwzolaon cani'te bžinten cate' bla' Juanna' gwđixjue'ede' xtiža' Diosen', ley dan' bžoj da' Moisés na' dan' bosozoj yezica'chle bene' goso'e xtiža' Diosen' bzejni'in chio' čhe yela' gwnabia' čhe Diosen'. ¹⁴ Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Čhe Juanna' žan ca', con še šejle'le. ¹⁵ Le'e žia nagle da' chene, le gwzenag xtiža'na'.

¹⁶ žNo gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe': ¹⁷ "Ba bcuežto' bžejo, neca bya'ale, na' ba bilyaše'to', neca gwcheže'." ¹⁸ Juan ben' bzoe' bene' nis bide' laole nga, bitw güe'ej gwđagwšagüe' can' chese'ej chesagw bene' yoble, nach gwnale che': "Yo'o yaz da' xigüen' yichjlažda'ogüe'." ¹⁹ Na' neda', Diosen' gwsele' neda' golja' beňach, na' chle'ele che'ej chagua' can' chese'ej chesagw bene' yoble, na' žale čhia' naca' bene' lia na' bene' borrašw. Na' lecze žale čhia' naca' xmigw bene' güechixjw ca' na' xmigw yezica'chle bene' güen da' xinj. Perw nacbia' yela' sina' čhe Diosen' dan' napto' naquen da' güen, le ba ble'eczele can' chon neto' napton'.

Yež ca' gan' bitw bosozenague' čhe Jesúsén'
(Lc. 10:13-15)

²⁰ Nach Jesúsén' be'e xtiža' bene' ca' že' yež ca' gan' bene' da' zan da' zaca' yesyebande', na' gwđile' legaque' dan' bitw besyetiňde' xtola'gaquen'. Nach gwne':

²¹ —jNyaše'chguaze gac čhe le'e bene' Corazin! jNyaše'chguaze gac čhe le'e bene' Betsaida! Bene' ca' nita' Tiro na' Sidón ba besyetiňde' xtola'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoš'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogaquen'.

²² Žia' le'e, saca'zi'chle clél ca bene' že' Tiro na' Sidón cate' žin ža gac juisyw. ²³ Na' le'e nita'le Capernaum chonle xbab šeca Diosen' gone' gacxenchgualé cate' yežinle yaba gan' zoe'na'. Bi gone' ca', san sele' le'e lo yi' gabil. Šeca' bena' da' zaca' yesyebane bene' ca' gwñita' Sodomán' can' ba bena' laole nga, zesyetiňde' xtola'gaquen', na' ne' chi' ciudan' šeca'. ²⁴ Žia' le'e, gałe'chle clél ca bene' Sodomán' cate' žin ža gac juisyw.

Bene' ca' yesejnilaže' Jesúsén' nite' mbalaz
(Lc. 10:21-22)

²⁵ Nach Jesúsen' boļ güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' choņa' yela' choxcen chio' ba bzejni'ido' baļ beņe' diža' güen chio' quinga. Bzejni'ido' beņe' ca' gosache' cheseyajžde' no gwsed gwlo'e legaque'. Na' bitw bzejni'ido' beņe' ca' cheson xbab zjanaque' beņe' sina' na' beņe' zjanejni'i. ²⁶ Beno' ca' Xa', le' can' gwnalažo'.

²⁷ Na' gože' beņe' ca' že'na':

—Xan' ba bene' lo' na' gona' cont chombia' beņe' le'. Le' nombia'yaņe' neda', na' neda' nombia'yana' le'. Na' beņe' ca' ba gwleja' ba zjanombi'e Xan'. Na' noch no zjanita' beņe' zjanombi'e Xan', ñe neda' ca' zjanombi'e. ²⁸ Le'e chjaņaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le' šejnilaže' neda'. Neda' gona' ga soale mbalaz. ²⁹ Le gwzenag chia' na' gwzejni'ichda' le'e. Neda' naca' beņe' xenlaže' na' beņe' šagüe' na' gona' ca soale mbalaz lo' yichjlažda'olen'. ³⁰ Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

12

Ža che Dios beņe' ca' zjanaque' Jesúsen' txen goselečhje' trigon' da' gosagüe'

(Mr. 2:23-28; Lc. 6:1-5)

¹ Ca timpnen' gozac to ža che Dios'a cate' Jesúsen' gwdie' len beņe' ca' zjanaque' le' txen gan' nyaž trigw. Nach beņe' ca' gosedone', na' goselečhje' dao che trigon' cont gosagüe' xsenna'.

² Na' besele'e beņe' fariseon' can' gosone', na' gosi'e Jesúsen':

—Gwnašč žbixčhen' beņe' ca' zjanaque' le' txen chesone' žin da' bi de ľsens goncho ža che Dios?

³ Na' Jesúsen' gože' legaque':

—žBiņa' gwlable can' ben da' rey Davin' to ža cate' le' na' beņe' lježe' ca' gosedone'?

⁴ Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw beņe' bi nac bžoz, na' ľecze bnežjue' che beņe' zja'ac len le'. ⁵ Na' žbiņa' gwlable le'e ley dan' bžoj da' Moisés gan' žan bžoz ca' chesoncze' mandaw che yodao' blaon' yogo' ža che Diosen'? Na' bitw nacho zjanape' dola' dan' chesone' žin ža che Diosen'. ⁶ Žia' le'e, neda' zoa' nga zaca'cha' clal ca yodao' blaon'. ⁷ Xtiža' Diosen' dan' nyojen žan: "Chaclaža' yeyaše' yeži'ilaže'le beņe', gague con gotle beyixe' par gonxenle neda'." Šaca' chejni'ile bi zejenna' žan ca', bilja nale bene' quinga zjanape' dola', le' bibi da' mal chesone'. ⁸ Žia' le'e, naquen' lo' na' nia' bi da' nac güen goncho cate' nac ža che Diosen', neda' naca' ben' gwseļa' Diosen' golja' beņač.

Beyac to beņe' nxo'on šla'a taque'

(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to lo' yodao' che chio' beņe' Israel. ¹⁰ Na' lo' yodaon' zoa to beņe' nxo'on šla'a taque', nach beņe' fariseo ca' gose'e Jesúsen':

—žDe ľsens yeyoncho beņe' xinj ža che Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de ľsens goncho žin, žcbi la' yebejteleba' lo' yechon' lo' žana'? ¹² Da'na'na' žia' le'e de ľsens gaclencho beņe' ža che Diosen'. Le' zaca'ch to beņe' clal ca to xila' dao'.

¹³ Nach Jesúsen' gože' ben' nxo'on taque'na':

—Blj naon'.

Na' blien' na' taquen' beyaquen binlo can' nac dan' yešļa'a. ¹⁴ Nach beņe' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bžoj da' Isaías che Jesúsen'

¹⁵ Goche'e Jesúsen' can' bosoxi'a beņe' fariseo ca' na' gwze'e gwyeje' ga yoble. Beņe' zan ja'aclene' le', nach beyone' yogo' beņe' ca' chesacšene. ¹⁶ Na' bene' mandaw nono yesoe'lene' diža' non' beyon ľegaque'. ¹⁷ Bene' ca' cont goc can' ža Xtiža' Diosen' dan' bžoj da' Isaíasen', žan:

¹⁸ Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' seļa' Spiritw chian' soateze soan len le'.

Na' chixjue'ede' yogo' loļ beņe' can' chazlaža' yesone'.

¹⁹ Bitw gacyože' len beņe', neca yosye'e,

na' neca nie' zižjo lo' nez cont yesene beņe' bin' že'.

²⁰ Bi gwzoe' ca' ale beņe' chesejnilaže' le' late' lasze.

Soe' gaclene' ľegaque'.

Nach žin ža gone' cont gac con da' zej to liča lo' yežlion'.

21 Na' bene' že' yogo' naciónna' yesebeze' gaclene' legaue'.

Gosene' Jesúsen' bebeje' da' xigüe' len yela' guac che Beelzebú

(Mr. 3:19-30; Lc. 11:14-23; 12:10)

22 Na' zoa to bene' lchol na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte bene'. 23 Na' yogo' bene' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

24 Perw cate' bene' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

25 Gocbe'e Jesúsen' can' goson bene' fariseo ca' xbaden', nach gože' legaue':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še bene' že' bite'teze yež yesaque' chople na' yesedile' legacze', lecze bi sibia' yež čhegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague šša yesenite' txen. 26 Lecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' čhen, le chdiñlen cuinen še ca'. 27 Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen bene' lježle chesyebeje' da' xigüe' zjajo'o zjanyaz yichjlaždao' bene'. Na' bene' lježle ca'ze chosolo'e clelen' chnele. 28 Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

29 ¿Nac gac šo' bene' gwban liž to bene' gual na' que'e bi da' de che' še bi zgua'tec gwčheje' bene' guala'? Lete gone' ca' nach gac que'e bi da' de che'.

30 Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

31 Da'nan' žia' le'e, yogo' da' xinj da' chon beňach, na' yogo' diža' bya' dan' chesene' che Diosen', Diosen' yezi'xene' čhen, perw note'teze bene' chne' yela' ya' che Spiritw che Diosen', gwbat yezi'xen Diosen' che'. 32 Na' note'teze bene' še ne' yela' ya' chia' neda' naca' ben' gwseła' Diosen' golja' beňach, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'

(Lc. 6:43-45)

33 Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'.

34 Na' ca'czen' nac len le'e nacchguale bene' zgot na' bene' gwxiye'. Bitw gac güe'le diža' šagüe' dan' nacle bene' laždao' xi'a. Le yogo'te diža' da' chchoj cho'achon', lo' yichjlažda'ochon' na' za'aquen. 35 To bene' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to bene' laždao' xi'a cho'e diža' xi'a, le can' za lo' yichjlažda'ogüen'. 36 Na' žia' le'e, cate' žin ža gon Diosen' yesežaglaog yogo' bene' cheson da' xinj toli tocañe, cana' yogo'lol bene' yosodie' cuent che yogo' diža' dan' ba goso'e da' bitwbi zjazacan'. 37 Na' con ca diža' dan' choe'le, Diosen' čhoglagüen' chele še naple doļa' o še bi naple doļa'.

Bene' bi bosozenag che Diosen' gosenabe' gon Jesúsen' to yela' guac

(Mr. 8:12; Lc. 11:29-32)

38 Nach bał bene' ca' chososed chosolo'e dan' bzoj da' Moisés, na' bene' fariseo ca' gose'e Jesúsen':

—Maestrw, chaclaže'to' gono' to yela' guac da' le'eto' cont nezeteto' še da' licze Diosa' gwsele' le'.

39 Nach Jesúsen' gože' legaue':

—Le'e zoale na'a nacchguale bene' laždao' xi'a na' ba gwlejiyichjle Diosen'. Na' chnabe gona' yeto yela' guac da' le'ele cont nezele še Diosa' gwsele' neda', perw bi gona' can' chnablana', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. 40 Cate' za' šej Jonásen' Nínive, Diosen' bene' cont to bel xen be yo'o lo' nisdakon' gwdebbba' le' na' šone ža šone yel gwyo'e lo' le'eban'. Na' ca' nac neda', gata' na' gaša', na' yeyoža' šo'a lo' ba šone ža šone yel. 41 Na' cate' žin ža gon Diosen' cont yogo' bene' cheson da' mal yesežaglägüe' toli tocañe, žana' bene' Nínive bene' ba gosat yedesecuise' le'e mbanle na'a lao Diosen', le legaue' besyetingjle' xtolen' cate' da' Jonásen' gwduxjue'ede' xtiža' Diosen' len legaue'. Na' neda' zoa' nga naccha' bene' blao clal ca da' Jonásen', na' bitw chzenagle chia'. 42 Na' lecze žana' cate' gon Diosen' cont yogo' bene' cheson da' mal yesežaglaogüe' toli tocañe, da' no'olen' gwnabia' bene' Seba ca'

yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clal ca da' rey Solomónna', na' bitw chzenagle chia'.

Da' xigüen' cheyo'on da' yoble lo' yichjlaždao' bene'
(Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan: ⁴⁴ "Da' yoble šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, ⁴⁵ nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clal ca goc che' cana'. Can' goc che bena', lecze ca' gac che le'e mbanle na'a dan' nactecle bene' laždao' mal.

Xna' Jesüsen' len bene' biše' ca' besežine' ga zoe'
(Mr. 3:31-35; Lc. 8:19-21)

⁴⁶ Ne' choe'te Jesüsen' diža' len bene' quinga, cate' bžin xne'e len biše' ca'. Gosaclaže' yeso'e yesoelene' le' diža' na' bene' zan nita' lagüe' na'ate. ⁴⁷ Bene' ca' že' na', toe' gože' Jesüsen':

—Xna'o len bene' bišo' ca' zjanite' chyo'o na' chesacclaže' yesoelene' le' diža'.

⁴⁸ Nach Jesüsen' gože' le':

—¿Nezele no nac xna'a na' no zjanac biše' lježa'?

⁴⁹ Nach bli ne'e blo'e bene' ca' zjanaque' le' txen na' gože' bena':

—Bene' quinga zjanaque' xna'a na' zjanaque' biše' lježa'. ⁵⁰ Le note'teze bene' chone' da' chnaláže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

13

Jempl che bene' goz trigon'
(Mr. 4:1-9; Lc. 8:4-8)

¹ Na' lo žana' gwza' Jesüsen' yo'o gan' zoen' jači'e cho'a nisdaon'. ² Nach catec bene' zan juisyw besedobe' gan' či'en' na' benten byen gwyo'e gwči'e to lo' barcw. Na' yogo' bene' ca' besedoben' gosonite' cho'a nisdaon' ga nac yo biž. ³ Nach da' zan da' bsd blo'e Jesüsen' legaue' len jempl da' bi'e. Na' be'e to jempl, gwne':

—To bene' güen žin jeze' trigw, ⁴ na' šlac zej chose' trigon' late' bin che trigw dan' chazen' jasechazen chanez, nach be ca' žia xil be chaš le'e yaba gosagwban'. ⁵ Yelaten' jasechazen ga nac lo yej ga bibi yotec zoa, na' da' nga byob blan' le' bi jasechazen ga nac sitjw. ⁶ Perw na' cate' bla' gwbiža' na' bzejen len na' gosebizen, le gague zjajo'otec loenna' sitjw. ⁷ Yelaten' jasechazen ga nac lo yag yeše', na' yag yešen' gosecha'on na' bosololen len. ⁸ Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje. ⁹ Le'e žia nagle da' chene, le gwzenag xtižan'.

Jesüsen' be'e diža' bixchen' bzejni'ide' bene' jempl
(Mr. 4:10-12; Lc. 8:9-10)

¹⁰ Nach bene' ca' zjanaque' Jesüsen' txen gosebigue' lagüen', na' gose'ene':

—¿Bixchen' chsd chlo'edo' bene' quinga len jempl?

¹¹ Na' gož Jesüsen' legaue':

—Nono na' neze can' nac yela' gwnabia' che Diosen', na' ba chone' cont le'e chejnilaže'lene' nezelen. Perw bi chon Diosen' ca' len bene' bi chesacclaže' yesejnilaže'ne'. ¹² Note'teze bene' chosozenague' xtiža' Diosen', gwzejni'ich Diosen' legaue' cont šanch dan' yesejni'ide'. Perw na' note'teze bene' bi chosozenague', da' daon' ba zjanezde', yeca'a Diosen' len. ¹³ Da'n'an' chsd chlo'eda' bene' quinga len jemplen', le chesele'ede' dan' chona' perw bitw chesache'ede' bi zejen, na' chesende' xtižan' perw bitw chesejni'iden'. ¹⁴ Len bene' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

¹⁵ Nacle bene' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjle xtoła'le cont yeca'an na' yocoba' yichjlažda'olen'.

¹⁶ Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen. ¹⁷ Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen'

cani', gosaclaže'chgüe' yesele'ede' dan' chle'ele ña'a, perw bitw goła' yesele'eden'. Na' gosaclaže'chgüe' yesende' dan' chenele ña'a, perw bitw goła' yesenden'.

Jesúsen' bzejni'ide' bi zejen jempl che ben' goz trigon'

(Mr. 4:13-20; Lc. 8:11-15)

¹⁸ Na' le gwzenag, quinga zejen jempl che ben' goz trigon'. ¹⁹ Ca dan' byažen zejen xtíža' Dios da' chzejni'i che yela' gwnabia' che'. Na' biñ dan' beselažo' chanezen', zejen bene' ca' chesende' xtíža' Diosen' perw bi chesejni'iden'. Na' ca cheyoža' chžin gwxiyen' chebejen xtíža' Diosen' lo' yichjlažda'ogaquen'. ²⁰ Na' biñ dan' beselažo' ga nac lo' yej na' bi ben loen, zjanaquen ca bene' la' chesyebetede' xtíža' Diosen' cate' chesenden', ²¹ perw zjanaque' ca da' bibi loe chontec, šložga chesejle'e che xtíža' Diosen', na' cate' chac bi da' mal chegaquen' o cate' chesegue'e bene' legaque' dan' chosozenague' xtíža' Diosen', la' chesebeyichjte' xtížen'. ²² Na' biñ dan' beselažon' ga nac lo' yag yeše', zejen ca bene' ca' ba zjanende' xtíža' Diosen', perw šlac zjambane' chesyelał chesyžejde' na' da' chesacclaže' yeseni'e chziye'en legaque'. Yogo' da' qui bi choen' latje yega'an xtíža' Diosen' lo' yichjlažda'ogüen', na' da'nan' bi chesejnilaže' le' ca cheyala'. ²³ Na' biñ dan' beselažo' lo' yo šagüe' zejen ca bene' chesende' xtíža' Diosen' na' chesejni'iden' na' chosozenaguen'. Balen gosebían to gayoa güjeje, na' yebałen gosebían gayon güjeje, na' yebałen šichoa güjeje.

Jempl che trigon' na' yixe'

²⁴ Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo' yežlio che'na'. ²⁵ Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yixe' gan' ba naz xan yežlion' trigon', nach beze'e. ²⁶ Na' to ši'ize trigon' len yixe' ca' beselan', na' trigon' gwzolaog chbian. ²⁷ Na' bene' güen žin che xan yežlion', cate' gosache'ede' nach jaya'aque' gan' zoa xangaque' jasyeyeže'ne': "Bene', žgague biñ trigon' goz yežlio chion'? ¿Bixchen' nchixen len yixe'?" ²⁸ Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "¿Che'ndo' lažo'to' yixen'?" ²⁹ Na' gože' legaque': "Bitw lažo'len. Le xož lažo'le lente trigon'." ³⁰ Jaseyenna'. Guac yesecha'on txen. Na' cate' ba gole' yotoble cosešen', cana' gona' mandaw zgua'tec lažo'le yixen' na' gonlen manoj cont yeseyen. Nach šjaytoble trigon' co'šagüe'len."

Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

³¹ Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'. ³² Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'o'chen ca bichle yixe' cuan na' chaquen ca to yag cha'o, nach byiñ dao' ca' chjasen ližda'ogacba' lo' xozenna'.

Yela' gwnabia' che Diosen' naquen ca levadura

(Lc. 13:20-21)

³³ Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' bene' len jempl

(Mr. 4:33-34)

³⁴ Yogo' da' quinga bsd blo'e Jesúsen' bene' ca' besežag gan' zoe'na'. Bsd blo'ede' legaque' be'e jempl, bitwbi bzejni'ide' legaque' sin ca be'e jempl. ³⁵ Bene' ca' cont goc can' bzoj da' bene' be' xtíža' Diosen' cani', žan:

Gwsed gwlo'egacda'ne' len jempl,

na' yepagacane' dan' nono ña' ñeze da' ba ngaše' cate' gwxcete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsd blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' benach na' zaca'lebda' ca ben' goze' biñ che trigon'. ³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa

yixen'. ³⁹ Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl' ca' zaca'lebegaque' ca bene' ca' yosyotobe' cosešen'. ⁴⁰ Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juisyon'. ⁴¹ Diosen' gwsele' neda' golja' benach na' cate' žin ža, neda' sela' angl' chia' ca' cont yosyotobe' yogo' bene' ca' chese'go'oyele' bene' yoble yesone' da' mal na' ľecze yosyotobe' yezica'chle bene' cheson da' mal. Na' angl' ca' yesyebje' ľegaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'. ⁴² Nach yesesele' ľegaque' lo' yi' gabiľ gan' yeseye' toľi tocaņe. Na' yesebežyaše' yesagwxejte ľaye' tantw yesežaglaochgüe'. ⁴³ Cana'ch Xacho Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen da' ngaše' to lo' yežlio. Nach bocuašen' da' yoble ľecze na'ze na' chebechgüede' beze'e jayete' yogo'loľ bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ Na' yela' gwnabia' che Diosen' ben' zoa yaban', ľecze zaca'leben ca da' nga goc. Zoa to comerciant bene' cha'o perla dan' zjanacchgua xdan. ⁴⁶ Na' bželde' to perla da' ľeca zacan'. Na' beyote' yogo'loľ bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

Jempl che yixjw bel

⁴⁷ Na' yela' gwnabia' che Diosen' ben' zoa yaban' zaca'leben ca da' nga goc. Gwnita' baľ bene' gwxen bel na' bosozale' yixjw bel chegaquen' lo' nisdakon' na' gwxi'en zän cuen bel. ⁴⁸ Nach cate' ba gwža' lo' yixjon', besyebjen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. ⁴⁹ Ca'czen gac che yogo' bene' cate' žin ža te che yežlion'. Angl' ca' yesyebje' bene' mal ca' ladjo bene' ca' zjanaque' bene' güen lao Diosen' ⁵⁰ na' yosozale' ľegaque' lo' yi' gabiľ gan' yesebežyaše' na' yesagwxejte ľaye' dan' ľeca yesežaglägüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' ľe' txen:

—žZyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsen' ľegaque':

—Note'tezle še chac chsed chlo'ele Xtiža' Diosen' dan' byoj cani', še ľecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'loľ da' zaca' dan' chyažj chchinde', baľen zjanaquen da' cobe na' baľen zjanquen da' gole.

Bene' yež Narzaret bi gosejle'e che Jesúsen'

(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' ľe' txen ⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' ľeca besyebande' len xtižen' na' gose' ľježe':

—žGa jasede' yela' sina'? na' žnacxechen' chac chone' yela' guac ca'? ⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. ⁵⁶ Na' ľecze bene' zane' ca' nite' lažcho nga. žNacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž chegaque', bi gosaclaže' yesejle'e che'. Na' gož Jesúsen' ľegaque':

—Yogo'ze bene' chonļa'aņe' bene' choe' xtiža' Diosen', perw bene' gualaž che' na' bene' lo' yo'o che' bi chesonļa'aņe' le'.

⁵⁸ Na' to chopez yela' guac ben Jesúsen' Nazaretan' dan' bitw gosejle'e che'.

14

Quingan' goc gosote' Juan ben' bzoa bene' nis

(Mr. 6:14-29; Lc. 9:7-9)

¹ Na' ca tiempen' Herodes ben' naque' gobernador che distritw Galilean', bende' diža' ca nac yogo'loľ dan' chon Jesúsen'. ² Nach gože' xmose' ca':

—Bengan' da Juanna', ben' bzoa bene' nis. Ba bebane' ladjo bene' guat ca', da'nan' chaque' chone' yela' guac.

³⁻⁴ Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodias ca' xo'ole' la'czla' Herodias naque' xo'ole' bene' biše' Felipe. Na' Juanna' gože' Herodesen':

—Bi cheyała' soalen no'ol che bene' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezene' Juanna' na' bosocheje' ni'a ne'e len gden lo' ližya gan' gosegüe'ene'.

⁵ Herodesen' goclaže' gote' Juanna', perw bitwbi bende' le', le gwnežde' bene' zan chesejle'e Juanna' cho'e xtiža' Diosen', na' bžebe' bi yeson bene' ca'. ⁶ Perw na' cate' gosone' lnin' za la Herodesen', bi' no'ol che Herodias bya'abe' lao bene' ca' ja'ac lnin'. Na' leca bebe Herodesen' can' bya'a no'ol güegon', ⁷ na' bzoe' Diosen' testigw che' gwnežjue'be' bite'teže nabebe' le'. ⁸ Na' gwlo'oyela' xna'ben' lebe' cont gožbe' Herodesen':

—Ben' neda' to lo' platw yichj Juan ben' chzoa bene' nis.

⁹ Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac lnin' gwnežjue'be' bite'teže nabebe' le', da'nan' benšaze' mandadw gac can' gwñabebe' le'. ¹⁰ Ca' goquen' bene' mandadw jasechogue' yen Juanna' lo' ližya gan' yo'ena'. ¹¹ Na' bosožie' yichjen' to lo' platw cont bosonežben' no'ol güegon' na' lebe' bnežjwben' xna'be'.

¹² Nach bene' ca' zjanaque' txen len da' Juanna' jasyexi'e cuerp chen' na' jasecašen'. Gwde na' ja'aque' gan' zoa Jesúsen' jaseže'ne' can' ba goquen'.

Bguagw Jesúsen' gayo' mil bene'

(Mr. 6:30-44; Lc. 9:10-17; Jn. 6:1-14)

¹³ Na' cate' bene' Jesúsen' can' goc che da' Juanna', beže'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'acden legaque'. Perw bene' ca' že' yež ca' zjachi' cho'a nisdaon' cate' gosende' ba zjada Jesúsen', na' gosa'ac lažgaque' ja'aque' yo' biž jasešague' Jesúsen'. ¹⁴ Na' cate' bžin Jesúsen' cho'a nisdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene'. ¹⁵ Na' cate' ba' chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

¹⁶ Nach Jesúsen' gože' legaque':

—Bitw cheyała' šjaya'aque', san le'e güe'elne' da' yesagüe'.

¹⁷ Nach gose'ene':

—Chopga beł ya'a chechon' de na' gayo'ga yetextil dao'.

¹⁸ Nach Jesúsen' gože' legaque':

—Le šjaxin' ni.

¹⁹ Nach ben' Jesúsen' mandadw gosebe' bene' zan ca' lo' yixyen'. Na' gwxi'e yetextil ca' gayo' na' beł ya'a ca' chope, na' gwne'e yabale be'e yela' choxclen che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'. ²⁰ Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje beł dan' bega'anna'. ²¹ Na' bene' ca' gosagw da' ca' zjanaque' ca' do gayo' mil bene' byo, bi cuent no'ol ca' len bidao'.

Jesúsen' gwze'e lo' nisdaon'

(Mr. 6:45-52; Jn. 6:16-21)

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdaon' šlac bega'an le' besele' bene' ca' ližgaque'. ²³ Na' beyož besele' bene' ca' ližgaque', gwlo'e to lo' ya'a jal' güiže' Diosen' tože'. Na' cate' goł, toz Jesúsen' zoe' lo' ya'an. ²⁴ Na' ca' nac barcon' gan' zeseyeyo'o bene' ca' zjanaque' Jesúsen' txen, ba zejen do gachoł nisdaon' nžiga'ses nisen' len dan' chas chata' nisdaon', le ben' chečhjen' clele. ²⁵ Na' do šbal beyetj Jesúsen' ya'ana' na' gwze'e lo' nisdaon' na' ba zejgale' gan' zja'aquen'. ²⁶ Nach cate' besele'ede' le' zeje' lo' nisdaon' leca besežebe', na' bososye'e gosene':

—iše da' chda chelen' chle'echo!

²⁷ Na' la' boł güižte Jesúsen' legaque', gože'ne':

—Le gončhach laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo' nisdaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolaogwze'e lo' nesdaon' zeje' gan' zoa Jesúsen'.
 30 Perw na' cate' gocbe'ede' chehjhchgua ben', bžebe' na' gwzolaogchebe' lo' nisen'. Nach bosye'e, gože' Jesúsen':

—Xana', bosla neda'.

31 Na' la' blite na' Jesúsen' beḡue'ne', na' gože'ne':

—¿Bixchen' chac chopdo'? Gwyejle'ch chia'.

32 Nach cate' beyo'o Jesúsen' len Pedroa' lo' barcon', la' gwlezte be'na'. 33 Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret

(Mr. 6:53-56)

34 Na' goseḡague' nesdaon' na' besežine' yežlio gan' nzi' Genesaret. 35 Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gaḡa'ze cont gosenезде' ba bžin Jesúsen' lažgaque'. Na' bene' ca' že' yež ca' goseche'e yogo' bene' chesacšene lao Jesúsen'. 36 Na' goseneyoede' Jesúsen' gwnežjue' latje yesoḡe' la'ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr. 7:1-23)

1 Na' bal bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

2 —¿Bixchen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixchen' cbi chosyone'e zan ni'a cate' za' yesaḡüe'?

3 Nach Jesúsen' gože' ḡegaque':

—Na' le'e ¿bixchen' chbejyichjle cbi chonḡe can' že Diosen' cheyaḡa' goncho san chonxen costumbr chelen'? 4 Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyaḡa' gate'." 5 Perw le'e žale guaque ye' to bene' xaxne'e: "Bibi de gona' gaclena' le'e, le yogo' da' de chia' ba bnežjuan' lo' na' Dios." 6 Na' žale bich bi cheyaḡa' gwnežjue' xaxne'en še ca'. Na' dan' žale ca', chzoale ca'ale dan' že Diosen' na' con na'ole costumbr gole che da' xozxta'ole ca'. 7 Le'e nacle bene' gwxiye'. Chonḡe cayanen' bzoj da' Isaiasen' chele, gan' žan:

8 Bene' qui chesonxene' neda' len diža' cho'a, perw bi chesonxene' neda' len lažda'ogaque'.

9 Bibi zejen dan' chesonxene' neda',

le dan' chososed chosolo'eden' naquen da' chnaláže' beḡachze.

10 Nach Jesúsen' bozoḡgüize' bene' ca' zjanžaguen' cont gosebigue' lagüen' na' gože' ḡegaque': —Le gwzenag da' nga nia' le'e na' le šejni'i. 11 Bitw nacho dan' che'ej chagw benachen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

12 Nach gosebiga' bene' ca' zjanaque' Jesúsen' txen lagüen' gose'ene':

—¿Bi gocbe'edo' bene' fariseo ca' beseže'e cate' gosende' xtižo'na'?

13 Na' gož Jesúsen' ḡegaque':

—Gwžin že cate' Xa' Diosen' ben' zoa yaban' gwžiaye'e yogo' loḡ bene' bi chosozenag che'. Gwžiaye'e ḡegaque' can' choncho cate' chlažo'cho yiḡe' ca' chesela'ac lo' yel. 14 Jaseye bene' fariseo ca'. Zjanaque' ca' to bene' lchol' bene' che'nde' cue'e nez yeto bene' lchol'. Nezecho to bene' lchol' bitw gac cue'e nez yeto bene' lchol', le txen šjasebiḡe' to lo' yechw.

15 Nach Pedroa' gože' Jesúsen':

—Bzejni'išque neto' bi zejen can' gwnaon'.

16 Nach gož Jesúsen' ḡegaque':

—¿Lencze le'e bitw chejni'ile da' quinga ba gwnia'? 17 ¿Bi nezele yogo' dan' che'ej chagw benachen' cho'on lo' li'e na' chžin hor cheden? 18 Perw yogo' diža' dan' chesoe' benachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'. 19 Le lo' yichjlaždao' benachen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che ležžgaque', na' yeseneye'e che bene'. 20 Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gaḡüe'.

To no'ole bi naque' bene' Israel chejniláže' Jesúsen'

(Mr. 7:24-30)

²¹ Beza' Jesúsen' latjen' len bene' ca' zjanaque' le' txen jaya'aque' distritw Galilea gała'ze gan' mbane ciuda Tiro na' ciuda Sidón. ²² Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'šque neto'. To bi' no'ol chia' yo'oo nyaz da' xigüe' yichjlažda'obe' na' leca chžaglaobe'.

²³ Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le' con nagüe' chio' choł güiže' le' zižje cont gacleno'ne'.

²⁴ Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le' legaque' zjazaca'lebe' ca' xila' dao' be' zjanaczjeje.

²⁵ Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

²⁶ Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

²⁷ Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo'yo.

²⁸ Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

²⁹ Beza' Jesúsen' latjen' len bene' ca' zjanaque' le' txen gosoe' nezen' dan' chde gała'ze cho'a nisdao' Galilean'. Nach gosope' to lo' ya'a jasechi'e lo' ya'ana'. ³⁰ Na' besežin bene' zan lo' ya'a gan' zoa Jesúsen' len bene' ca' zjanaque' le' txen. Zjanche'e no' bene' nxiñj ni'e, bene' lchoł, bene' bi' chac ni'e, bene' bi' zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'. ³¹ Na' leca besyebane bene' ca' cate' besele'ede' can' besyene' bene' ca' bi' gosac yesene, na' besyeyac bene' bi' zjazoa ni'a na'gaque', na' besyeda bene' nxiñj ni'e, na' besele'e bene' lchoł ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

³² Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše'da' bene' qui, le' ba' goc šone' ža' zjanite' nga len neda', na' bibi de da' yesagüe'. Na' bi' chaclaža' yosa'ane' sin cbi' yesagüe' cont bi' yesechołde' chanez.

³³ Nach legaque' gose'ene':

—Gan' zoacho nga naquen to latje daš ga' bibi de. ¿Gaxe želecho da' yesagw yog'o' bene' quinga?

³⁴ Nach gož Jesúsen' legaque':

—¿Gaca' yetextilen' de' chele?

Nach gose'ene':

—Gažga yetextil' dao' zjade na' to' chopga beł ya'a dao'.

³⁵ Nach Jesúsen' bene' mandadw yesebe' bene' zan ca' lo'yon'. ³⁶ Na' gwxi'e yetextil' ca' gaže na' len beł ya'a dao' ca', nach be'e yela' choxcen che' Diosen', nach bzojxen' bnežjuen' bene' ca' zjanaque' le' txen na' legaque' bosonežjue' che' yogo' bene' nita' na'. ³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. ³⁸ Na' bene' ca' gosagw yetextilen' len belen' nac tap mil bene' byo, na' bi' cuent no'ole ca' len bidao' ca'. ³⁹ Nach beyož besela' Jesúsen' bene' ca' ližgaque', na' beyo'e to' lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba

(Mr. 8:11-13; Lc. 12:54-56)

¹ Na' goquen' bał bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. ² Nach Jesúsen' gože' legaque':

—Cate' chle'ele chexna le'e yaban' šeže'le nach žale: "Yeža'a gwxe dan' chexna le'e yaban'."

³ Na' cate' chle'ele zete bejw xna le'e yaban' do' cheni' nach žale: "Guac yejw zag, le' ze bejw xna le'e yaban'." Nacle bene' gwxiye', le' nezele še guac yejw zag o še guac zeye' caten' chle'ele can' nac le'e yaban', perw bi' chache'ele bi' zejen da' ca' chon Diosen' tiemp nga zoacho na'a.

⁴ Le'e zoale na'a nacchgualle bene' laždao' xi'a na' ba gwlejiyichje Diosen'. Da'nan' chñable gona' yeto yela' guac da' le'ele cont nezele še Diosen' gwsele' neda'. Perw bitw gona' can'

chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

*Dan' chsed chlo'e bene' fariseo ca' na' bene' saduceo ca' zaca'leben ca levadura
(Mr: 8:14-21)*

⁵Na' cate' besežine' yešļa'a nisdao' Galilean', bene' ca' zjanaque' Jesúsen' txen gosache'ede' gosanlaže' yetextil da' yesagüe'. ⁶Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷Nach gose' lježgaque':

—Gwne' ca' le gague bi yetextilen' noa'chon'.

⁸Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e? ⁹¿Biña' šejni'ile? na' čba gonlaže'le can' bguagua' gayo' mil bene' byo len gayo'ze yetextil dao'? na' lecze čbitw zalaže'le do yebał žome pedas yetextil botoble dan' becho'onen? ¹⁰Na' čchixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen? ¹¹¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹²Nach bene' ca' zjanaque' Jesúsen' txen gosache'ede' gague be'e diža' che levadura dan' chosochine' par chcha'o yetextilen' san be'e dižan' ca' cont bi yosozenague' che dan' chososed chosolo'e bene' fariseo ca' na' bene' saduceo ca'.

*Pedroa' gwne' Jesúsen' naque' bene' gwseła' Diosen' cont nabi'e
(Mr: 8:27-30; Lc: 9:18-21)*

¹³Nach Jesúsen' len bene' ca' zjanaque' le' txen besežine' gala'ze to ciuda dan' nzi' Cesarea de Filipino. Nach Jesúsen' gože' bene' ca' gosa'aclene' le':

—Diosen' gwsele' neda' golja' beñačh. Perw čbi chesena bene'? čnon' naca' neda'? čBi chesene'?

¹⁴Na' gose'ene':

—Bałe' chesene' naco' da' Juan ben' bzoa bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' da' Jeremías o yeto bene' be' xtiža' Diosen' cani'te.

¹⁵Nach gože' legaque':

—čChixe le'e? čNo žale naca'?

¹⁶Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli' tocaņe.

¹⁷Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno beñačh bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. ¹⁸Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošen bene' ca' yesonxene' neda'. ¹⁹Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o bene' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰Nach Jesúsen' gože' legaque' nono yese'e še naque' Cristo ben' gwlej Diosen' cont nabi'e.

*Jesúsen' gwdixjue'ede' gate'
(Mr: 8:31-9:1; Lc: 9:22-27)*

²¹Na' žana' Jesúsen' gwzolažüe' bzejni'ide' bene' ca' zjanaque' le' txen cheyała' šeje' Jerusalenna'. Na' gože' legaque' bene' gole blao ca' chesenabi'e nación chechon', na' bxož gwnabia' ca' na' bene' ca' chososed chosolo'ede' dan' bzoj da' Moisés yosoči yososaque' le' na' yesote' le'. Perw yeyon ža yebane' ladjo bene' guat ca'. ²²Nach Pedroa' gwčhe'e Jesúsen' gan' nac lchojiže' na' gwzolažüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac chio' ca dan' zo' nga.

²³Perw Jesúsen' gwyechje' gwne'e Pedroa' gože'ne':

—¿Gwcuas ca'ale Satanás! Chgo'oyelo' neda' bi gona' can' nžia' bia' Diosen' gona'. Bi nsa'o xbab che Dios, san nsa'o xbab che beñačh.

²⁴Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gague' neda' txen, cheyała' cuejyichj cuine' la'czla' žaglažüe' na' con gone' can' nja' neda'. ²⁵Note'teze bene' chacde' gone' cont bi žaglažüe' o cont nono

yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli tocanē. ²⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocanē? Le bi zoa nacle gon benachen' chixjue' cont gata' yela' mban che' toli tocanē. ²⁷ Diosen' gwsele' neda' golja' benač na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to benačen' ñite' mbalaz o yesezaca'zi'e neče da' goson to toe'. ²⁸ Na' da' li žia' le'e, balē nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsela' Diosen' golja' benač.

17

Jesúsen' goque' ca to be'ni'

(Mr. 9:2-13; Lc. 9:28-36)

¹ Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'. ² Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. ³ Na' concze besele'ede' da' Moisésen' len da' Eliásen' na' chosošalje' len Jesúsen'. ⁴ Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Eliás.

⁵ Ne' choe'te Pedron' dižan' ca' cate' to bejw da' chactiten gwyečhen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže' chgüeda' che'. Le gwzenag che'.

⁶ Na' cate' bene' ca' nche'e Jesúsen' gosende' diža' ca' besežebchüe', con gosaze' cosčo'ale lo yon'. ⁷ Nach gwbiga' Jesúsen' gwxo'a ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyechis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsela' Diosen' golja' benač, cana'ch güe'le diža' čhen.

¹⁰ Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Eliás ben' gwzoa cani' cheya'la' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Eliásen' na' yeyonšagüe' yogo'lo. ¹² Perw žia' le'e, Eliás ba bide' na' bi gosache'e bene' še nac le'. Na' gosonde' le' con ca' gosaclaže'. Na' ca'czen' yosočhi yososaque' neda' naca' ben' gwsela' Diosen' golja' benač.

¹³ Nach bene' ca' zja'aque' len Jesúsen' gosache'ede' cho'e diža' che da' Juan ben' bzo'e bene' nis.

Beyon Jesúsen' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe' na' gože'ne':

¹⁵ —Xana', beyaše'laže' šca xi'ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo'be' lo nis. ¹⁶ Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

¹⁷ Nach Jesúsen' gože' bene' ca' že'na':

—iLe'e bene' bi chejnilaže', chonchguale clele! ¿Batca' zelao na' lagua' le'e? Bedesan' bidaon' ni.

¹⁸ Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

¹⁹ Na' gwde goc ca', bene' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixchen' bi goc neto' yebejto' da' xigüen'?

²⁰ Jesúsen' gože' legaque':

—Bitw goc yebejten dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'le'ne', guaque ye'le ya'a nga: “Gwcuas nga, na' jayzoa na'ate", na' gac can' nalen'. Bitw bi de dan' bi gac gonle con še chejle'le Diosen' gone' gaquen. ²¹ Na' cont yebejle da' xigüe' ca' dan' zjanac ca dan' bebeja' yichjlaždao' bidaon' na', cheya'la' gwyo gwčejele gonle gwbas na' zoatezle yol güižle Diosen'.

Da' yoble Jesúsen' gwdixjue'ede' gate'

(Mr. 9:30-32; Lc. 9:43-45)

²² Na' šlac zjayda Jesúsen' len bene' ca' zjanaque' le' txen do gan' mbane distritw Galilea, Jesúsen' gože' legaque':

— Diosen' gwsele' neda' golja' beñač, na' yosodie' neda' lo na' bene' chesegue'ede'nda',
²³ na' yesote'nda'. Perw na' yeaon ža yosban Diosen' neda' ladjo bene' guat ca'.

Nach bene' ca' zjanaque' Jesúsen' txen cate' gosende' xtize'na' gosacyaše'chgüede'.

Jesúsen' gwdixjue' da' chosočixjue' che yodao'

²⁴ Na' cate' besyežine' Capernaum, bene' ca' chosočixjue' che gastw che yodao' blaoc che chio' bene' Israel ja'aque' lao Pedroa'. Na' gose'ene':

— žBi chyixjw maestrw chelen' da' cheyała' chixjue' che yodaon'?

²⁵ Nach gož Pedroa' legaque':

— Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

— žBi xbab chono', Simón? Ca nac bene' gwnabia' ca' nita' yežlio nga, žnon' chacdo' chosočixjue'? žbene' gualaž che' o še bene' zito'?

²⁶ Nach Pedroa' gože'ne':

— Chosočixjue' bene' zito'.

Nach Jesúsen' gože' le':

— Bene' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyała' chixjwcho che yodaon'. ²⁷ Perw cont nono yeson xbab chgue'echo yodao' blaon', na' chixjwcho. Gwyej cho'a nidsaon', na' bzala' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

18

Gosacyož bene' ca' zjanaque' Jesúsen' txen noe' nacch blaoc

(Mr. 9:33-37; Lc. 9:46-48)

¹ Nachen' bene' ca' zjanaque' Jesúsen' txen gosebigue' cuite'na', na' gose'ene':

— žNo neto' gacchto' blaoc cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol legaque'. ³ Na' gože'ne':

— Da' li žia' le'e, note'teže še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabia' Diosen' ben' zoa yaban' yichjlažda'ole.

⁴ Na' note'teže bene' še yeyaque' ca bidao' nga na' gwzexjwlaže' lao Diosen', nach gaque' bene' blaoc len neda' cate' Diosen' ben' zoa yaba gone' cont solao nabi'a'. ⁵ Note'teže bene' chone' güen len to bidao' ca bi' nga neče da' chejnilaže' neda', choncze' güen len neda'.

Bitw cheyała' goncho cont gon bene' da' xinj

(Mr. 9:42-48; Lc. 17:1-2)

⁶ Note'teže bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosochėje' yene' to yiše xen na' yosozale'ne' lo' nidsaon' clcl ca da' gone' cont lažo' bene' yoble gone' da' xinjen'. ⁷ Nyaše'chguaze gac che beñačen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

⁸ Na' da' li žia' le'e, še ni'a na'len' chonen cont gonle da' xinj, cheyała' cuejyichjle da' malen' chonle. Yejni'a bibi ni'a na'len' soa clcl ca gonle da' xinjen' len len. Na' yejni'a šjazyoale len Diosen' toli tocañe bi zoa šla'a taca'len' o nchog šla'a ni'alen' clcl ca yeyejle lo yi' gabil nya' cuerp chelen'. ⁹ Na' še yejlaolen' chonen cont gonle da' xinjen', cheyała' cuejyichjle da' malen' chonle. Yejni'a bibi yejlaolen' cuia clcl ca gonle da' xinjen' len len. Na' yejni'a šjazyoale len Diosen' toli tocañe zoa šla'aze yejlaole clcl ca yežinle lo yi' gabil žia chop la'a yejlaolen'.

Jempl che xila' be gocžeje

(Lc. 15:3-7)

¹⁰ Bi gonle note'teže bene' chejnilaže' neda' ca bene' bibi zaca'tec, la'czla' bitec zaque' len beñač. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'. ¹¹ Na' ca naca' neda', Diosen' gwsele' neda' golja' beñač cont gwnežjua' yela' mban toli tocañe che bene' ba zjambiyi'.

¹² žBixe chonle xbab? Še nita' to gayoa xila' chele na' yexjw toba' žbi yocua'anle be ca' yetaplalj togalj do lo ya'a na'ze na' šjajdiljwle ben' bexjua'? ¹³ Na' da' li žia' le'e, cate' yežezeleba' yebechle dan' beželban' clcl ca can' chebele che be ca' taplalj togalj ben' bi gosacėje. ¹⁴ Ca'czen' naquen len bene' ca' chesejnilaže' neda' bene' ca' bitec bi zjazaque' len beñačen'. Xacho Diosen' ben' zoa yaban' bitw che'nde' cuiayi' ne toe'.

Cheyała' yezi'xencho che bene' lježcho bene' chesejnilaže' Diosen'
(Lc. 17:3)

¹⁵ Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble. ¹⁶ Perw še bi gwzenague' diža' dan' šje'elenlenen', güenč che'ele yeto o yechope bene' lježle cont yesaque' testigw ba gota'yoel ben' yoša' xbab čhen'. ¹⁷ Na' še bitwce gwzenague' čhele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnilaže' Diosen', ca no bene' güechixjw bene' chesonchgia da' xinj.

¹⁸ 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

¹⁹ 'Na' da' yoble žia' le'e, še čople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. ²⁰ Na' gan' nžag čhope šonle chonxenle neda', zoacza' txen len le'e.

²¹ Nach Pedroa' gwbigue' gože' Jesúsen':

—Xana', še bene' lježa' chone' da' mal contr neda', žbał ni'a cheyała' yezi'xena' che'? žzelao do gaž ni'a?

²² Nach Jesúsen' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

Jempl' che ben' bi bezi'xene' che dan' čala' bene' lježe'

²³ 'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmose' ca' xmechue'. Na' goclaže' yebeje' cuent len legaque'.

²⁴ Na' cate' gwzologüe' bezi'e cuent che to toe', da' nechw bžin to xmose' ben' čala' zan millón. ²⁵ Na' mosen' bitwbi xmechue' gota' par yonežjuen'. Da'nan' bene' gwnabian' bene' mandaw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čale' čhen'. ²⁶ Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yela' chxenlaže' len neda', na' yeyona' doxen dan' čala' čhion'." ²⁷ Nach bene' gwnabian' beyaše'de' le' na' bezi'xene' che doxen dan' čale' na' bsane' le'. ²⁸ Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwnizte' yene' gože'ne': "Yeyono' dan' čalo' čhian' netec na'a." ²⁹ Nach mos lježen' la' bzocate' xibe' lagüen', gože'ne': "Gwdapešca yela' chxenlaže' čhia' na' yeyona' doxen dan' čala' čhion'." ³⁰ Perw na' mos nechon' bitw bzenague' che mos lježen'. La' gwyejte' jene' mandaw goseyixjue'ne' ližya na' bi yechoje' še bina' yonežjue' dan' čale' čhen'. ³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'lol can' goca'. ³² Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čalo' čhian' dan' gota'yoedo' neda' yezi'xena' čhion'." ³³ žBixchen' bi beyaše'do' mos lježo' ben' čale' čhion' can' beyaše'da' le'?" ³⁴ Na' bža'achgua bene' gwnabian' na' bdie' le' lo na' bene' goseyixjue'ne' ližya ga žlaglogüe', na' bi yechoje' še bina' yeyixjue' doxen dan' čale' čhen'.

³⁵ Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

19

Bi cheyała' yela'acho len no'ol čechon' cont soalencho no'ole yoble
(Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwlague' yegw Jordánna' beyeje' gan' mbane distritw Judean'. ² Na' bene' zan ja'aclen le', na' beyone' bene' ca' chesacšene.

³ Na' bał bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosožie'ne' xya čhoł, nach gose'ene':

—žGuac to bene' nšagna' yele'e len xo'ole' še bite'teze dan' chone' cbi cholaže' bene' čhen'?

⁴ Nach gože' legaque':

—žBina' gwlable can' noj Xtiza' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. ⁵ Na' gwna Diosen': "Da'nan' bene' byon' gwsane' xaxne'e cont soalene' no'ole čhen' na' chope' yesaque' ca toz bene'." ⁶ Na' ca' bich yesac čhope' san toze'. Da'nan' bi cheyała' yesyele'e, le Diosen' ba bcode' legaque'.

⁷ Nach gose'ene':

—Še naquen ca' ĵbixchen' ben da' Moisésen' mandadw cate' to bene' yele'e len no'ol chen' cheyala' chas to yiš da' gwnežjue' no'ol chen' ga güen' diža' besyele'ena'?

⁸ Jesúsen' gože' legaque':

—Da' Moisésen' be'e latje yela'ale len no'ol chele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho goclaže' yesyele'e. ⁹ Žia' le'e, note'teze bene' chele'e len no'ol che' na' cheque'e no'ole yoble, len neztede' no'ol chen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozce ca da' xinj gone' ca nac da' chon bene' chata'lene' no'ol che bene' yoble.

¹⁰ Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güench nono gwšagna'.

¹¹ Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen. ¹² Nita' bene' bi žan yošošagne'e dan' gosalj'e bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp chegaque'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'

(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsen' cont xoa ne'e yichjgacbe' na' nabe' lao Diosen' gaclene' legacbe'. Perw bene' ca' zjanaque' le' txen gosedi'e bene' ca' zjanche'ebe'. ¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyož gwžoa na' Jesúsen' yichjgacbe' gwñabe' lao Diosen' gaclene'be', nach gwyeje' ga yoble.

Bene' güego' bene' goc bene' gwñi'a

(Mr. 10:17-31; Lc. 18:18-30)

¹⁶ Na' goquen', to bene' güego' bžine' gan' zoa Jesúsen', na' gože'ne':

—Maestrw, le' naco' bene' güen. ĵBi da' güen cheyala' gona' cont gata' yela' mban chia' toli' tocañe?

¹⁷ Nach Jesúsen' gože'ne':

—ĵBixchen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yela' mban chio' toli' tocañe, cheyala' gono' can' non Diosen' mandadw goncho.

¹⁸ Nach gože' Jesúsen':

—ĵBica' da' ca'?

Nach Jesúsen' gože' le':

—Nono gotle, bi gata'lenle' no'ol bi nac no'ol chele o bene' byo bene' bi nac bene' chele, bi cuanle, bitw güe'le diža' güenlaže' che bene' lježle. ¹⁹ Le gap bala'an' xaxna'le, na' le gague lježle can' chaque cuinle.

²⁰ Nach bene' güegon' gože' Jesúsen':

—Yogo'lol' da' quinga gwzologua' chonczan' cate' ne' nactia' bidao'. ĵBixe dan' chyažjeh gona'?

²¹ Jesúsen' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

²² Perw na' bene' güegon' cate' beyož bende' diža' can' gož Jesúsen' le', beza'yaše', le bene' gwñi'achgua goque'.

²³ Gwde na' Jesúsen' gože' bene' ca' zjanaque' le' txen:

—Da' li žia' le'e, leca zdebe naquen to bene' gwñi'a gwzenague' che Dios ben' zoa yaba cont Diosen' nabi'e yichjlažda'ogüe'. ²⁴ Da' yoble žia' le'e, bedao'ch te to be xen be nzi' camello to lo' nag yeše' cdel ca to bene' gwñi'a gwzenague' che Dios cont Diosen' nabi'e yichjlažda'ogüe'.

²⁵ Na' bene' ca' zjanaque' Jesúsen' txen leca besyebande' cate' gosende' xtizen', nach gosene':

—ĵNoxen' šjayzoa len Diosen' še ca'?

²⁶ Jesúsen' gwñe'e legaque', nach gože'ne':

—Bibi de da' gac yeson beṇachen' cont šjasjenite' len Diosen', perw bi zoa da' ṇacho da' bi gac gon Dios.

²⁷ Nach Pedroa' gože' Jesúsen':

—Neto' ba gwlejyichjto' yogo' da' de čheto' cont nacto' le' txen. ¿Bi da' güen gata' čheto' dan' ba gwlejyichjto' da' ca'?

²⁸ Jesúsen' gože' legaque':

—Da' li žia' le'e, Diosen' gwsele' neda' golja' beṇach' na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' ṇabia'le šižinw cuen beṇe' ca' zjanaque' xi'in diaža che da' Israel. ²⁹ Na' note'teze beṇe' ba gwlejyichje' liže', biše', zane', ṅaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca' yogo' da' ca'. Na' lecze gata' yela' mban che' toli tocanē. ³⁰ Perw zan bene' zjanaque' bene' žialao na'a, gwžin ža cate' yesaque' bene' bzebe. Na' beṇe' zjanaque' bene' bzebe na'a, gwžin ža cate' yesaque' bene' žialao.

20

Jempl che bene' güen žin ca'

¹ Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca' da' nga goc. To beṇe' nape' to yežlio gan' že'chgua yag uvas. Na' gwze'e ližen' to zil do cheni' gweyje' gan' chac ya'a jatiljue' beṇe' güen žin cont yesone' žin yežlio chen' žana'. ² Na' gosexenlaže' beṇe' güen žin ca' to denario čhixue' to toe' con ca' chac mosen' tža žin. Nach gwsele' legaque' gan' jasene' žinna'. ³ Na' do cheda ga gozeje' gan' chac ya'an, na' ble'ede' nita'ch beṇe' bibi žin de yesone'. ⁴ Na' gože' legaque': “Lencze le'e le šja'ac gan' že' yag uvas chian' le šjen žin na' čhixjwca' le'e ca' cheya'a.” Nach ja'ac bene' ca'. ⁵ Na' da' yoble gweyje' do guagwbiž na' do cheda šone. Bezle'ede' nita'ch beṇe' bibi žin chesone' nach gwsele' legaque' cont yesone' žin gan' že' yag uvas chen'. ⁶ Na' ca' do cheda gayo' šeže'le gozeje' da' yoble ble'eczde' nita'ch beṇe' bibi žin chesone'. Na' gože' legaque': “¿Bixchen' bi gweyje' žin?” ⁷ Nach gose'ene': “Notno gwne' neto' šjento' xšine'.” Nach gože' legaque': “Lencze le'e le šja'ac le šjen žin gan' že' yag uvas chian'. Na' čhixjwca' le'e ca' cheya'a.” Nach ja'ac bene' ca'. ⁸ Na' cate' bžin hor bosa' ṅan yag uvasen' beṇe' güen žin ca', nach gože' mos blao chen': “Beyax beṇe' güen žin ca' cont čhixjo'ne', solao čhixjo' beṇe' ca' besela'ac bzebe, na' yeyože' len beṇe' ca' besela'ac da' nechw.” ⁹ Nach mos blaon' zgua'tec gwduxjue' beṇe' ca' gosezolagüe' gosone' žin cheda gayo' šeže'le tgüje denario to toe'. ¹⁰ Na' cate' gwduxjue' beṇe' ca' gosezolagüe' gosone' žin šezildao', gosacde' čhixjoche' legaque' da' zča'och dan' gosezolagüe' gosone' žin šezildao'. Perw toczce can' gwduxjue' yogo'lo'te'. ¹¹ Na' cate' beyož gosezi' laxjw beṇe' ca' gosezolao žinna' šezildao', gosadoe' diža' ṅan žinna'. ¹² Gose'ene': “Do ža bžaglaochguato' lo da' zeye' bento' žin chion'. Na' toczce can' gwduxjo' neto' len beṇe' ca' besela' bzebe, len to hor güejgan' gosone' žin.” ¹³ Perw na' ṅan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario čhixjua' to tole? ¹⁴ Laxjon' ba gwxi'o, guac yeyejo'. Čaclaža' gwnežjua' beṇe' ca' to denario güje con can' bena' le'e la'czla' besela'aque' bzebe. ¹⁵ ¿Bixchen' chxi'o neda' neče dan' naca' beṇe' šagüe'? Naquen lo na' gona' con ca' čaclaža' len da' de chia'.”

¹⁶ Nach Jesúsen' gože' beṇe' ca' bosozenag jemplen':

—Can' naquen, nita' beṇe' zjanaque' beṇe' bzebe na'a, perw lecze gwžin ža cate' legaque' yesaque' beṇe' žialao. Na' nita' beṇe' zjanaque' beṇe' žialao na'a, perw gwžin ža yesaque' beṇe' bzebe. Diosen' chaxe' yogo'lo' beṇe' cont yesejle'e che', perw bal' guen' chosozenague' che' na' legacze' chbeje' cont chesaque' xi'ine'.

Da' yoble chyixjue'e Jesúsen' gate'

(Mr. 10:32-34; Lc. 18:31-34)

¹⁷ Jesúsen' len yezan beṇe' zja'aque' Jerusalenna'. Na' šlac zjangüe'e nezen' gwlejiže' beṇe' šižinw ca' gwleje' cont zjanaque' txen len le' na' gože' legaque':

¹⁸ —Na'a ba zejcho Jerusalenna' gan' yesone' neda' lo na' bžox gwnabia' ca' na' lo na' beṇe' ca' chososed chosolo'ede' dan' bžoj da' Moisés, na' yesečhogläüen' chia' yesote' neda', neda' naca' ben' gwsele' Dios golja' beṇach. ¹⁹ Na' yesone'nda' lo na' beṇe' bi zjanaque' beṇe' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon' ža yebana' ladjo beṇe' guat ca'.

Xna' Jacobo na' Juanna' gwṇabe' yesebe' xi'ine' ca' cuit Jesúsen' gan' nabi'ena'

(Mr. 10:35-45)

²⁰ Na' ja'ac xi'in Zebedeo, Jacobo len Juan, na' len xna'gaque' lao Jesúsen'. Na' xna'gaquen' bzoa xibe' lao Jesúsen' gože'ne':

—Chṇabda' le' to goclen.

²¹ Nach Jesúsen' gože'ne':

—¿Bi goclen chaclažo' gona?
 Nach xna'gaquen' gože'ne':
 —Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.
²² Jesúsen' gože' Jacobo na' Juanna':
 —Le'e cabi nezele bi dan' chñable. ¿Gwçhejlaže'le tele yela' zi' yela' ya' ca dan' tia' neda' na' gac çhele can' gac chia'?
 Nach bosyoži'e xtižen' gose'ene':
 —Gwçhejlaže'to'.
²³ Nach Jesúsen' gože' legaque':
 —Da' licze tele yela' zi' yela' ya' ca dan' tia' neda' na' gac çhele can' gac çhian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen çe'.
²⁴ Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaque'. ²⁵ Nach Jesúsen' goxe' yogüe' cont gosebigue' lagüen' na' gože' legaque':
 —Nezecele bene' gwnabia' çe to to naciön na' bene' blao ca' chesone' byen chosozenag bene' chegaque'. ²⁶ Perw bi naquen ca' len le'e. San note'tezle chaclaže'le gacle bene' blao, cheyała' gwzexjwlaže'le gaclen bene' lježle. ²⁷ Na' še note'tezle chaclaže'le gacle bene' žialao, cheyała' gon cuinle ca' xmos bene' lježle. ²⁸ Ca'cze naquen len neda' naca' ben' gwsela' Diosen' golja' beñach. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neçe xtoła' beñachen'.

Jesúsen' bene' cont chope bene' lçhol besyele'ede'

(Mr. 10:46-52; Lc. 18:35-43)

²⁹ Nach cate' besyeya'aque' ciuda Jericó, bene' zan zjasenagüe' Jesúsen' len bene' ca' zjanaque' le' txen. ³⁰ Na' çhope bene' lçhol zjachi' chanez gan' zjayda Jesúsen'. Na' cate' gosache'ede' Jesúsen' zej gan' zjachi'ena' nach chososya'adie' gose'e le':
 —Xanto', len' naco' xi'in diaža çe da' rey Davin'. Beyaše'laže'šca neto'.
³¹ Nach bene' ca' chesyede gan' zjachi'ena' gosedi'e' legaque' cont yesenite' šize. Perw na' gosene' zizjech gose'ene':
 —iXanto', len' naco' xi'in diaža çe da' rey Davin', beyaše'laže'šca neto'!
³² Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':
 —¿Bin' chaclaže'le gonda' le'e?
³³ Nach gose'ene':
 —Xanto', chaclaže'to' yele'eto'.
³⁴ Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

Gosonxene' Jesúsen' cate' beyo'e Jerusalén

(Mr. 11:1-11; Lc. 19:28-40; Jn. 12:12-19)

¹ Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsle'le' mandadw çhope bene' ca' zjanaque' le' txen, ² gožgaque'ne':
 —Le šja'ac yež dan' chi' gała'ze, na' cate' žinlen' na' yežezele to burr be no'ole da'ba' yag na' nçe'te to xi'inđa'oba'. Le sežgacba' na' le çe'gacba' nga. ³ Na' še bi ye' bene' le'e na' ye'ine': "Xanto' na' chyažjde' legacba'." Na' la' yedyesantecze'ba' len le'e.
⁴ Goc yogo' da' qui cont goc can' bzoj to ben' bzoj Xtiza' Diosen' cani', gwne':
⁵ Gož bene' ca' nita' Jerusalénna':
 "Le na'šc, ba za' rey çhelen',
 žie' cože' to burr dao', xi'in beyixe' be choa' yoa'.
 Ze'e ca to bene' bi naque' bene' blao.
⁶ Na' ja'ac bene' ca' yež dao' dan' gož Jesúsen' legaque' ca', na' gosone' can' ben' Jesúsen' mandadw. ⁷ Na' besyeche'e burroa' len xi'inba' lao Jesúsen' na' gosexoa no xagaque' cože'ban' na' gwžia Jesúsen' be daon' cont gwyetje' Jerusalénna'. ⁸ Na' bene' zan gosonxene' Jesúsen' goseyixjw no xagaque' lo nez cont blej burron' len na' yebałe' goseçhogue' xoze' yag na' goseyixjuen' lo neza'. ⁹ Na' bene' zjažialao na' lecze bene' za'ac cože' bososye'e gosene':
 —iLeca bene' zaca' benga nac xi'in diaža çe da' rey Davan! iMbalaz ben' za' nga gwsela' Xancho Diosen' le' cont nabi'e! iLeca bene' zaca' ben' zoa yaban'!
¹⁰ Na' cate' bžin Jesúsen' Jerusalénna' yogo' bene' ca' že' ciudan' besyebande', na' gosene':
 —¿No bengala' nga?
¹¹ Na' bene' ca' nžag Jesúsen' bosyoži'e xtiža'gaque' gosene':
 —Bengan' Jesús bene' za' yež Nazaret gan' mbane distritw Galilea na' cho'e xtiža' Dios.

Jesúsen' beje' bene' ca' cheson ya yodao' blaon'

(Mr. 11:15-19; Lc. 19:45-48; Jn. 2:13-22)

¹² Na' Jesúsen' gwyo'e chyo'o yodao' blaon' na' bešaše' yogo' bene' ca' chesote' na' bene' chesa'o na'. Nach bchixe' xmes bene' ca' chosoša' mechw, na' yag ga chesebe' bene' ca' chesote' ngolbex. ¹³ Na' gože' legaque':

—Nyojce Xtiža' Diosen' žan: “Yesene' ližan' naquen to latje gan' yesoļ giūiz bene' neda'”, perw le'e chonlen ca to latje ga že' bene' gwban.

¹⁴ Na' bene' lchol' ca' na' len bene' ca' nxinj ni'e gosebigue' lao Jesúsen' šlac zoe' chyo'o yodaon'. Nach beyone' legaque'. ¹⁵ Perw na' bħoz gwnabia' ca' na' bene' ca' chososed chosolo'e dan' bzoj da' Moisésen' leca beseže'e cate' besele'ede' yela' guac ca' dan' ben Jesúsen'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosenabe': “Leca bene' zaca' bengac nac xi'in diaža che da' rey David.” ¹⁶ Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' legaque':

—Zenda'. ¿Biņa' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

¹⁷ Na' bechoje' gan' nita' bene' ca' na' beze'e ciudan'. Na' že'na' jayga'ane' Betania.

Ben Jesúsen' cont gwbiž yag yixgüigw

(Mr. 11:12-14, 20-26)

¹⁸ Na' zil beteyo besyeya'aque' Betanian' jaseya'aque' Jerusalenna' da' yoble. Na' šlac zjangüe'e nezen' gwdon Jesúsen'. ¹⁹ Na' ble'ede' to yag yixgüigw zoan cho'a nezen' na' jane'e še žia yaguen' yixgüigw. Perw bibi bželde', con xlaguen' na'že žia. Nach gožen':

—Bich bi yixgüigon' cuio'.

Na' la' gwbižte yaguen'. ²⁰ Nach bene' ca' zjanaque' le' t xen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

²¹ Na' Jesúsen' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jaso'a lo' nisdaon'”, na' gac can' nalen'. ²² Na' še chejnilaže'le Diosen', bite'teze dan' nabele'ne' cate' yoļ giūizlene', gončen' le'e.

Yela' chnabia' che Jesúsen'

(Mr. 11:27-33; Lc. 20:1-8)

²³ Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bħoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

²⁴ Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendan'.

²⁵ Le našc neda': ¿non' gwseļa' da' Juanna' bzoe' bene' nis? ¿Dios nan' gwseļe'ne', še benachen'? Nach legacze' gose' lježe':

—Še ye'chone' Dios gwseļa' le', na' ye'e chio': “¿Bixchen' ca gwyejle'le che'?” ²⁶ Na' bi gac ye'chone' benač gwseļa' le', le yogo'te bene' že' nga chesejle'e Diosen' gwseļe' da' Juanna' be'e xtiže'na', na' xož bi yesonde' chio'.

²⁷ Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

²⁸ Na' Jesúsen' gože' legaque':

—Le gon xbab bi zeje jempl nga: Gwzoa to bene' gwnita' chope xi'ine'. Na' gože' tobe': “Xi'ina', chaclaža' šejo' güen žin na'aža gan' že' yag uvas chia' ca'.” ²⁹ Nach xi'inen' gože' le': “Bitw ša'a.” Perw gwdele beyombe' xbab nach gwyejbe'. ³⁰ Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': “Guacze, na' ša'a.” Perw bitw gwyejbe'. ³¹ Gwnašc neda', ¿no bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güechixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yichjlažda'ogaque' cllel ca' le'e. ³² Ca

nac Juanna' ben' bzoe' bene' nis, bide' laolen' na' gwdixjue'ede' le'e' naquen' cheyala' gonle' cont yebe' Diosen' le'e. Perw bitw gwyejle'le' che'. Na' bene' güeçhixjw' ca' na' no'ole' zle' ca' gosejle'e' che'. Na' cate' goçbe'ele' bene' ca' ba' gosejle'e' che', bitw betinjele' xtoła'le' ca' cont šejle'le' che' dan' bse'de' da' Juanna'.

Jempl che mos mal ca'

(Mr. 12:1-12; Lc. 20:9-19)

³³ Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'te'ze' bene' to ga yesesie' uvasen' cont choj xisen'. Na' lecze' bene' to da' sibe' ca' to campanaryw ga yesecua' bene' yosogüia yesene'e' yag ca'.

'Na' bcua'ane' yežlion' lo na' bene' yesonši'e' yag uvasen' na' gwze'e' gwyeje' zito'. ³⁴ Cate' bžin ža yosyotobe' cosešen', gwsele' to çhope xmore' gan' že' bene' ca' nac lo na'gaque' yag uvasen' cont šjasyexi'e' to tlawc cosešen' dan' cheyala' si'e'. ³⁵ Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'. ³⁶ Nach gossela' xan yag uvasen' mos zanch clcl ca' bene' ca' gwsele' da' nechw, perw lecze' can' gosonde' bene' nechw ca', lecze' ca' gosonde' legaque'.

³⁷ Nach gwdena' xan yežlion' gwsele' cuinçze' xi'inen', godce' yesezi'e' xtižen'. ³⁸ Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." ³⁹ Nach gosezene'ne', besyebeje'ne' gan' že' yag ca' na' gosote'ne'.

⁴⁰ Beyoz' be' Jesúsen' jempl nga, gozne':

—žNacxe' chaquele' gon xan yežlion' len bene' ca' boca'anlene' yag uvas chen' cate' yežin cuine'?

⁴¹ Nach bosyoži'e' xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlawc cosešen' cate' žin ža yosyotoben'.

⁴² Jesúsen' gože' legaque':

—Ca'czen'. žBiña' gwlable' ga nyoj Xtiža' Diosen', žan quinga?:

Yej dan' bi gosacłaže' bene' güen yo'o ca' yosochine',

len ba naquen' yej squin.

Da' nga ben' Xancho Diosen',

na' naquen' to da' yežejecho.

⁴³ Da'nan' žia' le'e, da' bi chzenagle' che' Diosen', cuejyichje' le'e' na' cueje' bene' yoble bene' yosozenag che' cont nabi'e' yichžlažda'ogaque'. ⁴⁴ Na' ca' nac' yejen', note'te'ze' bene' lažo' lo yeja' na' cue'žošje', na' note'te'ze' bene' chiže' yeja' cate' lažon' na' gwšošjen' le'.

⁴⁵ Na' bħox' gwnabia' ca' na' bene' fariseo' ca', cate' gosende' jempl' ca' dan' be' Jesúsen', gosache'ede' be'e' diža' che' legaque' dan' bi chesejnilaže' le'. ⁴⁶ Nach gosacłaže' yesezene' le', perw besežebe' bi yesone' bene' ca' nžague' legaque', le' yogüe' gosejle'e' gwsela' Diosen' Jesúsen' cont cho'e' xtiže'na'.

22

Jempl che ben' bene' lni cate' bšagna' xi'ine'

¹ Na' da' yoble bsd' blo'e' Jesúsen' bene' ca' len jempl, gozne':

² —Yela' gwnabia' che' Diosen' zaca'leben' ca' da' nga' goc. Gwzoa to bene' gwnabia' na' bene' gastw cate' bšagna' xi'ine'. ³ Na' cate' bžin hor solao' lnin' gwsele' xmore' ca' cont jasexi'e' bene' ca' ba' bol' güiže' šja'ac' lni'na', perw notno' gocłaže' šja'ac' lni' chen'. ⁴ Nach gože' yeto xonj' xmore' ca': "Le šjež' bene' ca' ba' bol' güižan' ye'ln'e' ba' bsi'ni'a' dan' gagwchona'. Ba' betua' be' dao' be' chesane' na' ba' bsi'ni'a' dan' gagwcho' lo lnin'. Na' ye'ln'e' yeside' gagwcho' dan' ba' bsi'ni'an'." ⁵ Perw bene' ca' ba' gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e' yežlio che', na' yetoe' gwyeje' jene' negosyw. ⁶ Na' yebale' gosenize' mos ca' gwsele' bene' gwnabian' na' gosonde' legaque' zi' na' gosote' legaque'. ⁷ Na' leca' bž'a' bene' gwnabian'. Na' gwsele' soldadw' che' ca' jasete' bene' ca' gosot' xmosen' na' bosozeye' lažgaquen'. ⁸ Nach bene' gwnabian' gože' xmosen': "Ba' bsi'ni'a' dan' gagwcho' lo lnin', perw bene' ca' ba' bol' güiža' nachbia' bitw' zjazaque' yeside'. ⁹ Le šja'ac' le' šjata' yogo' nez' na' ye'le' yogo' bene' yežagle' yeside' lnin'." ¹⁰ Na' mos ca' ja'aque' yogo' nez' na' jasetobe' con yogo' bene' besežague', no' bene' naque' bene' güen na' no' bene' naque' bene' mal, cont beža' yo'o gan' chac' lnin'.

¹¹ Perw cate' gwyo'o bene' gwnabian' jane'e' bene' ca' že'na' na' ble'ede' to bene' bi nyaze' lache' da' bnežjue' yesaze' lo lnin'. ¹² Nach gože' le': "Migw' chia', žnac' goquen' gwyo'o nga' bitw' nyazo' lache' dan' be'na' çhazo'?" Nach bena' bitw' beželde' bi ye'ene'. ¹³ Nach bene' gwnabian' bene' mandadw' yosoçhej' xmore' ca' ni'a' na' bena' cont yesyebeje'ne' na' yesebeque'ne' gan' nac' çhol', ga' cuežyaše' na' gan' gagwxetje' laye' tantw' žaglagüe'. ¹⁴ Can'

naquen, Diosen' chaxe' yogo' bene' cont yesejle'e che', perw bał guen' chosozenague' che' na' legacze' chbeje' cont yesaque' xi'ine'.

*Ca nac dan' cheyała' gaxjw
(Mr. 12:13-17; Lc. 20:20-26)*

¹⁵ Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'. ¹⁶ Na' bene' fariseo ca' gosesele' bał bene' zjanaque' txen len legaque' na' yebał bene' chesone' txen len Herodesen' cont jaseže' Jesúsen':

—Maestrw, nezetu' zoatezo' cho'o diža' li. Na' nezetu' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'. ¹⁷ Da'nan' zedeñabeto' le' cont nao' neto' can' chacdo' cheyała' gonto'. ¿Naquen binlo no chixjw da' cheyała' chixjwcho lao ben' nac la'zelagüe bene' gwnabia' ben' chi' Roma, še bi?

¹⁸ Jesúsen' gocbe'ede' yela' xi'a chegaquen', nach gože' legaque':

—iNacle bene' gwxiye'! ¿Bixchen' chaclaže'le yoslažo'le neda' len xtižan'? ¹⁹ Le gwlo'e neda' to mechw dan' chyixjwle che gobiernen'.

Nach goso'ene' to mechw dan' nzi' denario. ²⁰ Nach Jesúsen' gože' legaque':

—¿No lao dan' da' le'e mechw nga? na' ¿no la da' nyoj le'en ni?

²¹ Nach gose'ene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

²² Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

*Cate' yesyeban bene' guat ca'
(Mr. 12:18-27; Lc. 20:27-40)*

²³ Na' lo ža na'teze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁴ —Maestrw, da' Moisésen' gwne': "Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyała' yošagna'lene' no'ol güezeba' cont yesenita' xi'in diaža che da' bišen'. ²⁵ Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'. ²⁶ Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'. ²⁷ Na' gwde gosat yogo'loł bene' ca', nach got len no'ola'. ²⁸ Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagna'lene' le'.

²⁹ Na' gož Jesúsen' legaque':

—Clelen' chonle xbab dan' žale ca', le bi nezele can' ža Xtiža' Dios dan' nyojen, neca nombia'le yela' guac chen'. ³⁰ Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca angl bene' zjazoa yaba. ³¹ Na' ca nac dan' yesyeban bene' guat ca', ¿bina' gwlable da' nga can' nyoj Xtiža' Diosen'? žan: ³² "Neda' naca' Dios ben' chonxen Abraham, ben' chonxen Isaac na' ben' chonxen Jacob". Bene' guat ca' bi chesonxene' Diosen', san bene' zjamban.

³³ Na' bene' ca' zjanžagen' besyebande' cate' gosende' diža' dan' bsed blo'ede' legaque'.

*Dan' nac da' blaoch dan' ža Diosen' cheyała' goncho
(Mr. 12:28-34)*

³⁴ Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'. ³⁵ Na' to ben' nsedchgüe' ley dan' bzoj da' Moisés lecze goclaze' cueje' Jesúsen' diža' da' gwchine' contr le', gože'ne':

³⁶ —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyała' goncho?

³⁷ Nach gož Jesúsen' le':

—“Cheyała' gaquecho Xancho Diosen' con ca zelao chejni'icho do yichj do laže'cho.” ³⁸ Lenna' naquen da' žialaoch na' da' blaoch lagüe da' ca' ža Diosen' cheyała' goncho. ³⁹ Na' da' gwchopen' zejgalan' ca', žan: “Cheyała' gaque lježcho ca chaque cuincho.” ⁴⁰ Chope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

*Criston' naque' xi'in diaža che da' rey David
(Mr. 12:35-37; Lc. 20:41-44)*

⁴¹ Na' šlac ne' zjanžag bene' fariseo ca', ⁴² Jesúsen' gože' legaque':

—¿Bixe xbab chonle che Criston' ben' gwlej Diosen' cont yedenabi'e? ¿No xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' leaque':

—Še ca' naquen, ¿bixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.”

⁴⁵ ¿Naxe gac nacho Criston' xi'in diaža che da' rey David? le' cuin Davin' gože' le': “Xana”.

⁴⁶ Na' notoch no goc yosyoži'e xtižen'. Na' gwzoloa žana' notoch no besyeyaxje bi yeseñabde' Jesúsen'.

23

Xtola' bene' fariseo ca' na' bene' ca' chososed chosolo'e leyna'

(Mr. 12:38-40; Lc. 11:37-54; 20:45-47)

¹ Nach Jesúsen' gwzoloa be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

² —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'. ³ Na' da'nan' cheyala' gwzenagle chegaque' cate' chosozende' le'e can' za leyna', na' cheyala' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyala' gac. ⁴ Legaque' chosozanche' dan' za leyna'. Chesonen' ca to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en legaque'. ⁵ Ca nac bene' ca', yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'osägüe'cho to pedas yiš gan' nyoj late' güjeje Xtiža' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' lecze chesone' lox xagaque' da' tonech clcl ca che bene' yezica'chle. ⁶ Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. ⁷ Chesyebede' chesap bene' legaque' bala'an cate' chesyezague' lagüe ya'a. Na' chesyebede' yese' bene' legaque' maestrw.

⁸ Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnilaže' le neda' nac biše' lježle tole yetole. ⁹ Na' lecze bitw gonxenle note'teze bene' blao ye' lne': “Xato”. Toze Diosen' ben' zoa yaba naque' Xacho. ¹⁰ Na' bitw güe'le latje ye' bene' le'e: “Xana”, le toz neda' Cristo naca' Xanle. ¹¹ Še no le'e nacle bene' blaoch, cheyala' gwzexjw yichje gaclen lježle. ¹² Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

¹³ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

¹⁴ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' choj güižle Diosen', šša choe'le diža' cont yesaque' bene' leca chonxenlne'. Gacchle castigw clcl ca yezica'chle bene' güen da' xinj.

¹⁵ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! ¡Nacle bene' gwxiye'! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chželelene' chzejni' ilne' cont yesaque' bene' xi'ach clcl ca le'e.

¹⁶ ¡Nyaše'chguaze gac che le'e! ¡Nacle ca bene' lchoj bene' chesacdde' guac yesegüe'e nez bene' yoble! Žale note'teze bene' še ne': “Yodao' blaon' zonan testigw chia' gona' can' ba gwnia’”, bitwbi zejen dan' chnen'. Perw še že': “Oro dan' de lo' yodaon' zonan testigw chia' gona' can' ba gwnia’”, nach cheyala' gone' can' gwnen'. ¹⁷ ¡Le'e nacle ca to bene' lchoj na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. ¹⁸ Na' lecze žale še to bene' že': “Mes gan' chosozeye' beyixe' ca' chesonxene' Diosen', zonan testigw chia' gona' can' ba gwnia’”, bitwbi zejen xtižen'. Perw na' še že': “Dan' xoa lo mes lo' yodaon' zonan testigw chia' gona' can' ba gwnia’”, nachen' cheyala' gone' can' gwnen'. ¹⁹ ¡Le'e nacle ca bene' lchoj na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios. ²⁰ Še bene' že': “Mes dan' zoa

lo' yodaon' zoan testigw chia' gona' can' ba gwnia'", lencze dan' xoa lo mesen' zoan testigw che'. ²¹ Na' še bene' že': "Yodaon' zoan testigw chia' gona' can' ba gwnia'", lencze zejen Diosen' naque' testigw che', le yodaon' naquen che Dios na' nan' zoe'. ²² Na' še bene' že': "Yaban' zoan testigw chia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

²³ 'Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! jNacle bene' gwxiye! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež benachle na' cheyała' gonle can' ba gwlo'o cho'ale gonle. Da' ca' zjanaquen da' zejechen gonle, perw lencze bitw cheyała' cuejyichjle bi gwnežjwle da' ca' chnežjwle Diosen'. ²⁴ jNacle ca to bene' lchoj bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyała' goncho, na' bi chonle da' ca' zjzaca'chguan.

²⁵ 'Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! jNacle bene' gwxiye! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbchegüele chca'alen. ²⁶ jLe'e bene' fariseo, nchol yichjlažda'olen! Le yetinje xtola'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

²⁷ 'Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! jNacle bene' gwxiye! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban. ²⁸ Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

²⁹ 'Nyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! jNacle bene' gwxiye! Chonšagüe'le cho'a ba che da' bene' gosoe' xtiža' Diosen' cani', na' chonšagüe'le cho'a ba che yezica'chle bene' goson da' güen. ³⁰ Na' žale: "Šaca' chio' ba zoacho ca tiemp che da' xoxxta'ocho ca', bitw bencho txen len legaque' cate' gosote' bene' ca' gosoe' xtiža' Diosen' cani'." ³¹ Perw na' yogo'lolte dan' chonle chlo'en tozce can' nacle len da' xoxxta'ole ca' bene' gosot da' bene' ca' gosoe' xtiža' Diosen' cani'. ³² Le gwza'laošaze le gon bica'ch da' zgot dan' bitw goła' yeson da' xoxxta'ole ca'.

³³ 'Le'e nacchgualene bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'. ³⁴ Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle bałe' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'. ³⁵ Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xoxxta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasene' gosote'ne' do gan' zoa yodao' blaon' na' do gan' ze mes gan' chosozoye' beyixe' chesonxene' Diosen'. ³⁶ Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xoxxta'ole ca'.

Begüine' Jesüsen' che xtola' bene' Jerusalén

(Lc. 13:34-35)

³⁷ 'Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaza' yotoba' le'e ca to jed xcaca' ben' nche' xi'in na' chyežba' legacba', perw bitw goclaze'le. ³⁸ Na' na'a ba gwlejyichj Diosen' le'e. ³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nselä' Xancho Diosen' le' nabi'e".

24

Gwžin ža yosyočinje' yodao' blaon'

(Mr. 13:1-2; Lc. 21:5-6)

¹ Na' ba cheza' Jesüsen' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' gosoe' diža' catec xdan nac yodaon' na' lencze ca' yo'o ca' zjanyechjen. ² Nach Jesüsen' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwze yeyož yežlio nga

(Mr. 13:23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesús'en' ba chi'e lo ya'an, bene' ca' zjanaque' le' txen gosebigue' lagüen' gose'ene' šiže:

—Che'neto' nao' neto' batcan' gac da' ca'. Na' ĩnac gac nezeto' cate' ba zoa bagwze yido' na' ba zoa yeyoż yežlion'?

⁴ Nach Jesús'en' boži'e xtiža'gaquen' gwne':

—Le gwsaca' cont notno siye' le'e. ⁵ Le zan bene' yesaš yežlio nga bene' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan. ⁶ Na' yenele chac gwdiļe nile nale, na' yenele guac gwdiļe, perw bi žeble, le can' cheyaļa' gac. Perw gague lenna' nacho ba bžin ža yeyoż yežlion'. ⁷ Le yesediļ to yež len yeto yež yoble na' to naciön len yeto naciön yoble. Na' cue' yižgüe', na' gata' gwbin na' zan cuen ga xo'chgua lo yežlion'. ⁸ Perw na' yogo' da' qui gac cate' za' solao gata' yela' zi'.

⁹ Nach bene' ca' že' yogo' naciön yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. ¹⁰ Cana' bene' zan bene' ba chesejnilaže' neda' yesebejyichje' bich yesejnilaže' neda'. Na' legacetez' yesechje' yeson lježgaque' lo na' bene' da' chesegue'ede' legaque'. ¹¹ Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. ¹² Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'. ¹³ Perw na' note'tezle gwyo gwchejlaže'le cont bi cuejyichje dan' chejnilaže'le neda' žinten gatle, nach šjayzoale len Diosen'. ¹⁴ Na' šja'ac bene' doxen lo yežlion' yesejixjue'ede' diža' güen cont yeseneze benachen' cheyaļa' yosozenague' che Diosen' nach nabi'e yichjlažda'ogaque'. Na' cate' bene' že' yogo' naciön ba zjanezde' da'na', cana'ch yeyoż yežlion'.

¹⁵⁻¹⁶ Da' Daniel ben' gwdixjue'ede' xtiža' Dios cani' bzoje' che da' zbanchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyaļa' yosoxonje' šja'aque' do ya'adao'. (Bene' gwlaben' cheyaļa' šejni'iden'.) ¹⁷ Na' bene' chda do yichjo'o che ližen', bi yeyetje' yotobe' xšinlaže' že' ližen', con yoxonje'. ¹⁸ Na' bene' chda yiže' bi yeyej liže' šjayxi'e xałane'. ¹⁹ iNyaše'chguaze zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca'. ²⁰ Na' le nab lao Dios bi yažjen gwxonje cate' chac zag o lo ža che Dios. ²¹ Le yesaquen ža da' leca yesale' bene'. Cate' gwxtete yežlion' na' ža na'aža nono na' gale' ca', neca žinlažen' yesale'de' ca' da' yoble. ²² Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

²³ Cana' še no ye' le'e: "Le na'šc, nga zoa Criston' ben' gwlej Diosen' cont nabi'e", o "Le na'šc, na' zoe'", ne ca'cze bi šejle'le. ²⁴ Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. ²⁵ Ba nezele can' gac, le ba gwdixjue'eda' le'e yogo' can' gac. ²⁶ Na' še yese'e le'e: "Zoa Criston' latje dašen'", bitw gwzenag chegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le chegaque'. ²⁷ Can' chac cate' chep yes chšenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' benač. Yida' zejzenez na' yogo' loļ bene' yesele'ede' neda'. ²⁸ Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble

(Mr 13:24-37; Lc. 21:25-33; 17:26-30, 34-36)

²⁹ Na' cate' la' yeyože saca'zi' benachen', gwbižen' yeyaquen čol, na' bion' bich gwsenin'. Nach beljw ca' yeselazon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ³⁰ Na' cana'ch bene' že' yežlion' yesele'ede' neda' naca' ben' gwseļa' Diosen' golja' benač za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' naciön che yežlion' yesebežyaše', bene' bi gosejnilaže' neda'. ³¹ Na' caten' yida', to trompeta' cuežen žiže, na' sela' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

³² Le gwzenag che jempl nga che yag yixgüigw: Cate' ba chzoloa chebešw yaguen' na' chelan' laga' che'en' dao', chache'ele bačh zoa yela' tiemp yejon'. ³³ Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'. ³⁴ Da' li žia' le'e, biña' yenit diaža che le'e nita'le na'a cate' ba goc yogo' loļ da' ca'. ³⁵ Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

³⁶ Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toz Xa' Dios neze.

³⁷ Diosen' gwsele' neda' golja' benač, na' can' goc tiemp che da' Noé, lecze can' gac caten' neda' yida' da' yoble. ³⁸ Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. ³⁹ Bitw gosacbe'ede' bin' gac. Cate'ch goc yejw sio' juisyw na' bia'

nisen' yogo'lole' cana'ch gosache'ede'. Lecz can' gac, con cate'ch yida' da' yoble cana'chen' yesache'e bene' bin' gac. ⁴⁰ Quingan' gac caten' yida' da' yoble: Chope bene' nite' do yixe', toe' yezi' yeca'a, na' yetoe' yocua'ana'. ⁴¹ Na' chope no'ole nite' chesote', toe' yezi' yeca'a na' yetoe' yocua'ana'.

⁴² Da'nan' le soa le cueze, le bi nezele bi za bi horen' yida' da' yoble, neda' naca' Xanle. ⁴³ Le gon xbab che da' nga, šaca' neze xan yo'on' do bi hor lo yelen' zin bene' gwbanna' ližen', na'ze' cont bitw güe' e latje šo' ben' ližen' cuane' xšinlazen'. ⁴⁴ Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' benačh.

Mos ben' chon güen, na' mos ben' bi chon güen
(Lc. 12:41-48)

⁴⁵ Note'te zle ze zoele lez bate'teze, zaca'leble ca to mos bene' naque' bene' sina' na' bene' chon da' cheyla' gone'. Na' še to bene' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tza tza. ⁴⁶ Še to bene' mosen' chonteze' can' gož xanen' le', mbalaz soe' cate' yežin xanen'. ⁴⁷ Da' li žia le'e, xanen' cue' lo na' mosen' yogo'lol da' de che'. ⁴⁸ Perw še mosen' naque' bene' zgot na' gone' xbab ne': "Ba gwže xanan'". ⁴⁹ Nach solagüe' tile' mos ca' yezica'chle na' ye'ej gagwxate' len no bene' borrašw, ⁵⁰ nach xane'na' yežine' to ža senyale' le' to hor bi nache'ede'. ⁵¹ Na' dan' bi chon mosen' ca cheyla' gone', xane'na' chinchgüe' le' ca gatte'. Gac che' can' chac che note'teze bene' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglagüe'.

25

Jempl che ši no'ole güego' ja'aque' to yela' güešagna'

¹ Nach Jesüsen' goze'e bene' ca' zjanaque' le' txen:
—Cheyla' soale lez batcan' yedenabi'a, can' gwnita' no'ole chesejni'i no'ol ca' za' gua'a diza' chen'. Goc to yela' güešagna', na' nita' ši no'ol güego' zjanaque' migw che bene' ca' chosošagnan'. Na' zjanxobe' lintern čhegaque' ja'aque' jaseleze' yesyechoj bene' ca' liž no'olen' par šja'aque' liž bene' byon' txen. ² Na' gayo' no'ol ca' gosaque' bene' chejni'i na' yegayoe' bibi xbab gosone'. ³ Cate' no'ol ca' bibi xbab goson gosa'ac liže', zjanxobe' lintern čhegaquen', perw bitw gosoxe' botey gan' yože set dan' yosochine' cate' yebiž dan' yože lo' lintern čhegaquen'. ⁴ Na' no'ol ca' chesejni'i, zjanxobe' lintern čhegaque' lente botey seten' dan' yosochine' cate' yebiž dan' yože lo' lintern čhegaquen'. ⁵ Na' bene' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'. ⁶ Na' do chel, to bene' gwne' zižje, gože' legaque': "Ba chesyechoj bene' güešagnan'. Le šo'o šjašagchone'." ⁷ Na' cate' gože' legaque' ca', yogo' no'ol ca' gosezeche' na' gosechogue' mešw dan' gwyey che lintern' na' bosyogualen' da' yoble. ⁸ Na' no'ol ca' bibi xbab cheson gose'e no'ol ca' yegayo': "Žbi gonle late' dan' yože botey chelen' neto'? le ba chebiž četon'." ⁹ Nach no'ol ca' gose'e legaque': "Bitw gac gonto' late' chele, le dan' de četon' bitw gaquen' par yogo'cho. San le šja'ac le šjaji' chelen' ga choten'." ¹⁰ Nach no'ol ca' bi goson xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' chejni'i, goso'e txen len bene' ca' chosošagnan' lo' yo'o gan' chesone' lnin'. Nach mos ca' bososeyjue' puerten'. ¹¹ Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Bene', gwsaljwšca puerta' cont šo'to'." ¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesüsen' bene' ca' zjanaque' le' txen:

—Ca'czen' cheyla' soale lez batcan' yedenabi'a, le bitw nezele bi za bi hor yida' yežlio nga da' yoble, neda' naca' ben' gwseła' Diosen' golja' benačh.

Jempl che ben' bocua'anlene' xmore' ca' mechon'

¹⁴ Na' dan' yida' yežlio nga da' yoble yedenabi'a zaca'leben ca da' nga goc. To bene' gwyeye' nación zito'. Na' za' se'e goxe' mos che' ca' na' gwlo'e lo' na'gaque' xmechue' cont gosone' delgens. ¹⁵ Toe' bocua'anlene' gayo' mil. Na' yetoe' bocua'anlene' čhop mil. Na' yetoe' bocua'anlene' to mil. Bnežjue' legaque' con ca ble'ede' da' chac yeson to toe'. Beyož bene' ca' na' gwze'e. ¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan lecze gayo' mil. ¹⁷ Lecze ca' ben ben' bocua'anlene' čhope mil, na' bene' gan yechope mil. ¹⁸ Na' ben' bnežjue' to mil gwyeye' jacuaše' xmechw xanen' to lo' yechw da' gwche'ene' lo' yo.

¹⁹ Goc šsa gwza' xan mos ca' cate' bežine', nach bene' mandadw ja'ac xmore' ca' lagüen' cont bosyodie' cuent. ²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' bežo' neda'. Na' ba bena' gan yegayo' mil." ²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyla' gono'. Na' dan' beno'

can' cheyała' gonon' len da' daon' bocua'anlena' len', da'nán' gona' lo nao' da' xench. Gwyo'o cont so' mbalaz len neda'." ²² Nach cate' bžin ben' bocua'anlene' čhope mil, bena' gože'ne': "Xana', ni de da' čhope mil dan' bocua'anleno' neda', na' ba bena' gan yechope mil." ²³ Nach gož xanen' le': "Ba beno' da' güen. Naco' mos güen na' ba beno' ca cheyała' gono'. Na' dan' beno' can' cheyała' gonon' len da' daon' bocua'anlena' le', da'nán' gona' lo nao' da' xench. Gwyo'o cont so' mbalaz len neda'." ²⁴ Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nezda' naco' to beñe' znia. Chelapo' da' gosaz beñe' yoble, na' chotoba' coseš ga goson beñe' yoble žin. ²⁵ Da'nán' gwya'a jače'ena' to yechw na' bcuaša' xmechon', le bžeba' še gwñitan'. Na' na'a bezi'scan!." ²⁶ Nach xanen' gože' le': "iNaco' mos mal, na' naco' xagüed! Nezdo' chelapa' ga gosaz beñe' yoble, na' chotoba' coseš ga goson beñe' yoble žin. ²⁷ Na' lagüe da' nezdo' chona' ca' čibixchen' bi gwlejo' xmechuan' beñe' yoble cont yezi'an len yichjen na'a ba bela'a?" ²⁸ Nach gože' xmoše' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. ²⁹ Can' naquen, note'teze beñe' chon güen len dan' chnežjo xanen' le', xanen' gwnežjochce' čhe', cont gata' da' zčha'och čhe'. Perw na' note'teze beñe' bi chgone' žin dan' chnežjo xanen' le', yeca'a xanen' da' daon' noxe'na'. ³⁰ Na' ca' nac mos xagüed nga, le yebeje' le čhe'əxoxje' gan' nac čhoj' na' cuežyaše' na' gagwxejte laye' dan' leca žaglagüe'."

Can' gac cate' Jesúsen' gone' yela' justis čhe yogo' nación

³¹ Diosen' gwsele' neda' golja' beñach, na' cate' yida' da' yoble nsa'a yela' zaca' juisyw čhia' na' nčhi'a yogo' angl čhia' ca', cana'ch cui'a nabi'a güen juisyw can' chnabia' Dios ben' zoa yaba. ³² Na' yapa' yogo' beñe' che yogo' nación ca' yeside' laguan'. Na' cate' ba nita' yogüe' na' la'ane' can' chon to beñe' güeye xila' cate' chebeje' partle xila' ca' na' partle šib ca'. ³³ Na' beñe' ca' zjanac beñe' güen lao Diosen' dan' ba gosejnilaže' neda', gwnita' legaque' cuitan' šla'a liča. Perw beñe' mal ca', gwnita' legaque' cuitan' šla'a robes. ³⁴ Na' neda' naca' rey yapa' beñe' ca' nita' šla'a ličan': "Ba ben Xa' Diosen' cont le'e soale mbalaz. Le da nga cont gona' nabia'le txen len neda' can' ba nžia bia' Diosen' cate' gwxtete yežlio. ³⁵ Gona' cont nabia'cho txen, le cate' gwdon'a le'e beñe dan' gwdagua'. Na' cate' gwbiłda' nis, le'e beñe da' güe'aja'. Na' cate' goca' ca' beñe' zito' le'e bleble neda' ližlen'. ³⁶ Na' cate' bi gota' da' čhaza', le'e beñe da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." ³⁷ Na' beñe' güen ca' yese'e neda': "Xanto', čbaten' ble'eto' le' gwdon'o na' beñto' da' gwđago'? Na' čbaten' gwbiłdo' na' beñto' da' güe'ejo'? ³⁸ Na' čbaten' goco' ca' beñe' zito' na' blebto' le'? Na' čbaten' ble'eto' le' bi de da' čhazo' na' beñto' da' gwyazo'? ³⁹ Na' čbaten' gocšendo' o goto' ližya na' bedena'to' le'?" ⁴⁰ Na' neda' naca' rey yape'gaca'ne': "Da' li žia' le'e, beñe' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le' legaque', la'cžla' bitec bi zjazaque' len beñachen', lencze nedan' beyaše'laže'le'."

⁴¹ Nach beñe' ca' nita' šla'a robesle, beñe' mal ca', yape'gaca'ne': "Le cuas ca'ale. Ba žia bia' chele cuiayi'le yela' güen da' mal chelen'. Le šja'ac lo yi' gabil dan' bi cheyol, yi' dan' bxeñ Diosen' cont saca'zi' Satanás toli tocañe len da' xigüe' ca' cheson xšinen. ⁴² Le šja'ac lo yi' gabilen', le cate' gwdon'a bitw beñe dan' gagua'. Cate' gwbiłda' bitw beñe da' ye'aja'. ⁴³ Cate' goca' ca' beñe' zito' bitw bleble neda' ližle. Cate' bi gota' da' čhaza' bitw beñe da' čhaza'. Cate' gocšenda' na' cate' gota' ližya, bitw bedena'le neda'." ⁴⁴ Nach legaque' lecze yosyoži'e xtižan' yesene': "Xanto', čbaten' bi beyaše'to' le' cate' gwdon'o o gwbiłdo', o goco' beñe' zito', o bi gota' da' čhazo', o gocšendo', o goto' ližyan'?" ⁴⁵ Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le' beñe' ca' chesejnilaže' neda', la'cze bibi zjazaque' len beñachen', da'nán' lencze nedan' bi beyaše'laže'le'." ⁴⁶ Nach beñe' mal ca' yesezaca'zi'e toli tocañe. Perw beñe' ca' chesone' güen lao Diosen' yesezoe' mbalaz toli tocañe.

26

Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' beñe' ca' gwleje' cont zjanaque' txen len le':

² —Ba nezele yechope žazen' gála' in'i pascw chechon'. Na' cana' gaca' lo na' beñe' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' beñach.

³ Nach bxož gwnabia' ca' na' beñe' ca' chososed chosolo'e dan' bzoj da' Moisésen' na' beñe' gole blao ca' chesenabi'e nación Israel chechon' besedobe' chyo'o liž bxož blao ben' le Caifás.

⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. ⁵ Na' gosene':

—Bi senchone' lo in'in' cont ca yesebec beñe' žaš.

To no'ole bzoe' set zix yichj Jesúsen'

(Mr. 14:3-9; Jn. 12:1-8)

⁶ Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra. ⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chl'a' zix' da' leca chzaca' la'ay. Na' no'olen' bzoachochje' seten' yichj Jesúsen'. ⁸ Na' bene' ca' zjanaque' txen len Jesúsen' cate' besele'ede' can' ben no'olen' beseže'e' na' gosene':

—¿Bixchen' con benditjde' set zix' nga? ⁹ Ša no bete' len, yesonen mechw xen na' yosonežjuen' gaclenen bene' yaše'.

¹⁰ Jesúsen' gocbe'ede' bin' gosene' nach gože' legaue':

—¿Bixchen' chnele che no'olen'? Dan' bene' len neda' nga naquen güen. ¹¹ Le bene' yaše' ca' bate'teze nita'cze' len le'e, san nedan' bich soa' yessa len le'e. ¹² Dan' bguazje'nda' set zixen' bene' dan' cheyała' yesone' len neda' cate' gaša'. ¹³ Da' li žia' le'e, doxen yežlio gate'teze šjasedixjue'e bene' diža' güen dan' chzejni' in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jañe'e bžox gwnabia' ca'. ¹⁵ Na' ježe' legaue':

—¿Gaca'te' goñle neda' cont gwdia' Jesúsen' lo na'le?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. ¹⁶ Nach cana' Judasen' gwzologüe' gwdiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaue' can' yesone' šjasyeza'laže' yela' got čhen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' lni' caten' chesagüe' yetextil dan' bibi levadura yo'o, na' ža nechw čhe lni' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' čhe pascon'?

¹⁸ Nach Jesúsen' gože' legaue':

—Le'e šja'ac ciudan' gan' zoa to bene' byo ben' nombia'cho na' ye'ln'e: "Maestron' že' ba zoa žin ža gac da' cheyała' gac čhe', na' ližo' nga che'nde' gagwlen'to'ne' xše' lni' pascon'."

¹⁹ Nach bene' ca' gosone' can' gož Jesúsen' legaue', jasesini'e xše' že' lni'na'.

²⁰ Na' cate' beyož gwxo'a gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. ²¹ Na' šlac chesagüen' gož Jesúsen' legaue':

—Da' li žia' le'e, to le'e gwdele neda' lo na' bene' ca' chesegue'e neda'.

²² Nach legaue' besyeyaše'laže'de', nach gosezologüe' tgüje tgüje' gosenabde' le' gose'ene':

—Xana', žnedan' gona' ca'?

²³ Nach gože' legaue':

—To ben' chagw len neda' txen toz lo' ye'en, le' gwdie' neda' lo na' bene' ca'. ²⁴ Na' gac čhia' can' nyoj le'e Xtiža' Diosen', neda' naca' ben' gwsela' Diosen' golja' benach, perw nyaše' chguaze nac ben' gwdie' neda' lo na' bene' ca'. Yejni'acle ša bi golje'.

²⁵ Nach Judasen' ben' za' gwdie' Jesúsen' lo na' bene' ca' gože'ne':

—Maestrw, žnedan' gwdia' le' lo na' bene' ca'?

Jesúsen' gože'ne':

—Le len'.

²⁶ Na' šlac chesagüen', Jesúsen' gwxi'e to yetextilen' na' beyož be'e yela' choxclen čhe Dios, bzojxen' na' bnežjuen' bene' ca' zjanaque' le' txen, gože' legaue':

—Le gagon'. Lenna' cuerp čhian'.

²⁷ Nach bežue' to vas gan' yože nis uvasen', na' beyož be'e yela' choxclen čhe Dios boznežjuen' legaue', goze'ene':

—Yogo'le, le ye'ej late' güje dan' yože lo' vas nga. ²⁸ Da' nga xčhena' na' chzanlažan' laljen neče xtola' yogo'lol beňach. Na' laljen cont solao gac da' cob dan' gwna Diosen' gone' gaclene' beňachen'. ²⁹ Čhnia' le'e, bich ye'eja' nis uvas na'a. Cate'ch žin ža ba zoacho txen gan' zoa Xa' Diosen' čhnabi'e, cana' ye'ejan' da' yoble.

Jesúsen' gwne' Pedroa' bi čebe' še nombi'e le'

(Mr. 14:26-31; Lc. 22:31-34; Jn. 13:36-38)

³⁰ Na' beyož gosonxene' Diosen' len to da' gosole', nach gosa'aque' ja'aque' Ya'a Olivos.

³¹ Na' šlac zjangüe'e nezen' Jesúsen' gože' legaue':

—Na'aže' yogo'le cuejyichjle neda' neče dan' gac čhian'. Le nyojczen le'e Xtiža' Diosen' žan: "Gota' bene' güeye' xilan' na' xila' ca' yesaslasba'." ³² Perw na' cate' yosban Diosen' neda' ladjo bene' guat ca', yobch yeya'a Galilea ca le'e.

³³ Nach Pedroa' gože' Jesúsen':

—La' yogó' bene' quinga yesebejyichje' le', neda' gwbat gona' ca'.

³⁴ Jesúsén' gože' le':

—Da' li' zia' le', bina' cuež' jean' na'aže' cate' gac šon' ni'a bi chčebo' še nombi'o neda'.

³⁵ Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' ľecze ca' yogó' bene' šižinw ca' zjanaque' Jesúsén' txen gosene' ca'.

Jesúsén' boľ güiže' Diosen' to latje dan' nzi' Getsemaní

(Mr. 14:32-42; Lc. 22:39-46)

³⁶ Nach besežine' latje gan' nzi' Getsemaní, na' Jesúsén' gože' bene' ca' zjanaque' le' txen:

—Ngaze le' cue' šlac ša'a na'le' šjal' güiža' Diosen'.

³⁷ Na' gwče'e Pedroa' len chop xi'in Zebedeo, Jacobon' len Juanna'. Na' Jesúsén' gwzolao gocyše'chgüede', na' benchgüe' xbab. ³⁸ Nach gože' legaque':

—Lo' yichjlažda'oguan' chacyaše'chgüeda', chacda' con gatzca' catequen' chžaglagua'. Nga le' yega'an bi tasle, le' na' txen len neda'.

³⁹ Nach Jesúsén' gwžialagüe' yelate' na' jačhaze' lo' yon' cosčo'ale nach boľ güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

⁴⁰ Nach beyeje' gan' nita' bene' ca' šone' na' ble'ede' zjanite' chesetase'. Na' gože' Pedroa':

—¿Ne šlož dao' ca' goc cuejle' bišgal len neda'? ⁴¹ Bi tasle na' le' yoľ güiž' Dios cont bi gon gwxiyen' le'e gan'. Nezda' che'nele' na'zle len neda' perw bi chzoele.

⁴² Na' gosze'e gan' nite' na' da' yoble jal' güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezyeje' gan' niten' na' da' yoble ble'ede' chesetase' le' ba chesežode' yejlagüen' bišgal.

⁴⁴ Na' gwze'e da' yoble gan' nite'na' jal' güiže' Diosen' da' gwyone' ni'a, na' goznacze' da' yoble can' ba gwnen'. ⁴⁵ Na' bezžine' gan' nita' bene' ca' šone' nach gože' legaque':

—Na'ach guaque' tasle na' yezi'laže'le. Ba gole gwde to bene' neda' lo' na' bene' güen da' xinj ca', neda' naca' ben' gwsela' Diosen' golja' benač. ⁴⁶ Le' čhas. Le' yeyo'o. Ba za' ben' gon neda' lo' na'gague'.

Judasen' bdié' Jesúsén' lo' na' bene' chesegue'ede' le'

(Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsén' dižan' ca' cate' bžin Judas ben' goque' txen len bene' šižinw ca' gwleje Jesúsén' cont zjanaque' le' txen. Na' zan bene' zja'ac len le' zjanoxe' no yag, no spada, bene' gosesela' bžoz gwnabia' ca' na' bene' gole blao ca' chesenabi'e nación Israel' chechon'. ⁴⁸ Na' Judas ben' bdié' le' lo' na' bene' ca', gože' legaque' nac yesežezde' non' yesezene', gwne':

—Ben' gwnopa' xague', le'na' Jesús. Le' sene'.

⁴⁹ Nach la' gwbiga'te' cuit Jesúsén', gože'ne':

—Patiox, Maestrw.

Na' bnope'ne'. ⁵⁰ Jesúsén' gože'ne':

—Migw čhia', čbixčhen' zao' nga?

Nach la' gosebiga'te' bene' ca' gosezene' Jesúsén' na' goseče'ene'.

⁵¹ Na' to ben' nac txen len Jesúsén' gwleje' spada čhen' na' gwđinen' mos čhe bžoz blaon' gwčoghte' šla'a nagen'. ⁵² Nach Jesúsén' gože'ne':

—Bego'o spada chion' lo' liženna', le' yogó' bene' chesote' bene' len spada, ľecze len chesatlene'. ⁵³ Čbi nezdo' guac nabda' Xan' cont la' sela'te' angl' zan juisyw bene' yesaclene' neda'? ⁵⁴ Perw še gona' ca' čnacxe' gac dan' cheyala' gac dan' nyoj Xtiža' Diosen' žan quinga gaquen'?

⁵⁵ Nach Jesúsén' gože' bene' ca' zjasezen le':

—čBixčhen' nonle' neda' ca' to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsd blo'eda' bene' že'na' na' bi gwzenle' neda'. ⁵⁶ Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogó' bene' ca' zjanaque' Jesúsén' txen bosoxonje' gosebejyichje'ne'.

Goseče'e Jesúsén' lao bene' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' bene' ca' gosezen Jesúsén' goseče'ene' lao Caifás ben' nac bžoz blao, gan' ba zjanžag bene' ca' chososed chosolo'e dan' bžoj da' Moisésén' na' len bene' gole blao ca' chesenabi'e nación chechon'. ⁵⁸ Nach Pedroa' na'ogüe' Jesúsén' zito' zito'le bžinte' liž bžoz blaon', na' gwyo'e chyo'ona' gwchi'e len bene' ca' chesape' yodao' blaon', le' goclaže' le'ede' naquen' zelao gac čhe Jesúsén'.

⁵⁹ Nach yogo' b̄xoz gwnabia' ca' na' yezica'chle bene' gole blao ca' chesenabi'e naci3n chechon' cheseyiljwlaže' bi diža' güenlaže' yeso'e che Jesús'en' cont yesote'ne'. ⁶⁰ Perw goc sša bitw besyeželde' bi diža' güenlaže' yosode'ede' le' cont gosožie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yeçhope bene' na' bedilen can' gosenen'. ⁶¹ Quinga gosene':

—Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

⁶² Nach gwzoža' b̄xoz blaon' gože' Jesús'en':

—¿Bibi de bi nao' ca' nac da' nga chosocuiš bene' quinga le'?

⁶³ Bitwbi gwna Jesús'en'. Nach gož b̄xoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli' tocañe cue'e da' balı' še ledó' can' žon'.

⁶⁴ Jesús'en' gože'ne':

—Le can' žale nan' naca'. Diosen' gwsele' neda' golja' benach. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene b̄xoz blaon' xtiža' Jesús'en', gwšo' gwçheza'te xen', le par le' da' mal juisyon' gwna Jesús'en' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'.

⁶⁶ ¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca' Dios.

⁶⁷ Nach bosyoži'e xene' cho'alao Jesús'en', na' gosebaže'ne', na' bale' gosegape' xague'na'.

⁶⁸ Nach gose'ene':

—Še len' naco' Criston', gwñeya'ašč, gwna neto', ¿non' chgapa' le'?

Pedroa' bi gwçhebe' še nombi'e Jesús'en'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že' na', Pedroa' bitw gwçhebe' še naque' txen len Jesús'en', na' gože' no'olen':

—Bi ñezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinna' le', na' goze'e bene' ca' že'na':

—Lecze len benga naque' txen len Jesús bene' Nazareten'.

⁷² Da' yoble bitw gwçhebe' še naque' txen len Jesús'en', nach gwne':

—Na' zoa Diosen' cue'e da' balı' bitw nombi'a bena' žo' ca'.

⁷³ Na' goccze šlož, gosebiga' bene' ca' že'na' goseze'e Pedroa':

—Da' licze, naco' txen len legaque', le nacia' chñio' can' chesene bene' Galilea ca'.

⁷⁴ Nach Pedroa' chop šone ñi'a gwne':

—Diosen' goñe' ga saca'zi'a še chonlaža' dan' žia' bi nombi'a bena'.

Na' la' gwchežte to jea. ⁷⁵ Nach jayze'e Pedroa' can' gož Jesús'en' le': "Biña' cuež jean' cate' gac šone ñi'a bi chchebo' še nombi'o neda'." Nach beze'e leca gwchežyaše'.

27

Goseche'e Jesús'en' lao Pilaton'

(Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b̄xoz gwnabia' ca' na' bene' gole blao ca' chesenabia' naci3n chechon' besyedobe' na' gosechoglagüen' yesote' Jesús'en'. ² Nach bosocheje'ne' na' goseche'ene' jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesús'en' lo' na' bene' ca', cate' gocbe'ede' ba gosechoglagüen' yesote' Jesús'en', betinjde' dan' bdie' le' lo' na' b̄xoz gwnabia' ca' na' bene' gole blao ca'. Nach gwyeje' laogaquen' par bonežjue' legaque' šichoa mechw platan'. ⁴ Nach gože' legaque':

—Malen' bena' bdia' lo' na'len' to bene' bi nape' dola'.

Na' gose'ene':

—Bitwbi dola' nap neto' dan' beno' ca'.

⁵ Nach Judasen' božale' mechw ca' lo' yodao' blaon', nach beze'e na' jaylo'o do yene' beyot cuine'.

⁶ Beyož beza' Judasen', bħoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwđixjwcho cont yega'a yela' mban che to bene'.

⁷ Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'. ⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyxjue' cont gosote' Jesúsen'. ⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena bene' Israel zaca' bena'. ¹⁰ Na' gosezi'e yežlio che to bene' güen yeso', can' gwna Xancho Diosen' neda'."

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseche'e Jesúsen' lao gobernadore' na' šlac zeche' lagüen', gobernadore' gože'ne':

—žLen' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' bħoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'. ¹³ Nach Pilaton' gože'ne':

—žBi chendo' catec da' žan xya nga chesagüe' chio'?

¹⁴ Perw Jesúsen' ne to xtiže'na' bitw boži'e, na' bebanechgüe gobernadore'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadore' gwsane' to bene' de ližya cate' čala' lni pascw checho, con bene' yeseñab bene' gualaž chechon'. ¹⁶ Na' ližya na' de to bene' chzechgua che' naque' bene' güen da' xinj, na' le' Barrabás. ¹⁷ Nach Pilaton' gože' bene' ca' zjanžaguen':

—žNoe' bene' quinga chaclaže'le gwsana'? žGwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

¹⁸ Gočbe'e Pilaton' dan' chesacxi'a bħoz gwnabia' ca' Jesúsen', da' nan' bosodie' le' lo' ne'en.

¹⁹ Ca' čhi' Pilaton' gan' chone' yela' justisen', cate' bžin to rson da' gwsela' no'ol čen', gože'ne': "Bitw bi gondo' bena', le bibi doła' nape'. Nže'e gwñeda'ne' yel na' bžaglaochgua' neče dan' chac che bena'."

²⁰ Na' bħoz gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yeseñabe' gwsane' Barrabásen' na' yeseñabe' yesote' Jesúsen'. ²¹ Nach gobernadore' gože' legaque' da' yoble:

—žNo bene' quinga čhope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—žBixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—žBde'e le'e yag cruz!

²³ Nach gož gobernadore' legaque':

—žBixe da' xinj nonen'?

Na' legaque' da' yoble bososya'achgüe' gose'ene':

—žBde'e le'e yag cruz!

²⁴ Gočbe'e Pilaton' bicze bi gac gone'. Ba čyala'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagá' dan' gotlene', xbagá' le'e naquen še ba betwlene'.

²⁵ Nach yogo' bene' ca' gose'ene':

—Xbagá' neto' na' xbagá' xi'into' naquen che yela' got che benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsen', nach bene' le' lo' na'gaque' cont yosode'ene' le'e yag cruzen'.

²⁷ Nach soldadw che gobernadore' goseche'e Jesúsen' lo' yo'o che gobernadore', nach bosyotobe' yogo' soldadw ca'. ²⁸ Na' goseyi'e xalana' Jesúsen' na' bosoguacue'ne' to lache' xna' ca' dan' chesaz rey ca'. ²⁹ Na' gosone' to corona de xis yeše' bosozoen' yichjen', na' ne'e liča bosogoxe'ne' to xis. Na' bosozoa xibe' lagüen' par gosonle' che', nach gose'ene':

—žViva rey che bene' Israel!

³⁰ Nach bosozí'ene' xene', na' besyeque'e xis dan' noxen' na' bosozeten' yichje'. ³¹ Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzen'.

*Bosode'e Jesúsen' le'e yag cruzen'**(Mr. 15:21-32; Lc. 23:26-43; Jn. 19:17-27)*

³² Nach besechoje' ciudan' na' besyežague' to beñe' Cirene le Simón na' gosone' byen bosogüe'ene' yag cruz che Jesúsen'.

³³ Na' besežine' to latje gan' nzi' Gólgota, zeje diža' latje che žit yichj beñe' guat. ³⁴ Na' bosonežjue' Jesúsen' vino da' nchiže to da' zla' par ye'ejen', perw le' con bñixen', bitw güe'ejen'.

³⁵ Na' cate' beyož bosode'ene' le'e yag cruzen', soldadw ca' gosone' rifa cate' besyele'e xałane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xałanan' na' yesezi' che che', yesonen' rifa." ³⁶ Nach gosebi'e gosape'ne'. ³⁷ Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che beñe' Israel ca'."

³⁸ Na' lecze cana' bosode'e čhope beñe' gwban le'e yečhope yag cruz. Toe' gwda' cuit Jesúsen' liča na' yetoe' cuite' robes. ³⁹ Na' beñe' ca' gosede gan' da' Jesúsen' gason yichjlagüe' dan' leca besegue'ede' le', na' gosezi'diže' le', ⁴⁰ gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

⁴¹ Na' len bħox gwnabia' ca' na' len beñe' ca' chososed chosolo'e dan' bzoj da' Moisésen' na' len beñe' fariseo ca', na' len beñe' gole blao ca' chesenabi'e nación chechon', yogüe' gosenzi'diže'ne' na' gosene':

⁴² —¡Yezica'chle beñe' bosle' na' bi chac yosla cuine'! Še naque' rey che chio' beñe' Israel, yeletj cuine' le'e yag cruzen' na'a na' šejle'cho che'. ⁴³ Le' chejnilaže' Diosen', le gwne': "Dogualje Xi'in Dios neda'." ¡Na' le'echo yosla Diosen' le' na'a še chacde' le'!

⁴⁴ Na' beñe' gwban ca' zjada' le'e yag cruzen' chop la'a cuiten', lecze gosenzi'diže' le'.

*Can' goc cate' got Jesúsen'**(Mr. 15:33-41; Lc. 23:44-49; Jn. 19:28-30)*

⁴⁵ Na' do guagwbiz doxen yežlion' goc choł bžinte cheda šone. ⁴⁶ Na' do cheda šone Jesúsen' bosye'e žižje gwne':

—Elí, Elí, ¿lama sabactani? (Zeje diža: Dios chia', Dios chia', ¿bixchen' ba gwlejyichjo' neda'?)

⁴⁷ Na' bał beñe' ca' zjanita' na' gosende' na' gosene':

—Le gwzenag, benga choł güiže' da' Elías ben' be' xtiža' Diosen' cani'.

⁴⁸ Nach la' bchojte to beñe' gwyeyse' jaxi'e to esponja na' bzažeden' vino zichj na' bzoen' to lao xis toñe nach jažiguen' cho'a Jesúsen' cont xopen'. ⁴⁹ Na' yebałe' gose'e bena':

—Cüedcho, yešč še güeze Eliasen' yosle'ne'.

⁵⁰ Nach da' yoble Jesúsen' bosye'e žižje na' gote'. ⁵¹ Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'ele. Na' gwxo'chgua gosoxjte yej ca'. ⁵² Na' lecze besoyaljo ba che beñe' ba gosat. Na' zan da' beñe' ca' gosejnilaže' Diosen' besyebane' ladjo beñe' guat ca'. ⁵³ Nach caten' ba beban Jesúsen' ladjo beñe' guat ca', besyechoje' lo' ba čegaquen' na' jaya'aque' jaseło'elagüe' ciuda Jerusalén. Na' zan beñe' besele'ede' legaque'.

⁵⁴ Na' ca nac xan soldadw ca' na' beñe' ca' nče'e, beñe' nita' chesape' Jesúsen', cate' besele'ede' can' gwxo' na' bichle da' ca' goc, besežebchgüe', na' gosene':

—Da' li le benga goc dogualje Xi'in Dios.

⁵⁵ Na' lecze nita' zan no'ole ladjo beñe' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beže'e distritw Galilean' par chesaclene' le' len bi da' chyažjde'.

⁵⁶ Na' len no'ol ca' María beñe' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

*Bosocuaše' Jesúsen'**(Mr. 15:42-47; Lc. 23:50-56; Jn. 19:38-42)*

⁵⁷ Na' gwzooa to beñe' gwni'a beñe' ciuda Arimatea le' José na' ba gwzolao chzenague' che Jesúsen'. Na' cate' ba chxoa gwbiž ⁵⁸ Josén' gwyeye' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp chen'. ⁵⁹ Nach Josén' bego'lo ne'e cuerp che Jesúsen' na' blaže'ne' to lache' xen da' nyach. ⁶⁰ Na' gwlo'e cuerp chen' to lo' bloj cobe che' da' gwche'ene' le'e yej. Na' blóle' to yej xen cho'a blojen' cont bseyjon len. Nach beze'e. ⁶¹ Na' María beñe' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsen'

⁶² Na' beteyo, gwde žan' caten' chososiñi'e par ža che Diosen', besedobe bħox gwnabia' ca' na' beñe' fariseo ca' na' ja'aque' gan' zoa Pilaton'. ⁶³ Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': "Yeyon ža yebana' ladjo bene' guat ca.'" ⁶⁴ Da'n'an' gwseła'sca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyejeje' cuerp čhen' na' yese'e bene' le bebane' ladjo bene' guat ca'. Le še yesaque bene' ba bebane' ladjo bene' guat ca', gonchen malech clal ca len diža' dan' gwdise' gwne' Diosen' gwsele' le'.

⁶⁵ Nach Pilaton' gože' bene' ca':

—Goṇa' le'e soldadw ca'. Le če'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo bene' guat ca'

(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža če Dios, bał dmiḡw María bene' Magdala len María ben' yeto ja'aque' jasene'e gan' bosocuaše' Jesúsen'. ² Na' leca gwxo', le angl če Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. ³ Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca nac beye'. ⁴ Na' cate' besele'e bene' gop ca' le', leca gosexize' besežebe' na' gosebixe' gosatte' šlat. ⁵ Perw na' anglen' gože' no'ol ca':

—Bitw žeble. Neda' nežda' Jesúsen' ben' bosode'e le'e yag cruz nan' cheyiljwle. ⁶ Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp čhen'. ⁷ Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobeč Jesúsen' yežine' Galilean' clal ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acses'e' zjasyedixjue'ede' bene' ca' zjanaque' Jesúsen' txen can' goca'. ⁹ Na' šlac zjaya'aque' besyežague' Jesúsen' chanež. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. ¹⁰ Jesúsen' gože' legaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

Bene' gop ca' jasyedixjue'ede' bħoz ca' can' ba goca'

¹¹ Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bħoz gwnabia' ca' doxen can' ba goquen'. ¹² Nach besedobe bħoz gwnabia' ca' len bene' gole blao ca' chesenabia' nación čhechon' na' bosoxi'e nac yesone' ca nac dan' gose' soldadw ca' legaque'. Na' bosonežjue' soldadw ca' da' zcha'o mechw. ¹³ Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebetje' cuerp čhen' lo' blojen' na' besyeyo'en ga yoble. ¹⁴ Na' še gubernadoren' yende' diža' quinga, neto' šjašaljento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž čhechon'.

Jesúsen' gože' legaque' yeso'e xtiže'na' yogo' nación

(Mr. 16:14-18; Lc. 24:36-49; Jn. 20:19-23)

¹⁶ Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'. ¹⁷ Na' cate' besele'ede' Jesúsen' gosonxene'ne'. Perw bia'cze to čhope' gosacžejlaže' še le'na'. ¹⁸ Nach gwbiga' Jesúsen' gan' nite'na' na' gože' legaque':

—Ba ben Diosen' lo na' doxen yeła' chnabian' dan' de yaban' na' yežlion'. ¹⁹ Da'n'an' le šja'ac le šjased le šjalo'e bene' ca' že' yogo'loł nación cont yesejnilaže' neda'. Na' le gwzoe' nis cont yosolo'e le čhesejnilaže' Xacho Diosen', na' čhesejnilaže' neda' naca' dogualje Xi'ine', na' lencze Spiritw če'na'. ²⁰ Na' gwsed gwlo'elne' cont yesone' yogo'loł dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te če yežlion'. Da' na'zen' chzoja' na'a.

DIŽA' GÜEN DAN' BZOJ SAN MARCOS

Juan ben' bzoa bene' nis gwdixjue'ede' diža' güen che Diosen' latje daš
(Mt. 3:1-12; Lc. 3:1-9, 15-17; Jn. 1:19-28)

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaiás ben' be' xtiža' Diosen' caní' bzoje' da' nga, žan:

Chselá' to bene' cuialagüe' laoguo'n güe'e xtižon',
cont ba zjanita' bene' yosozenague' chio' cate' šejo'.

³ Beña' chne' zižje latje dašen' že':

"Le gonšagüe' yichjlažda' olen' cont gwzenagle che Xančon' cate' yide';
le cuejyichj da' malen' chonle cont yichjlažda' olen' gaquen ca to nez da' ba gosonšagüe'."

⁴ Ca' goquen', Juan ben' chzoa bene' nis bžine' latje dašen' na' gože' bene' ca' besežag na' cheyala' yesyetiñjde' xtoła' gague' na' yesezoe' nis cont nitla' xtoła' gague'. ⁵ Zan bene' za'ac do distritw Judea na' ciuda Jerusalén bosozenague' che diža' dan' chyixjue'ede'. Na' cate' gosexoadole' bi da' xinj zjanone', Juanna' bzoje' legaque' nis lo' yegw Jordán.

⁶ Xalana' Juanna' goquen de yiša' xa camello na' da' bchej lšine' goquen de yid, na' gwdagüe' biše' zo len šina' beser yiže'. ⁷ Na' gwdixjue'ede' bene' xtiža' Diosen', gwne':

—Coža' na' za' za' to bene' zaca' che' ca neda', na' da' nacchgüe' bene' zaca', bi zaca' gona' xmandadoe' lechja' no xe'le'. ⁸ Neda' ba bzoa' le'e nis, perw ben' za' zan' gone' cont soa Spiritw che Diosen' lo' yichjlažda' olen' nabian' xbab chele.

Jesúsen' gwzoe' nis

(Mt. 3:13-17; Lc. 3:21-22)

⁹ Ca tiempa' Jesúsen' gwze'e lagüe' yež Nazaret da' chi' ga mbane distritw Galilea, na' Juanna' bzoje' le' nis lo' yegw Jordán. ¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa Diosen', na' Spiritw che Diosen' betjen jasoan len le', na' ca hora' Spiriton' naquen ca nac ngolbex. ¹¹ Na' gosende' gwne' Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque' laže' chgüeda' chio'.

Satanásen' goclážen' co'oyelan' Jesúsen' cont gone' da' mal

(Mt. 4:1-11; Lc. 4:1-13)

¹² Nach Spiritw che Diosen' benen cont la' gweyjeť Jesúsen' latje daš. ¹³ Na' gwzoe' latje dašen' čhoa ža ladjo be znia' ca'. Na' Satanás dan' chnabia' da' xigüe' ca' goclážen' co'oyelan' le' cont gone' da' mal. Nach beyoža' jasaclen angl che Diosen' le'.

Jesúsen' gwzoloa chyixjue'ede' xtiža' Diosen' distritw gan' nzi' Galilea

(Mt. 4:12-17; Lc. 4:14-15)

¹⁴ Beyož gosegüe'e Juanna' ližya, Jesúsen' beze'e beyeje' Galilea gan' jatixjue'ede' diža' güen, gwne' Diosen' nabi'e yichjlaždao' bene' ca' yosozenag che'. ¹⁵ Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le yetinje xtoła' len' na' le šejle' diža' güen che Diosen' da' chyixjue'eda'.

Jesúsen' goxe' tap bene' gwxen beľ šja'aclene' le' txen

(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' che Galilean' cate' ble'ede' chope bene' gwxen beľ, Simón na' bene' biše' Andrés. Na' zjanite' chosozale' yixjw dan' chesezende' beľen' lo' nisa'. ¹⁷ Na' gož Jesúsen' legaque':

—Le šo'o len neda'. Nacle bene' gwxen beľ na' chbejle beľen' lo' nisen', perw na'a gona' cont gaxle bene' yesyechoje' lo' da' malen'.

¹⁸ Nach la' bosocua' ante yixjw čhen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw čhegaquen'. ²⁰ Na' Jesúsen' lecze goxe' legaque' šja'aclene' le' na' bosocua' ane' Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

To bene' gwoyo' gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwoyo'e lo' yodao' da' zoa na' na' gwzoloagüe' bsd blo'ede'. ²² Bene' ca' že' na' besyebande' can' bsd blo'ede', le can' bzejni' iden' nachbia' nežde' cayanen' nac xbab che Diosen', gague bzejni' ide' can' chosozejni' i ben' chosolo'e ley dan' bzoj da' Moisés. ²³ Na' lo' yodaon' zoa to bene' yo'o nyaze' da' xigüen', na' bosye'e gwne':

24—¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwseła' Dios.

25 Nach Jesúsen' gože' da' xigüen':

—¡Sšago', bechoj lo' yichjlaždao' bengal!

26 Na' da' xigüen' benen cont gwchole bena', nach chosya'adiachguan bechojen lo' yichjlažda'ogüen'. 27 Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e bengal? ¡Nacbia' nape' yela' chnabia' na' yela' guac, le da' xigüe' ca' chesonen da' že'!

28 Na' ca' nac dan' ben Jesúsen' bedao' nez gos gwłalje dižan' doxen lagüe yež ca' gan' mbane Galilea.

Jesúsen' beyone' taobi'in che Simón Pedro

(Mt. 8:14-15; Lc. 4:38-39)

29 Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés. 30 Na' taobi'in che Simónna' die' che'ede' xla; na' gose'e Jesúsen':

—Benga die' che'ede'.

31 Nach jabiga' Jesúsen' na' bežue' taquen' gwłise'ne'. Na' la' beyacted', nach bsiñi'e da' gose'ej gosagüe'.

Jesúsen' beyone' zan bene' chese'ede'

(Mt. 8:16-17; Lc. 4:40-41)

32 Cate' ba gwxa gwbižen' na' ba gwxin, jasesane' lao Jesúsen' zan bene' chese'ede' na' bene' zjayo'o zjanyaze' da' xigüen'. 33 Na' do yež bene' besedop besežague' cho'a yo'o gan' zoa Jesúsen'. 34 Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjayo'o zjanyaz bene', perw bitw bi'e latje bi yesenan, le legaquen zjanezen non' nac le'.

Jesúsen' chyixjue'ede' xtiža' Diosen' Galilea

(Lc. 4:42-44)

35 Šbal cate' ne' nac chlojesúsen' gwyase' na' gwze'e gwyeje' ga nono nla' na' boł güiže' Diosen'. 36 Simón na' bene' lježe' ca' ja'aque' jasyediljue'ne'. 37 Na' cate' besyěželde'ne' gose'ene':

—Yogo'ze bene' chesyeyiljue' le'.

38 Perw Jesúsen' gože'ne':

—Le šo'o ga yoble ga nac gała'ze cont lecze šjatixjue'eda' xtiža' Diosen' na', le da'nan' ba gwza'a.

39 Can' goc, Jesúsen' gwde' doxen gan' mbane Galilea gwduxjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

Jesúsen' beyone' to bene' che'ede' lepra

(Mt. 8:1-4; Lc. 5:12-16)

40 To bene' che'ede' yižgüe' dan' nzi lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

41 Na' Jesúsen' beži'ilaže'de' le' na' bežue'ne' gwne':

—Chaclaža' yeyacdo'. Beyaque.

42 Cate' gwne' ca' la' bega'ate yižgüen' na' beyacde'. 43 Nach Jesúsen' besele'ne' liže', bene' mandadw, gože'ne':

44—Notno yo'o can' ba beyona' le', con gwyej jaña' bxoza' cont le'ede' bačh beyacdo', na' bnežyw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenežde' ba beyacdo'.

45 Perw ben' bi bchejde', yogo'ze bene' gože' can' goca'. Da'nan' Jesús'a' bich goc šeje' con ca nla'ze gate'teze yež, san con gwde' do yixe', na' bia'cze bene' za'ac yogo'ze yež jasene'e le'.

2

Jesúsen' beyone' to bene' bi chda šla'a ni'a ne'e

(Mt. 9:1-8; Lc. 5:17-26)

1 Gwde to čop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenезде' bežine' to yo'o ga ba gwzoacze'. 2 Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwduxjue'ede' xtiža' Diosen' len legaque'. 3 Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. 4 Perw bi chac yesežine' gan' zoa Jesúsen' catec chyi. Nach goseque'e tej dan' ncu'a' yichj yo'on na' beseletje' le' na'le to lo cam dao'. 5 Na' cate' Jesúsen' gocbe'ede' can' chesejnilaže'nen', gože' bene' güe'na':

—Xi'ina', ba bezi'xena' xtolon'.

⁶ Bał bene' chososed chosolo'e ley dan' bzoj da' Moisésen' zjachi'e na, na' gosone' xbab: ⁷ “¿Bixchen' chna bengca ca'? le chon cuine' ca Dios. Nono zoa bene' gac yezi'xene' xtoła' benač. Toz Diosen' gac yezi'xenen'.” ⁸ Perw Jesúsen' chache'eczede' can' nac xbab čhegaquen', na' gože' legaque':

—¿Bixchen' chza'laže'le ca'? ⁹ Še yapa'ne': “Ba bezi'xena' xtoła'na'”, bi nezele še napa' yela' gwnabia' cont yezi'xena' xtole'na', san še yapa'ne': “Gwyas, beyoa' xcamon'”, na' nachbia' še napa' yela' guac gac can' gwnian'. ¹⁰ Perw neda' naca' ben' gwsela' Dios golja' benač, gwlo'eda' le'e na'a zoa' yežlio nga napa' yela' gwnabia' cont yezi'xena' xtoła' benač.

Nach gože' bene' xinja':

¹¹ —Čapa' le', beyas, beyoa' xcamon' na' beyej ližo'.

¹² La' beyaste bene' xinja' chesena'te bene' ca' nita'na' na' beyoa' xcamen'. Da'nana' yogo' bene' ca' besyebande' na' goso'e yela' choxclen čhe Diosen', gosene':

—Biņa' le'echo yela' guac dan' nac ca'.

Jesúsen' goxe' Leví cont gwejlene'ne'
(Mt. 9:9-13; Lc. 5:27-32)

¹³ Da' yoble gwej Jesúsen' cho'a nisdao' na' bene' zan besedobe' gan' zeje' na' bsed blo'ede' legaque' xtiža' Diosen'. ¹⁴ Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

¹⁵ Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan bene' güečhixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'. ¹⁶ Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxečen' ben' chsed chlo'e le'e che'ej chagwlene' txen bene' güečhixjw na' yebał bene' güen da' xinj ca'?

¹⁷ Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetiñjde' xtolen', san bene' güen da' xinj. Legaquen' zjazaca'lebe' ca' bene' cheseyažje bene' güen rmed.

Gosenabde' Jesúsen' bixchen' bene' zjanaque' le' txen bi chesone' gwbas
(Mt. 9:14-17; Lc. 5:33-39)

¹⁸ To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jasenabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

¹⁹ Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zosalene' legaque'? Še zoa ben' bšagnan', bi gac yesone' gwbas. ²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

²¹ 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' čhiben' na' šon' lache' golen', na' gan' žon'na' gacchen da' xen. ²² Neca zoa bene' chgue'e vino cobe lo' bzod yide'exo', le vino coben' čšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža čhe Dios
(Mt. 12:1-8; Lc. 6:1-5)

²³ To ža čhe Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao čhe trigon' šlac gosodie' gan' nyaženna'. ²⁴ Nach bene' fariseon' gose'e le':

—Gwnašc ¿bixchen' cheson bene' ca' zjanaque' le' txen žin da' bi cheyała' yesone' ža čhe Dios?

²⁵ Na' Jesúsen' gože' legaque':

—¿Biņa' gwlable can' ben da' rey David to ža cate' le' na' bene' lježe' ca' gosodone'? ²⁶ Gwyo'o Davin' ga nac liž Dios cate' da' Abiatar goque' bħoz blao, na' gwdagüe' yetextil da' nac čhe Dios da' bi chac gagw bene' bi nac bħoz, na' lecze bnežjue' čhe bene' zja'ac len le'.

²⁷ Lecze gož Jesúsen' legaque':

—Diosen' gwleje' to ža cate' bi yeson beṇachen' žin cont gaclenen beṇač, gague gwleje' beṇačhen' cont yesonxene' ža chen'. ²⁸ Da'nan' naquen lo na' nia' bi da' nac güen goncho lente cate' nac ža che Dios, neda' naca' ben' gwseła' Diosen' golja' beṇač.

3

Jesúsen' beyone' to bene' nxo'on šla'a taque'
(Mt. 12:9-14; Lc. 6:6-11)

¹ Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on šla'a taque'. ² Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. ³ Nach Jesúsen' gože' ben' nxo'on taquen':

—Gwzoža' na' gwzecha nga.

⁴ Nach gwṇabde' bene' ca' yezica'chle:

—ŽBi da' cheyała' goncho ža che Dios? žGoncho da' güen, še goncho da' mal? žCheyała' yoslacho bene', še cheyała' gotchone'?

Perw na' legaque' gosenite' šižize. ⁵ Nach Jesúsen' gwṇe'e legaque', bže'e can' gosone' xbab, na' lecze gocyše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. ⁶ Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisaon'

⁷ Nach Jesúsen' gwyeye' cho'a nisaon' len bene' ca' zjanaque' le' txen, na' zan bene' Galilea ja'ac len le'. ⁸ Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'. ⁹ Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le', ¹⁰ le bene' zan ba beyone', na' bene' ca' ne' chese'ede' chosožiga' lježe' nac gac yesože'ne'. ¹¹ Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdile' legaquen na' bene' mandadw bi yesenan no nac le'.

Jesúsen' gwčhie' bene' šižinw ca' gosaque' txen len le'
(Mt. 10:1-4; Lc. 6:12-16)

¹³ Beyoža' Jesúsen' gwloe' to lo' ya'a na' goxe' bał bene' goclaže' šja'aclene' le', nach gosa'aque' ja'aque' gan' zoen'. ¹⁴ Nach gwleje' šižinw bene' yesenita' len le', cont sele' legaque' šjasedixjue'ede' xtizen'. ¹⁵ Na' bnežjue' legaque' yela' guac cont yeseyeyone' bene' güe' na' yela' gwnabia' cont yesyebje' da' xigüe' da' yo'o nyaz bene'. ¹⁶ Šižinw bene' quin' gosac: Simón ben' lecze gože'ne' Pedro; ¹⁷ Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen; ¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, ¹⁹ na' Judas Iscariote ben' gwdechle bdie' Jesúsen' lo' na' bene' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú
(Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen gosoe' lo' yo'o gan' zoe' ca' hora', ²⁰ na' da' yoble besežagchgua bene', neca goc yese'ej yesagw Jesúsen' len bene' ca' zjanaque' le' txen. ²¹ Na' cate' goseneze biše' ljež Jesúsen', ja'aque' cont yesyech'e'ene', le' gosene' chactont'e'.

²² Nach bene' ca' bososed bosolo'ede' ley dan' bzoj da' Moiséš gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

²³ Nach Jesúsen' goxe' bene' ca' na' bsd blo'ede'ne' gwne':

—žNac gon Satanás dan' chnabia' da' xigüe' ca' yebejen lecze da' xigüe'? ²⁴ Še to gobiern' choje' čop šon cuenle na' yeyoža' yesedile' legacze', gobiern'na' bi sibi'e. ²⁵ Na' še bene' že' toz yo'o yesechoje' chople na' yesedile' legacze', gague sša yesenite' txen. ²⁶ Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

²⁷ 'Nono gac šo'e lo' yo'o che to bene' gual na' que'e bi da' de che' še čbi zgua'tec gwčheje' bene' gual na', lete gone' ca' nach gac que'e bi da' de che'.

²⁸ 'Da' li žia' le'e, yogo' da' xinj da' chon beṇač na' yogo' diža' bya' da' yesene', Diosen' yezi'xene' chen še yesyetinjde'. ²⁹ Perw note'teze bene' ne' yela' ya' che Spiritw che Dios, gwbat yezi'xen Diosen' che', san de dola' che' toli' tocaṇe'.

³⁰ Gwne' ca' dan' gosene' che' yo'o nyaze' da' xigüe'.

Xna' Jesúsen' na' bene' biše' gosaxe'ne'

(Mt. 12:46-50; Lc. 8:19-21)

³¹ Na' bžin xna' Jesúsen' len bene' biše', na' gosenite' chyo'ole gosaxe' le'. ³² Na' bene' ca' zjanita' cuít Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

³³ Nach Jesúsen' gože' legaque':

—¿Nezele non' nac xna'a na' no zjanac biše' lježa'?

³⁴ Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'. ³⁵ Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

4

Jempl che bene' goz trigo

(Mt. 13:1-9; Lc. 8:4-8)

¹ Yeto ža yoble gwzolaó Jesúsen' chsed chlo'ede' cho'a nísdaon', na' besežagchgua bene' zan juisyw gan' ch'ena'. Na' da' besežagchgua bene' zan, berten byen gwyo'ó Jesúsen' to lo' barcw dao' da' chda' lo' nísdaon' cho'a yo bižen' na' gwchi'e lo'enna', na' yogo' bene' ca' gosenite' cho'a nísdaon' ga nac yo biž. ² Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

³—Le gwzenag da' nga: To bene' güen žin jeze' trigw. ⁴ Na' šlac zeje' chose' trigon', late' biñ che trigw dan' chazen' jasechazen chanez nach be ca' žia xil be chaš le'e yaba gosagwban'. ⁵ Yelaten' jasechazen ga nac lo' yej, ga bibi yotec zoa, na' da' nga byob blan' le' bi jasechazen ga nac sitjw. ⁶ Perw cate' bla' gwbiža' na' bzeyen len na' gwbižen, le' gague' yo'otec loenna' sitjon'. ⁷ Yelaten' jasechazen ga nac lo' yag yeše', na' yag yešen' gosecha'on na' bosololen' len, na' bibi gosebian. ⁸ Perw na' yelaten' jasechazen ga nac yo šagüe'. ⁹ Na' nga beselan' na' gosecha'on na' leca güen gosebian, bažen gosebian do šichoa güeje to ton, bažen gayon, na' yebažen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Bichen' bzejni'ide' bene' len jempl

(Mt. 13:10-17; Lc. 8:9-10)

¹⁰ Gwdena' cate' ba besyeya'ac bene' zan ca', bene' ca' zjanita' gała'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. ¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejni-laže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. ¹² Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? ¹⁴ Ben' ben goza' naque' ca' ben' choe' xtiža' Diosa'. ¹⁵ Na' bał bene' zjanaque' ca' biñ dan' beselažo' chanez, le' chosozenague' cate' chas chlalde xtiža' Diosen', na' ca' cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. ¹⁶ Yebał bene' zjanaque' ca' biñ dan' beselažo' ga nac lo' yej na' bi ben loen. Legaque' chesyebede' chosozenague' xtiža' Diosen', ¹⁷ perw šložga chesežibi'e, na' cate' chesac bi da' mal chegaque' o bichle chesone bene' legaque' neče da' chosozenague' xtiža' Diozen', la' chesebejyichjten'. ¹⁸ Na' yebał zjanaque' ca' biñ dan' besego'onen ga nac lo' yag yeše'. Chosozenague' xtiža' Diosen', ¹⁹ na' šlac žjambane' chesyelał chesyžejde', na' da' chesaclaže' yese'ni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'añ xtiža' Diosen' lo' yichjlažda'ogüen' na' da'nana' bi chesejnilaže' le' ca' cheyala'. ²⁰ Perw na' nita' bał bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca' biñ dan' beselažo' lo' yo šagüe'. Bał zjanaque' ca' biñ dan' gosebian šichoa güeje to ton, na' yebał ca' da' ca' bexoen' gayon, o ca' no da' ca' bexoen' to gayoa güeje to ton.

Jempl che yi' dan' chguala'cho

(Lc. 8:16-18)

²¹ Lecze gože' legaque':

—Cate' chguala'cho to yi' ¿gwɔdosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwseñin'. ²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenežden'. ²³ Le'e žia nagle da' chene, le gwzenag xtižan'.

²⁴ Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchce' cont soachle mbalaz da' chzenagle che'. ²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che bin dan' chlan' na' chcha'on

²⁶ Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze bin lo yo. ²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nežde' naquen' chac. ²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyala' cuian. ²⁹ Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

Jempl che bin che xomdas

(Mt. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' gü'e'cha' jempl cont nezele šanch bene' yosozenag che' cont nabi'e yichjlažda'ogaque'. ³¹ Naquen ca to bin che xomdas da' chyaž lo yo. Len chnabia' nac da' dao' len bin ca' chazcho lo yežlion'. ³² Perw cate' bač nyažen, chcha'on na' chaquen da' xench lao yiže' cuan ca', na' da' xenchgua chac xol che xozenna', na' lente byin' dao' ca' chesyezi'laže'ba' lo xozenna'.

Jesúsen bgone' žin jempl

(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che bin ca', con ga zelao goc gosejni'ide'. ³⁴ Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

Jesúsen' bebecžie' be' bđono' len nisdao'

(Mt. 8:23-27; Lc. 8:22-25)

³⁵ Leze lo žana' cate' gwžin, Jesúsen' gože' bene' ca' zjanaque' le' txen:

—Le šo'o laga'cho yešla'a nisdaon'.

³⁶ Nach bosyocua'ane' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto chop barcw dao'. ³⁷ Na' gwzolao gwyechjchgua to be' bđono' na' nisdaon' leze chas chatan', na' gwzolao cheyož nis lo' barcon'. ³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! ¿Bibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdiłe' be' bđonon' na' gože' nisdaon':

—iŠižize! iŠižize!

Na' bebe'ži be' bđonon' na' beyata'ži nisdaon'. ⁴⁰ Nach Jesúsen' gože' bene' ca' zjanaque' le' txen:

—¿Bixchen' chžebtecle? ¿Nacxečhen' bi chejle'le chia'?

⁴¹ Legaque' besežebchgüe' na' gose' lježe':

—¿Noxe benga? lente be' bđono' na' len nisdaon' chosozenaguen che da' že'.

5

Bene' Gadara yo'o nyaze' da' xigüe'

(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara, ² na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'. ³ Bena' ba zoacze' capsantw na'le na' nono chzoe goxe' le', ne len gden ca gosezoede' le'. ⁴ Da' zan ni'a bosocheje' ni'a ne'e gden, perw bia'cze gwchoguen', con bzojx btinen', na' nono gwzoe le'. ⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. ⁶ Na' cate' ble'ede' Jesúsen' zito' gwyejsese' jazoa xibe' lagüen', ⁷ na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chņeyoeda' le' bi gwsaco' neda'.

⁸ Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

⁹ Na' gwñabe Jesúsen' len:

—¿Bi lio'?

Na' boži'in xtižen'.

—Legión lia', le nac zanto'.

¹⁰ Na' goseneyoen Jesús'a bi yeselen' zito' cate' yesyežašen' yichjlaždao' ben'. ¹¹ Na' gala'ze lo ya'ana' chesaš zan coš chesagwba'. ¹² Nach da' xigüen' goseneyoen le':

—Gwseła' neto' gan' nita' coš ca' na' ben' latje šjajo'oto' lo' yichjlažda'oban'.

¹³ Nach Jesús'en' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjse coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

¹⁴ Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc. ¹⁵ Cate' besežine' gan' zoa Jesús'en' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. ¹⁶ Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. ¹⁷ Nach gosezologüe' gosata'yoede' Jesús'en' yeze'e lažgaquen'.

¹⁸ Na' cate' beyo'o Jesús'en' lo' barcon' ben' ba gwyo'o gwyaz da' xigüen' gota'yoede' Jesús'en' šejlene' le'. ¹⁹ Perw Jesús'en' bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

²⁰ Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesús'en' len le', na' yogo' bene' gosene xtižen' besyebande'.

Bi' no'ol che Jairo, na' no'ol ben' gwdane' xa Jesús'en'

(Mt. 9:18-26; Lc. 8:40-56)

²¹ Cate' bežin Jesús'en' cho'a nisdao' zeze'e lo' barcw daon' dan' zeza' šla'a nisdao'n, bene' zan ja'aque' gan' bežinen', na' Jesús'en' bega'ane' cho'a nisdao' na'ze. ²² Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesús'en' bzoa xibe' lagüen' ²³ na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

²⁴ Nach Jesús'en' gwejlene' le'. Na' bene' zan ja'acch, na' bosochichgüe' le'. ²⁵ Ladjo bene' ca' len to no'ol che'ede', ba goc šižinw iz chzoe' gwba'o'. ²⁶ Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'zen, san chyała'len. ²⁷ Cate' bende' cheso'e xtiža' Jesús'en', no'olna' gwddie' ladjo bene' ca' na' bžine' cože'le Jesús'en' na' gwdane' xen'. ²⁸ Le bene' xbab, gwne': "Con še ba gwdana' xen' nach yeyactecza'." ²⁹ Na' da' li cate' gwdane' xen' la' gwlezte gwba'o' dan' zoen', na' no'olen' gocbe'ede' ba bega'a yižgüe' chen'. ³⁰ Na' Jesús'en' la' gocbe'etede' to bene' ba beyacde' len yela' guac chen', nach gweychje' gwne'e bene' ca' nita' cože'le, na' gwnabde' legaque':

—¿Non' gwdan xan'?

³¹ Nach bene' ca' zjanaque' Jesús'en' txen gose'ene':

—Ba ble'eczede' ca chosochie' le', ¿bixchen' chnabo' non' gwdan xao'n?

³² Perw Jesús'en' chne'e nile na'le cont le'ede' non' gwdan xen'. ³³ Nach no'olen' nezde' can' ba goc che' na' do chaž chžebe' gweyje' jazoa xibe' lagüen' na' gože'ne' yogo' da' li. ³⁴ Na' Jesús'en' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesús'en' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

³⁶ Perw Jesús'en' bi bene' cuent dan' chesena bene' ca', na' gože' xan yodaon':

—Bitw žebo', con gweyje'le' chia'.

³⁷ Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'. ³⁸ Na' cate' besežine' liž xan yodaon', ble'ede' ba chi' žaš chesosye'e chesebeže'. ³⁹ Nach gwyo'e na' gože' legaque':

—¿Bixchen' mbeclé žaš chbežle? Bi no'ol daon' biña' gatbe', san chtasben'.

⁴⁰ Perw bosoxiže' gosonle' che'. Nach Jesús'en' bešaše' yogo'lole', na' gwche'e xaxna'be' na' bene' ca' zja'aclen le' na'ze na' goso'e len le' gan' de bi' no'ol daon'. ⁴¹ Na' bexue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izeguben'. Na' bene' ca' besele'e leca besyežejde' can' goca'. ⁴³ Perw Jesús'en' gože' legaque' nono yes'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret

(Mt. 13:53-58; Lc. 4:16-30)

¹ Na' beza' Jesúsen' na' bežine' laže', na' bene' ca' zjanaque' le' txen ja'aclene' le'. ² Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' bene' zan bene' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nežde'? na' ¿nacxečen' chac chone' yela' guac ca'? ³ Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e' che'. ⁴ Nach Jesúsen' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

⁵ Na' ne to yela' guac ca' goc gone' na', lete gwᵋoa taquen' yichj to chop bene' güe' na' beyone' legaque'. ⁶ Na' bebande' dan' bi gosejle' bene' che'. Na' gwdechle gwda Jesúsen' bsd blo'ede' to to yež dao' ca' nita' gala'ze.

Jesúsen' gwsele' bene' ca' zjanaque' le' txen jasedixjue'ede' xtiža' Diosen'

(Mt. 10:5-15; Lc. 9:1-6)

⁷ Na' goxe' bene' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebaje' da' xigüe' lo' yichjlaždao' bene'. ⁸ Na' cate' za' yesa'aque' gože' legaque' bibi yesoᵋe' chanež, ne bzod, ne yetextil, ne mechw, con yesoᵋe' to xis da' yosochiše'. ⁹ Na' yosoleje' yel perw bi yesoe' yeto xcamise'. ¹⁰ Na' lecze gože' legaque':

—Cate' žinle to liž bene', na'ze yega'anle šlac zoale lagüe yeža', cate' ch yeza'le yeža' cana'ch yeza'le latja'. ¹¹ Na' še zoa ga bi yosolebe' le'e' neca yosozenague' chele, cate' yeza'le na' le cuibe ni'alen' yo bište cont nachia' malen' chesone' bi chosozenague' xtiža' Diosen'. Da' li žia' le'e' cate' žin ža gac juisyw bene' ca' bi yosolebe' le'e' yesacche' castigw clcl ca' bene' Sodoma na' bene' Gomorra.

¹² Nach gosa'aque', na' goseyixjue'ede' cheyała' yesyetinge xtoła' benachen'. ¹³ Leze besyebaje' da' xigüe' da' yo'o nyaz bene', na' zan bene' güe' goseyebene' set na' besyeyacde'.

Gosote' Juan ben' bzoe' bene' nis

(Mt. 14:1-12; Lc. 9:7-9)

¹⁴ Na' ca' nac rey Herodes, gwnežde' can' chesone', le yogo'ze bene' gosende' can' ben Jesúsen'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'nan' chaque' chone' yela' guac.

¹⁵ Yebale' bene' gosene':

—Naque' ben' be' xtiža' Diosen' cani', ben' le Elías.

Na' yebale' gosene':

—Naque' con to bene' choe' xtiža' Dios ca' bene' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwčhogbi'an gosečogue' yene', na' na'a ba bebane' ladjo bene' guaten'.

¹⁷⁻¹⁸ Le Herodesen' beque'e Herodías na' gwzoalene' le' goque' xo'ole' la'czła' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen no'ol che bene' bišon'.

Da'nan' Herodesen' gwčhogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' goclaže' gote'ne', perw bi goc. ²⁰ Le Herodesen' gwnežde' Juanna' naque' to bene' chon da' zej to liča na' to bene' yo'o lo' na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czła' bi gwejni'iteque Herodesen' dan' bšalj Juanna', con bebede' bzenague' che'. ²¹ Perw Herodíasen' beyiljwlaže' nac bene' cate' ben Herodesen' in' gola' ža le', bsiñi'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. ²² Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lež ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' goᵋan'.

²³ Na' lecze gože'be':

—Diosen' naque' testigw chia' goᵋa' le' con da' ᵋabdo'nda', la' gašjo yež ca' gan' mbanda' chnabi'a.

²⁴ Na' bechojbe' na' gožbe' xᵋa'ben':

—¿Bi ᵋabda'ne'?

Na' le' gože'be':

—Gwnab yichj Juan ben' chzoe' bene' nis.

²⁵ Na' la' beyo'otebe' gan' chi' reyna' na' gože'ne':

—Che'nda' netecna'a goño' neda' to lo' platw yichj Juan ben' chzoa bene' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bačhle gwne' lao bene' ca' jasa'ac ĩnin' Diosen' naque' testigw che' gwnežjue'be' bite'teze nabebe' le', da'nan' bi bžone' gac dan' gwnabebe' le'. ²⁷ Nach la' gwseła'te reyna' to soldadw na' gože'ne' šjaxi'e yichj Juanna'. ²⁸ Na' gwyej soldadon' lo' yo'o ližyan' na' jačogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xna'be'.

²⁹ Cate' goseneze bene' ca' zjanaque' txen len Juanna', jasexi'e cuerp chen' cont bosocuaše'ne'.

Jesúsen' bguagüe' gayo' mil bene'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'. ³¹ Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le' chep chetj chac bene', neca chac latje yesagüe'. ³² Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. ³³ Perw zan bene' besele'ede' gosa'aque' na' besyeyombi'e Jesúsen', na' zan yež bene' ca' bosoxonjsese' na' byobch besežine' ca' Jesúsen'. ³⁴ Na' cate' Jesúsen' bchoje' lo' barcon' ble'ede' ba besežag bene' zan na' beyaše' beži'ilaže'de' legaque', le nite' ca' nita' no xila' be nono de gwyoeba'. Nach gwzolaogüe' bsd blo'ede' legaque'. ³⁵ Cate' ba zoa xin, bene' ca' zjanaque' le' txen gose'ene':

—Ba zoa xin, na' latj gan' zoacho nga naquen latj daš. ³⁶ Na' besela' bene' quinga cont šja'aque' ga že' bene' do ranšw na' do yež dao' ca' dan' nyechj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che' chop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yečhop bej ya'a.

³⁹ Nach gože' bene' ca' yesebi'e to xonj güeje' lo' yixyen'. ⁴⁰ Na' gosebe' to gayoa güeje' na' yebale' šiyon güeje'. ⁴¹ Nach Jesúsen' gwxi'e yetextil ca' gayo' na' bej ya'an chope, na' gwne'e le'e yaba bi'e yela' choxclen che' Dios na' bzojxe' yetextilen' bi'en bene' ca' zjanaque' le' txen cont goseyisen' len bene' ca'. Leze gwdis'e bel ya'a ca' chop lao yogo'loj bene' ca'. ⁴² Na' yogüe' gosagüen' na' goseljde'. ⁴³ Beyoža' bososše'e yešžinw žome yetextil bixjw na' len late' güeje bej da' bega'an. ⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdaon' na' yesežine' Betsaida, šlac le' za' chesele' bene' ca' žena' ližgaque'.

⁴⁶ Na' cate' beyož bzed'e bene' ca' diža', gwyeye' lo' ya'an boj güiže' Dios. ⁴⁷ Na' ca' nac barcon', cate' goc chol ba zejen gachol nisdaon', na' toze Jesúsen' ne' zie' ga nac yo biž. ⁴⁸ Na' ble'ede' bi chac yosyose'en binlo, le ben' chechjen clele na' bi choen' latje sa' barcon'. Na' šbał beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen'. ⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e. ⁵⁰ Le yogüe' besele'ede'ne' na' besežebe'. Perw le' la' boj güižte' legaque', gože'ne':

—Le gončač laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', ⁵² le bi gosejni'ide' dan' bene' yela' guac len yetextil ca', na' bina' yesejnilaže' le'.

Jesúsen' beyone' bene' güe' ca' že' Genesaret

(Mt. 14:34-36)

⁵³ Na' goselague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'. ⁵⁴ Na' cate' beyož besyechoje' lo' barcon' bene' ca' la' besyeyombi'a'te' Jesúsen'. ⁵⁵ Na' ja'acsese' doxen gan' mbane Genesaret, na' do lo' cam dao' zjanxoe' bene' güe' ca' jasesane'ne' gan' zjanezde' zoa Jesúsen'. ⁵⁶ Na' gate'teze gwyej Jesúsen', do yixe', do yež,

con goseyixjue' bene' güe' ca' do chanez na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' beňachen' chonen cont laždagüen' bi naquen xilaže' len Diosen' (Mt. 15:1-20)

¹ Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalenna' na' ja'aque' gan' zoa Jesúsen'. ² Na' besele'ede' bal' bene' ca' zjanaque' Jesúsen' txen con gosagüe' neca bosyone'e zan ni'a can' chesacde' cheyala' yesone', na' da'nan' gosezi'diže' legaque'. ³ (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biña' bosyone'e zan ni'a. ⁴ Na' cate' yesyežine' lagüe ya'a, bi yesagüe' še biña' bosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.) ⁵ Nach bene' fariseo ca' na' bene' ca' bososed bosolo'ede' dan' bzoj da' Moisésen' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.

⁶ Jesúsen' gože' legaque':

—Chonle cayanen' bzoj da' Isaíasen' che le'e nacle bene' gwxiye' gan' bzoje', žan': Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chošolo'eden' naquen da' chnalaže' beňachze.

⁸ Bi chonle ca chnalaže' Dios, san na'ole can' ža beňachen' cheyala' gonle, chyible no yeso' xguague, no xiga' ga che'eje' nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che beňach. ¹⁰ Da' Moisésen' gwne': "Le gap bala'an xaxna'le", na' "Note'teže' še chžia chnite' xaxne'e, cheyala' gate'." ¹¹ Perw le'e žale to bene' guac ye'e xaxne'e: "Bibi de goña' gaclena' le'e, le yogo' da' de chia' naquen Corbán" (zeje diža', ba bnežjuen' lo na' Dios). ¹² Na' žale cate' to bene' že' ba naquen lo na' Diosen' nach bich cheyala' gaclen xaxne'e. ¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' čia' ca', na' gože' legaque':

—Yogo' le le gwzenag čia', na' le šejni'i. ¹⁵ Bite'teže da' ye'ej gagw beňachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'. ¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšajlene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'. ¹⁸ Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beňachen' chonen cont lažda'ogüe' bi naquen xilaže' len Diosen'? ¹⁹ Le da' che'ej chagw beňachen' gague cho'on lo' lažda'ogüen', san lo' li'en cho'on, na' čžin hor cheden.

Na' da' gwne' ca' zeje diža' bite'teže yela' guagw nacczen xilaže'. ²⁰ Na' lecze gwne':

—Xbab da' yo'o lo' yichjlaždao' beňachen', lenna' chonen cont lažda'ogaque' bi zjanaquen xilaže' len Diosen'. ²¹ Le lo' yichjlaždao' beňachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' chegaque', gwzoo xtogaque', yesote' bene', ²² yesone' gwban, yesezelaže' gata' chegaque' da' de che bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yeseneye'e che bene', yesaque' bene' ya'laže', yesone' xbab da' bi zaca'. ²³ Yogo' da' mal qui chesechojen lo' laždao' beňach na' chonen cont bi nac lažda'ogaque' xilaže' len Diosen'.

To no'ol zito' gwejynilaže' Jesúsen'

(Mt. 15:21-28)

²⁴ Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'. ²⁵ Cate la' gwnežete xna' to bi' no'ole bi' yo'o nyazbe' da' xigüen', na' gweyje' na' bzoa xibe' xni'a Jesúsen'. ²⁶ No'olen' goque' bene' zito', no'ole Sirofenacia. Gweyje' gwnabde' Jesúsen' yebeje' da' xigüe' yo'o nyaz bi' no'ol čhen'. ²⁷ Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo yo.

²⁹ Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

³¹ Jesúsen' bezse'e gan' mbane Tiro na' gwddie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. ³² Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'. ³³ Nach Jesúsen' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. ³⁴ Nach gwne'e le'e yaba, behande', na' gwne':

—jEfata! —zeje diža': jByalj'o!

³⁵ Nach nag bena' besyeyaljon na' goc bende', na' lecze beyac ložen' na' goc gwnie' binlo. ³⁶ Na' Jesúsen' gože' bene' ca' nono yese'e ca', perw la'czla' gože' legaque' ca', nachle gosoe' diža' can' goca'. ³⁷ Na' leca besyehande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

8

Jesúsen' cho'e da' chagw tap mil bene'

(Mt. 15:32-39)

¹ Ca tiempa' besežagchua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

² —Cheyaše'da' bene' qui, le ba goc šone' za zjanite' nga len neda' na' bibi de yesagüe'. ³ Še yesela'ne' ližgaque' na' biña' yesagüe', chanez yesego'one' yesechołde', le bałe' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsen' gwnabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxclen che Dios, nach bzojxen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. ⁷ Leze zjano'e to chop bel ya'a, na' Jesúsen' be'e yela' choxclen che Diosen' che bel ya'a ca' na' leze goseyisen' che yogo'lol bene'. ⁸ Na' yogüe' gosagi'e na' gosełje'de'. Gwdena' bososše'e yegaže žome len late' güeje yela' guagw da' bega'an. ⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”, ¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclaže' gon Jesúsen' to yela' guac da' yesele'ede' le'e yaba

(Mt. 16:1-4; Lc. 12:54-56)

¹¹ Na' bene' fariseo ca' gosezolagüe' chesediłdiže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenežde' še da' licze Diosa' gwsele' le'. ¹² Jesúsen' behanchgüede' na' gwne':

—Ba ble'ele chona' yela' guac. ¿Bixchen' chnable to yela' guac da' le'ele cont nezele' še Diosen' gwsele' neda'? Da' li' žia' le'e, bitwbi gona' da' le'ele.

¹³ Nach bcua'añe' legaque' na' beyo'e lo' barcon' beze'e beyeje' yešla'a nisdaoñ'.

Levadura che bene' fariseo ca'

(Mt. 16:5-12)

¹⁴ Bene' ca' zjanaque' Jesúsen' txen gosanižaže' yeso'e da' yesagüe', na' totec yetextil zjano'e lo' barcon'. ¹⁵ Na' Jesúsen' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

¹⁶ Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

¹⁷ Jesúsen' goche'ede' xbab dan' chesone' na' gože'ne':

—¿Bixchen' chacžełjaže' le da' bibi yetextil de? ¿Biña' šejni'ile, neca chache'ele? ¿Nac chach lažda'olen' bi chejle'le? ¹⁸ ¿Bi chle'ele len yełlaole, neca chenele len nagle? ¿Bi chjayze'ele?

¹⁹ Gwdisa' gayo' yetextil na' goquen che gayo' mil bene', na' ¿bi chjayze'ele yebałe žome goc da' becho'onen' da' botoble?

Na' legaue' gosene':

—Šižinw žome becho'onen da' botobto'.

²⁰ —¿Chixe caten' gwdisa' gaže yetextilen' lao tap mil bene'? ¿Yebałe žome gwža'te dan' botoblen'?

Na' gosene':

—Gaže žomen'.

²¹ Nach gože' legaue':

—¿Biña' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to bene' lchol bene' Betsaida

²² Gwdechle besežine' Betsaida na' jasesane' to bene' lchol lao Jesúsen', na' gosata'yoede' le' yeyone' le'. ²³ Na' bexue' taca' bene' lchola' na' gwleje'ne' yež. Nach gwdebe' xene' yejlagüen' na' gwxo taquen' yichje' na' gwñabde'ne' še chle'ede' late'. ²⁴ Bene' lchola' gwñe'e na' gwne':

—Chle'eda' bene', na' chle'eda'ne' ca yag, perw chesa'aque'.

²⁵ Nach Jesúsen' bexoa taque' yejlagüen' da' yoble, na' gwña'yañe' ben' na' beyaque', bele'etede' yogo' binlo. ²⁶ Nach Jesúsen' besele' le' liže', gože'ne':

—Bi yeyo'o lagüe yežen', ñeca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

²⁷ Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

²⁸ Legaue' gose'ene':

—Bałe' chesene' naco' Juan ben' bzoa bene' nis, yebałe' chesene' naco' Elías, na' yebałe' chesene' naco' yeto bene' be' xtiža' Dios cani'.

²⁹ Na' gwñabde' legaue':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsen' gože' legaue' nono yese'e ca'.

Jesúsen' gwduxjue'ede' gate'

(Mt. 16:21-28; Lc. 9:22-27)

³¹ Na' gwzolao Jesúsen' bzejni'ide' legaue' can' gac chen', gože'ne':

—Da' zan da' saca'zi'a neda' naca' ben' gwseła' Diosen' golja' beñač. Na' bene' blao ca' chesenabia' nación chechon' na' bxož gwnabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwnen' zaca'laon. Na' Pedron' gwče'e Jesúsen' ga nac lchojiže' na' gwzolagüe' chdile' le' dan' gwne' ca'. ³³ Perw Jesúsen' gwyečhje' na' gwne'e bene' ca' zjanaque' le' txen, na' gwđile' Pedron', gože'ne':

—jGwcuase ca'ale Satanás! Bi nsa'o xbab che Diosen' san nsa'o xbab che beñač.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyała' chojyichj cuine', la'czla' saca'zi'e, na' gone' can' nia' neda'. ³⁵ Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ñe chia' neda' o neče xtiža' Diosen', ba de yela' mban che' toli tocañe. ³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocañe? ³⁷ Le bi zoa nacle gon beñačen' chixjue' cont gata' yela' mban che' toli tocañe. ³⁸ Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', leče ca' neda' yeto'eda' che' par nia' naque' neda' txen, neda' naca' ben' gwseła' Dios golja' beñač. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nčhia' bene' ca' zjanac angl che'.

9

¹ Lecze gož Jesúsen' legaue':

—Da' li žia' le'e, bałe nita'le nga na'a biña' gatle cate' žin ža le'ele Diosen' gwlo'e yela' guac xen chen' can' chnabi'en'.

Bša' Jesúsen' ca goque'

(Mt. 17:1-13; Lc. 9:28-36)

² Gwde xop ža, Jesúsen' gwčhe'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'. ³ Xalane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xalänen'. ⁴ Na' concze besele'ede' da' Elías na' da' Moisés chosošalje' len Jesúsen'. ⁵ Nach Pedron' gože' Jesúsen':

—Maestro, įleca güenna' zoacho nga! Gonto' šone ranšw, to čhio', to čhe Moisés, na' yeto čhe Elías.

⁶ Le bene' ca' zja'aclen Jesúsen' besežebchgüe', na' Pedroa' bi chache'ede' bin' že'. ⁷ Nach gwčhe' to bejw gan' niten' gwyęchjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag čhe'.

⁸ Na' cate' gosenęe' cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwseļa' Dios golja' beňač, cana' güe'le diža' čhen.

¹⁰ Da'nan' gosezoe' šize, nono gose'e ca', perw na' gosenabe įježe' bi zejen dan' gwne' yebane' ladjo bene' guat ca'. ¹¹ Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyaļa' yide' da' yoble cate' za' yedenabia' ben' seļa' Diosen'. ČBixčhen' chesene' ca'?

¹² Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loį da' de yežlio nga. ĮNezele bin' ža gan' nyoj Xtiža' Diosen' chia' neda' naca' ben' gwseļa' Dios golja' beňač? Žan saca'zi'a na' bene' zan bi yesejnilaže' neda'. ¹³ Na' žia' le'e, Elías ba bide' na' gosonde' įe' con ca gosaclaže', can' nyoj įe'e Xtiža' Diosen' žan can' cheyaļa' gac čhe'.

Jesúsen' beyone' to bi' yo'o nyazbe' da' xigüe'

(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyęchjde' legaque', na' len bene' ca' chososed chosolo'ede' dan' bzoj da' Moisés chesedildiže' len legaque'. ¹⁵ Na' cate' bene' ca' besele'ede' Jesúsen', yogüe' besyežejde' na' ja'acsesę' bosoguape' įe' tiox. ¹⁶ Nach gwñabde' legaque':

—ĮBin' chdildiža'le len bene' ca'?

¹⁷ Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'.

¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxęj įaybe'. Na' ca' jej cheddo fuerz chebe'. Na' ba gwñaba' lao bene' qui zjanaque' le' txen yesębeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' bene' ca' že'na':

—ĮLe'e bene' bi chejnilaže'! ĮŠna chyažjen soalena' le'e cont šejnilaže'le? ĮBatca' zelao na'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbičbe' lo yo, chbič čtolbe' na' chbia bžina' cho'abe'. ²¹ Nach Jesúsen' gwñabde' xaben':

—ĮBaį iz ba goc chache' ca'?

Na' xaben' gwne':

—Cate' nache' bida'ote gwzolao chache' ca'. ²² Na' zan ni'a da' xigüen' chzaļan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

²³ Jesúsen' gože'ne':

—Cheyaļa' šejnilažo' neda', įe yogo' da' chzelaže' bene' chesejnilaže' neda' chaquen.

²⁴ Nach xaben' gwne' zižje:

—ĮChejnilaža' le', goclen neda' šejnilaže'cha'!

²⁵ Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'anbe' ca bi' guat, na' zan bene' gosene' gotben'. ²⁷ Perw Jesúsen' bęxue' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, bene' ca' zjanaque' įe' txen gosebeje' įe' ca to lchojiže' na' gosenabde' įe':

—ĮBixčhen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyaļa' gonįe gwbas na' soatezle yol güižle Dios.

Da' yoble Jesúsen' gwne' gate'
(Mt. 17:22-23; Lc. 9:43-45)

³⁰ Cate' besyeya'aque' na', besyedie' distritw Galilea. Na' Jesúsen' goclaže' nono yeseneze,
³¹ le chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' benach, yosodie' neda' lo na' bene' yesote'nda',
perw yeyon ža yebana' ladjo bene' guat ca'.

³² Perw bi gosejni'ide' bin' gože' legaque', na' besežebe' yesenabde'ne'.

Gosedildiže' gosene' noen' nac bene' blaoch
(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen'
gwnabde' legaque':

—žBixchen' chdildiža'le chanez?

³⁴ Perw con gosenite' šižize, le chanezan' gosedildiže' gosene' noen' nac bene' blaoch.

³⁵ Nach Jesúsen' gwchi'e na' goxe' bene' šižiw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyala' gonle xbab bibi zaca'tecl, na' cheyala'
gon cuinle ca xmos yogo' bene' lježle.

³⁶ Nach bežue' to bidao' na' bzeche'be' gachol' legaque', na' gwlene'be' na' gože' legaque':

³⁷ —Note'teze bene' chone' güen len to bidao' ca bi' nga neche da' chejnilaže' neda',
choncze' güen len neda'; na' noteze' chon güen len neda', choncze' güen len Dios ben' gwsela'
neda'.

Bene' bi chon chio' contr; txencza' chone' chio'
(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto'
gone' ca', le bi chone' chio' txen.

³⁹ Na' Jesúsen' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela'
ya' chia'. ⁴⁰ Le bene' bi chone' chio' contr, txencza' chone' chio'. ⁴¹ Chnia' le'e to da' zejen,
note'teze bene' gone' le'e la' to xiga'ze nis da' ye'ejle neche chejnilaže' neda' na' neche nežde'
le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj
(Mt. 18:6-9; Lc. 17:1-2)

⁴² Note'teze bene' chon cont lažo' to bene' za' gwzologüe' chejnilaže' neda' gone' da' xinj,
yejni'acle yosocheje' yene' to yiše xen na' yosozale'ne' lo' nisonaon' clcl ca da' gone' cont
lažo' bene' yoble gone' da' xinjen'. ⁴³ Na' še yena'len' chon' chon cont gonle' da' xinj, cheyala'
cuejyichjle da' malen' chonle. Yejni'a bibi na'le zoa clcl ca gonle' da' xinjen' len len. Na'
yejni'a šjayzoale len Diosen' toli' tocañe bi zoa šla'a taca'le clcl ca yeyejle lo' yi' gabil' dan' bi
cheyol' chenit nya' cuerp' chelen'. ⁴⁴ Na' gabilen' neca chesat bzogan', neca cheyol' yin'. ⁴⁵ Na'
še ni'alen' chonen ga gonle' da' xinj, lecze cheyala' cuejyichjle da' malen' chonle. Yejni'a bibi
ni'alen' zoa clcl ca gonle' da' xinjen' len len. Na' yejni'a šjayzoale len Diosen' toli' tocañe bi
zoa šla'a ni'alen', clcl ca yeyejle lo' yi' gabil' dan' bi' cheyol' chenit nya' cuerp' chelen'. ⁴⁶ Na'
gabilen' bzoga' ca' bi chesatba', neca cheyol' yin'. ⁴⁷ Na' še yejlaolen' chonen cont gonle' da'
xinj, cheyala' cuejyichjle da' malen' chonlen'. Yejni'a bibi yejlaolen' žia clcl ca gonle' da' xinjen'
len len. Na' yejni'a šjayzoale len Diosen' toli' tocañe zoa šla'aze yejlaole clcl ca yežinle lo' yi'
gabilen' žia chop la'a yejlaolen'. ⁴⁸ Ca nac gabilen', bi chesat bzogan', neca cheyol' yin'.

⁴⁹ Le dan' chyi chzaca'le yežlio nga chzejni'in le'e cont bi yeyejle lo' yi' gabil'. Na' da'
chyi chzaca'le zaca'leben ca zede' da' cheyala' chixe' yezj yogo' ni'a cate' chjasesane' yezj
lao Diosen'. ⁵⁰ Na' zeden' naquen güen, perw še bich bi zxi' naquen, žnacxe goncho cont
yeyaquen zxi' da' yoble? Na' le'e cheyala' gwyo gwchejlaže'le dan' chyi chzaca'le na'
cheyala' soale binlo' tole yetole, na' še soale ca', zaca'leble ca to yela' guagw da' yo'o zede'.

10

Jesúsen' bzejni'ide' bi cheyala' yela'acho len no'ol checho
(Mt. 19:1-12; Lc. 16:18)

¹ Jesúsen' beze'e Capernaum na' gwejche' gan' mbane distritw Judean' na' yešla'a yegw
Jordánna'. Na' da' yoble besežag bene' zan gan' zoen' na' lecze da' yoble bsd blo'ede'
legaque' con can' choncze'. ² Nach bał bene' fariseo ca' ja'aque' gan' zoa Jesúsen' gosaclaže'
yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to bene'
yele'e len no'ol che'. ³ Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

⁴ Legaque' gosene':

—Moisésen' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaque':

—Moisésen' gwne' gac gonle' ca' lagüe dan' nacle bene' güedenag len Diosen'. ⁶ Perw cate' gwxe yežlion', cate' bxe Diosen' yogo' da' de, bi goquen ca'. Le noyjen žan: "Bene' legaque', to bene' byo na' to no'ole." ⁷ "Da'nan' bene' byon' gwsane' xaxne'e cont soalene' no'ol chen', ⁸ na' chope' yesaque' ca' toz bene'." Na' ca' bich yesac chope' san toze'. ⁹ Da'nan' bi cheyala' yesyele'e, le Diosen' ba bcode' legaque'.

¹⁰ Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. ¹¹ Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca' naquen šaca' gata'lene' no'ol che' bene' yoble. ¹² Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

Jesúsen' gwñabde' Diosen' gac güen che' bidao' ca' besežag

(Mt. 19:13-15; Lc. 18:15-17)

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedi'e' bene' ca' zjanche'ebe'. ¹⁴ Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca' bidao' quinga, legaque' chosozenague' che' Diosen' cont chnabi'e' yichjlažda'ogaque'. ¹⁵ Da' li žia' le'e, note'teze bene' cheyala' yosozenague' che' Diosen' ca' cheson bidao' cate' chosozenagbe' che' xaxna'be', le bene' bi yosozenague' ca', gwbat nabia' Diosen' yichjlažda'ogaque'.

¹⁶ Nach gwłene' to' to bidao' ca' na' gwñabde' Diosen' gac güen chebe', gwžoa taquen' yichjbe'.

To bene' güego' bšaljlene' Jesúsen'

(Mt. 19:16-30; Lc. 18:18-30)

¹⁷ Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. žBi cheyala' gona' cont gata' yela' mban chia' toli tocañe'?

¹⁸ Jesúsen' gože'ne':

—žBixchen' žo' naca' bene' güen? Toze bene' güen zoa, na' len' Dios. ¹⁹ Le' neždo' da' none' mandaw goncho: "Bi gata'lenle' no'ol bi nac no'ol chele' o bene' byo bene' bi nac bene' chele; nono gotle; bi cuanle; bi güe'le diža' güenlaže' che' bene' lježle; bi siye'le bene'; le' gap bala'an xaxna'le."

²⁰ Na' boži'e' xtižen':

—Maestro, yogo' da' quinga chzenaga', gwzolagua' chonczan' cate' ne' nactia' bidao'.

²¹ Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono'; šjayeto' yogo' da' de' chio' na' da' le'edo' chen' bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

²² Na' cate' bene' ben' dan' gwna' Jesúsen', godce' leca' zdebe naquen gone' can' gože'ne', na' beza'yaše', le' bene' gwñi'achgua goque'.

²³ Nach Jesúsen' gwne'e do' cue'ej cuite' na' gože' bene' ca' zjanaque' le' txen:

—Leca' zdeb naquen to bene' gwñi'a gwzenague' che' Diosen' cont Diosen' nabi'e' yichjlažda'ogüe'.

²⁴ Na' bene' ca' zjanaque' le' txen besyebande' can' gwnen', perw Jesúsen' goze'e' legaque':

—Xi'ina', bene' chesacde' zaca'chgua yela' gwñi'a chegaquen', leca' zdebe naquen yosozenague' che' Diosen' cont nabi'e' yichjlažda'ogaquen'. ²⁵ Bedao'ch te to be xen be nzi' camello to lo' nag yeše' clcl ca' to bene' gwñi'a gwzenague' che' Dios cont Diosen' nabi'e' yichjlažda'ogüe'.

²⁶ Cate' gosende' dan' gwne', leca' besyebande' na' gose' lježe':

—žNoxen' šjayzoa len Diosen' še ca'?

²⁷ Jesúsen' gwne'e' legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le' bi zoa da' nacho da' bi gac gon Dios.

²⁸ Nach Pedron' gože'ne':

—Neto' ba gwlejyichjto' yogo' da' de' cheto' cont nacto' le' txen.

²⁹ Jesúsen' boži'e' xtižen':

—Da' li žia' le', note'teze bene' ba gwlejyichje' liže', bene' biše', zane', xe', xne'e, no'ol che', xi'ine', o yežlio che' ne' chia' neda' na' neče' chzenague' xtižan', ³⁰ yežlio nga yonežjo Diosen' le' to gayoa cate'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na'

cate' yežine' yaban' gata' yela' mban' che' toli' tocañe. ³¹ Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

Da' yoble Jesúsen' gwne' yesote'ne'
(Mt. 20:17-19; Lc. 18:31-34)

³² Zjangü'e nez zja'aque' bso dan' zoa gała'ze Jerusalenna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojiže' na' gože' legaque' can' gac čhen'. ³³ Gože'ne':

—Na'a ba zejcho Jerusalén gan' yesone' neda' lo na' bžoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesečhoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwsela' Dios golja' benač. ³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

Jacobo na' Juan gosenabe' to goclen lao Jesúsen'
(Mt. 20:20-28)

³⁵ Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

³⁶ Na' gwnabe Jesúsen' legaque':

—iBi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabi'o.

³⁸ Nach Jesúsen' gože'ne':

—Le'e cabi nezele bi dan' čnñable. žGwčejlaze'le tele yela' zi' yela' ya' ca dan' tia' neda' na' gac čhele can' gac čhia'?

³⁹ Legaque' gose'ene':

—Gwčejlaze'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac čhele can' gac čhian'. ⁴⁰ Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen čhe'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'. ⁴² Perw Jesúsen' goxe' yogüe' cont gosebigue' laogüen' na' gože' legaque':

—Nezeczle bene' zjambeje' cont chesenabi'e to to nación na' bene' blao ca' chesone' byen chosozenag bene' chegaque'. ⁴³ Perw bi naquen ca' len le'e. San note'tezle chaclaže'le gacle bene' blao, cheyala' gwzexjwlaže'le gaclenle bene' lježle. ⁴⁴ Na' note'tezle chaclaže'le gacle bene' žialao, cheyala' gon cuinle ca' xmos yogo' bene' lježle. ⁴⁵ Le lencze neda', gwsela' Diosen' neda' golja' benač, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neče xtola' benačhen'.

Jesúsen' beyone' to bene' lchoj ben' gože' Bartimeo
(Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoj chanez čnñabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo. ⁴⁷ Na' bene' lchoja' cate' gočbe'ede' gwde Jesús bene' Nazaret gan' čhi'ena', gwzolagüe' gwne' zižje gwne':

—iJesús, xi'in diaža čhe da' rey David, beyaše'laže'sca neda'!

⁴⁸ Bene' zan gosedi'e' le' cont bich yosye'e, perw bosya'adiache' gwne':

—iXi'in diaža čhe da' rey David, beyaše'laže'sca neda'!

⁴⁹ Nach Jesúsen' gwleze' na' gwne':

—Le gaxe'.

Nach gosaxe' bene' lchoja' na' gose'ene':

—Benčačhlažo', gwzoža', le chaxe' le'.

⁵⁰ Nach gwcho'one' lache' da' nřoa čože' na' bxite' jabigue' lao Jesúsen'. ⁵¹ Nach Jesúsen' gwñabde' le':

—iBi chaclažo' gonda' le'?

Bene' lchoja' boži'e xtižen':

—Maestro, čhe'nda' yele'eda'.

⁵² Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlagoon'.

Na' la' bele'ete bene' l'cho'la', na' gwda'ogüe' Jesús'en'.

11

Jesús'en' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesús'en' gwsele' chop bene' ca' zjanaque' le' txen mandadw, ² gožgaque'ne':

—Le šja'ac yež dan' chi' ga'la'ze, na' cate' žin'len' na' yeželele to burr dao' da'ba' yag be nono na' cuia. Le sežba' na' le che'ba' nga. ³ Na' še no chnab bičen' chonle ca', le ye'e: “Xanto' chyažjde'ba'”, na' la' gwzantecze'ba'.

⁴ Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

⁵ Na' bal' bene' ca' nita' na' gose'ene':

—¿Bixen' chonle? ¿Bix'čen' chsežle burron'?

⁶ Nach bosyoži'e xtižen' can' gož Jesús'en' legaque', na' goso'e latje goseseže'ba' cont goseče'eba'. ⁷ Nach goseče'e burron' lao Jesús'en' na' gosexo'a xagaque' cože'ban' na' gwžia Jesús'en' leba'. ⁸ Na' bene' zan gosonxene' Jesús'en' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

⁹ Bene' zjažialao na' lecze bene' za'ac cože' gosezolagüe' bososye'e, gosene':

—iLeca zaca'chgua bengal! iMbalaz ben' za' nga nse'la' Xancho Diosen' le' cont nabi'e! ¹⁰ iMbalaz ye'la' gwnabia' che' da' nse'e, le' nabi'e ca' da' xoxxta'ocho David! iLeca zaca'chgua Dios ben' zoa yaban'!

¹¹ Can' goc, Jesús'en' gwyo'e Jerusalén, na' lecze gwyo'e chy'o'o che yodao' blaon'. Na' beyož gwne'e yogo'lol' da' de na', beyeje' Betania len bene' šižinw ca' ba gwleje' cont zjanaque' le' txen, le ba zoa ga'.

Jesús'en' gwne' gacxi'a yag yixgüigw da' bibi žia

(Mt. 21:18-19)

¹² Beyechj ža cate' besyeya'aque' Betania, Jesús'en' gwdone'. ¹³ Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. ¹⁴ Nach Jesús'en' bo'ž güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

Jesús'en' bešaše' bene' ca' cheson ya'a chy'o'o yodaon'

(Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwyo'o Jesús'en' chy'o'o yodao' blaon', gwzolagüe' bešaše' bene' ca' chesote' na' bene' chesa'o na'. Na' bchiže' xmes bene' ca' chosoša' mechw na' yag ga chesebe' bene' ca' chesote' ngolbex. ¹⁶ Na' bi be'e latje yesexo'a xnez bene' zjanao' yoa' chy'o'o yodaon'. ¹⁷ Na' bsd blo'ede' bene' ca' že' na', gože'ne':

—Nyojcze Xtiža' Diosen' žan: “Yesene' ližan' naquen latje gan' šja'ac bene' yogo' nación yosol güiže'nda'”, perw le'e ba ben'len ca' to latje ga že' bene' gwban.

¹⁸ Na' bžoz gwnabia' ca' na' bene' ca' chososed chosolo'e dan' bžoj da' Moisés gosende' can' gwnen', na' goseyilwlaže' nacle yesone' yesote'ne'. Ba chesežebe' Jesús'en', le yogo' bene' besyežejde' can' bsd blo'eden'. ¹⁹ Perw na' cate' go'ž, Jesús'en' beže'e ciudad'.

Gwbiž yag yixgüigon'

(Mt. 21:20-22)

²⁰ Beyechj ža sežil, gosodie' na' besele'ede' yag yixgüigon' ba gwbižen lente loen. ²¹ Nach Pedron' jayze'ede' na' gože' Jesús'en':

—Maestro, gwna' yag yixgüigw dan' gwnao' gacxi'an, ba gwbižen.

²² Jesús'en' boži'e xtižen':

—Le šejnilaže' Dios. ²³ Da' li žia' le'e, note'teže bene' ye'e ya'a nga: “Gwcuase nga na' jayzoa lo' nisdao'”, še bi chacčejlaže' lo' yichjlažda'ogüe', san chejnilaže' Diosen', guacczen. ²⁴ Da'n'an' žia' le'e, yogo'te da' nable cate' cho'ž güižle Dios, le šejle' guaquenzen, na' le gacczen. ²⁵ Na' cate' cho'ž güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xto'la'le. ²⁶ Perw še le'e bi yezi'xenle che bene', Xacho Dios bene' zoa yaba bi yezi'xene' che xto'la'le.

Ye'la' gwnabia' che Jesús'en'

(Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' ślac chda Jesúsen' chyo'o yodao' blaon' jasebiga' b̄xoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e naciōnna'. ²⁸ Na' gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach n̄ia' le'e bi yela' gwnabia' chonlendan'.
³⁰ ¿No gwseła' da' Juanna' bzoe' bene' nis? ¿Dios nan' gwsele'ne' še benachen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca' gwyejle'le che'?” ³² Bi gac ye'chone' benach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

³³ Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

¹ Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoo to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gwyeje' zito'. ² Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en. ³ Perw na' bene' ca' gosezene' mosen' gosot goseyine'ne', na' to ga'alze' bosyose'ene' bibi gosone'. ⁴ Nach xan yežlion' da' yoble gwsele' yeto xmose'; perw benga bosozie'ne' yej, gosone' güe' yichje' na' gosonde' le' zgot. ⁵ Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bale' gosot goseyine' le' na' yebale' gosottecze'ne'.

⁶ 'Ne' zoa yeto bene' bina' sele', bena' xi'ine' bene' chacchgüede', na' bzebe gwsele' le', le bene' xbab: “Yesezi'e xtižen'!” ⁷ Perw bene' ca' gose' lježe': “Bengan' yega'anlene' yežlio nga cate' gat xen'. Le da gotchone' cont yega'anlenchon'.” ⁸ Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

⁹ Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

¹⁰ ¿Bina' gwlable ga nyoj Xtiža' Diosen'? žan quinga:

Yej dan' bi gosaclaže' bene' güen yo'o ca' yosochine', len ba naquen yej squin.

¹¹ Da' nga ben Xancho Dios, na' naquen to da' yežejecho.

¹² Nach gosaclaže' yesezene' Jesúsen', le gosacbe'ede' be'e jemplna' neche dan' bi chesejnilaže' le'. Perw besežebe' še bi yesone bene' ca' nžaguen' legaque', da'nān' bosocua'ane'ne' na' besyeya'aque'.

Ca nac che dan' cheyała' gaxjw

(Mt. 22:15-22; Lc. 20:20-26)

¹³ Gwdena' gosesele' bal' bene' fariseo na' bal' bene' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'. ¹⁴ Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teže bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. Da'nān' zedenabeto' le' žnaquen binlo no chixjo da' cheyała' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

¹⁵ Jesúsen' goche'ede' gague do lažen' chese'ene' ca', san chesaclaže' yesonlede' le' len xtiža'gaquen', nach gože'ne':

—¿Bixchen' chaclaže'le yoslažo'le neda' len xtižan'? Le gon neda' to mechw cont na'an.

¹⁶ Na' goso'enen', na' cate' ble'eden' na' Jesúsen' gwñabde' legaque':

—¿No lao dan' da' le'e mechw nga? na' žno la dan' nyoj le'en ni?

Nach bosoyoži'en gose'ene':

—Če César ben' nac la'zelagüe bene' gwnabian' ben' chi' ciuda Roman'.

¹⁷ Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban bene' guat ca'
(Mt. 22:23-33; Lc. 20:27-40)

¹⁸ Nach besežin bał bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

¹⁹ —Maestro, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyała' yošagna'lene' no'ol güezeba' cont yesenita' xi'in diaža che da' bišen'. ²⁰ Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. ²¹ Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. ²² Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca' beyožen got len no'ola'. ²³ Gož neto', cate' yesyebane' ladjo bene' guat ca' ĩnox bene' ca' soalene' no'ola' ca' xo'ole'? le yogo' bene' gaža' bosošagna'lene' le'.

²⁴ Nach Jesúsen' boži'e xtižen', gwne':

—Clemen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'. ²⁵ Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca' angl bene' zjazoa yaba. ²⁶ Na' ca' nac dan' yesyeban bene' guat ca', ĩbiña' gwlable gan' bzoj da' Moisés, can' gož Diosen' le' caten' boł güiže'ne' to lo yag yeše' dao' da' chey? Gože'ne': "Neda' naca' Dios ben' chonxen Abraham, ben' chonxen Isaac, na' ben' chonxen Jacob." ²⁷ Bene' guat ca' bi chesonxene' Diosen', san bene' zjamban. Na' ca' nac le'e, leca clemen' chonle xbab.

Da' nac da' žialao da' cheyała' goncho
(Mt. 22:34-40)

²⁸ Leze bžin to bene' bsd blo'ede' ley dan' bzoj da' Moisés, bene' bende' caten' chesežeše' len Jesúsen', na' nežde' boži'icze Jesúsen' xtiža'gaquen' binlo. Na' bena' gwñabde'ne':

—ĩNon' nacch da' žialao da' zjanyojen da' ža Diosen' cheyała' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lołen, žan: "Le gwzenag bene' Israel gualž chia', toze Xancho Dios naque' bene' zaca' gonxencho. ³⁰ Da'n'an' cheyała' gaguecho Xancho Diosen' con ca' zelao chejni'icho, do yichj do laže'cho, do fuerz valor checho." Lenña' naquen' da' žialao lagüe da' ca' ža Diosen' cheyała' goncho. ³¹ Na' da' gwchopen' zejgałan' ca', gan' žan': "Cheyała' gague lježcho ca' chaque cuincho." Bich bi de da' že' cheyała' goncho da' zaca'ch ca' da' qui.

³² Nach ben' chsd chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxen-chone', na' noch no' zoa bene' zaca'ch ca' le'. ³³ Na' še gaguecho Dios, con ca' zelao chejni'icho, do yichj do laže'cho, do fuerz valor checho, na' gague lježcho ca' chaque cuincho, lenña' zaca'chen ca' yogo' da' choncho chotcho no beyixe' na' chzeychoba' chonxencho Diosen'.

³⁴ Nach cate' goche'e Jesúsen' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'ogoun'.

Na' ne yetoe' bich besyaxjde' bichle yesenabde' Jesúsen'.

Criston' naque' xi'in diaža che da' rey David
(Mt. 22:41-46; Lc. 20:41-44)

³⁵ Jesúsen' bsd blo'ede' chyo'o yodaon', gwne':

—ĩNacxečen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque' xi'in diaža che da' rey David? ³⁶ Cuin Daviden' gwne' can' blo'e Spiritw che Diosen' le':

Xancho Dios gože' Xanan':

"Gwche'edo' cuita' nga nabi'acho txen,

na' gona' gac yog'o no chesegue'e le' yosozexjw yichje' yosozenague' chio'."

³⁷ ĩNacxe gac nacho Criston' naque' xi'in diaža che da' David? le' cuin Davin' gože' le': "Xana'". Na' zjanyanchgua bene' ca' chosozenag xtižen', na' besyebede' xtižen'.

Jesúsen' bcuiše' bene' ca' chososed chosolo'e ley dan' bzoj Moisés
(Mt. 23:1-36; Lc. 11:37-54; 20:45-47)

³⁸ Jesúsen' caten' chsd chlo'ede' legaue' gwne':

—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' toñ, na' chesyebede' chesap bene' legaue' bala'an

cate' chesyēzague' lagüe ya'a. ³⁹ Chesyebede' chesebi'e gan' chesebe' bene' blao cate' chja'aque' yodao' na' cate' chac lni. ⁴⁰ Legaque' cheseque'e yo'o che no'ol güezeb ca', na' cate' chosol güize' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clcl ca yezica'chle bene' güen da' xinji.

To no'ol güezebe be'e Diosen' xmechue'

(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gała'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñi'a ca' chesegüe'e da' zcha'o mechw. ⁴² Ca' chac, cate' bžin to no'ol güezebe bene' yaše', gwlo'e čop mechw dao' da' bibi zaca'tec. ⁴³ Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clcl ca yogo' bene' ca' chesego'o mechw lo' cajan', ⁴⁴ le yogo' legaque' chesegüe'e da' checho'onen lo yela' gwñi'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

13

Jesúsen' gwne' gwžin ža yosyočhinje' yodao' blaon'

(Mt. 24:1-2; Lc. 21:5-6)

¹ Cate' cheza' Jesúsen' yodao' blaon' to bene' ca' zjanaque' le' txen gože'ne':

² —Maestro, gwña'šc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočhinje'.

Can' gac cate' ba zoa yeyož yežlion'

(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nła' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

⁴ —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

⁵ Jesúsen' boži'e xtižen', gwne':

—Le gwsaca' cont nono siye' le'e. ⁶ Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

⁷ Na' cate' yenele chac gwdiže' nile nale, o yenele guac gwdiže', bi žeble, le can' cheyala' gac. Perw gague lenna' nacho ba bžin ža yeyož yežlion'. ⁸ Le yesedił to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

⁹ Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže' le neda' nita' bene' yesече' exoxje' le'e no lao rey no lao nochle bene' gwnabia', na' can' güe'lenle legaque' xtižan'. ¹⁰ Le za' te che yežlion', xtiža' Diosen' cheyala' gas laljen doxen yežlion'. ¹¹ Na' cate' yesezene' le'e na' yesече' le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teže, le gague le'eczen' nele, san Spiritw che Diosen' gonen ga nale bin' cheyala' nale. ¹² Cana' bal' benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesot legaque'. ¹³ Yogo'ze bene' yesegue'ede' le'e dan' chejnilaže' le neda', perw note'tez le'e gwyo gwčhejlaže'le cont bi cuejyichjle dan' chejnilaže'le neda' žin žate gatle, nach šjayzoale len Diosen'.

¹⁴ Da' Daniel ben' gwdixjue'ede' xtiza' Dios bzoje' che da' zbanchgua da' gwxinjen latje gan' chonxcho Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) ¹⁵ Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'. ¹⁶ Na' bene' chda yixe' bi yeyej liže' šjayxi' xalane'. ¹⁷ jNyaše' chguaze zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'. ¹⁸ Le nab lao Dios bi yažjen gwxonjle caten' chac zag, ¹⁹ le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble. ²⁰ Na' šaca' Xancho Diosen' bi yozaše' žan' yesac ca', notno yela, perw yozašen' neče chacde' bene' ca' chesejnilaže' le', bene' ba gwleje' zjanaque' xi'ine'.

²¹ Cana' še no ye' le'e: “Le na'šc, nga zoa Cristo ben' gwlej Diosen' cont nabi'e”, o “Le na'šc, na' zoe”, bi šejle'le. ²² Le yesaš bene' gwxiye' bene' yesaclaže' yosolane' xlatja' nga, na' yeson cuine' ca bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine'

yesaclaže' bene' gwxiye' ca' yeseziye'e šaca' gac yeseziye'e legaque'. ²³ Perw ca nac le'e, le gwzenag, le ba gwđixjue'eda' le'e yogo' can' gac.

Can' gac cate' ben' gwsela' Diosen' golje' benach' yide' da' yoble
(Mt. 24:29-35, 42-44; Lc. 21:25-36)

²⁴ Perw ca nac ža ca' cate' yeyož gale' le can' gwnia', gwbižen' yeyaquen choł na' bion' bich gwseñin'. ²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ²⁶ Nach bene' že' yežlion' yesele'ede' neda' naca' ben' gwsela' Diosen' golja' benach' za'a ladjo bejon' len yela' guac xen na' yela' bene' zaca' juisyw chian'. ²⁷ Nach sela' angl' chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

²⁸ Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'eñ dao', nezele ba za' lagüe ba. ²⁹ Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. ³⁰ Da' li žia' le'e, biña' yenit diaža che le'e nita'le na'a cate' yeyož gac yogo'loł da' ca'. ³¹ Le'e yaban' na' yežlion' yesede čhen, perw ca nac xtižan', gague da' te cbi gac can' žanna'.

³² Perw nono neze bi ža bi horen' gac ca', ne angl' ca' nita' yaba, neca neda' naca' Xi'in Diosen' bi nežda'. Toze Xa' Dios neze.

³³ Da'nan', le soa le cueze, le güia le na', na' le soateze yoł güižle Dios, le nono neze batcan' žin ža. ³⁴ Naquen ca' nac che to bene' šeje' zito', na' cate' za' se'e choł liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. ³⁵ Le soa le cueze ca' bene' chesape' liže'na', le bi zjanežde' batcan' yela' xan yo'on, še cate' ba zoa gal', še chel, še cate' chbež jea, še cate' ba gwyeni'. ³⁶ Le xož yele'e zejzenez na' yedole'de' legaque' chesetase'. ³⁷ Da' nga žia' le'e leze žiczan' par yogo'loł bene'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

¹ Yechop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bžoz gwnabia' ca' na' bene' ca' chososed chosolo'e dan' bžoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'. ² Perw gosene': —Bi senchone' lo lñin' cont ca yesebec bene' žaš.

To no'ole bžoe' set zix yichj Jesúsen'

(Mt. 26:6-13; Jn. 12:1-8)

³ Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chgwan la'ay. Na' bžoxje' gan' yož seta' na' bžoačhočhje' seta' yichj Jesúsen'. ⁴ Na' bal' bene' ca' zjanita' na' beseže'e, na' gose' lježe':

—žBixčhen' benditjde' set zix nga? ⁵ Ša no bete' len güesonen ca no laxjw mos da' gone' gan güiž, na' gwnežjuen' gaclenen bene' yaše'.

Na' beseloque' no'ola'.

⁶ Perw Jesúsen' gwne':

—Jayen'. žBixčhen' chnele che no'olen'? Dan' bene' len neda' nga naquen güen. ⁷ Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan čele, san neda' bich soacza' yesša len le'e. ⁸ No'ole nga bene' da' zelao gwzauque'de'. Ba bguazje' neda' set zix can' cheyala' yesone' len neda' cate' gaša'. ⁹ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

Judas gwchoglaže' gwđie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeje' jane'e bžoz gwnabia' ca' cont yosoxi'e nac gone' gwđie' Jesúsen' lo na'gaque'. ¹¹ Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzolažüe' gwđiljwlaže' nac gone' gwđie' Jesúsen' lo na'gaque'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' bžin ža čhala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjajza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenažde' le':

—žGa che'ndo' šjasiñi'ato' cont gagwcho xše' che pascon'?

¹³ Nach gwsele' čhop bene' ca' na' gože'ne':

—Le šja'ac ciudan', na' yežagle to beñe' byo no'e to che'e nis. Le šejlene', ¹⁴ na' gan' yežinen', le ye' xan yo'on: "Maestrona' že': Goñsco' to yo'o gan' gagwto' xše' ža lni nga len beñe' ca' zjanaque' neda' txen." ¹⁵ Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

¹⁶ Na' gosa'ac beñe' ca' chophe, na' besežine' ciudan', na' yogo' can' gož Jesúsen' legaque' goc, na' bososiñi'e xše' že' lñin'.

¹⁷ Cate' beyož gwxo'a gwbiž, bžin Jesúsen' len beñe' šižinw ca' gwleje' cont zjanaque' le' txen. ¹⁸ Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' beñe' ca' chesegue'e neda':

¹⁹ Nach legaque' besyeyaše' laže' de' na' gosezolagüe' tgüeje tgüeje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

²⁰ Na' Jesúsen' gože'ne':

—Ladjo le'e beñe' šižinw, to beñe' chagw len neda' txen toze lo' ye'en gon ca'. ²¹ Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' beñach. Perw įnyaše' chguaze nac ben' gwdie' neda' lo' na' beñe' ca'! Yejni'acle ša bi goljen'.

²² Na' šlac chesagüe', Jesúsen' gwxi'e to yetextilen', na' beyož be'e yela' choxclen che Dios, bzoxjen', na' bnežjuen' legaque', gwne':

—Le gagon'. Len'na' cuerp chia'.

²³ Nach beñue' to vas gan' yože nis uvasen' na' beyož be'e yela' choxclen che Dios, be'en legaque' na' yogüe' gose'eje' late' güej dan' yože lo' vassen'. ²⁴ Na' gože' legaque':

—Da' ngan' xchena' na' chzanlažan' laljen neche yogo' lo' beñach. Na' laljen cont solao gac da' coben' da' gwna Diosen' gone' gaclene' beñach. ²⁵ Da' li' žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

Jesúsen' gwne' Pedroa' bi chebe' naque' le' txen

(Mt. 26:30-35; Lc. 22:31-34; Jn. 13:36-38)

²⁶ Beyož gosole' gosonxene' Diosen' nach gosa'aque' ja'aque' Ya'a Olivos. ²⁷ Nach Jesúsen' gože'ne':

—Na'aže' yogo'le cuejyichje neda' neche dan' gac chian'. Le nyojzen le'e Xtiža' Diosen', žan: "Gota' beñe' güeyoe xilan' na' xila' ca' yesaslasba'." ²⁸ Perw cate' yosban Diosen' neda' ladjo beñe' guat ca', yobch yeya'a Galilea ca' le'e.

²⁹ Nach Pedron' gože'ne':

—La' yogo' beñe' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li' žia' le', biñ'a' cuež jean' chop ni'a na'aže' cate' gac šon ni'a bi chchebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' bo' güiže' X'e Dios Getsemaní

(Mt. 26:36-46; Lc. 22:39-46)

³² Nach besežine' latje gan' nzi' Getsemaní, na' Jesúsen' gože' beñe' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

³³ Na' gwche'e Pedro, Jacobo na' Juan, na' gwzolaon da' juisyw da' godde' lo' yichjlažda'ogüen' na' benchgüe' xbab. ³⁴ Na' gože' legaque':

—Lo' yichjlažda'ogua' nga chacyaše' chgüeda', chacda' gatzca' catequen' chžaglagua'. Nga le yega'añ na' le soa le na' txen len neda'.

³⁵ Nach Jesúsen' gwžialagüe' yelate' na' jachaze' coscho'ale lo' yon' gwñabde' Dios še guac ten ca'ale bi gac can' ba zoa gac che'. ³⁶ Gože' Diosen':

—X'a', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chnaba' gac da' žia' neda', san gac da' nao' le'.

³⁷ Nach beyeje' gan' nita' beñe' ca' šone, na' ble'ede' zjanite' chesetase'. Na' gože' Pedron': —Simón ¿chtason'? ¿Ne šlož da'oze ca' goc cuejo' bišgal len neda'? ³⁸ Bi tasle, san le yol güiž Dios cont bi gon gwxiyen' le'e gan. Da' li' lo' yichjlažda'olen' chna'laže'le gonle da' nac binlo, perw cuerp chelen' bi chzoeczen.

³⁹ Nach gwyeje' da' yoble na' bo' güiže' Dios na' da' yoble gože'ne' dan' ba gožcze'ne' tñi'a. ⁴⁰ Nach bezyeje' gan' niten', na' da' yoble ble'ede' chesetase', le yejlagüen' chesexa'

chesežoden' bišgal. Na' bi besyežellaže' nac yosyoži'e xtižen'. ⁴¹ Na' da' gwyone' ni'a gwyeye' na' bezžine' gan' nita' bene' ca' šone' na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to bene' neda' lo' na' bene' güen' da' xinj' ca', neda' naca' ben' gwseła' Diosen' golja' beṇač. ⁴² Le chas, le yeyo'o. Ba za' ben' gon neda' lo' na'gaque'.

Gosezene' Jesúsen' cont yeseče'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' goseseła' bžox gwnabia' ca' na' bene' gole' blao' ca' chesenabia' nación Israel' cheton'. (Judasen' goque' to bene' šižinw' ca' gwlej Jesúsen' cont zjanaque' le' txen.)

⁴⁴ Na' Judasen' ba gože' legaque' nac yesenežde' non' yesezene', gwne':

—Ben' gwnopa' xague', le'na'; le sene' na' le če'e.

⁴⁵ Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnopene'. ⁴⁶ Nach gosezene' Jesúsen' cont yeseče'ene'.

⁴⁷ Perw to ben' zecha' cuiť Jesúsen' gwlej spada' chen' na' gwɔdinen' mos če' bžox blaon' gwchogte' šla'a' nagueñ'. ⁴⁸ Nach Jesúsen' gože' bene' ca':

—¿Nonle' neda' ca' to bene' gwban' za'acle' zedexi'le' neda' len spada' na' len yag? ⁴⁹ Yogo' žaze gwzoo' len le'e' bsd' blo'eda' bene' chyo'o' yodao' blaon', na' bi gwzenle' neda'. Perw chac' da' qui' cont chac' can' nuy' Xtiza' Diosen'.

⁵⁰ Nach yogo' bene' ca' zjanaque' Jesúsen' t xen' bosoxonje' gosebeyjichje'ne'.

Bi' güego' bin' boxonj

⁵¹ Na' to bi' güego' na'obe' Jesúsen', na' nřoa' cože'be' toze' sávana. Na' bene' ca' ba gosezene' Jesúsen' lecze' gosenize'be'. ⁵² Perw gwlejyichjbe' sávanan' na' boxonjbe' ga'alyidbe'.

Goseče'e' Jesúsen' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseče'e' Jesúsen' lao bžox blaon', na' besežag' yogo' bene' ca' zjanac' bžox gwnabia', na' bene' gole' blao' ca' chesenabi'e' nación' cheton' na' bene' ca' bososed' bosolo'ede' dan' bžoj' da' Moisés. ⁵⁴ Na' Pedron' na'ogüe' Jesúsen' zito' zito'le' bžintie' liž' bžox blaon' na' gwyo'e' chyo'ona' gwchi'e' t xen' len bene' ca' chesape' yodao' blaon' boše'e' cuine' cho'a' yi'.

⁵⁵ Na' ca' nac' bžox blaon' na' yogo' bene' ca' chesenabia' nación' cheton', besyeyiljwlaže' bi' da' yesagüe' xya' če' Jesúsen' cont yesote'ne', perw bi' besyeželden'. ⁵⁶ Na' zan bene' gosone' diža' güenlaže' če' Jesúsen', perw bi' gosene' toz' ca' yesene'. ⁵⁷ Bałe' gosezože'e' na' bososbague'ne' xya' chol' gosenē':

⁵⁸ —Neto' beneto' gwne': "Neda' yochinja' yodao' nga' da' ben' beṇač, na' šone' žaze' yeyona' yeto' yodao' da' bi' gon' beṇač."

⁵⁹ Perw ne' ca' ca' gosene' toz' ca' yesene'.

⁶⁰ Nach bžox blaon' gwzože'e' ladjo' yogo' lole' na' gwñabde' Jesúsen':

—¿Bi' choži'o' xtižen'? ¿Bi' dan' chosožie' le' xya'?

⁶¹ Perw Jesúsen' bitw' bi' gwne', bitw' boži'e' xtižen'. Na' bžox blaon' da' yoble' gwñabde' le', gwne':

—¿Naco' le' Cristo' ben' gwlej Diosen' cont' nabi'e, na' Xi'in' Dios' ben' chonxencho'?

⁶² Jesúsen' gože'ne':

—Le' can' naca'. Na' le'ele' neda' cate' ba' chi'a' šla'a' liča' če' Dios' ben' nac' la'zelagüe' bene' gwnabia', neda' naca' ben' gwsele' golja' beṇač. Na' le'ele' yetja' ladjo' bejw' dan' ze' le'e' yaban'.

⁶³ Nach bžox blaon' gwčeza' xalane' cont' nacia' bi' beque'e' can' gwna' Jesúsen', na' gwne':

—Noch' no' chyažje' bene' co' da' bałi. ⁶⁴ Le'e' ba' benele' chne' če' Dios' dan' že' ca', chon' cuine' ca' Dios. ¿Nacxe' ža' le'e'?

Na' yogüe' gosene' nape' doła' na' cheyała' gate'.

⁶⁵ Nach bałe' gosezolagüe' chosoži'ene' xene' na' bososeyjue' lagüen' len' to' lache' na' gosot' goseyine' le', na' gosonle' če' gose'ene':

—¿Gwnašc' non' chot' le'!

Na' bene' ca' chesape' yodao' blaon' gosot' goseyine' le'.

Pedron' bi' gwčebe' še' nombi'e' Jesúsen'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e' chyo'o' che'e'lele, cate' bžin' to' no'ole' güen' žin' če' bžox blaon'. ⁶⁷ Na' cate' no'olen' ble'ede' le' chi'e' choše'e' cuine' cho'a' yin', gwne' le' na' gože'ne':

—Lencze' le' naco' t xen' len' Jesús' bene' Nazaret.

⁶⁸ Perw Pedron' bi' gwčebe', gwne':

—Bi nombi'ane', neca nezda' bin' zo'.

Na' beyej Pedron' jayzie' cho'a puert na'le. Nach gwchež to jea. ⁶⁹ Na' no'ol güen žinŋa' gwne'e le' da' yoble na' gože' bene' ca' nita' na':

—Benga naque' legaque' txen.

⁷⁰ Perw le' da' yoble bi gwchebe' še naque' txen len Jesúsen'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nachbia' chŋio' can' chesene' bene' Galilea ca'.

⁷¹ Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsen' le': "Biŋa' cuež jean' chop ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesúsen' le', na' gwcheže'.

15

Goseče'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', bꝛoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosochėje' Jesúsen' na' goseče'ene' jasesane'ne' lo na' Pilato ben' nac gobernador. ² Pilaton' gwnabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

³ Na' bꝛoz gwnabia' ca' da' zan da' bosocuiše'ne'. ⁴ Nach Pilaton' da' yoble gwñabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

⁵ Perw Jesúsen' bitw bi gwne'. Na' Pilaton' bebande' che'.

Gosechogbi'en gat Jesúsen'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to bene' de ližya caten' chała' lŋi pascw che neto' bene' Israel, con to bene' yesenab bene' gualaž cheton'. ⁷ To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal. ⁸ Nach besežag bene' na' gosenabde' Pilaton' gwsane' to bene' con can' nac costumbr chegaquen'. ⁹ Na' Pilaton' boži'e xtiža'gaquen' gwne':

—¿Chaclaže'le gwsana' rey che le'e nacle bene' Israel?

¹⁰ Gwne' ca' le gocbe'ede' dan' chesacxi'a bꝛoz gwnabi'a ca' Jesúsen', da'nan' bosodie' le' lo ne'e. ¹¹ Perw bꝛoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. ¹² Nach Pilaton' gwnabde' legaque':

—¿Bixe gona' len ben' žale nac rey che le'e nacle bene' Israel?

¹³ Legaque' bososya'adie' bosyoži'e xtižen':

—jBde' le'e yag cruz!

¹⁴ Pilaton' gože' legaque':

—¿Bixe da' xiŋj nonen'?

Nach legaque' da' yoble bososya'achgüe' gosene':

—jBde' le'e yag cruz!

¹⁵ Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruz.

¹⁶ Nach soldadw ca' goseče'ene' yeto latje dan' zoa chyo'o che liž bene' gwnabian', na' bosotobe' yogo' soldadw ca', zjanac zane'. ¹⁷ Gosechize' Jesúsen' to lache' moradw, na' gosone' to corona de xis yeše' bosozoen' yichjen'. ¹⁸ Na' gosezologüe' chesonle' che', chesosye'e:

—jViva, rey che bene' Israel!

¹⁹ Na' bosozete' yichjen' xis, bosozhi'ene' xene', na' bosozoa xibe' gosone' ca' bene' chesonxen le'. ²⁰ Beyož gosonle' che', besyeyine' lache' moradon' na' bosyoguacue'ne' xacze'. Nach goseče'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

²¹ Na' šlac zjanče'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yiže', na' bosogüe'ene' yag cruz che Jesúsen'.

²² Goseche'e Jesúsen' latje ga nzi' Gólgota, zeje dižan' Latje che Žit Yichj Bene' Guat. ²³ Na' gosone' vino da' nchiže to nechw da' nzi' mirra, perw Jesúsen' bi goclaže' ye'ejen'. ²⁴ Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsen' cont bla' bi besyechel to toe'.

²⁵ Cheda ga šezille caten' bosode'ene' le'e yag cruz. ²⁶ Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey che Bene' Israel." ²⁷ Txen len Jesúsen' lecze bosode'e le'e yag cruz yechope bene' gwban, toe' šla'a liča, na' yetoe' šla'a robes. ²⁸ Na' da' gosone' ca', goc ca' nyoj Xtiža' Diosen', žan: "Gosone'ne' ca' bene' güen da' xinj."

²⁹ Na' bene' gosede gala'ze gosezi'diže'ne', con chosota yichje' gosene':
—Le' gwnao' yochinjo' yodaon' na' šone žaze yeyontion'. ³⁰ Bosla cuino' na' beyetj le'e yag cruza'.

³¹ Lecze ca' bxož gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. ³² Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

³³ Cate' bžin guagwbiž, doxen yežlion' goc choł, bžinte cheda šone. ³⁴ Na' ca' hora' Jesúsen' gwne' zižje gwne':

—Eloi, Eloi žlama sabactani? —zeje diža': Dios čhia', Dios čhia', žbixchen' ba gwlejšyichjo' neda'?

³⁵ Na' bał bene' ca' zjanita' na' gosende' na' gosene':

—Le gwzenag, choł güiže' da' Elías, ben' be' xtiža' Dios cani'.

³⁶ Nach to bene' ca' gwyejsese' na' bzažede' to esponja vino zičj na' bzoen' to lao xis toņe nach jažiguen' cho'a Jesúsen' cont xopen', na' gwne':

—Cuezcho, yešque güid Eliásen' yeletje' le'.

³⁷ Nach Jesúsen' bosye'e zižje, na' gote'. ³⁸ Na' lache' da' ze lo' yodao' blaon' bcheza' gacholen, gwza'te yichjen bžinte che'e. ³⁹ Na' xan soldadw ca' zie' lao Jesúsen', na' cate' bende' can' bosye'en na' ble'ede' can' goten', gwne':

—Da' li le' bengan' goc dogualje Xi'in Dios.

⁴⁰ Lecze bał no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. ⁴¹ No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososi'ne' par ža che Dios cate' bi de lsens yesone' žin. Na' cate' ba chxoa gwbiž, ⁴³ to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosonabi'e nación Israel cheton', na' ba zoe' chbeze' batcan' solao nabi'a' ben' seła' Diosen'. ⁴⁴ Pilaton' bebanded' dan' ba gote', na' goxe' xan soldadw ca' cont gwñabde' le' še da' li ba gote'. ⁴⁵ Na' cate' xan soldadw ca' gože' le' le' can' ba goc, Pilaton' bnežjue' latje beyoa' Josén' cuerp che' Jesúsen'. ⁴⁶ Nach Josén' gwzi'e to lache' xen, beletje' cuerp che Jesúsen' na' bolazen' len. Na' la' jasełote' le' to lo' bloj da' nche'ene' le'e yej xen, na' blöle' to yej cho'a blojen' cont bseyjon len. ⁴⁷ Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'

(Mt. 28:1-10; Lc. 24:1-12; Jn. 20:1-10)

¹ Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix' cont šjaselo'en cuerp che Jesúsen'. ² Na' šezilda' ža dmigw besežine' cho'a ban', cate' za' chla' gwbiž. ³ Na' za' yesežine' gose' lježe':

—žNoxe ca'a yej xen dan' da' cho'a blojen'?

⁴ Perw cate' besežine' na' gosene'e, besele'ede' yej xen dan' da' cho'a blojen' ba bga'an. ⁵ Nach gosoe' lo' blojen', na' besele'ede' chi' to bene' xcuide' šla'a liča, nyaze' to lache' ton' da' šiš. Na' besežebe'. ⁶ Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexo'e'ne'. ⁷ Le šjaya'ac na' le ye' bene' ca' gosaque' le'

txen, na' len Pedron', gwyobech Jesúsen' yežine' Galilea clél ca legaque'. Na' Galilean' na' yesele'ede'ne' can' gwnacze'.

⁸Nach no'ol ca' chosyoxonjse' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesúsen' blo'elagüe' María no'ole Magdala
(Jn. 20:11-18)

⁹Beyož beban Jesúsen' ladjo bene' guat ca' šezldao' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. ¹⁰Na' María nga jatixjue'ede'bene' ca' ba gosenita' len le'. Zjanita'yaše' na' chesebeže' cate' bžine'. ¹¹Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

Jesúsen' blo'elagüe' len čhop bene' ca' gosaque' le' txen
(Lc. 24:13-35)

¹²Beyož goc ca', čhop bene' ca' gosaque' Jesúsen' txen zjangüe'e nez yiže' cate' Jesúsen' blo'elagüe' legaque', na' nža'le besele'ede'ne'. ¹³Lece legaque' ja'aque' jasedixjue'ede'bene' yezica'chle, perw neca gosejle'e čhegaque'.

Da' bgon Jesúsen' yeson bene' ca' chsejnilaže'ne'
(Mt. 28:16-20; Lc. 24:36-49; Jn. 20:19-23)

¹⁴Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chsejnilaže' le' do yichj do laže' na' zjanaque' laždao' chačh, le bi gosejle'e čhe bene' ca' besele'ede'ne' ba bebane' ladjo bene' guat ca'. ¹⁵Na' gože' legaque'.

—Le šja'ac doxen yežlio, na' le šjatixjue' diža' güen chia' len yogo'lol bene'. ¹⁶Bene' ca' yesejnilaže' neda' na' yesezoe' nis, gata' yela' mban čhegaque' toli tocañe. Perw bene' bi chsejnilaže' neda', yesebiaye'e. ¹⁷Na' bene' ca' chsejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yeseñie' diža' cobe da' bi zjansede'; ¹⁸na' še yesože' no beļ zña, o še yese'eje' da' nac venen, bibi yesacde'; na' lece yesexoā taque' yichj bene' chese'e na' yesyeyacde'.

Begüe Jesúsen' yaba
(Lc. 24:50-53)

¹⁹Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a liča. ²⁰Na' bene' ca' zjanaque' le' txen besežaše' na' jasedixjue'ede' diža' güen čhe' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le' nac da' li dižan' goso'en. Da' na'zen' chzoja'.

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

¹⁻⁴ Teófilo, naco' bene' zaca' na' chzoja' le' diža' quinga cont nezdo' da' li ca nac da' ba bosozejni'ide' le' che da' ca' ba gosac. Bene' zan bačh bosozoje' che Jesúsen', goso'e diža' che da' ca' bene', con can' bosozejni' bene' ca' neto', bene' ca' besele'ede' can' gwzolaon cate' goljte Jesúsen'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwñabyoža' can' goquen' na' gwyazlaža' gwzowan' tcho'a cont nezdo', Teófilo.

To angl gwđixjue'ede' galje Juan

⁵ Ca tiemp caten' gwnabía' rey Herodes distritw gana' nzi' Judea, na' gwzoa to bẏoz che bene' Israel ca' bene' le Zacarías. Bene' žin len to xonj bẏoz bene' zjale Abías. Na' no'ol che Zacarías le Elisabet, na' naque' diaža che da' bẏoz Aarón. ⁶ Na' Zacarías len Elisabeten' zja'accze' to licha len Diosen' na' gosonyane' yogo'lol da' non Xancho Diosen' mandadw da'na' nyoj le'e ley che'na'. ⁷ Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

⁸ Na' goquen' beyala' Zacaríasen' len bene' lježe' ca' bene' ca' zjanaque' bẏoz cont yesone' da'na' besyeyale' yesone' yesonxene' Dios. ⁹ Na' bẏoz ca' yogo' ni'a chesone' rifa cont chata'bia' noe' choj gwzeye' yal'lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. ¹⁰ Na' šlac bzeye' yala' gosenita' yogo'lol bene' zan ca' chyo'ole bosol' güiže' Diosen'. ¹¹ Na' to angl bene' gwseļa' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. ¹² Na' cate' ble'e Zacaríasen' anglen', benit bechol' lo' yichjlažda'ogüe' na' bžebchgüe'. ¹³ Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol chio' Elisabeten' sane' to xi'ino', na' gwsio'be' Juan. ¹⁴ Na' so' mbalaz na' yebedo' na' lecze bene' zan yesyebede' še ba goljbe'. ¹⁵ Gache' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. ¹⁶ Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyaļa' yesonxene' le'. ¹⁷ Na' cuialaobe' lao Xanchon', na' soa Spiritw che Diosen' len lebe' can' gwzoan len da' Eliasen', na' lecz ca' yela' guac che Diosen'. Na' bene' ca' bi nita' binjo len xi'ine' ca', gombe' ga yesenite' binjo len legache', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xanchon' cate' yide'.

¹⁸ Nach Zacaríasen' gože' anglen':

—¿Nac gac nezda' da' nga? Neda' naca' bene' gole na' lecz ca' no'ol chian' ba naque' bene' gole.

¹⁹ Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwseļa' neda' zedetixjue'eda' le' diža' güen qui. ²⁰ Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yeñio' da' yoble. Na' da' li gwžin ža gac can' gwnia'.

²¹ Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. ²² Na' cate' bechoj Zacaríasen', bene' señw len ne'e da' bi goc ñie'. Nach gosache' bene' ca' ble'ebande' lo' yodao'na'.

²³ Na' cate' beyož bdelaze' dan' bene' žin lo' yodao'na', beyej liže'. ²⁴ Gwde na' no'ol che' Elisabeten' gwchenda' bidaon' lo' le'e. Na' gayo' bio' gwzoaze'. ²⁵ Na' gwne':

—Güenchuan' ba ben Xancho Diosen' len neda'. Ba bžin ža beži'ilaže'de' neda', cont bich yeson benača' xbab bibi zaca'.

To angl gwđixjue'ede' galje Jesucriston'

²⁶ Goc xop bio' noa' Elisabeten' bidaon', Diosen' besele' anglen' ben' le Gabriel, gwyeye' to yež da'na' nzi' Nazaret gan' mbane distritw Galilea. ²⁷ Gwseļa' le' gan' zoa to no'ol güego' le' María. Na' Marian' napši'ichgua cuine'. Na' to bene' le' José bačh naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. ²⁸ Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nzi'ide' le' na' zoe' len le'. Na' gone' cont so' mbalazch ca yogo'lol no'ole yezica'chle.

²⁹ Cate' ble'e Marian' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. ³⁰ Na' anglen' gože'ne':

—Bitw žebo' María, Diosen' nži'ide' le'. ³¹ Na'a gua' xi'ino' to bi' byo dao', na' sano'be', na' go'ole labe' Jesús. ³² Na' Jesús'en' gaque' to bene' blao na' benachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e naciön Israel chele ca gwnabia' da' xozxta'ogüe' rey David. ³³ Na' le' nabi'e naciön Israelen' toli' tocane, na' gwbat te yela' gwnabia' chen'.

³⁴ Nach gož Marian' angla':

—¿Nacxe gac sana' bdaon'? Bitw nžaga' bene' byo.

³⁵ Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'n'an' bidaon' za' galje gacbe' laždao' xilaže' na' yososi'ebe' Xi'in Dios. ³⁶ Na' bene' xna'o Elisabeten' lecze bač gwchendao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž. ³⁷ Bibi de da' nacho da' cbi gac gon Dios.

³⁸ Nach gož Marian' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marian'.

Marian' jane'e Elisabeten'

³⁹ Gwde na' la' gwyejte Marian' to yež da' žia to lo' ya'a gan' mbane distritw Judean', ⁴⁰ na' bžine' liž Zacariasen'. Na' gwyo'e bguape' Elisabeten' tiox. ⁴¹ Na' cate' Elisabeten' bende' choł güiž Marian' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' ⁴² na' gwne' zižje da' bebechgüede', gože' Marian':

—Zo' mbalazch ca yogo'loł no'ole yezica'chle. Na' lecze bidaon' no'ona' soabe' mbalaz. ⁴³ Chebanda' le' naco' xna' Xana' zedena'lo neda'. ⁴⁴ Con cate' benda' chguapo' neda' tiox, bidao' chian' lecze bebebe', bxite' bžia'be' lo' lian'. ⁴⁵ Zo' mbalaz da' gwyejli'io gac can' gwna xtiža' Diosen' dan' gož anglen' le'.

⁴⁶ Nach Marian' gwne':

Chonxena' Xancho Diosen' do yichj do laža'.

⁴⁷ Na' do yichj do laža' chebechgüeda' Dios ben' bebeje' neda' lo' da' malen'.

⁴⁸ Ba beyaše'de' neda' naca' xmore' la'czla' bibi zaca'.

Na' na'a bene' yesenita' toli' tocane yesene' neda' zoa' mbalaz.

⁴⁹ Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

⁵⁰ Na' note'teže bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža čhegaque' ca'.

⁵¹ Bač blo'e Diosen' benachen' yela' guac che'.

Na' ba bolague' bene' ya'laže' ca'.

⁵² Ba bene' cont bene' gwnabia' ca' bich yesenabi'e.

Na' bene' bi' naque' bene' blao, Diosen' ba bnežjue' latje yesaque' bene' blao.

⁵³ Na' bene' chesedon, Diosen' ba bnežjue' legaque' da' zan da' güen.

Na' bene' gwni'a ca', ba hose'e legaque', bibi bonežjue' legaque'.

⁵⁴ Nach ba goclene' chio' bene' Israel naccho ca' xmore'.

Ba blo'ede' bitw ganlaže' chio', san ba cheyaše' cheži'ilaže'de' chio'.

⁵⁵ Ba bene' can' gože' da' Abraham len yezica'chle da' xozxta'ocho.

Na' soacne' yeyaše' yeži'ilaže'de' xi'in diaža čhe da' Abrahamna' toli' tocane.

⁵⁶ Na' cate' ba goc šone bio' zoa Marian' len Elisabeten', nach Marian' beyej liže'.

Golje Juan bene' bzoe' bene' nis

⁵⁷ Na' cate' bžin ža san Elisabeten', gwzane' bi' byo dao'. ⁵⁸ Na' cate' goseneže bene' gualiž čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. ⁵⁹ Na' goc xono' ža goljbe' na' jasezoe'be' seřw dan' že' circuncisión can' gosone' len yogo' bi' byo dao' bi' gosaljbe' lo' diaža čhe da' Abraham. Na' gosaclaže' si' labe' Zacarias can' le' xaben', ⁶⁰ perw xna'be' gwne':

—Bi gac. Cheyała' si'be' Juan.

⁶¹ Na' legaque' gose'ene':

—Notno diaža čhele nita' bene' zjale ca', neča xozxta'ole.

⁶² Na' gosone' seřw gosenabde' xaben' nac che'nde' si' labe'. ⁶³ Nach bene' seřw gwñabe' to yagla' dao' da' bzoje': "Si' labe' Juan." Na' yogüe' besyebande'. ⁶⁴ Beyož bzoje' da'na', la' gocte beñe', nach la' gwzolaote be'e diža' benxene' Diosen'. ⁶⁵ Na' besyebane bene' gualiž čhegaquen'. Na' xtiža'gaquen' gos gwłaljen doxen yež ca' zjachi' lo' ya'ana' gan' mbane distritw Judean'. ⁶⁶ Na' yogo'loł bene' gosende' dižan' gosone' xbab lo' yichjlažda'ogüe' čhe da' ca', na' gosone':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

⁶⁷ Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

⁶⁸ Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

⁶⁹ Na' bena' bach za' cont yebej chio' lo da' malen', naque' bene' gwnabia' gual,

na' naque' xi'in diaža che da' rey David ben' goc xmos Diosen'.

⁷⁰ Chac can' gwna Diosen' len cho'a da' bene' ca' gwsele' cani', bene' gosac lo ne'e gosoe' xtižen'.

⁷¹ Ba za' ben' gwne' yosle' chio' lo na' yogo' bene' chesegue'e chio'.

⁷² Chac can' gože' da' xozxta' ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gaclene' chio'.

⁷³ Diosen' chone' can' gwlo'e da' bali lao da' xozxta' ocho da' Abraham gože'ne' gaccze can' gwnen'.

⁷⁴⁻⁷⁵ Gwne' yosle' chio' lo na' bene' chesegue'ede' chio'.

Nach gac lažda' ochon' xilaže' lao le' na' gonxenchone' sin cbi žebocho,

na' šejcho lica gonxenchone' šlac de yela' mban checho.

⁷⁶ Nach Zacaríasen' gože' bdao' chen':

Bdao' chia', beñač yesene' chio' naco' bene' choe' xtiža' Dios, Dios ben' naque' la'zelagüe bene' blao.

Yesene' ca' da' cuialaguo' lao Xanchon' na' go'o xtižen' cont nita' bene' yosozenague' che' cate' yide'.

⁷⁷ Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtola'chon'.

⁷⁸ Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' beñač.

⁷⁹ Cue'e be'ni' che' lo' yichjlaždao' chio' naccho ca bene' chaš ga nac choj, chio' chžebcho gatcho.

Na' gwzejni'ide' chio' beñač naquen' soa cuezcho yežlio nga.

Can' be' Zacaríasen' xtiža' Diosen'.

⁸⁰ Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzologüe' gwduxjue'ede' xtiža' Diosen' len bene' Israel ca'.

2

Caten' golje Jesúsen'

(Mt. 1:18-25)

¹ Na' lecz šlac gwnabia' rey César Augusto, bene' mandadw gwyas to censo cont nezde' bal' bene' že' to to yež da' zjachi' doxen yežlio gan' chnabi'e. ² Na' lecz cana' Cirenio naque' gobernador gan' nzi' Siria. Na' naquen da' nechw bchele' bal' bene' že' to to yež. ³ Na' yogo'lol' bene' jaya'aque' lažgaque' jasyede cuent cuine' cont bosochele' le'. ⁴ Na' José naque' diaža che da' rey David. Da'n'an' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. ⁵ Beyeje' jayde cuine' cuent na' zenche'e no'ol che' Marian' perw biña' yeseca'a lježe'. Na' Marian' ba no'e bdao'. ⁶ Na' šlac nite' Belén bžin ža sane'. ⁷ Na' gwxxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesonna' par legaque'.

Angl ca' bosozende' bene' güeyoe xila' ba golje Jesúsen'

⁸ Na' že'na' yiže' che yež Belén na'ate že' bene' güeyoe xila' chesape' xila' chen'. ⁹ Na' to angl bene' gwsela' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyečhen bsenin' gan' nite'na'. Na' besežebchgüe'. ¹⁰ Na' gož angla' legaque':

—Bitw žeble. Na'a chixjue'eda' le'e to diža' güen da' yesebechgüe yogo'lol' bene'. ¹¹ Na'aža lo yež che rey David ba golje bena' gac yebeje' beñačen' lo da' mal. Naque' Cristo, na' zeje diža' naque' ben' gwsele' Dios cont nabi'e, na' lecze naque' Xancho. ¹² Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

¹³ Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

¹⁴ jChonxencho Diosa' ben' zoa yaba,

na' lo yežlio yesezoa yesebez beñačen' binlo, con bena' cheson can' chazlaže' Diosen'.

¹⁵ Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjajna'cho dan' ba goc can' nac dan' gwsele' Xanchon' angl quinga bedesedixjue'ede' chio'.

¹⁶ Na' beseya'aces bene' güeyoe xila' ca' jaya'aque' Belén. Na' beseželde' Marian' len Josén' na' len bdao'na'. Na' bdao'na' debe' gan' chesagw beyix'e ca'. ¹⁷ Beyož besele'ede' can' ba goquen, na' goso'e diža' che bdao'na' len bene' ca' yezica'chle ca' nac dan' gož anglen' legaque'. ¹⁸ Na' yogo'lol bene' ca' gosende' diža' dan' gosoe' bene' güeyoe xila' ca' besebande'. ¹⁹ Na' lecze Marian' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. ²⁰ Nach beseya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba gac yogo'lol da' ba gosende' na' besele'ede' dan' gož anglen' legaque'.

Diaža che Jesúsen' jasesane'be' lo' yodao' blaona'

²¹ Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marian' lebe'.

²² Na' cate' gwde ba beyac Marian' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. ²³ Gosone' can' nyoj ley che' dan' ža: "Yogo' bi' byo dao' bi' nechw cheyała' gache' lo' na' Dios." ²⁴ Nach gosonxene' Diosen', gosone' can' ža ley che Xancho Dios dan' žan: "Cheyała' gotle chop ngolbex o čhope plomxtil."

²⁵ Na' Jerusalénna' gwzoa to bene' le' Simeón. Benan' gweyczce' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón, ²⁶ na' bzejni'in le' bi gate' še bina' le'ede' Criston'. ²⁷ Na' Spiriton' benen cont gweyje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley čhegaquen' mandadw. ²⁸ Nach Simeónna' gwlene'be' nach benxene' Diosen', gože'ne':

²⁹ Xana' Dios, bač goc can' gwnaon'.

Ben latje yeyeda' binlo gana' zo'na', neda' naca' xmoso'.

³⁰ Ba ble'eda' bena' zedyelej neto' lo' da' mal.

³¹ Naque' bene' gwnalažo' gwselo' neche yogo'lol benač.

³² Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

³³ Nach xaben' len xna'ben' besebande' ca' diža' chebe' dan' be' Simeónna'. ³⁴ Na' Simeónna' gwnabde' Diosen' cont gac güen čhegaque'. Na' gože' Marian':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benačen' can' chaclaže' Diosen' goncho, perw zane' bi yesejle'e che'. ³⁵ Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'ogüon' catequen' žaglaguo' len da' gac che'.

³⁶ Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne' cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole, ³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüeje bene' gwbas na' con gwzoachgüe' boł güiže' Diosen'. ³⁸ Na' goquen' gwbiga' Anan' gan' zoa Josén' len Marian' lo' yodao'na' na' be'e yela' choxclen che Diosen' bač gwsele' Jesúsen'. Na' be'e diža' che Jesúsen' len yogo' bene' ca' že' Jerusalén ben' chesebeze' batca' sela' Diosen' ben' yebeje' legaque' lo' da' malen'.

Jaya'aque' Nazaret

³⁹ Nach Josén' len Marian' cate' beyož gosone' yogo'lol dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. ⁴⁰ Na' Jesúsen' zej chcha'ogüe' na' zej chchachlaže'. Na' ca' zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsen' chašil yodao' blaona'

⁴¹⁻⁴² Na' xaxne'e ca' yogüiz chja'aque' ln̄i da' čala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsen' cate' goseče' xaxne'en le' ja'aque' ln̄in' Jerusalén. ⁴³ Na' cate' gwde ln̄ina' beseya'aque', perw Jesúsen' bega'ane' ciuda Jerusalén. Na' xne'ena' len Joséna' bi gosache'ede'. ⁴⁴ Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža čhegaque' na' no bene' xmigüe', ⁴⁵ perw bitw beseželde' le'. Nach besebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon' žach beseželde' Jesúsen' chašil yodao' blaona', čhi'e gachol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen chnabde' legaque'. ⁴⁷ Na' yogo'lol bene' ca' chosozenague' xtiža' Diosen' da' cho'e chesebande' can' chejni'ide' na' can' choži'e xtiža' bene' ca' zjansed dan' bzoj da' Moisés. ⁴⁸ Na' cate' besele'e xaxne'en le', besebande', na' xne'en gože' le':

—Xi'indagua', ¿bixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—¿Bixchen' beyiljwle neda'? ¿Bi nezele liž Xa' ngan' cheyala' soa'?

⁵⁰ Perw xaxne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxne'e bzenague' čhegaque'. Na' gwlec yichj xne'ena' yogo'lol dan' goca'. ⁵² Na' ca' chac zej chejni'iche Jesúsen' na' zej gwcha'oche', na' Diosen' len benača' zej chesazlaže'che' le'.

3

Juan gwduxjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

¹ Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisanias gobernador che distritw Abilinia. ² Nach lecze izna' Anás na' Caifás gosacche' bžoz blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. ³ Na' Juanna' gwyeje' yogo'lol yež dan' nita' gala'ze yegw Jordán, jatixjue'ede' yogo'lol bene' cheyala' yesyetinjde' xtoła'gaque' na' yesezoe' nis cont niłao xtoła'gaquen'. ⁴ Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chne' zižje latje dašen', že':

"Le gonšagüe' yichjlažda'olen' cont soale gwzenagle che Xanchon' cate' yide', le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyegaquen laše',

na' no nez da' nacchgua bxoca' yesyegaquen liča,

na' no nez da' nžaš nche'ene' yesyegaquen ba'a.

⁶ Na' yogo'lol bene' yesacbe'ede' can' chaclaže' Diosen' yebeje' benačen' lo da' mal."

⁷ Na' bene' zan ja'aque' gan' gwzoo Juanna' cont gwzoe'ne' nis. Na' Juanna' gože' legaque':

—Le'e nacchgualo bene' zgot na' bene' gwxiye'. ¿Chaquele guac yelale lao castigw dan' seła' Diosen' caten' gone' yela' justis che benačen'? ⁸ Še da' li ba betinjele xtoła'le, cheyala' gonle da' nac güen cont yesacbe'e bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyegaquen xi'in diaža che da' Abrahanna'. ⁹ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, čhog xan yaga' len na' gwzeyen'.

¹⁰ Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyala' gonto'?

¹¹ Na' gože' legaque':

—Ben' nape' čhope camis cheyala' gwnežjue' ton che bene' bi de che'. Na' lecze ca' che ben' de da' gagüe', cheyala' gwnežjue' che ben' bi de gagüe'.

¹² Na' cate' to čhope bene' güečhixjw ca' jasebigue' cont gwzoo Juanna' legaque' nis, na' gose'ene':

—Maestrw, ¿bica' da' cheyala' gonto'?

¹³ Na' gože' legaque':

—Bitw gwchixjwchle ca da' cheyala' yeseyixjue'.

¹⁴ Na' to čhope bene' ca' zjanac soldadw lecze gosenabde' le', gose'ene':

—¿Čhix neto'? ¿Bica'ch da' cheyala' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwagaque'. Le gon banez len laxjwle.

¹⁵ Na' bene' ca' gosezoe' lez yid Cristo ben' naquen seła' Diosen' yedenabi'e, na' gosacde' še Juanna' naque' Cristo. ¹⁶ Na' Juanna' gocbe'ede' xbab čhegaquen' na' gože' yogo'lole':

—Neda' da' li chzoo' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lečhja' no xe'le'. ¹⁷ Benan' gone' len benačen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', se'le' legaque' lo' yi' gabilen' dan' cbi cheyol chenit.

¹⁸ Da' zanch da' gwna Juanna' gwduxjue'ede' legaque' diža' güen, na' gwñeyoede' legaque' yesejle'en. ¹⁹ Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'lol da' mal dan' ba ben Herodes. ²⁰ Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis

(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo hora' Jesúsen' boļ güiže' Diosen' na' la' byaljwte yaba gan' zoa Diosen'. ²² Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwñe Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

Diaža che Jesúsen'

(Mt. 1:1-17)

²³ Na' ca do šichoa ize Jesúsen' cate' gwzolao bene' yogo'lol da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Eli, ²⁴ na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. ²⁵ Na' Joséna' naque' xi'in Matatías, na' Matatiasen' naque' xi'in Amós, na' Amósen' naque' xi'in Nahum, na' Nahunna' naque' xi'in Eslí. Na' Eslin' naque' xi'in Nagai, ²⁶ na' Nagain' naque' xi'in Maat, na' Maata' naque' xi'in Matatías, na' Matatiasen' naque' xi'in Semei, na' Semein' naque' xi'in José, na' Josén' naque' xi'in Judá. ²⁷ Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, ²⁸ na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. ²⁹ Na' Era' naque' xi'in Josué, na' Josué'n' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. ³⁰ Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. ³¹ Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. ³² Na' Natánna' naque' xi'in David, na' Davida' naque' xi'in Isai, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. ³³ Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, ³⁴ na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. ³⁵ Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, ³⁶ na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. ³⁷ Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, ³⁸ na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásen' goclažen' co'oyelan' Jesúsen' cont gone' da' mal

(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. ² Choa ža gwzoe' latje dašen' na' lao choa žan' bicze bi gwdagüe'. Na' cate' gwde choa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. ³ Nach gož Satanásen' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsen' len:

—Nyojcze Xtíža' Diosa' žan: “Gague yela' guagw na'zen' chyažje chio' beñač cont gac bancho, san lecze chyažjecho yogo'lol diža' dan' ža Diosen'.”

⁵ Na' gwče' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio. ⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoa xibo' gonxeno' neda', nach goņa' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsen' gože' Satanásen':

—Becuas ca'ale Satanás. Nyojczé Xtiža' Diosen' žan: “Cheyala' šejnilaže' cho Xancho Diosen' na' toz le' gonxencho.”

⁹ Nach Satanásen' gozče'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', ¹⁰ le nyojczé Xtiža' Diosen', žan:

Seja' Diosen' bene' ca' zjanac angl che' yesaclene' le' na' yesape' le',

¹¹ yesože' le' cont bi čhego' no yej.

¹² Nach Jesúsen' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

¹³ Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

Jesúsen' gwzolaküe' chyixjue'ede' diža' güen che Diosen' distritw Galilea

(Mt. 4:12-17; Mr. 1:14-15)

¹⁴ Nach Jesúsen' beyeje' distritw Galilea, na' yela' guac che Spiritw che Diosen' gwzoan len le'. Na' yogo' lo' bene' že' yež ca' zjachi' doxen Galilea gosenezde' che Jesúsen'. ¹⁵ Na' Jesúsen' bsd blo'ede' legaque' lo' yodao' čhegaquen', na' yogo' lo' bene' ca' gosonxene' le'.

Bežin Jesúsen' Nazaret

(Mt. 13:53-58; Mr. 6:1-6)

¹⁶ Na' bežin Jesúsen' yež Nazaret gan' gwcha'ogüe', na' gwoy'e yodao' ža che Dios can' ba yolagüe' chone', na' gwzchede' cont gwlabé'. ¹⁷ Na' ben' yo'o lo' ne'e yodao' na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',

na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyeyačlaže' bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchol.

Na' bene' chyi chzaca', zedeyena' cont noch no yosoči yososaque' legaque'.

¹⁹ Na' zedetixjue'eda' ba bžin ža gaclen Diosen' benačhen'.

²⁰ Jesúsen' botobe' yišen' na' bonežjuen' ben' yo'o lo' ne'e yodaon' na' gwchi'e. Na' yogo' bene' ca' nita' yodaon' la' gosenat'ie' le'. ²¹ Nach gwzolao' be'e diža' gwne':

—Ža na'aža ba chac can' ža Xtiža' Diosen' dan' ba benele nga.

²² Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

²³ Nach gož Jesúsen' legaque':

—Ye'ljale neda' can' ža diža' dan' de: “Bene' güen rmed le', beyon cuino'.” Na' lecze ye'ljale neda': “Dan' chesene' beno' yež Capernaum da' bebane bene', lecz can' cheyala' gono' lažcho nga.”

²⁴ Nach goze'e legaque':

—Da' li chnia' le'e, bene' gualaž che note'teze bene' choe' xtiža' Diosen' bitw chesezi'e che'.

²⁵ Ca tiemp che da' Elías ben' be' xtiža' Diosen' cani', bibi yejw goc šon iz yo gašje na' goc gwbin juisyw čhegaque' doxen gan' zelao mbane Israel. Naqen da' li gwnita' zan no'ol güezebe yež ca' gan' mbane Israel ca' tiempa', ²⁶ perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. ²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

²⁸ Na' yogo' bene' ca' že' yodao' na' cate' gosende' dan' gwna Jesúsen' beseža'achgüe'. ²⁹ Na' la' besyezoža'te' na' besyebaje' Jesúsen' yežen', na' goseche'ene' to lo' ya'a da' zoa gala'ze, gosačlaže' yososlažoe'ne' lo' ya'a na'ate, ³⁰ perw bibi goc yesonde' le'. Con beza' Jesúsen' bedie' gachol gaque'.

Jesúsen' bebeje' da' xigüe' dan' yo'o yichjlaždao' bene'

(Mr. 1:21-28)

³¹ Na' jasoe' yež Capernaum gan' mbane Galilean', na' ža che Dios bsd blo'ede' bene' ca' že' lo' yodao' na'. ³² Na' bene' ca' besyebande' ca' nac dan' bsd blo'eden', le bzejni'ide' cacze to bene' nezde' cayanen' nac xbab che Diosen'.

³³ Lo' yodao' na' gwzoo to bene' yo'o nyaze' da' xigüen'. Na' bosye'e gwne':

³⁴—¿Bixchen' chgoša' chlaže' chio' len neto', Jesús beñe' Nazaret? ¿Zedežiayo'o neto'? Neda' nombi'a le' na' nezda' naco' beñe' laždao' xilaže' juisyw ben' gwseła' Diosen'.

³⁵Nach Jesúsen' gwdiłe' da' xigüen' na' gožen':

—¡Sšago! Bechoj yichjlaždao' benga.

Na' bchiž da' xigien' bena' gachol beñe' ca' že'na' nach bechojen. Perw bitw benen le' zi'.

³⁶Na' leca besyebane yogo' beñe' ca', nach gose' lježe':

—¿Bixen' chac? ¿Bixe da' coben' chlo'e benga? Nachbia' nape' yela' chnabia' na' yela' guac, le chone' mandaw na' la' chechojte da' xigüe' da' yo'o nyaz beñe'.

³⁷Na' ca' nac dan' ben Jesúsen' gos gwłalje dižan' doxen lagüe' yež ca' zjachi' do na'.

Jesúsen' beyone' taobi'in che Simónna'

(Mt. 8:14-15; Mr. 1:29-31)

³⁸Na' cate' beze'e yodao'na', na' gwyeye' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'. ³⁹Na' Jesúsen' gwzeche' cuite' gan' die', na' bcheque' gwdiłe' da' lan' cont bechojen. Nach taobi'in che Simónna' la' gwyastie' na' bšini'e' da' gose'ej gosagüe'.

Jesúsen' beyone' beñe' zan

(Mt. 8:16-17; Mr. 1:32-34)

⁴⁰Na' cate' ba chxoa gwbižen' goseče'e con yogo' beñe' chese'e yižgüe' jasesane' legaque' lao Jesúsna'. Na' Jesúsen' gwxo'a ne'e yichj to toe' na' beyone' legaque'. ⁴¹Na' lecz ca' bebej Jesúsen' da' xigüe' da' yo'o yichjlaždao' beñe' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsen' gwdiłe' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

Jesúsna' gwde' doxen Galilean' bšed blo'ede'

(Mr. 1:35-39)

⁴²Na' beteyo cate' gwyeni', beze'e na' beyeje' to latje ga nono nla'. Na' beñe' ca' besyeyiljue'ne' na' ja'aque' gan' zoen'. Na' gosaclaže' yosozague' Jesúsen' cont bi yeze'e. ⁴³Na' Jesúsen' gože' legaque':

—Lecz ca' beñe' ca' nita' yež yoble cheyala' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴Ca' goquen', Jesúsen' gwde' to to yež che distritw Galilea na' bšed blo'ede' beñe' ca' lo' yodao' chegaquen'.

5

Gosezene' be zan bełya'a

(Mt. 4:18-22; Mr. 1:16-20)

¹Na' šlac zecha Jesúsen' cho'a nisdao' da'na' nzi' Genesaret, besežag beñe' zan na' bosochite' Jesúsen' da' gosaclaže' yosozenague' xtiža' Diosen' dan' bi'e cho'a nisdao'. ²Na' Jesúsen' ble'ede' chope barcw dao' cho'a nisdao'. Na' beñe' gwxcen beł ca' ba besyežaše' lo' barcon' ba chesyeyibe' yixjw beł chegaquen'. ³Na' Jesúsen' gwyo'e lo' barcw che Simónna' na' gwñabde' le' bosozigue' barcon' yelate' lo' nisen'. Na' Jesúsen' gwchi'e lo' barcon' blo'ede' beñe' ca' že'na'. ⁴Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwžala' yixjw chelen' na' senle belen'.

⁵Nach Simónna' gože' Jesúsen':

—Maestrw, ba bento' žin do yel na' ne to nono bdola'. Perw le' ba gwnao' yezolaoto', na' gwžala'to' yixjw ca' da' yoble.

⁶Na' beyož bosozala' yixjw chegaquen' zjanyicoco'ten belen', yezeze ca' yesyecheza'ten.

⁷Na' beñe' ca' zjanita' lo' barcw che Simónna' gosone' seřw gosaxe' beñe' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e beł zan lo'en'na'. ⁸Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to beñe' mal, bibi zaca' par so' nga len neda'.

⁹Gwne' ca' le' le' txen len beñe' lježe' ca' že' lo' barcon' besyebanchgüede' da' gosezene' beł zanna'. ¹⁰Lecz ca' besyebane xi'in ben' le' Zebedeo, zjanac čop biše'tie', Jacobo len Juan. Beñe' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' beñe' gwxcen beł, na' chebejo' belen' lo' nisen'; perw na'a gona' cont gaxle beñe' yesyechoje' lo' da' malen'.

¹¹Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boł güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. ¹⁴ Nach Jesúsen' bene' mandaw gože' le' notno ye'e can' ba beyone' le'. Na' gože' le':

—Con gwyej ja'na' bxoza' cont le'ede' bach beyacdo'. Na' bnežjo da' cheyała' gwnežjo' dan' non Moisésen' mandaw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca nac yela' guac dan' ben Jesúsen'. Na' besedob bene' zan cont bosozenague' xtüža' Jesúsen' na' cont beyone' legaque' len bite'teže yižgüe' da' chese'ede'.

¹⁶ Nach Jesúsen' bchoje' to ši'i güeje jal güiže' Diosen' to latje daš.

Jesúsen' beyone' to bene' bi chda šla'a ni'a ne'e

(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' bene'. Na' gala'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loł yež ca' gan' mbane distritw Galilea len distritw Judea, na' lecze bałe' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesús'a na' beyone' bene' güe' ca'. ¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosacłaže' yesedie' šjasesane' le' lao Jesús'a. ¹⁹ Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'. ²⁰ Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolo'n'.

²¹ Na' bene' ca' chososed chosolo'e dan' bzoj Moisés'a na' bene' fariseo ca' gosene':

—¿Non' chaque benga naque' chne' ca'? Chon cuine' ca Dios. Le nono zoa bene' gac yezi'xene' xtola' benačhen'. Toz Diosen' gac yezi'xenen'.

²² Jesúsen' gocbe'ede' ca nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? ²³ Še yapa'ne': "Ba bezi'xena' xtolo'na'", bi nezele še napa' yela' gwnabia' cont yezi'xena' xtole'na'. San še yapa'ne': "Gwyas na' gwda", na' nabilia' še napa' yela' guac gac can' gwnian'. ²⁴ Na'ach gona' cont gacbe'ele napa' yela' gwnabia' cont yezi'xena' xtola' benačh, neda' naca' bena' gwseła' Diosen' golja' benačh.

Nach gože' bene' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste bene' xinja', chesena'te bene' ca' nita'na'. Nach beyoa' xcamen' na' beže'e zjajda liže' chonxene' Diosen'. ²⁶ Na' yogo'loł bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo na'aža.

Jesúsen' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to bene' güečhixjw bene' le' Leví, chi'e latje gan' chčhixjue'. Na' Jesúsen' gože' le':

—Da len neda'.

²⁸ Nach gwžoža' Levín' gwlejjichje' yogo' xšinlaze' na' gwyejlene' Jesúsen'.

²⁹ Nach Levína' bene' to lni' xen ližen' par Jesúsen', na' ja'ac bene' zan bene' güečhixjw ca' na' bene' yezič'chle na' gosebe'lene' le' cho'a mesen' gosagüe'. ³⁰ Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxečhen' che'ej chagwle txen len bene' güečhixjw na' yebałe bene' güen da' xinj ca'?

³¹ Jesúsen' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed. ³² Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaque' zjanaque' ca bene' cheseyažjde' bene' güen rmed.

Gosēnabde' Jesúsen' bixchen' cbi gwleje' tgüeje ža gwbas

(Mt. 9:14-17; Mr. 2:18-22)

³³ Nach bal bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

³⁴ Nach gož Jesúsen' legaue':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaue'? Bi gac. ³⁵ Perw žin ža cate' bich soe' len legaue', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesúsen' be'e jempl nga bzejni'ide' legaue':

—Notno zoa bene' cheza' xe' da' cobe na' yode'en de'exo'. Še gone' ca' gwžiyae'e xe' da' coben' na' xe' de'exon' bitw gac leben len lache' coben'. ³⁷ Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. ³⁸ Cheyala' yesegue'e vino coben' lo' yid cobe cont bibi gaquen. ³⁹ Na' ca' nac bene' bach yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

6

Bene' ca' zjanaque' Jesúsen' txen goselechje' trigon' gosagüen' ža che Dios

(Mt. 12:1-8; Mr. 2:23-28)

¹ Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. ² Na' besele'e bal bene' fariseon' can' gosone' na' gose'e legaue':

—¿Bichen' chonle' da' bi de šens goncho ža che Dios?

³ Na' Jesúsen' gože' legaue':

—¿Bina' gwlable can' ben' da' rey David to ža cate' le' na' bene' lježe' ca' gosedone'? ⁴ Gwyo'o Davin' liž Dios na' jaži'e yetextil da' nac che Dios da' bi chac gagw bene' bi nac bžoz, na' gwdagüen', na' lecze bnežjue' che bene' zja'ac len le'.

⁵ Na' lecz ca' gwna Jesúsen':

—Naquen lo' na' nia' bi da' nac güen goncho cate' nac ža che Dios, neda' naca' ben' gwšela' Diosen' golja' beňach.

Beyac to bene' nžo'on šla'a taque'

(Mt. 12:9-14; Mr. 3:1-6)

⁶ Na' yeto ža che Dios gožeje' lo' yodaon' na' bšed blo'ede' bene' ca' že'na'. Na' ladjo bene' ca' zjaže'na' yo'o to bene' nžo'on taque' liča. ⁷ Na' bene' ca' chososed chosolo'e dan' bžoj da' Moisés na' bene' fariseo ca' chosogüia chesene'e Jesúsen' še yeyone' bena' ža che Dios cont de da' yosode'ede' yesagüe' xya che'. ⁸ Na' goche'e Jesúsen' can' chesone' xbaben', na' gože' ben' nžo'on taque':

—Gwžoža' na' gwzecha nga gachol.

Nach bena' bžine' gwzeche' lagüen'. ⁹ Na' Jesúsen' gože' bene' ca' že'na':

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še gwžiyai'chone'?

¹⁰ Jesúsen' gwne'e yogo'te ben' že'na', nach gože' ben' nžo'on taque':

—Bli naon'.

Nach blien' na' taquen' beyaquen binlo. ¹¹ Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šizünw postlw

(Mt. 10:1-4; Mr. 3:13-19)

¹² Na' to ža gwwey Jesúsen' to lo ya'a jel güiže' Diosen'. Na' do yel be'lene' Diosen' diža'. ¹³ Na' cate' gwe'ni', goxe' bene' ca' zjanaque' le' txen, nach gwleje' šizinue' na' bsi'e legaue' postlw. ¹⁴ Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé. ¹⁵ na' Mateo, na' Tomás, na' Jacobo xi'in Alfeo, na' Simón ben' nac cananista, ¹⁶ na' Judas bene' biše' Jacobo, nach Judas Iscariote ben' bdie' Jesúsen' lo' na' bene' chesegue'ede' le'.

Jesúsen' bzejni'ide' bene' zan

(Mt. 4:23-25)

¹⁷ Na' beyetje' lo ya'an len legaue' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesúsen' zjančixe bal bene' chese'e yižgüe'. Na' Jesúsen' beyone' legaue'. ¹⁸ Na' bene' ca' zjajo'o zjanyaz da' xigüen' yičhjažda'ogaue',

Jesúsen' bebejen'. ¹⁹ Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yizgüe' chegaquen' še yesechele'ne'.

Non' zoa mbalaz na' non' cbi zoa mbalaz
(Mt. 5:1-12)

²⁰ Na' Jesúsen' gwłis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

²¹ 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

²² 'Neda' naca' ben' gwseła' Diosen' golja' benach. Na' mbalaz soale še dan' chejnilaže'le neda' chesegue'e bene' le'e, na' chesyebeje' le'e lo' yodao' chegaque', na' cheseneye'e chele, na' chesene' nacle bene' mal. ²³ Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' gason da' xozxta'ogaque' len da' bene' ca' goso'e xtiža' Diosen' cani'.

²⁴ 'Na' nyaše'chguaze nac le'e bene' gwni'a. Chac güen chele na'a, perw gague toli tocanen' gac chele ca'.

²⁵ 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüne'le na' cuežyaše'le.

²⁶ 'Nyaše'chguaze nac le'e chesonxen yogo'lol bene' le'e. Ca'czen' gason da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

Cheyla' gaquecho bene' chesegue'ede' chio'
(Mt. 5:38-48; 7:12)

²⁷ 'Le'e chzenagle chia', cheyla' gaquele bene' chesegue'ede' le'e. Cheyla' gonle da' güen len bene' ca' chesegue'ede' le'e. ²⁸ Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e. ²⁹ Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle. ³⁰ Note'teze bene' bi dan' nabde' le'e, le gwnežjon. Še to bene' que'e bite'teze da' de chele, bitw yenablen. ³¹ Con yogo' da' güen da' chaclaže'le yeson benachen' len le'e, lecze ca' cheyla' gonle len legaque'.

³² 'Še chaquele šinze bene' chacde' le'e na' bi chaquele bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. ³³ Lecze še chonle da' güen len bene' ca' cheson da' güen len le'e na' bi chonle güen len bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'. ³⁵ Perw na' le'e, le soa le gague bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwni'a le'e, gwlo'ele nacle xi'in Dios ben' nac la'zelagüe bene' blaö, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxclen che' na' len yezica'chle bene' güen da' mal ca'. ³⁶ Na' ca' Xacho Diosen' ben' zoa yaba cheyaše' cheži'ilaže'de' yogo' benachen', ca'cze cheyla' yeyaše' yeži'ilaže'le ljež benachen'.

Bitw zaca'cho nacho bene' zjanape' dolä'
(Mt. 7:1-5)

³⁷ 'Bitw gonle xbab zaca'le nale bene' zjanape' dolä'. Še nale che bene' zjanape' dolä', ca'cze Diosen' ne' le'e nacle dolä'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. ³⁸ Le soa le gwnežjo bi da' gwnežjwle bene' na' Diosen' güeyoncze' chele. Bał bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' chosozoaya'aten'. Ca'czen' cheyla' gonle gwnežjwle bi dan' cheseyažje bene' na' lecz ca' gon Diosen' len le'e.

³⁹ Nach Jesúsen' be'lene' bene' že'na' to jempl, gwne':

—žGuaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw. ⁴⁰ Ca nac cate' to bene' chsede' len to maestrw, bi nacho naque' bene' blaöch ca maestroa'. Na' la'czla' še ben' chseda' gwda' yichje' yogo'lol dan' blo'e maestron' le', bitw naque' bene' sina'ch ca maestroa'.

⁴¹ žBixchen' chna'le beb dao' dan' yo'o lo' yejlao bene' lježle, na' bi chacbe'ele naquech beb xen dan' yo'o lo' yejlaolen'? ⁴² Na' še le'e yo'o to da' xen lo' yejlaolen' žnacxechen' che'le bene' lježlen': "Ben' yebeja' beb dao' dan' yo'o lo' yejlaguon'?" žBene' güexoayag! Žgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

Dan' choncho chlo'en bin' yo'o lo' yichjlažda'ochon'
(Mt. 7:17-20; 12:34-35)

⁴³ Bitw n̄acho to yag frut güen chbian frut da' bi nac güen, na' n̄eca n̄acho dan' bi nac güen chbian da' nac güen. ⁴⁴ Con can' nac da' chbia to to yaguen' nezecho bi yaga'. Yag yeše' bitw chbian da' na' n̄zi' yixgüigw. Lecz ca' yag bisga'a bi chbian uvas. ⁴⁵ To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

Chope bene' na' yo'o da' chon to toe'
(Mt. 7:24-27)

⁴⁶ '¿Bichen' che'le neda': "Xana", na' bi chonle can' nona' mandadw? ⁴⁷ Na'a n̄ia' nac zaca'lebe bene' nao' neda' na' chzenague' xtiža' na' chone' can' nona' mandadw. ⁴⁸ Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachgguan. ⁴⁹ Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiyai'te yo'on.

7

Jesúsen' beyone' xmos to x̄an soldadw
(Mt. 8:5-13)

¹ Na' cate' beyož be' Jesúsen' diža' len bene' ca', beyeje' yež Capernaum. ² Na' zoa to x̄an soldadw bene' bitw naque' bene' Israel. Na' zoa to x̄mose' chacšenchgüede', na' yelez ba de' par gate'. Na' x̄an soldadon' chacchgüede' le'. ³ Na' cate' x̄an soldadon' bende' diža' che Jesúsen', gwsele' bal bene' gole blao che bene' Israel cont jasenabde' Jesúsen' šeje' liže' yeyone' x̄mose'. ⁴ Nach cate' besežine' gan' zoa Jesúsen', gosenabde' le' gaclene' x̄an soldadon'. Na' gose'e Jesúsen':

—X̄an soldadon' naque' to bene' zaque' gacleno', ⁵ le chacde' chio' bene' Israel, na' le' bene' yodao' cheto' nga len xmechue'.

⁶ Nach gwyej Jesúsen' len legaque', perw za' yesežine' liže'na' cate' gwseła' x̄an soldadon' bal bene' migw che' lao Jesúsen' na' gose'ene':

—X̄an soldadon' že' bitw gwša'a yichjo' yido' liže'na', le nezde' bitw zaque' cont šo' liže'na'. ⁷ Da'n̄an' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque x̄mose'na'. ⁸ X̄an soldadon' že' zoa bene' chnabia' le' perw lecz nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono'", na' chonen'. Na' nezde' con nao' yeyac x̄mose'na' na' yeyacde'.

⁹ Na' Jesúsen' cate' bende' diža' dan' gose' bene' migw che x̄an soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel biṅa' šejnilaže' neda' ca chejnilaže' benga bi naque' bene' Israel.

¹⁰ Nach jaya'ac bene' ca' gwseła' x̄an soldadon'. Cate' besyežine' liže'na' ba beyaque xmosen'.

Jesúsen' bosbane' xi'in to no'ole güezebe

¹¹ Jesúsen' gwyeje' to yež dan' nzi' Nain len bene' ca' zjanaque' le' txen na' zan bene' yoble. ¹² Ba zja'aque' gała'ze par yesežine' cho'a puert che yežna' cate' besele'ede' chesechoj x̄onj bene' cho'a puerten' zjanlene' to bene' guat. Na' ben' goten' naque' bene' tliša', na' x̄ne'en naque' no'ole güezebe. Na' bene' zan bene' lo yeža' zja'aclene' x̄na' bene' guaten'. ¹³ Na' cate' ble'e X̄anchon' no'olen', beyaše'de' le' na' gože'ne':

—Bitw cuežo'.

¹⁴ Nach gwyeje' jažoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

¹⁵ Nach bene' guaten' gwch'i'e na' gwzologüe' benie'. Na' Jesúsen' beyone' le' lo na' x̄ne'e.

¹⁶ Na' yogo'lol bene' ca' besežebe' dan' beban bene' guata' nach gosonxene' Diosen' gosene':
—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaclene' chio' naccho naciön che'.

¹⁷ Ca nac dan' ben Jesúsen' gos gwłalj diža' čhen' doxen Judea na' yogo'lol yež ca' dan' zjanita' gała'ze.

Juanna' gwsele' čhope ben' gosaque' le' txen gan' zoa Jesúsen'
(Mt. 11:2-19)

¹⁸ Nach bene' ca' zjanaque' txen len Juanna' jaseye'lene' le' diža' yogo'lol ca nac dan' chon Jesúsen'. Nach gox Juanna' chope bene' ca' ¹⁹ nach gože' legaque':

—Le šja'ac gan' zoa Jesúsen' na' ye'Ine': “¿Len' naco' ben' chbezto' seła' Diosen' o še cheyała' cuezchto' yid bene' yoble?”

²⁰ Nach bene' ca' chope cate' besežine' gan' zoa Jesúsen' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' seła' Diosen' o še cuezchto' yid bene' yoble.

²¹ Šlacte ne' nita' chope bene' ca', Jesúsen' beyone' bene' zan bene' ca' chesacšene' na' bene' chese'ede' yižgüe' gual. Lecze bebeje' da' xigüe' da' zjajo'o zjanyaz yichjlaždao' bene' zan. Na' bene' cont besyele'e zan bene' lchol. ²² Nach Jesúsen' boži'e xtiža' bene' ca' gwseła' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'. ²³ Mbalaz zoa bene' chejle'e chia' na' bi chdebde'.

²⁴ Na' cate' besyeya'ac bene' ca' gwseła' Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿šayichj šayen chaque'? Bi naque' ca'. ²⁵ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr; bena' nita' yo'o güenchgua, ca no liž bene' gwnabia'. ²⁶ ¿Noxen' jale'ele'? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. ²⁷ Če benga nyojen le'e Xtiža' Diosen' žan:

Neda' Dios seła' to bene' cuialagüe' laguo' güe' xtižon'

cont cate' yido' ba nita' bene' yesonxene' le'.

²⁸ Chnia' le'e, notech no benač na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czła' bi naque' bene' blao, gwžin ža cate' šejni'ichde' chia' clel ca Juanna'.

²⁹ Ba bzoa Juanna' bene' zan nis na' len bał bene' güechixjw. Na' yogo' bene' ca' gosacbe'ede' Diosen' zejcz'e to licha dan' gwsele' Juanna' jatixjue'ede' legaque' yesyetinjde' xtola'gaque'. ³⁰ Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtola'gaquen' can' goclaže' Diosen'. Bi gosacłaže' gwzoo Juanna' legaque' nis. ³¹ Nach Jesúsen' gože' legaque':

—¿No gwsaca'lebd'a le'e zoale na'a? ¿No chon can' chonlen'? ³² Nacle ca bidao' neče bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.” ³³ Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'eje' vino, nach gwnale che': “Yo'o nyaz da' xigüen' yichjlažda'ogüe'.” ³⁴ Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benač. Na' lecze žale naca' migw che bene' güechixjw ca' na' migw che nochle bene' güen da' xinj. ³⁵ Perw na' bene' chosozenag che Diosen' zjanape' to yeła' sina' na' chesone' cont nacia' Dios'a naque' la'zelagüe' bene' sina'.

Jesúsen' gwyeye' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. ³⁷ Na' to no'ole lo ciudan', no'ole zle', gwnežde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chła' zix. ³⁸ Na' jabjue' gała'ze xni'a Jesúsen' na' gwcheže' na' nis xčež chen' bžonen ni'a Jesúsen' gwbišen. Na' bxie' ni'ena' len yiša' yichje' na' bnopen' na' gwdeben' set zixen'. ³⁹ Na' ben' goxe' Jesúsen' ližen', cate' ble'ede' can' chon no'ola' na' godce': “Šaca' benga naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'”. ⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzoo to bene' na' nita' chope bene' chesale' xmechue'. Toe' chal'e gayo' gayoa mechw da' nzi' denario, na' ben' yeto chal'e šiyon mechw lecze denario. ⁴² Na' chopte bene' ca' ne toe' ca de chegaque' cont yesyeyixjue' xyan'. Na' ben' gwlej mechon' gwlejyichje' dan' chesale' chen'. Gwnašc neda', čnoe' bene' ca' chope' gosacchde' che'?

⁴³ Nach Simónna' gože'ne':

—Šeca ben' goc xya čhen' da' xench na' gwlejiyichjen'.

Jesúsen' gože'ne':

—Da' li can' ba gwnao'na' naquen.

⁴⁴Nach Jesúsen' gwyechje' gwne'e no'ola' na' gože' Simónna':

—čChle'edo' no'ole nga? Neda' ba gwyo'a ližo' nga na' bi beño' nis čhib ni'a, perw no'ole nga ba gwdibe' ni'an' len nis xchež čhen' bxien' len yiša' yichje'. ⁴⁵Bi bnopo' neda', perw na' no'ole nga cate' bla'atia' gwzologüe' chnope' ni'a nga. ⁴⁶Bi gwdebo' set yichja', perw no'ole nga ba gwdebe' set zix ni'a nga. ⁴⁷Na' žia' le', xtole'na' gosaquen da' zan, perw ba bezi'xena' čhe'. Da'nan' chacchgüede' neda'. Beñe' bi žinlaže' xtole'n' ca xtoła' no'ole nga, cate' yezi'xena' čhe' bitw gactecde' neda'.

⁴⁸Nach gože' no'olen':

—Ba bezi'xena' xtoła'na'.

⁴⁹Nach beñe' ca' chesagw len Jesúsen' txen lo mesen' gwzoloao chese' lježe':

—čNox benga chacde' le'na' chezi'xene' xtoła' benačhen'?

⁵⁰Nach gož Jesúsen' no'ola':

—Dan' chejniłažo' neda' da'nan' ba de yeła' mban čho' toli tocane. Beyej to šagüe' to güen.

8

No'ol ca' gosaclene' Jesúsen'

¹Na' gwdechle gwyej Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' beñe' yosozenague' che'. Na' zja'aclen beñe' šižinw ca' le', beñe' ca' zjanzi' postlw. ²Nach to xonj no'ole lecze zja'aclene' Jesúsen' beñe' ca' ba beyone'. Bale' ba bebeje' da' xigüe' da' zjajo'o zjanyaz lo' yichjlažda'ogaque' na' yebale' ba beyone'ne' cate' gosacsende'. Na' toe' lie' Maria beñe' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'. ³Nach lecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio čhe' ca'. Na' lecze len ben' le Susana gwyejlene' Jesúsen', na' yezan beñe' yezica'chle. Na' no'ol ca' bosochine' bite'teze da' gota' čhegaque' cont bosonežjue' dan' byažje Jesúsen' len beñe' ca' zjanaque' le' txen.

Jempl che bene' goz trigon'

(Mt. 13:1-9; Mr. 4:1-9)

⁴Na' beñe' zan besežag gan' zoa Jesúsen' beñe' za'ac to to yež ca'. Na' be'e to jempl, gwne':

⁵—To beñe' güen žin jeze' trigw na' šlac zeje' chose' trigon' late' biñ jasechazen do čho'a nezen', na' bosolej bosošoj beñe' len, na' be žia xil be chaš le'e yaba gosagwban'. ⁶Yelaten' jasechazen ga nac lo yej, na' cate' beselan' na' gosebizen, le gague bi gopa' den'. ⁷Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len. ⁸Perw na' yelaten' jasechazen ga nac yo šagüe' na' beselan', na' balen gosebjan to gayoa güeje.

Na' beyož be'e diža' quinga gwne' žiže gože' legaque':

—Le'e žia nagle da' chene, le gwzenag xtiža'na'.

Jesúsen' gwne' bixčhen' bi'e jempl cate' bzejni'ide' beñe'

(Mt. 13:10-17; Mr. 4:10-12)

⁹Nach beñe' ca' zjanaque' Jesúsen' txen gosenabde' le' bi zejen jempl da' ba bi'e. ¹⁰Na' gož Jesúsen' legaque':

—Nono na' neze can' nac yeła' gwnabia' čhe Diosen'. Perw ba chone' cont le'e chejni-laže'lene' nezenen. Perw beñe' bi chesaclaže' yesejniłaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesache'ede' bi zejen, na' cont yesinde' xtižan' na' bi yesejni'iden'.

Jesúsen' bzejni'ide' bi zejen jempl che bene' goz trigon'

(Mt. 13:18-23; Mr. 4:13-20)

¹¹Na' ca' nac jempl nga zejen quinga: Ca dan' byažen zejen xtiža' Dios. ¹²Na' biñ dan' besego'onen chanežen', zejen beñe' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejniłaže' le' na' bi gata' yeła' mban čhegaque' toli tocane. ¹³Na' bin dan' besego'on ga nac lo yej zjanaquen ca beñe' chesyebede' xtiža' Diosen', perw zjanaque' ca to da' bibi loe chon, šložga chesejle'e čhe xtiža' Diosen', na' cate' chac bi da' mal čhegaque' la' chesebejyichjte' xtižen'. ¹⁴Na' bin dan' besego'onen ga nac lo yag yeše', zejen ca beñe' ca' ba gosende' xtiža' Diosen', perw šlac zjambane' chesyelał chesyzejde' na' chese'nde' yeseñi'e, na' chesede' chesontete' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejniłaže' le' ca cheyała'. ¹⁵Na' da' ca' besego'onen lo yo šagüen', zejen ca beñe' cate' chesende' xtiža' Diosen' chesezi'en chesonen' čhegaque', na' chesejniłaže' le' do yichj do laže', na' chesechejde' bite'tez dan' chac čhegaque' cont chesone' can' čhe'ne Diosa'.

*Jempl che yi' dan' chguala'cho**(Mr. 4:21-25)*¹⁶ Na' Jesúsen' gwne':

—Notno gwguala' to yi' na' gw dosen' to yeso', na' neca gwcuase' yin' xan xcame'. San chde'en le'e ze'e cont gwseñin' len yogo'lol bene' yeso'o lo' yo'o. ¹⁷ Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yesenezden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba neзде', yeca'a Diosen' len.

*Xna' Jesúsen' len bene' biše' ca' besežine' gan' zoe'**(Mt. 12:46-50; Mr. 3:31-35)*

¹⁹ Na' xna' Jesúsen' len bene' biše' ca' besežine' gan' zoa Jesúsen', gosaclaže' yeso'e, perw catec bene' zan že' gague goc latje yesežine' lagüe' na'ate. ²⁰ Na' to ben' ze na' gože' Jesúsen':

—Xna'o len bene' bišo' ca' zjanite' chy'o na' chesaclaže' yedesene'e le'e.

²¹ Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'alao xtižen', bene' can' zjanaque' xna'a na' biša'.

*Jesúsen' bcueze' be' bdono' lo nisdao'**(Mt. 8:23-27; Mr. 4:35-41)*

²² Na' goc to ža Jesúsen' gwyo'e to lo barcw len bene' ca' zjanaque' le' txen. Na' gože' legaque':

—Laga'cho yešla'ale nisdaon'.

Nach bosose'e barcon'. ²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdaon', na' gwzolao cheyož nis lo' barcon'. Na' besexožde' yesebiaye'e. ²⁴ Nach bosyosbane' Jesúsen' gose'e le':

—jMaestrw! jMaestrw! Bač chbiayi'cho.

Nach gwyase' na' gwdile' be' bdono' len nisdaon', na' la' gosebe'žiten. ²⁵ Na' gože' legaque':

—žNacxechen' bi chejle'le' chia'?

Nach legaque' besežebe' len besyebande'. Nach gose' lježe':

—žNoxe benga? lente be' bdono' na' len nisdaon' chosozenaguen che da' že'.

*To bene' Gadara yo'o nyaze' da' xigüe'**(Mt. 8:28-34; Mr. 5:1-20)*

²⁶ Na' besežine' laž bene' Gadara ca', to yež da' chi' šla'a distritw Galilean', laga'cho nisdao'.

²⁷ Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. ²⁸⁻²⁹ Na' bene' gualaž che' ca' bosochaje' ni'a ne'e len gden na' gosape' le'. Na' da' xigüe' ca' gosonen cont bzojbtine' gdenna' zan ni'a. Na' gosonen cont gwyaje' ga nono bene' zjanla'. Na' bena' cate' ble'ede' Jesúsen' na' bzoo xibe' lagüen'. Na' bosye'e zizje gwne':

—žBixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'. ³⁰ Nach Jesúsen' gože' da' xigüen' yo'o nyaz yichjlaždao' bena':

—žBi lio'?

Nach da' xigüen' gwnan:

—Legiön lia'.

Gwnan ca' le' zjanaquen da' zan zjajo'on yichjlažda'ogüen'. ³¹ Nach da' xigüe' ca' gosata'yoen Jesús'a' bi yeselen' lo yi' gabil. ³² Na' to ya'a da' zoa gala'ze chesaž zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. ³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjses coš ca' le'e ya'a gan' nita'ba' na' jasełažo'ba' lo' nisdao' ga gosatba' gose'ejba' nis.

³⁴ Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen. ³⁵ Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gala'ze cuít Jesúsen' nyaz xalane', na' ba bezoo yichjlažda'ogüe' binlo. Na' besežebe'. ³⁶ Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. ³⁷ Nach yogo'lol bene' ca' že' gan' mbane yež Gadaran' jaseta'yoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e. ³⁸ Na' bena' beyaque cate' Jesúsen' bebeje' da' xigüe'

ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

³⁹ —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole bene' gwdane' xe'

(Mt. 9:18-26; Mr. 5:21-43)

⁴⁰ Na' cate' Jesúsen' belague' nisdaon', bene' zan ba nita' chesebeze' le'. Chesyebechgüede' da' bežine' na'. ⁴¹ Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', ⁴² le ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwbao' na' ba benditje doxen xmechue' len bene' güen rmed ca'. Na' notno goc gon le' rmed. ⁴⁴ Na' gwbiga' no'olen' cože' Jesúsen' na' gwdane' lox xen', nach la' gwlezte gwbao' dan' zoen'.

⁴⁵ Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

⁴⁶ Nach Jesúsen' gože' legaque':

—To bene' ba gwdane' neda'. Chache'eda' ba beyacde' len yela' guac chia'na'.

⁴⁷ Nach no'olen' cate' goche'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwdane' le' na' can' goc la' beyactede'. ⁴⁸ Nach gož Jesúsa' no'ola':

—Xi'ina', ba beyacdo' dan' chejniłažo' neda'. Beyej binlo.

⁴⁹ Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestrosa' zed.

⁵⁰ Perw cate' bene' Jesúsen', na' gože' Jairo:

—Bitw žebo', con gwyejniłaže' neda' na' yeyaquebe'.

⁵¹ Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o. ⁵² Na' ba chichgua žaš na' yogo' bene' ca' že'na' chesebežchgüe'. Na' Jesúsen' gože' legaque':

—Bitw cuežle. Biņa' gatbe', san chtasbe'.

⁵³ Na' bosoxiže' gosonle' che' da' zjaņezde' ba gotbe'. ⁵⁴ Perw Jesúsen' beḡue' taca' bi' no'ol guaten' na' boļ güiže'be' gože'be':

—No'ol dao', beyas.

⁵⁵ Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'.

⁵⁶ Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtizen'

(Mt. 10:5-15; Mr. 6:7-13)

¹ Jesúsen' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebetje' da' xigüe' lo' yichjlaždao' bene', na' lecze ca' besyeyone' bene' ca' chesacšene'. ² Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'. ³ Na' gože' legaque':

—Bibi gože'le tnez. Bitw gože'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle. ⁴ Cate' žinle to liž bene', na'ze yega'anle šlac zoale lagüe'yeža'; cate'ch yeža'le yeža', cana'ch yeža'le latja'. ⁵ Na' še zoa ga bi yosolebe' le'e, cate' yeža'le na', le cuibe ni'alen' yo bište cont nacbia' malen' chesone' bi chosozenague' xtiža' Diosen'.

⁶ Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesúsen' na' besyeyone' no bene' güe'.

Ba gosote' Juan ben' bzoa bene' nis

(Mt. 14:1-12; Mr. 6:14-29)

⁷ Na' gobernador Herodes goque' tole bende' yogo'loļ da' güen da' chon Jesúsen'. Goczejlaže', le baļ bene' gose'e le' ba beban da' Juan ladjo bene' guat ca'. ⁸ Na' yebale' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'. ⁹ Na' Herodesen' gwne':

—Neda' bena' mandadw gosechogue' yen Juanna', perw ĩnoxen' chon da' güen ca dan' chesoe' bene' diža'?

Na' gwdiljwlaže' nacle gone' cont le'ede' Jesúsen'.

Bguagw Jesúsen' gayo' mil bene'

(Mt. 14:13-21; Mr. 6:30-44; Jn. 6:1-14)

¹⁰ Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwchi'e legacze' na' ja'aque' to latje gan' mbane yež Betsaida. ¹¹ Cate' gosacbe'e bene' ca' nita' gan' zoa Jesúsen' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsen' blebe' legaque' na' bsd blo'ede' legaque' Diosen' nabi'e yichjlaždao' bene' yosozenag che', na' beyone' bene' ca' chesacšene.

¹² Cate' gwzolaog wxoa gwbižen', nach bene' šižinw ca' zjanaque' Jesúsen' txen gose'ene': —Besela' bene' quinga cont šjaya'aque' ga že' bene' do ranšw na' do yež ca' dan' nychjmbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

¹³ Perw na' gož Jesúsen' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yečhopga bel ya'a de čecho, lete še si'chon cont gaquen yesagw yogo'lol bene' quinga.

¹⁴ Gosene' ca' le že' ca' gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

¹⁵ Nach gosone' mandadw gosebe' yogo' bene' ca', ¹⁶ na' Jesúsen' gwxi'e gayo' yetextilen' na' čhope bel ya'ana', na' gwne'e yabale, be'e yela' choxclen che Diosen' na' bzojxen' na' be'en bene' šižinw ca' cont goso'e che to to bene' ca'. ¹⁷ Na' gosagüen' ca' goseljde'. Nach bososše'e šižinw žome len yetextil bixjw na' len late' güeje bel da' bega'an.

Pedron' gwne' Jesúsen' naque' bene' gwsela' Dios

(Mt. 16:13-19; Mr. 8:27-29)

¹⁸ Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' chol güiže' Diosen'. Nach gože' legaque':

—ĽBi chesena bene'? ĽNon' naca' neda'?

¹⁹ Na' gose'e le':

—Bałe' chesene' naco' da' Juan ben' bzoe' bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

²⁰ Nach gože' legaque':

—ĽChixe le'e? ĽNo žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

Jesúsen' gwdixjue'ede' gate'

(Mt. 16:20-28; Mr. 8:30-9:1)

²¹ Nach Jesúsen' gože' legaque' nono yese'e naque' ben' gwlej Diosen' cont yedenabi'e. ²² Na' gože' legaque':

—Da' zan da' saca'zi'a, neda' naca' ben' gwsela' Dios golja' benač. Na' bene' gole blao ca' chesenabia' nación chechon' na' bzož gwnabia' ca', na' bene' ca' chososed chosolo'e ley dan' bzož da' Moisés, bi yesele'ede' neda' güen dan' bi gosejle'e čhia', na' yesote'nda', perw yeyon ža yebana' ladjo bene' guat ca'.

²³ Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'. ²⁴ Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne čhia' neda', ba de yela' mban che' toli tocañe. ²⁵ ĽBixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocañe? ²⁶ Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benač. Yeto'eda' che' cate' yida' da' yoble nsa'a yela' zaca' juisyw čhia' na' yela' zaca' juisyw che Xa' Diosen' na' che ben' zjanac angl che'. ²⁷ Da' li žia' le'e, balle nita'le nga na'a bina' gatle cate' žin ža le'ele gwlo'e Diosen' yela' gwnabia' chen'.

Jesúsen' goque' ca to be'ni'

(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gwyeye' to lo ya'a jel güiže' Diosen' na' gwche' Pedro len Juan len Jacobo. ²⁹ Na' šlac chol güiže' Diosen' goc cho'alagüen' ca da' bža'. Na' xalanen' beyaquen šiš xila' na' goctiten. ³⁰ Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. ³¹ Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyechjen bsenin' legaque'. ³² Na' Pedron' len bene' ca' yehopale leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moisés' len da' Elíasen' diža'. ³³ Na' cate' ba cheza' da' Moisésen' len da' Elíasen', Pedroa' gože' Jesúsen':

—Maestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab. ³⁴ Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'. ³⁵ Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

³⁶ Na' cate' beyož tawna Diosen' ca', besele'ede' yetoze' Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teže' šizize.

Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

³⁷ Na' beteyo cate' ba besyeyetje' ya'ana' bene' zan jasešague' legaque' gan' nite'na'. ³⁸ Na' toe' gwne' zižje, gože' Jesúsen':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'. ³⁹ Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cañe chsanen lebe'. ⁴⁰ Ba gota'yoeda' bene' ca' zjanaque' le' txen cont yesyebetje' da' xigüen' yo'o nyazbe', perw bitw gosezaque'de'.

⁴¹ Nach Jesúsen' gože' bene' ca' že' na':

—Le'e bene' bi chejnilaže', chonchguale clele! Čšna chyažjen soalena' le'e cont šejnilaže'le? ČBatca' zelao na'lagua' le'e?

Nach gože' xa bidao'na':

—Ben bidao' chion' nile.

⁴² Na' šlac zjasane'be' lao Jesúsen', da' xigüen' benen cont gwyazbe' šon, na' bchix' bto'len lebe' lo yo. Na' Jesúsen' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. ⁴³ Na' yogo' ben' že'na' besyebande' cate' besele'ede' yela' guac che Diosen'.

Da' yoble Jesúsen' gwdixjue'ede' gate'

(Mt. 17:22-23; Mr. 9:30-32)

Na' besyebande' che yogo'lo' dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

⁴⁴ —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsela' Diosen' golja' benačh.

⁴⁵ Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

Gosacyože' noe' nacch blao

(Mt. 18:1-5; Mr. 9:33-37)

⁴⁶ Na' bene' ca' zjanaque' Jesúsen' txen gosacyože' noe' nacch blao. ⁴⁷ Jesúsen' gocbe'ede' xbab dan' chesonen', na' bexue' to bidao' na' bzeche'be' cuite'na' ⁴⁸ na' gože' legaque':

—Note'teže bene' chone' güen len to bidao' ca bi' nga neče da' chejnilaže' neda', choncze' güen len neda'. Na' note'teže chon güen len neda' choncze' güen len Dios ben' gwsela' neda'. Na' note'tez le'e cate' chonle xbab che cuinle bibi zaca'teclē, canan' ba nacle bene' blao.

Bene' bi chon contr chio' txenczen' chone' len chio'

(Mr. 9:38-40)

⁴⁹ Nach Juanña' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

⁵⁰ Nach Jesúsen' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

Jesúsen' gwdile' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', bečhoglaže' šjeje' Jerusalén. ⁵² Na' gwsele' to čhope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen. ⁵³ Perw bene' Samaria ca' bi bosolebe' Jesúsen' len bene' ca' nžague', le gosacbe'ede' zja'aque' Jerusalén. ⁵⁴ Na' čhope

beñe' ca' zjanaque' Jesúsen' txen, Jacobon' len Juanna', cate' besele'ede' can' goson beñe' Samaria ca', nach gosenabde' Jesúsen':

—Maestrow, ¿che'ndo' gonto' can' ben da' Elías ben' be' xtiža' Diosen' cani, ñabeto' Diosen' sele' yi' gwzeyen beñe' qui?

⁵⁵ Nach Jesúsen' gwyechje' gwdile' le'gaque' gwne':

—Le'e bitw ñezele non' chnabia' yichjlažda'ole. ⁵⁶ Neda' bitw za'a cont gwziaya'a beñaç, san za'a cont gwnežjua'ne' yela' mban tołi tocañe, neda' naca' ben' gwsela' Diosen' golja' beñaç.

Nach ja'aque' yež yoble.

Can' gož Jesúsen' beñe' ca' gosaclaže' yesaque' le' txen

(Mt. 8:19-22)

⁵⁷ Šlac zja'aque' na', to beñe' gože' le':

—Sa'lena' le' gate'teze šejo'.

⁵⁸ Nach gož Jesúsen' le':

—Nita' xišna' beza' na' lecz chesyěžin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' beñaç.

⁵⁹ Nach Jesúsen' gože' yeto beñe':

—Yo'o len neda'.

Perw bena' gože' le':

—Xana', za' got xa'. Beñšca latje zgua'tec šjaycuaša'ne'.

⁶⁰ Na' gož Jesúsen' le':

—Beñe' ca' zjanac yichjlažda'ogüe' ca che beñe' guat, le'gaque' guaccze yosocuaše' yez-ica'chle beñe' guat. Perw le', jatixjue'e beñe' Diosa' ñabi'e yichjlaždao' beñe' yosozenague' che'.

⁶¹ Nach lecz yetoe' gože' Jesúsen':

—Sa'lena' le' Xana', perw zgua'tec šjazyenda' xaxna'a len diaža chia'.

⁶² Jesúsen' gože' le':

—Beñe' ba gwzoloa nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to beñe' chñe'e coscože'le šlac chgua'añe' go'n.

10

Jesúsen' gwsela' gayonši beñe' šjasedixjue'ede' xtiže'

¹ Na' gwdechle Xancho Jesúsen' gwleje' yegayonši beñe' na' bene' mandadw yesebialagüe' šja'ac çhope güje' to to yež ga za' šej le'. ² Na' cate' za' yesa'aque' gože' le'gaque':

—Chyažje beñe' nan yeseyixjue'ede' xtiža' Diosen', perw to çopga beñe' nita' yeseyixjue'eden'. Za' beñe' yosozenag che Diosen' zjazaca'lebe' ca to coseš xen da' chyažje yedobe. Da'n'an' le ñabe Xancho Diosen' sela'che' beñe' yesaclene' chio' yotobcho coseš chen'. ³ Le šja'ac, le neda' chsela' le'e šjatixjue'ele xtižen' len beñe' ca' chesegue'ede' le'e. Zaca'lebe' ca xila' dao' ben' chja'ac gan' že' beco'yo. ⁴ Bitw gua'le bzod, ñe mechw, ñe yel, na' bi šele guaple beñe' tióx beñe' yežagle chanez. ⁵ Note'tez liž šo'le zgua'tec nale:

“Chñablaže'šca' soa cuezle binlo len xbab dan' yo'o lo' yichjlažda'ole, le'e nita' le nga.” ⁶ Na' še zoa to beñe' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa beñe' chaclaže' soa cueze' binlo len yichjlažda'ogüe',

bi gac dan' ba gwñablaže'len'. ⁷ Na' lo' yo'o na'teze yega'añle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to beñe' güen žin cheya'la' si' laxjue', lecz ca' le'e zaca'le yesone' da' ye'ej gagwle. ⁸ Na' cate' žinle to yež ga chesonxene' le'e, le ye'ej le gagwteze da' yesone' le'e. ⁹ Le yeyon beñe' güe' beñe' nita' yež gan' žinle, na' le' ye'e: “Ba bžin ža gwzenagle che Diosen' cont ñabi'e yichjlažda'ole.” ¹⁰ Perw na' cate' žinle to yež ga bi yosolebe' le'e, le šja'ac la cay na' le ye'e: ¹¹ “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont ñabi'e yichjlažda'olen'.” ¹² Da' mal xen goson beñe' ciuda Sodoma cani', perw žia' le'e, žan' gac juisyw beñe' ca' bi bosolebe' le'e ližen',

yesa'le'chde' clel ca beñe' Sodoman'.

Beñe' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—iNyaše'chguaze gac che le'e beñe' Corazín! iNyaše'chguaze gac che le'e beñe' Betsaida! Beñe' ca' nita' Tiro na' Sidón ba' besyetingde' xto'la'gaque' šaca' blo'egacda'ne' yela' guac chia' ca da' ba blo'eda' le'e. Na' bosoš'e' ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beñe' ba boša' yichjlažda'ogüen'.

¹⁴ Saca'zi'chle clel ca beñe' že' Tiro na' Sidón cate' žin ža gac juisyw. ¹⁵ Le'e nita'le yež

Capernaum chonle xbab šeca Diosen' goŋchgüe' le'e yela' bala'an. Bi gone' le'e yela' bala'an san gone' le'e castigw toli tocaŋe dan' bi chejle'le chia'.

¹⁶ Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseła' neda'.

Besyēzin bene' gayonši ca'

¹⁷ Bene' gayonši ca' cate' beyož jasedixjue'ede' xtiža' Jesúsen', besyēzine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cĥeto' cate' chonto' mandadw yesyechojen lo' yichjlaždao' bene' choe'to' lao'.

¹⁸ Na' gože' legaue':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'.

¹⁹ Ba bene' le'e yela' guac cont gwlej gwšošje no beļ znia na' no bexjoni' na' cont soele Satanásen' bi gonen le'e gan. Na' bibi de da' gonen le'e zi'. ²⁰ Perw bi yebele neĥe da' xigüen' chosozenaguen cĥele, san le yebe da' ba bzoj Diosen' lale le'e libr gan' nyoj la yogo'lo' xi'ine' ca'.

Bebechgüe Jesúsen'

(Mt. 11:25-27; 13:16-17)

²¹ Za' beyožte gwna Jesúsen' ca' nach ben Spiritw cĥe Diosen' cont bebechgüede' na' bol güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxclen chio' ba bzejni'ido' baļ bene'. Ba bzejni'ido' bene' ca' gosache'ede' chesyazjde' no gwseđ gwlo'e legaue'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

²² Nach gože' bene' ca' že'na':

—Xan' ba bene' lo' na' chona' cont chombia' bene' le'. Le' nombia'yaŋe' neda', na' neda' nombia'yaŋa' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

²³ Na' gwyechj Jesúsen' gwne'e bene' ca' zjanaque' le' txen na' gože' legaue':

—Mbachgua zoale chle'ele neda' na' chle'etele da' ca' chona'. ²⁴ Na' chnia' le'e zan bene' ca' goso'e xtiža' Diosen' cani' len bene' zan rey gosacłaže' yesele'ede' dan' chle'ele na', perw bitw goļa' yesele'eden', na' gosacłaže' yesende' dan' chenelen', perw bitw goļa' yesenden'.

Jempl cĥe to bene' güen, bene' Samaria

²⁵ Na' gwzoža' to bene' nsedchgüe' ley dan' bzoj da' Moisés, gocłaže' cueje' Jesúsen' diža' da' gwĥine' contr le' na' gože'ne':

—Maestrw, žbi da' cheyaļa' gona' cont gata' yela' mban chia' toli tocaŋe?

²⁶ Na' gož Jesúsen' le':

—žBi nyoj le'e leyna'? žNac žan?

²⁷ Na' ben' chejni'ichgüe' leyna' boži'e xtiža' Jesúsen', gože' le':

—Ley cĥe Diosa' žan: “Cheyaļa' gaquecho Xancho Diosen' con ca zelao chejni'icho, do yichj do laže'cho, do fuers valor cĥecho, na' gaque lježcho ca chaque cuincho.”

²⁸ Nach gož Jesúsen' le':

—Da' licze can' ba gwnao'na'. Can' cheyaļa' gono' cont bano' toli tocaŋe.

²⁹ Na' bena' gocłaže' gwlo'ede' choncze' can' ža leyna', na' gože' Jesúsen':

—žNon' nac bene' lježa' ben' cheyaļa' gadca'?

³⁰ Na' Jesúsen' gože' le':

—To bene' beza' Jerusalén par yežine' yež Jericó, jasyexen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'ane' le' cacze to bene' guat. ³¹ Na' to bxož cĥe bene' Israel ca' gwdie' lo' neza', na' cate' ble'ede' bena' dena', nach gwcuase' to šla'ale neza' na' con gwdeze'. ³² Lecz ca' ben to diaža cĥe da' bene' Levi ca'. (Xi'in diaža cĥe da' Levi yo'o lo' na'gaque' cheson' mandadw lo' yodao' blaō.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'. ³³ Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'. ³⁴ Na' gwbigue' gan' de' na' bene' le' rmed, bšone' set len vino lao güe' che'na' na' bĥejen' lache'. Na' boži'e le' cože' xpurrue' na' beĥe'e le' ga zoa to mesón ga gwne'e le'. ³⁵ Na' beteyo cate' beza' bene' Samaria, gwleje' mechw da' zaca' ca' chop ža žin na' bnežjuen' xan mesónna' ca' laxjue', na' gože' le': “Gwŋa' benga na' še žan bichle da' gono' gastw na' chixjuan' cate' zeza'a.”

³⁶ Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone godce'ne' ca bene' lježe'?

³⁷ Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyala' gono' le', yeyaše' yeži'ilaže'do' yogo'lol bene'.

Jesúsa' jane'e Marta na' María

³⁸ Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyjeje' liže'na'. ³⁹ Na' zoa to bile' le María. Na' Marian' gwchi'e cuit Jesúsen' bzenague' xtiže'na'. ⁴⁰ Perw na' Martan' belalchgüede' bšini'e da' yesagüe'. Na' gwyjeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, chi'chgua yichjo' mandadua' na' chacčejažo' dan' nyanchguan. ⁴² María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyala' gonle.

11

Jesúsen' blo'ede' can' yosol güiže' Diosen'

(Mt. 6:9-15; 7:7-11)

¹ Na' gwzoa Jesúsa' to latje choł güiže' Diosen'. Cate' beyož boł güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyala' yoł güižto' Diosen', can' bzejni'i da' Juanna' bene' ca' gosaque' txen len le'.

² Na' Jesúsen' gože' legaque':

—Cate' yoł güižle Diosen', quinga nale:

Xato' bene' zoa yaba,

chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benaçh.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, benšca cheto' na'.

⁴ Na' bezi'xenšca cheto', le lencze neto' chezi'xento' che ljež benaçto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal,

san bcuase bcue'ejšca neto' len da' mala'.

⁵ Nach gož Jesúsen' legaque':

—Le gon xbab še šejle liž bene' migw chele do chel na' ye'lné: "Migw chia', benšca neda' šone yetextil. ⁶ Ba bla' to bene' migw chia' bene' za' zito', na' bibi de chia' da' gua'ane' gagüe'." ⁷ Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' cheto' ca'. Bi gac časa' goña' dan' chyažjdo'." ⁸ Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' sša na' chasšaze' gone' bite'tez da' chyažjele. ⁹ Na' chnia' le'e, še žan bi da' chyažjecho, chñabchon. Še žan to da' chaclaže'cho želecho, chyiljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'. Na' ca'cze cheyala' ye'le Diosen' cate' bi da' chyažjele o bi da' chaclaže'le gone'.

¹⁰ Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczdnen'. Na' note'tezle še žan chaclaže'le gac to da' gac, yoł güižle Diosen' can' chon to bene' chñie' cho'a yo'o, nach Diosen' gone' cont gacczen.

¹¹ Na' le'e nacle xa bidao', še xi'inle nabebe' le'e yetextil, ¿gwnežjwlebe' to yej? Na' še nabebe' le'e yid beł gagwbe' ¿gwnežjwlebe' to be xigüe'?

¹² Na' še nabebe' le'e to žit gagwbe' ¿gwnežjwlebe' to be xjoni'? Cabi gonle ca'. ¹³ La' nacle bene' mal, nezczle gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chñab len.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-30; Mr. 3:19-27)

¹⁴ Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'. ¹⁵ Perw bałe' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

¹⁶ Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. ¹⁷ Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague sša yesenite' txen. ¹⁸ Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' bene'. ¹⁹ Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesyebeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e clen' žale. ²⁰ Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

²¹ 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. ²² Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

²³ 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

Da' xigüe'na' yeyo'on da' yoble lo' yichjlaždao' bene'
(Mt. 12:43-45)

²⁴ 'Na' še to da' xigüe' da' gwyo'o gwyz lo' yichjlaždao' bene' yechojen, nach lažen nile na' le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bach cheyone' güen, na' ba zoache' binjo, ²⁶ nach šjatyoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bach goc ca', gacch mal che bena' clal ca dan' ba goc che' da' nechw.

Mbalaz nita' bene' ca' chosozenag xtiža' Diosen'

²⁷ Šlac be' Jesúsen' diža' quinga, gwzoo to no'ole gachol bene' ca' že' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwxa le' na' bguaže' le'.

²⁸ Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

Bene' bi chosozenag che Diosen' chesenabe' gon Jesúsen' to yela' guac
(Mt. 12:38-42; Mr. 8:12)

²⁹ Na' bene' zan gosebigue' gosechjde' Jesúsen', nach Jesúsen' gwne':

—Le'e zoale na'a nacchguale bene' laždao' xi'a. Chnabe' gona' yeto yela' guac da' le'ele cont nezele še Diosa' gwsele' neda', perw bi gona' ca dan' chnablena', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. ³⁰ Na' ca dan' goc che Jonásen' blo'en bene' Níneve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' benach. ³¹ Cate' žin ža gon Diosen' castigw che yogo'lol bene' cheson da' mal, da' no'olen' gwabi'e bene' Seba ca' yedecuise' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw chzenagle chia'. ³² Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Níneve ca' na' yosocuiše' le'e nita'le ža na'aža. Le' legaque' besyetingde' xtola'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

Dan' bsd blo'e Jesúsen' naquen ca to yi'
(Mt. 5:15; 6:22-23)

³³ 'Notno gwguala' to yi' na' gwadosen' caj, na' neca gwcuasen' ga yoble ga nono le'e len, san chde'en le'e ze'e cont gwsenin' len yogo'lol bene' yeso'o lo' yo'ona'. ³⁴ Žia yejlaocho cont le'echo. Con še bibi chaquen chle'eczecho binjo. Perw še ncho'cho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol' nac yichjlažda'ochon'. ³⁵ Da'n'an' le gon cont gacle bene' laždao' güen, na' šo' be'ni' che Diosen' yichjlažda'ole. ³⁶ Še nyeni' yichjlažda'olen' na' bibi da' mal yo'on, gwseni'czen xnezele can' chseni' to yi' ga nac chol'.

Jesúsen' gože' bene' fariseo ca' zjanape' dola' na' len bene' ca' chososed chosolo'e ley
(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsen' diža' quinga, to bene' fariseo gwče'e le' liže' cont yesagüe'. Na' gwyo'o Jesúsen' liž bene' fariseon' na' gwchi'e cho'a mesen'. ³⁸ Na' bene' fariseon' behande' ble'ede' bitw bona' Jesúsen' cate' za' gagüe' can' cheson legaque' chesacde' chebe Diosen' legaque' dan' chesone' ca'. ³⁹ Na' Xancho Jesúsen' gože' le':

—Le'e bene' fariseo nacle ca xiga' ye'en da' chchin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw. ⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. ⁴¹ Le yeyaše' bene' na' le gwnežjo bi da' cheseyažjde'. Še gonle ca', nacia' nacle bene' laždao' xilaže'.

⁴² 'jNyaše'chguaze gac che le'e bene' fariseo! La'czla' chnežjwle Diosen' to part lao ši part che yix'e'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'jNyaše'chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

⁴⁴ 'jNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nacia' gan' xoa ba che bene' guaten', le ley chechon' žan zjanaquen zban na' bi cheyala' gwlejhon. Perw le'e nacle ca ba da' bi zjanacia'. Chosozenag bene' chele na' bi chesache'ede' nacle bene' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, jnyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

⁴⁷⁻⁴⁸ 'jNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani! Chacle toze len da' xoxzta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

⁴⁹ 'Da'nan' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bałe' na' gwchi' gwsaca'le yebałe'. ⁵⁰ Na' da' li ba chonle can' gwnen'. Da'nan' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chzinten ža na'aža. ⁵¹ Zan bene' gosot bene' yoble legaque' gwzolaon len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chy'o yodao' gan' chesote' beyixe' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

⁵² 'jNyaše'chguaze nac le'e chsed chlo'ele ley che Diosen'! Bitw chzejni'ile bene' leyna' to liča can' naquen, neca chzenagle čhen. Na' bene' chesaclaže' yosozenaguen', neca choe'le latje yosozenaguen'.

⁵³ Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožgüe' len le'. Na' gosaclaže' yesebeje' le' diža' ⁵⁴ le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

¹ Na' goc zan mil bene' besežague' gan' zoa Jesúsen', catec bene' zan besežag bosolej bosošošte ni'a lježe'. Na' Jesúsen' zgua'tec gwzolağüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. ² Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. ³ Da'nan' bite'teže da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

Non' cheyala' žebcho

(Mt. 10:28-31)

⁴ 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. ⁵ San zoa ben' cheyala' žeble, cheyala' žeble Diosen', le cate' bačh beque'e yela' mban chele, lecze nape' yela' chnabia' cont yesele' le'e gabil'. Da' yoble chnia' le'e, cheyala' žeble Diosen'.

6 'Nezecho byin dao' ca' bibi zjazaca'tecba, perw na' Diosen' ne toba' bi chanlaže'. 7 Na' ca nac chio', da' leca chaque Diosen' chio' neztede' bal' yiša' yichj to tocho žia. Da'nan' bitw žeble, le zaca'ch le'e clel ca yogo' byin dao' ca'.

Cheyała' ye'cho bene' nombia'czcho Jesucriston'
(Mt. 10:32-33; 12:32; 10:19-20)

8 'Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benach. 9 Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque neda' txen.

10 'Na' note'teze bene' še ne' yela' ya' chia' neda' naca' ben' gwsela' Diosen' golja' benach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

11 'Na' cate' yeseche'exo'xje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. 12 Lo hor na'teze gwzejni' i Spiritw che Diosen' le'e bin' cheyała' nalen'.

Bitw cheyała' cuec yichjcho tlaoze bi da' de checho

13 To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

14 Na' Jesúsen' gože' le':

—Bitw naca' neda' juez chele. Bi cheyała' gua' neda' laze da' de chele.

15 Nach gože' yogo'loł bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chčhinecho, gague da' can' nac yela' mban checho.

16 Na' be'lene' legaque' to jempl, gwne':

—To bene' gwni' a gocchgua coseš che', 17 na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.” 18 Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'. 19 Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” 20 Perw Diosen' gože' bena': “Chono' xbab da' bibi zaca'. Na'aže' bžin hor gato', na' žnola lo na' gac yogo' da' de chio'?” 21 Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'

(Mt. 6:25-34)

22 Na' gož Jesúsen' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecze ca' bi gacžejlaže'le che xałana'le. 23 Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le. 24 Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a no goš chegacba' ga že' da' yesagwba', perw na' Diosen' chguagwce'ba'. jNacchle zaca' le'e ca be ca' zjažia xil! 25 Na' ne tole bi gac yoston cuinle gašje metr še con cue' yichjle tonle. 26 Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

27 'Le gon xbab ca nac yej ca' da' zjaze yiže'. Chesecha'oczen, bibi žin chesonen, neca chesajen do. Na' chnia' le'e, da' rey Salomón gocue' lache' güen juisyw, perw bitw bžinlaže' xałane'na' ca yela' xdan che yej ca'. 28 Diosen' none' xdan da' ca' ze yixen' la'czla' to čop žaze nitan' na' chosozeyen'. jNacchxe gon Diosen' len le'e gwlecceze yichje' gone' yogo' da' chyažjele, le'e late' lasze chejle'le che! 29 Da'nan' bitw güe'laže'le cont gata' da' ye'ej da' gagwle. Bitw gacžejlaže'le chen. 30 Bene' ca' bi chesonxene' Diosen' con cheso'e'laže' che bi da' gata' yese'ej yesagüe' na' che xałana'gaque'. Perw Xacho Diosen' nezczede' bi da' ca' chyažjele. 31 Cheyała' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

Da' zaca'ch gata' checho yežincho yaba

(Mt. 6:19-21)

32 'Bitw žeble la'czla' nac to čople. Diosen' chbede' chnabi'e yichjlaždao' le'e chzenagle che' na' chaclene' le'e. 33 Le yeyote' da' de chele cont gata' da' gwnežjwle bene' ca' cheseyaže. Še gonle ca', Diosen' gone' le'e da' zaca'ch na' da' cbi te chen cate' yežimle yaba gan' zoe'na'. Na' bitw gac šo' bene' gwban que'en, na' neca gac šo' be dao' gwžiai' len. 34 Gan' de dan' chaquele nan' zoa yichjlažda'olen'.

Cheyała' soa cuezcho batcan' yide Criston' yeto

³⁵⁻³⁶ Le soa le cueze batcan' yida' yeto. Le soa can' nita' bene' chesape' liž xangaquen' ślac zeje' to yela' güešagna'. Zjanyaz xalana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. ³⁷ Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'. ³⁸ Mba gac čhegaque' še chesebeze' batcan' yežine' la'czla' yežine' do chel o do šbal. ³⁹ Le gon xbab che da' nala. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'. ⁴⁰ Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' benach.

*Mos ben' chon güen, na' mos ben' bi chon güen**(Mt. 24:45-51)*⁴¹ Pedroa' gože' Jesúsen':

—Xanto', ¿cho'o jempl nga par neto'ze o še par yogo'lol benach?

⁴² Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyała' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. ⁴³ Še to bene' mos chonteze' can' ben xanen' mandadw gone', mba soe' cate' yežin xanen'. ⁴⁴ Da' li čhnia' le'e, xanen' cue'e lo na' mosen' yogo'lol da' de che'. ⁴⁵ Perw na' še mosen' gone' xbab na' ne': "Ba gwže xanan'", na' solagüe' got čhine' mosa' yezica'chle na' ye'ej gagwxate' na' sožde', ⁴⁶ nach xane'na' yežine' to ža senyale' le' cate' bi gache'ede'. Na' da' bi chon mosen' can' cheyała' gone', xane'na' got chinchgüe' le' na' gone' cont si'e castigw txen len yezica'chle bene' bi cheson can' cheyała' yesone'.

⁴⁷ Na' mos ben' nac bene' güedenag, la'czla' ba nežde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nana' xanen' got chinchgüe'ne'. ⁴⁸ Na' bene' bi nežde' bin' non xanen' mandadw gone' na' da'nana' chone' da' zaca' čhine' le', na' xanen' bi čhinteque' le' zi'. Note'teze bene' zjanye'chgua xbab, chesežo'o bene' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

*Yesedil bene' neče da' bid Jesúsen'**(Mt. 10:34-36)*⁴⁹ Nach gwna Jesúsen':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba čhi' yi'na'. ⁵⁰ Za'a cont saca'zi'a na' gata'. Na' čhžaglagua' ślac chbeza' žin ža yeyož gaquen. ⁵¹ ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Čhnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. ⁵² Quinga solao gac na'a, še žan nita' gayo' bene' to lo' yo'o, yesedil legacze', čhope' contr šone' na' šone' contr čhope'. ⁵³ Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

*Bitw gosacbe'ede' bi zeje da' ca' chon Diosen'**(Mt. 16:1-4; Mr. 8:11-13)*⁵⁴ Nach lecze gož Jesúsen' bene' ca' nita' na':

—Cate' chle'ele čhi' bejw gan' čhxo'a gwbiža' na' žale: "Gac yejw", na' chac ca'. ⁵⁵ Na' cate' chečh'be' da' za' ži'le na' žale: "Guac zeye'", na' chac zeye'. ⁵⁶ Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixčhen' bi chacbe'ele bi zejen da' ca' chon Diosen' tiemp nga zoacho na'a?

*Cheyała' goncho cont yezoacho binlo len bene' che'e chio' lao justis**(Mt. 5:25-26)*

⁵⁷ ¿Bixčhen' bi chonle xbab cont nezele can' cheyała' gonle? ⁵⁸ Cate' to bene' gonle xya che' na' che'e le'e lao justis, ślac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yosejyue' le'e liža. ⁵⁹ Čhnia' le'e bitw yebeje' le'e še bina' čhixjwle doxen da' čala'le.

13*Cuiayi'cho še bitw yetinjecho xtoła'chon'*

¹ Na' len bene' ca' že'na' gwnita' bał bene' gosoe'lene' Jesúsen' diža', gose'ene' Pilaton' gwsele' soldadw che' ca' jasetae' to xonj bene' Galilea ca' na' bchixgde' xčhengaquen' len che beyixe' ca' ba gosote' cont yesonxene' Diosen'. ² Nach boži'i Jesúsen' xtiža'gaquen' gože' legaque':

—¿Chonle xbaba' gosac chegaque' ca' lagüe dan' gasonche' da' malech clal ca bene' Galilea ca' yezica'chle? ³ Chnia' le'e, bi naquen ca'. Še bitw yetinjle xtoła'le ca', lecze gwžin ža cate' cuiayi'le. ⁴ Nezele che bene' šino'šone ca', šlac zjanite' yež Siloé gwbiže to campanariyw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clal ca' bene' ca' zjaže' Jerusalén? ⁵ Chnia' le'e, gague can'. Še le'e bi yetinjle xtoła'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejini'ide'ne' cheyała' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'. ⁷ Na' gože' ben' chape' yag che' ca': “Ba chac šon iz cheden'a'a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.” ⁸ Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb. ⁹ Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

Jesúsen' beyone' to no'ole ža che Dios

¹⁰ Na' to ža che Dios bsed blo'e Jesúsen' bene' že' to lo' yodao'. ¹¹ Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe cuerp che'na', na' gague gocch se' to liča. ¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gwxo'a ne'e cuerp che no'ola', na' la' bezete' to liča. Na' no'ola' benxene' Diosen'. ¹⁴ Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga žjada'ba' chjasanlba' güe'ej nis? ¹⁶ No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp čen' šino'šone iz. Da'nan' nacczen liča ba beyona'ne' ža che Dios.

¹⁷ Cate' gwne' ca', bene' ca' chesege'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

Yeła' gwnabia' che Diosen' naquen ca bin che xomdas

(Mt. 13:31-32; Mr. 4:30-32)

¹⁸ Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'. ¹⁹ Da'nan' yeła' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil gason ližgacba' lo xoze' yaga'.

Yeła' gwnabia' che Diosen' naquen ca levadura

(Mt. 13:33)

²⁰ Nach da' yoble gozne':

—Na'a nia' le'e yelate' nac nac yeła' gwnabia' che Diosen'. ²¹ Naquen ca levadura dan' gwlec no'olen' len to rob yezj cont gwcha'o doxenen.

Cheyała' chiljwlaže' cho nac goncho cont soacho binlo len Diosen'

(Mt. 7:13-14, 21-23)

²² Na' gwda Jesúsen' bsed blo'ede' bene' ca' že' ciuda ca' na' yež ca' gan' bedie' cont bežine' Jerusalénna'. ²³ Na' to bene' gože' Jesúsen':

—Xanto', ¿con to chopze bene' šjasyenite' len Diosen'?

Nach Jesúsen' gože' legaque':

²⁴ —Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen' ²⁵ cont bi gone' len le'e ca ben to xan yo'o cate' bžin hor gwseyjuen'. Gwože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'ene'. Na' gose'ene': “Gwsaljwšca cont šo'to'!” Na' gože' legaque': “Bitw nombi'a le'e, neca nežda' ga za'acle.” ²⁶ Can' gac che balle. Nach solaole ye'ine': “Güe'ej gw dagwto' len le' na' bsed blo'edo' neto' la cay lažto'!” ²⁷ Perw na' da' yoble ye'e le'e: “Bitw nežda' ga bene' le'e. Le šjaya'ac yogo' le'e bene' güen da' mal.” Can' ye'e le'e. ²⁸ Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite' yaba gan' zoa Diosen' chnabi'e.

Na' le'e bitw gac šo'lena'. Nach cuežyaše'le na' gagwxetje layle dan' leca žaglaole cate' gacbe'ele bich gac šo'le. ²⁹ Bene' zan bene' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. ³⁰ Nita' bene' zjanaque' bene' bzebe na'a perw gwžin ža cate' yesaque' bene' žialao. Na' nita' bene' zjanaque' bene' žialao na'a, perw gwžin ža cate' yesaque' bene' bzebe.

Begüine' Jesúsen' neche xtoła' bene' Jerusalén ca'
(Mt. 23:37-39)

³¹ Lo ža na'teze bał bene' fariseo ca' besežine' gan' zoa Jesúsen' gose'ene':
—Cheyala' yoxonjo' nga gan' chnabia' rey Herodes, le chaclaže' gote' le'.
³² Jesúsen' gože' legaque':
—Herodesen' naque' ca to beza' yela' gwxiye' čhen'. Le šja'ac na' ye'ln'e' yeto čhope žazen' soa' yebejča' da' xigü'e' ca' zjayo'o zjanyaz yichjlaždao' bene' na' yeyoncha' bene' chesacšene. Ba zoa yeyož gona' dan' cheyala' gonan'. ³³ Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

³⁴ Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chselja' Diosen' len le'e, chčhellene' yej. Zan ni'a goclaža' yotoba' le'e ca to jed xcaca' be nche' xi'ın na' chyežba' legacba', perw bitw goclaže'le. ³⁵ Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nselja' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to bene' de yi

¹ Na' to ža čhe Dios Jesúsen' gwyeje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya čhe'. ² Na' lagüe'na' zecha to bene' chacšene, de cuerp čhen' yi. ³ Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De lsens len ley čechon' yeyoncho to bene' güe' ža čhe Dios o še bitw bi lsens de?

⁴ Perw notno boži'i xtiže'na'. Nach Jesúsen' bežue' na' bena' na' beyone' le', na' gože'ne':

—Guac yeyejo'.

⁵ Nach gož Jesúsen' bene' ca' že' liž bene' fariseon':

—Le'e še zoa to burr o to go'n čele na' lažo'ba' to lo' yechw sitw, čcabi la' yebejteleba' la'šaze nac ža čhe Dios?

⁶ Na' nono goc yoži'i xtiža' Jesúsen'.

Bene' ca' gosaxe' gan' chac güešagna'

⁷ Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' legaque':

⁸ —Cate' to bene' gaxe' le'e gan' chac güešagna', bitw cue'le gan' cheyala' cue' bene' blao ca', le še cue'le na', guacte yid bene' nacch bene' blao ⁹ na' xan yo'ona' ye'e le'e: "Le soža' cont cue' benga." Nach do chaquele zto' soža'le cue'le ga yoble len bene' ca' bitec bi zjazaca'. ¹⁰ Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e to tole: "Bene' migw čhia', da cui'o len bene' blao ca'." Nach gacxenle lao bene' ca' zjachi' len le'e cho'a mesen'. ¹¹ Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

¹² Na' lecze gož Jesúsen' ben' goxe' le' ližen':

—Cate' gono' to lni na' gaxo' bene' yesagüe' len le', bitw gaxo' bene' biše' lježo', bene' migw chio' o bene' zjanaque' bene' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. ¹³ Cate' gono' to lni gox bene' yaše' na' bene' nchog no ni'a na'gaque', bene' nxinj ni'e, na' bene' lčhol. ¹⁴ Še gaxo' legaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to licha cate' gosebane'.

Jempl čhe to bene' ben lni xen

¹⁵ Na' to bene' čhi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo lni da' gac caten' ba chnabia' ben' selja' Diosen'.

¹⁶ Nach Jesúsen' gwne':

—To bene' bene' to lni xen, na' goxe' bene' zan šja'ac ližen' cont yesagüe'. ¹⁷ Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jañe'e to toe', gože' legaque': "Le šo'o, ba bšini'e dan' gagwchon'." ¹⁸ Na' yogo'lole' gose'e ben' bi zjazoe' latje šja'aque' gan' chone' lni'n'. Bene' nechon' gwne': "Za' gwxia' to yežlio, na' cheyala' šjana'an. Na' ye'šco' xanon' bitw gac yida'." ¹⁹ Na' yetoe' gwne': "Za' gwxia' gayo' cue' go'n na'

na'a šjengaca'ba' prueba. Ye'šco' xanon' si'xene' chia', bitw gac yida'." ²⁰ Na' yetoe' gože'ne': "Za' bšagna'. Da'nan' bitw gac yida'." ²¹ Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lñin' bže'e. Nach gože' xmosen': "Gwyej jata to to cay na' to to nez lo ciudan', na' gwtobo' bene' yaše' na' bene' nchog ni'a na'gaque' na' bene' nxinj ni'e, na' bene' lchoł cont yeside' yesagüe'." ²² Gwde bene' ca' nach gože' le': "Xana', ba jatoba' bene' ca' ba gwnaon', na' ne' dechcz latje par bene' yoble." ²³ Nach xane' na' gože' le': "Bchoj lo' ciudan' na' gono' byen yesid ben' nita' chanez. Na' šjaxi'o bene' ca' zjaže' yiže'. Gono' byen yeside' liža' nga yesagüe' cont yežan' bich bi latje šo'." ²⁴ Na' ca' nac bene' ca' goxa' da' nechw, bich gua' latje yesagw legaque' dan' ba bsiñi'ana'."

Dan' cheyala' goncho cont gaccho txen len Jesucriston'

²⁵ Na' bene' zan juisyw zjana'ogüe' Jesúsen', na' gwyechje' gože' legaque':

²⁶ —Note'teze bene' še chaclaže' šejnilaže' neda' na' gwzenague' chia', še bi gacchde' neda' cdel ca' xaxne'e, no'ol che', xi'ine', biše', zane', na' lente cuine', bi gac gone' neda' txen. ²⁷ Na' note'teze bene' bi chzanlaže' cuine' saca'zi'e o gate' ne' chia' neda', lecze bitw gac gone' neda' txen. ²⁸ Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'. ²⁹ Še bi gwchix gwtöle xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, ³⁰ yesene': "Benga gwzola chone' to campanaryw perw bitw beyož xšinen'." ³¹ Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. ³² Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. ³³ Ca' naquen len le'e, note'tezle še bi cuejyichjle yogo'loł bi da' de chele, bitw gac gonle neda' txen.

Cate' zeden' bich naquen xzi'

(Mt. 5:13; Mr. 9:50)

³⁴ 'Zeden' naquen güen, perw na' še bich naquen xzi', ĺnacxe goncho cont yeyaquen xzi' da' yoble? ³⁵ Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

15

Jempl che xila' ben' gocžeje

(Mt. 18:10-14)

¹ Na' bene' güečhixjw ca' na' yebaže bene' güen da' xinj, yogüe' gosebigue' gan' zoa Jesúsen' cont gosende' xtiže'na'. ² Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

³ Nach Jesúsen' be'e to jempl, gože' legaque':

⁴ —Še nita' to gayoa xila' chele na' gacžeje toba', ĺbi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'? ⁵ Na' cate' yeželban' yebechgüele na' yexoalba' ya'axičhje yeyoa'lba'. ⁶ Na' cate' yežin ližle, gwtoble bene' migw chele na' bene' gualič chele na' ye'lnē': "Le yebe len neda'. Ba bežel xila' chia' ben' gocžeje." ⁷ Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' cdel ca' yesyebede' che' taplalj togalj bene' zjanaque' bene' güen bene' bitw de xtoła'gaque' da' yesyetingjde'.

Jempl che mechw dan' gwnit

⁸ Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. ⁹ Na' cate' yeželenna', na' yotoble no'ole migw chele ca' na' bene' gualič chele na' ye'le legaque': "Le yebe len neda', le ba beželda' mechw chia' dan' gwnit." ¹⁰ Chnia' le'e lecze chesyebe chesyzaque' angl che Diosen' bene' zoa yaba cate' to bene' chon da' xinj chetingjde' xtole'na'.

Jempl che ben' benditje xi'inen' xmechue'

¹¹ Na' lecze gože' legaque':

—Gwzoa to bene' na' gwnita' chop xi'ine' bene' byo. ¹² Na' bžin ža bene' xcuiden' gože' xen': "Xa', beñ neda' dan' cheyala' sia' da' de čhio'." Nach xen' bnežjue' dan' cheyala' si'en. ¹³ Goc to chop ža nach bene' xcuiden' btobe' yogo'loł bi da' de che' na' gwze'e gwyeje' nación zito' na' zlez da' bi zaca' jene'. Na' benditjde' xmechue'na' zejlene' da' malen'. ¹⁴ Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'. ¹⁵ Da'nan' gwyeje' gan' zoa to bene' naciónna' gwñabe' žin, na' bena' gwsele' le'

yixē' ga že' be zan xcoše' na' jayoe'ba'. ¹⁶Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'. ¹⁷Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. ¹⁸Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', ¹⁹na' bich zaca' gone' neda' cuent ca xi'ine', con še gone' latje gaca' ca to xmore'." ²⁰Nach beze'e beyeje' gan' zoa xen'. Na' zito'le za' yezine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnope'ne'. ²¹Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." ²²Na' xe'na' gože' xmore' ca': "Le šjalej tgot lache' šagüe', le guacwben', na' le šjaxi' to niy na' le co'on xembe', na' le šjaxi' šcuae' yel na' gwdelen ni'abe'. ²³Na' le šjaxi' go'n dao' ben' chane' na' le gotba' cont gagwchoba', le goncho lni. ²⁴Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejyichjbe' chio', perw na'a ba bela'be'." Na' gosezolaogüe' chesone' lni.

²⁵Na' xi'ine' bene' nechon' zeje' yixē' cate' bežin xi'inen' yeto ben' benditje xmechuen', na' cate' zeza' ben' gwyej yixen', ba zoa yezine' liž xen' cate' bende' chosocueže' na' chosoye'e. ²⁶Na' goxe' to mosen' na' gwñabde' le' bixchen' chesone' lni. ²⁷Na' mosen' gože'ne': "Bi' bišo'na' ba bela' na' xao'n' ba betue' go'n daon' ben' chane'chgua da' bela'be' to šagüe' to güen." ²⁸Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. ²⁹Perw xi'ine' bene' nechua' gože' xen': "Zan iz ba chac zoa' nga chonteza' žin con can' zo' le', na' biña' gaca' bene' güedenag. Na' ne to šib dao' caña' goño' neda' cont gota'ba' gona' lni len bene' migw chia' ca'. ³⁰Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'n dao' ben' chane'." ³¹Na' xe'na' gože'ne': "Xi'indagua', le' zoatezo' len neda', na' yogo'lol da' de naquen chio'. ³²Perw cheyała' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejyichjbe' chio', perw ba bela'be'."

16

Jempl che to mos blao ben' benditjde' da' de che xane'

¹Nach gož Jesúsen' bene' ca' zjanaque' le' txen:

—Gwzoa to bene' gwñi'a na' gwzoa to mos blao che' ben' gwyo'o lo ne'e yogo'lol da' de che'. Na' bene' gwñi'ana' bende' rson xmore' blaon' ba benditjde' bi da' de che'. ²Na' xanan' goxe' le' na' gože'ne': "Ba benda' diža' can' chonon'. Cheyała' yodio' cuent yogo'lol da' ba benditjedo' chia'. Bich gac gono' xšinan' na'a." ³Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. ⁴Nezda' bi gona' cont nita' bene' yesene'e neda' cate' bich chona' žin che xanan'." ⁵Nach goxe' yogo'lol bene' ca' chesala' xmechw xane'na' tgüej tgüej na' gože' bene' nechw: "¿Gaca' chalo' che xana'?" ⁶Na' bena' gože'ne': "Chala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan chalo' che chop mil litrwze seten'." ⁷Gwde na' gože' bene' gwchopen': "¿Gacan' chalo' che xanan'?" Nach bena' gože'ne': "Chala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan chalo' che xono' gayoa robze trigon'." ⁸Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanan'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosochine' dan' de chegaque'.

⁹Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežlinle yaba gan' soale toli tocanē.

¹⁰Še to bene' chone' can' cheyała' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'chgua. ¹¹Še le'e bi chonle can' cheyała' gonle len dan' de chele yežlio nga da' te chen', bitw gon Diosen' le'e da' zaca'ch da' bi te che. ¹²Dan' de chele yežlio nga, che Diosen' gague chelen'. Na' še bitw chonle can' cheyała' gonle len da' nac che', bitw gone' le'e da' zaca'ch da' bi te chen'.

¹³Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

¹⁴Na' lecze nita' bene' fariseo ca' chesende' xtiza' Jesúsen', na' gozezi'diže' le', le gosaclaže' yesaque' bene' gwñi'a. ¹⁵Na' gož Jesúsen' legaque':

—Le'e chonle cont beñachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bał da' chesaque beñachen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda' ogaque'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda' ogaque'.

¹⁷ 'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te čhen.

Bi cheyala' yela'acho len no'ol chechon' cont soalencho no'ole yoble

(Mt. 19:1-12; Mr. 10:1-12)

¹⁸ Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

Bene' gwni'a na' Lázaro

¹⁹ Nach gozna' Jesúsen':

—Gwzoa to bene' gwni'a na' xdanchgua goc xalane'na', na' leca gwdagwšagüe' yogo' ža. ²⁰ Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwni'ana' cont gwnabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp čhen'. ²¹ Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwni'an'. Na' beco' ca' ja'acha' jasele'eba' yežo' dan' gwžia cuerp che'na'. ²² Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xoxxta'ocho Abraham. Na' lecze got bene' gwni'ana' na' bosocuaše'ne' ²³ na' beyeje' lo' yi' gabil'. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. ²⁴ Nach bene' gwni'an' gwne' zižje gwne': "Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwłapa' xbene'na', le leca chžaglagua' lo' yi' nga." ²⁵ Perw na' Abrahanna' gože' le': "Xi'ina', bosa'laže' cate' gwban'o yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. ²⁶ Bi gac gona' can' chaclažon', le Diosen' bach nze' to bđinj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga." ²⁷ Nach bene' gwni'ana' gože' Abrahanna': "Bene' gol dao', chata'yoeda' le' gwseła'šca Lázaron' liž xan". ²⁸ Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'." ²⁹ Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyala' yosozenague' che da' ca' zjanyojen." ³⁰ Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtola'gaquen'." ³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czla' še yeban to bene' ladjo bene' guat ca', bi yeseje'cze' che Diosen'."

17

Bitw cheyala' goncho cont gon bene' da' xinj

(Mt. 18:6-7, 21-22; Mr. 9:42)

¹ Na' gož Jesúsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. ² Yejni'a šaca' yosochėje' yene' to yiše na' šjasezale' le' lo' nisdao' clel ca soe' gone' cont to bene' za' gwzologüe' chejnilaže' neda' lažoe' gone' da' xinj. ³ Da'nan' le gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le til'e na' še gwše'e xbab na' ne' bich gone' ca', le yezi'xen che'. ⁴ La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyala' yezi'xene' che'.

Gosaclaže' yeseje'che' che Diosen'

⁵ Na' gose' postlw ca' Xancho Jesúsen':

—Gaclenšco' neto' cont šejle'chto' che Diosen'.

⁶ Nach gož Xanchon' legaque':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclne', še šejnilaže'ine', guaquee ye'le yag nga: "Gwcuase nga na' jayzoa lo' nisdaon'", na' guaccze can' nalna'.

Dan' cheyała' yeson mos ca'

⁷Le'e še mos chelen' chgua'ane' go'n, o še chyo'e xila', cate' chele'e güeyeban' bitw che'ln'e: "Beyo'o ngale, gwche'edo' gaguo' xše'." ⁸San che'ln'e: "Bsin'i'a da' ye'ej gagua' na' goñon'. Te yedaguan' nach gago'." ⁹Na' bitw cho'elne' yela' choxclen cate' ba bene' dan' gožlene'. ¹⁰Na' lecz ca' le'e, cate' ba benle yogo'lol dan' ža Diosen' gonle, cheyała' nale: "Bitw zacá'to' no gon yela' choxclen cheto' ca' dan' ba bento', le bento' con da' cheyała'cze gonton'."

Jesúsen' beyone' ši bene' chese'ede' yižgüe' da' nzi' lepra

¹¹Na' zej Jesúsen' Jerusalénna' len bene' ca' zjanaque' le' txen na' gwdie' gan' ndił distritw Samaria len distritw Galilean'. ¹²Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsen'. Na' gosezie' zito' ¹³na' gosene' zižje gosene':

—Maestrw Jesús, beyaše'laže' neto'.

¹⁴Na' Jesúsen' cate' ble'ede' legaque' na' gože'ne':

—Le šjaya'ac lao bꝛox ca' cont yesene'e le'e še ba beyacle.

Na' goquen' lo neza' besyeyacde'. ¹⁵Nach toe' cate' goche'ede' bach beyaque', na' bebi'e na' gwñie' zižje benxene' Diosen', ¹⁶na' bzoa xibe' lao Jesúsen' bi'e le' yela' choxclen. Ben' ben ca' naque' to bene' Samaria. ¹⁷Nach gwna Jesúsen':

—Beyona' ši bene'. ¿Ganxe bene' ca' yega? ¹⁸¿Toz bene' zito' nga bebi'e chonxene' Diosen'?

¹⁹Nach gož Jesúsen' bena':

—Bezoža' beyej to šagüe' to güen. Ba beyacdo' da' chejniłažo' neda'.

Yela' chnabia' che Diosen'

(Mt. 24:23-28, 36-41)

²⁰Na' bene' fariseo ca' gosenađe' le' batxen' yid ben' seła' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo. ²¹Nono cheyała' güie' diža' ne': "Gwña' nga chnabi'e", o "Gwña' na' chnabi'e." Le ba zoe' len le'e na' chnabi'e.

²²Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwseła' Diosen'", perw bitw gac can' nabraže'len'. ²³Yesenita' bene' yesi'e le'e: "Gwña'šc nga zoa ben' gwseła' Diosen'", o "Gwña'šc na' zoa ben' gwseła' Diosen'." Perw bitw ga'ole ben' yesi'e le'e ca'. ²⁴Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwseła' Diosen' golja' benach. Yida' zejzenez na' yogo'lol bene' yesele'ede' neda'. ²⁵Zgua'tec de da' zan da' cheyała' saca'zi'a na' bene' ca' že' na'a bitw yesejle'e chia'. ²⁶Lecz ca' goc ca' timp che da' Noé, lecze ca' gac cate' ba zoa žin ža yida' da' yoble, neda' naca' ben' gwseła' Diosen' golja' benach. ²⁷Bene' gwñita' ca' timp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'in che' cate' bžin ža gwyo'o Noén' lo' barcon'. Nach goc to yejswi' juisywo. Na' gosebiayi' yogo' bene' ca' bi gos'o lo' barcon'. ²⁸Lecz ca' goc ca' timp che da' Lot, bene' Sodomán' gose'ej gosagüe' gosote' bi da' de chegaque', na' gosezi'e bi da' beseyažjde', na' gosaz gosa'ane', na' goson liže'. ²⁹Perw na' žan' beza' Loten' Sodomán', Diosen' bene' cont byinj' yi' na' azufre yaba na' gosebiayi' yogo'lol'e'. ³⁰Can' gac cate' yida' da' yoble, neda' naca' ben' gwseła' Diosen' golja' benach, na' yogo'lol bene' yesele'ede' neda'.

³¹Na' ža caten' yida' še chda to bene' do yičhjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yiže', bitw gacde' yeyej liže'. ³²Le šjajza'laže' can' goc che no'ol che Loten'. ³³Note'tez bene' chadde' gone' cont chi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne' chia' neda', ba de yela' mban che' toli tocané.

³⁴Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. ³⁵Na' chop no'ole nite' txen chesote', toe' yeca'a Diosen' na' yetoe' yega'an. ³⁶Na' chope bene' nite' do yiže', toe' yeca'a Diosen' na' lecze yega'an yetoe'.

³⁷Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': "Gan' de be guat nan' chesežag šod ca'."

18*Jempl che to no'ol güezeb len to juez mal*

¹Na' be'len Jesúsen' legaque' to jempl bsd blo'ede' legaque' cheyała' nita'teze' yesonchachlaže' yosol güiže' Diosen'. ²Na' gože' legaque':

—Gwche' to ciuda ga gwzoo to juezen' bi gwdape' Diosen' bala'an' na' neca gwche'yichje' še chesazlaže' beñachen' can' chonen'. ³ Na' ciudan' gwzoo to no'ol güezeb, na' goxje cheje' lao juezen' na' che'e le': "Ben yela' justis chia' len bene' chgue'ede' neda'." ⁴ Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an' na' neca chi'yichja' še chesazlaže' beñachen' can' chonan'. ⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

⁶ Nach gož Xanchon' legaue':

—Le gon' xbab che dan' gwna juezen' ben' bi zej to licha. ⁷ Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güize' le' do za do yel. ¿Gwleze' sša cont yosle' legaue' lo na' bene' ca' chesegue'ede' legaue'? ⁸ Chnia' le'e, Diosen' bedao'nez yosle' legaue' lo na' bene' ca'. Perw cate' neda' yida' yežlio nga yeto, neda' naca' ben' gwsela' Diosen' golja' beñach, ¿ne' nita'ch bene' chesejnilaže' neda'?

Jempl che to bene' fariseo len to bene' güechixjw

⁹ Gwnita' hał bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

¹⁰ —Chope bene' ja'ac yodao' blao jasel güize' Diosen', toe' bene' fariseo na' yetoe' bene' güechixjw. ¹¹ Bene' fariseon' gwzeze' boł güize' Diosen' na' con chonxen cuine', gwne': "Dios, neda' chona' yela' choxcen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni. ¹² Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'." ¹³ Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': "Dios, beyaše'laže' neda' naca' bene' güen da' xinj." Da'na'z da' gwna bene' güechixjon'. ¹⁴ Na' chnia' le'e, Diosen' bezi'xene' che bene' güechixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Dios' gone' cont si'e zto', na' note'tez bene' chzexjwlaže' lagüen', Diosen' gone' cont gaxcene'.

Jasesane' bidao' lao Jesúsen'

(Mt. 19:13-15; Mr. 10:13-16)

¹⁵ Na' jasesane' bidao' lao Jesúsen' cont xoa ne'e yichjgache'. Na' cate' bene' ca' zjanaque' le' txen besele'ede' can' chesonen', gosedi'e' legaue'. ¹⁶ Perw na' Jesúsen' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaue' chosozenague' che Diosen' cont chnabi'e yichjlažda'ogüe'. ¹⁷ Na' da' li žia' le'e, note'teze' bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwni'a be'lene' Jesúsen' diža'

(Mt. 19:16-30; Mr. 10:17-31)

¹⁸ To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocanē?

¹⁹ Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios. ²⁰ Le' nezdo' da' none' mandadw goncho: "Bi gata'lenle' no'ol bi nac no'ol chele o bene' byo'bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an' xaxna'le'."

²¹ Na' gož ben' le':

—Yogo'lol da' quinga gwzolagua' chonczan' cate' ne' nactia' bidao'.

²² Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesúsen' le', gocyāše'chgüede', le bene' gwni'achgua goque'. ²⁴ Na' Jesúsen' gwne'e bene' gwni'ana' na' gože'ne':

—Leca zdebe naquen to bene' gwni'a gwzenague' che Diosen' cont Diosen' nabi'e yichjlažda'ogüe'. ²⁵ Bedao'ch te to be xen be nzi' camello to lo' nag yeše' clcl ca to bene' gwni'a gwzenague' che Diosen' cont Diosen' nabi'e yichjlažda'ogüe'.

²⁶ Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

²⁷ Na' Jesúsen' gože' legaue':

—Da' bi gac gon beñachen', bitw nacho bi gac gon Diosen' len.

²⁸ Nach Pedroa' gože' le':

—Neto' ba gwlejiychjto' yogo' da' de cheto' cont nacto' le' txen.

²⁹ Na' gož Jesúsen' legaque':

—Da' li žia' le'e, note'teze bene' ba gwlejiychje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', ³⁰ yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli' tocañe.

Da' yoble gosyixjue'e Jesúsen' ba zoa gate'

(Mt. 20:17-19; Mr. 10:32-34)

³¹ Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lo' dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwseła' Diosen' golja' beñach. ³² Gaca' lo' na' bene' ca' bi zjanac bene' Israel, na' yesezi diže' neda', na' yesene' yela' ya' chia', nach yosoži'e xene' cho'alagua'. ³³ Yesot yeseyine' neda' na' yesote' neda', perw yeyon' ža yebana' ladjo bene' guat ca'.

³⁴ Perw bene' ca' zjanaque' Jesúsen' txen bi gosejni'ide' dan' gože' legaque', le zjančhol' yichjlažda'ogüen', da'n'an' bi gosejni'iden'.

To bene' lchol' bene' Jericó bele'ede'

(Mt. 20:29-34; Mr. 10:46-52)

³⁵ Nach cate' ba zoa yežin Jesúsen' Jericó, to bene' lchol' chi'e chanezen' chñabe' yosonežjo bene' le' con gaca' da' chesezande'. ³⁶ Na' bende' chesede bene' zan gan' chi'ena', na' gwñabe' bin' chac. ³⁷ Na' gose'ene':

—Jesús bene' Nazaret chdie' lagu' nga.

³⁸ Na' bosya'adie' gwne':

—Jesús, xi'in' diaža che da' rey David, beyaše'laže'sca neda'.

³⁹ Nach bene' ca' zjažialao lao Jesúsen' gosedile' bene' lchol'en', gose'e le' cheyała' soe' šize, perw nachle bosya'adiache', gwne':

—Xi'in' diaža che da' rey David, beyaše'laže'sca neda'.

⁴⁰ Jesúsen' gwleze', nach bene' mandadw šjasexi'e bene' lchol'en' lagüe'na'. Na' cate' gwbiga' bene' lchol'en' lao Jesúsen', nach gože'ne':

⁴¹ —¿Bi chaclažo' gonda' le'?

Na' bene' lchol'en' gože'ne':

—Xana', benšca cont yele'eda'.

⁴² Jesúsen' gože'ne':

—Bele'e. Dan' chejnilažo' neda' bach beyac yejlagon'.

⁴³ Na' la' bele'ete bene' lchola' na' gwda'ogüe' Jesúsen' benxene' Diosen'. Na' ľecze ca' yogo' bene' ca' besele'ede' can' goquen' gosonxene' Diosen'.

19

Jesúsen' na' Zaqueo

¹ Nach Jesúsen' gwyo'e yež Jericó na' gwdeze' yešla'a ciudadan'. ² Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwñi'a. ³ Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' bčhecw dao'. ⁴ Da'n'an' gwza'sese' gwdie' lao bene' ca' cont gwyepe' to lo' yag da' zoa gala'ze gan' te Jesúsen'. ⁵ Perw na' cate' bžin Jesúsen' xan yaguen', gwne'e lo' yaguen' na' gože'ne':

—Zaqueo, bedao'nez beyetj. Cheyała' yega'ana' ližo' na'aže'.

⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'.

⁷ Perw na' bene' ca' zjanžague' len Jesúsen' cate' besele'ede' can' goquen', yogüe' gosene' che Jesúsen' gosene':

—Ba zeje' zjazoe' to liž bene' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zčha'och ca dan' cheyała' yeseyixjue', yonežjwgaca'ne' tap ca'te'le.

⁹ Na' Jesúsen' gože'ne':

—Na'aža ba ben Diosen' yela' mban chio' toli' tocañe len che bene' lo' yo'o' chio'. Na' da' li ba naco' xi'in' diaža che da' Abraham lagüe dan' ba chejnilažo' Diosen' can' ben da' xozxta'och Abraham. ¹⁰ Ca nac neda', gwseła' Diosen' neda' golja' beñach cont zedyediljua' note'tez bene' ba mbiayi', na' gwnežjua' legaque' yela' mban toli' tocañe.

Jempl che ši bene' bnežjw xangaque' legaque' mechw xen

¹¹ Na' šlac ne' zjanžag bene' chosozenague' diža' dan' choe' Jesúsen', be'lene' leaque' to jempl, le ba nite' gala'ze Jerusalénna' na' gosacde' la' solaote nabi'e nación Israelen'. ¹² Nach gwne':

—To bene' blao gwyeje' to yež zito' jene' dan' cheyala' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'. ¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' leaque': "Mechw nga gonele negosywe šlac bi zoa". ¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': "Bitw chaclaže'to' nabi'a' benga neto'." ¹⁵ Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmoše' bene' ši ca' lagüe'na', bene' ca' bocua'anlene' xmechuen'. Goclaže' nežde' gaca' gosone' gan len mechw dan' bocua'anlene' to toe'. ¹⁶ Bene' nechw bžine' lagüen' na' gože'ne': "Xana', xmecho' dan' bocua'anleno' neda' benen gan ši ca'te'le ca' dan' bocua'anon'." ¹⁷ Nach xanen' gože'ne': "Ba beno' da' güen. Naco' mos güen. Beno' can' cheyala' gono' len da' daon' bocua'anlena' le', da'nan' gona' cont nabi'o ši ciuda." ¹⁸ Na' bene' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca' dan' bocua'anon'." ¹⁹ Nach gože' le': "Le' nabi'o gayo' ciuda." ²⁰ Nach bžin yetoe' lao xane'na' na' gože'ne': "Xana', nga de' xmecho' dan' bocua'anleno' neda' benen gan gayo' ca'te'le ca' dan' bocua'anon'." ²¹ Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble." ²² Nach gož xanen' le': "Dan' ba gwnao' ca' chlo'en napo' dola'. Naco' mos mal. Chacdo' naca' to bene' znia, na' neždo' chona' gan da' bi bena' žin na' chelapa' dan' gosaz bene' yoble." ²³ Na' še neždo' chona' ca', žbichen' bi gwlejo' xmechuan' bene' yoble cont yežian' len yichjen' na' ba bela'a?" ²⁴ Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca' dan' bocua'anlena'ne'." ²⁵ Nach gose'e le': "Xant'o', ba noxe'cze' ši ca'te' ca' dan' bocua'anleno'ne'." ²⁶ Nach gož bene' gwnabian' leaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'. ²⁷ Na' ca' nac bene' ca' chesegue'ede' neda', bene' ca' bi chesaclaže' nabi'a'gaca'ne', le šjaji'e na' gotlene' lagua' nga."

*Gosonxene' Jesúsen' cate' beyo'e Jerusalén
(Mt. 21:1-11; Mr. 11:1-11; Jn. 12:12-19)*

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén. ²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, ³⁰ gože' leaque':

—Le šja'ac yež dan' chi' gala'ze, na' cate' žinlen' na' yeželete to burr dao' da'ba' yag, be nono na' cuia. Le sežba' na' le che'ba' nga. ³¹ Še no nab bixchen' chsežleba', na' ye'ln'e': "Xant'o' chyažjde'ba'."

³² Nach bene' ca' gwsele' Jesúsen' gosa'aque' na' besele'ede'ba' da'ba' gan' gož Jesúsen' leaque' ca'. ³³ Nach šlac cheseseže'ba', xamba' ca' gose'e leaque':

—žBixchen' chsežle burr daon'?

³⁴ Nach bene' ca' gwsele' Jesúsen' gose'e leaque':

—Xanton' chyažjde'ba'.

³⁵ Nach goseche'eba' lao Jesúsen' na' gosexo'a xagaque' cože'ban' nach bosožie' Jesúsen'. ³⁶ Na' šlac zeje' ngüe'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len. ³⁷ Nach ba zja'aque' gala'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yog'lol yela' guac da' ba besele'ede' da' ben Jesúsen'. ³⁸ Nach gosone':

—jMbalaz rey chechon' ben' ba za' nga gwsele' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benačhen' gac yesyenite' binlo len le'.

³⁹ Na' len bene' zan ca' zja'aclene' Jesúsen' zja'ac bał bene' fariseo. Nach to chop'e gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

⁴¹ Cate' bžine' gala'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše', ⁴² na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'.

⁴³ Gwžin ža cate' bene' ca' chesegue'ede' le'e yesone' to yež de yej da' šečhjen' ciudan' cont nono gac yoxonj. ⁴⁴ Na' yesote' le'e len xi'inle ca'. Na' yosyočhinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya' yodao' blaon'

(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chyo'o yodao' blaona' na' gwzologüe' bešaše' bene' ca' chesote' na' bene' chesa'o na'. ⁴⁶ Na' gože' legaque':

—Nyojczy Xtiža' Diosen' žan: "Ližan' naquen to latje gan' yesol giüz bene' neda'", perw le'e ba benlen ca to latje ga že' bene' gwban.

⁴⁷ Na' bsed blo'ede' bene' ca' že' yodao' blaona' yogo' ža. Na' bžoz gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyiljwlaže' nacle yesone' yesote'ne'. ⁴⁸ Perw bi besyěželde' nacle yesone' le' neče yogo' bene' besyebchgüede' xtiže'na'.

20

Yela' gwnabia' che Jesúsen'

(Mt. 21:23-27; Mr. 11:27-33)

¹ To ža šlac chsed chlo'e Jesúsen' bene' ca' chyo'o yodao' blaona' na' chyxijue'ede' diža' güen che Diosen', besežin bžoz gwnabia' ca' na' len bene' gol ca' chesenabi'e naciónna' na' bene' ca' chososed chosolo'e dan' bzoj da' Moisés. ² Na' gose'e le':

—Gwnašč neto' bi yela' gwnabia' napo' chono' da' qui, na' no ben yela' gwnabian' cont chonon'.

³ Na' boži'e xtiža'gaquen', gwne':

—Łecze de to da' nabda' le'e. Łe našč neda' ⁴ žnon' gwseła' da' Juanna' bzoe' bene' nis? žDios nan' gwsele'ne', še benačhen'?

⁵ Na' legacze' gose' lježe':

—žBi nacho? Še ye'chone' Dios gwseła' le', na' ye'e chio': "žBixčhen' ca' gweyje'le' che'?"

⁶ Na' bi gac ye'chone' benač gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

⁷ Na' gose'e Jesúsen':

—Bi nežeto' non' gwseła' da' Juan.

⁸ Nach Jesúsen' gože' legaque':

—Łecz ca' neda' bi yapa' le'e bi yela' gwnabian' chonłenda' da' ca'.

Jempl che mos mal ca'

(Mt. 21:33-44; Mr. 12:1-11)

⁹ Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gweyje' zito' na' jasoe' sša. ¹⁰ Cate' bžin ža yosyotobe' cosešen', nach gwseła' to mxose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. ¹¹ Nach xan yežlion' gwsele' yeto mosen', na' łecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. ¹² Na' xan yežlion' gwseła'che' mos gwyone, na' łecze gosotlate'ne' gosone'ne' güe', na' besyebeje'ne' gan' že' yag uvas ca'.

¹³ Na' xan yežlion' gwne': "žNacxe gona'?" Nach beyone' xbab gwne': "Seła' xi'ina' ben' chacchgüeda', le šeca güesezi'e xtiža' le'." ¹⁴ Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Łe da gotchone' cont yega'anlenchon." ¹⁵ Nach besyebeje' le' gan' že' yag ca' na' gosote'ne'.

Nach Jesúsen' gwñabde' bene' ca' zjanžagen':

—žNacxe gon xan yežlion' len bene' ca' bocua'anlene' yežlio chen'? ¹⁶ Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—įCatec da' mal juisyw dan' goc!

¹⁷ Na' Jesúsen' gwñachgüe' legaque' na' gwne':

—žBixe zejen da' nga nyojen le'e Xtiža' Diosen'? žan:

Yej dan' bi gosaclaže' güen yo'o ca' yosočhine',

len ba naquen yej squin.

¹⁸ Na' ca' nac yejna', note'tez bene' lažo' lo yeja' na' cue'žoše', na' note'tez bene' čiže' yeja' cate' lažon' na' gwšošjen le'.

Ca' nac dan' cheyala' gaxjw

(Mt. 21:45-46; 22:15-22; Mr. 12:12-17)

¹⁹ Na' bene' ca' chososed chosolo'e dan' bzoj da' Moisés na' bžoz gwnabia' ca' la' besyeyiljwlaže'te nacle yesone' yesezene' Jesúsen', le gosache'ede' Jesúsen' be'e jemplna' neče dan' bi chesejinilaže' le'. Perw bibi gosone', le besežebe' bi yeson bene' ca' že'na' bene' chesejle'e

che Jesúsen'. ²⁰ Da'nan' gosesel'e bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'. ²¹ Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to licha. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. ²² Na' da'nan' zedenabeto' le' ;naquen binlo no chixjo da' cheyała' chixjwcho che ben' nac la'zelagüe bene' gwnabia' ben' chi' Roma, še bi?

²³ Na' goche'e Jesúsen' gague do lažen' chese'ene' ca', san chesacraže' yesagüe' xya che xtižen'. Na' gože' le'gaque':

—¿Bixchen' chaclaže'le yoslažo'le neda' len xtižan'? ²⁴ Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

²⁵ Nach gože' le'gaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

²⁶ Na' bi gosezaque'de' yososlažo'e le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban bene' guat ca'

(Mt. 22:23-33; Mr. 12:18-27)

²⁷ Na' lecze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁸ —Maestrw, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'. ²⁹ Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. ³⁰ Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'. ³¹ Na' bene' gwoyna' lecze bošagna'lene' no'olen', na' lecz ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. ³² Gwde gosat yogo' loł bene' ca', nach got len no'ola'. ³³ Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le' yogo' bene' gaža' bosošagna'lene' le'.

³⁴ Na' Jesúsen' boži'e xtiža'gaquen', gože' le'gaque':

—Bene' ca' nita' lo yežlio nga chosošagne'e na' lecze chosošague' na' no xi'ingaque'. ³⁵ Perw na' bene' ca' chaque Diosen' zjazaque' cont yosbane' le'gaque' ladjo bene' guat ca' cont šjasyenite' len le' toli tocañe, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e. ³⁶ Bich yesate', le yesaque' ca' angl ben' že' yaba, na' yesaque' xi'in Dios lagüe dan' ba bosban Diosen' le'gaque' ladjo bene' guat ca'. ³⁷ Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. ³⁸ Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

³⁹ Na' bał bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

⁴⁰ Na' bich besyeyaxjde' bi yesenabde' le'.

Criston' naque' xi'in diaža che da' rey David

(Mt. 22:41-46; Mr. 12:35-37)

⁴¹ Jesúsen' gože' le'gaque':

—¿Nacxechen' chesena bene' Criston' ben' yedenabi'e naque' xi'in diaža che da' rey David?

⁴² Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' chio.”

⁴⁴ ¿Nacxe gac nacho Criston' naque' xi'in diaža che da' rey David? le' cuin Davin' gože' le': “Xana”.

Xtola' bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Bene' zan zjanžag chosozenague' cate' gože' bene' ca' zjanaque' le' txen:

⁴⁶ —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Le'gaque' chesyebede' chesaše' zjanyaze' lache' ton. Na' chesyebede' chesonxen

bene' legaque' cate' chesyēzague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. ⁴⁷ Na' chesyēque'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' chesacche' castigw clel ca yezica'chle bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

¹ Šlac zoa Jesúsen' chyo'o yodao', gwne'e na' ble'ede' bene' gwni'a ca' gosego'o xmechw-gaquen' lo' cajen' gan' chesegüe'e mechw che yodaon'. ² Na' leceze ble'ede' to no'ol güezebe bene' yaše' gwlo'e čhop centav dao' che'na'. ³ Nach Jesúsen' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clel ca yogo' bene' ca' yezica'chle. ⁴ Le yogo' legaque' chesegüe'e da' checho'onen lo yela' gwni'a čhegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chachbande'.

Gwžin ža yosyočhinje' yodao' blaona'

(Mt. 24:1-2; Mr. 13:1-2)

⁵ Na' bal' bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočhinje'.

Dan' gac cate' ba za' bagwze yeyož yežlion'

(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ždo bat gac dan' žo' nga? na' žnac gac nezetu' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosola'ne' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'. ⁹ Na' cate' yenele chac gwđile nile na'le o yenele čhi' žaš contr bene' ca' chesenabia', bi žeble, le zgua'tec da' quinga cheyala' gac. Perw gague lenna' nacho na'tec na'a yeyož yežlion'.

¹⁰ Nach gože' legaque':

—Na' yesedile to yež len yeto yež yoble na' to nación len yeto nación yoble, ¹¹ na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benačhen' neče dan' chac.

¹² Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yesече'xožje' le'e do lao rey na' do lao nochle bene' gwnabia' dan' chejnilaže'le neda'. ¹³ Na' cate' gac da' quinga güe'le xtiža'na'. ¹⁴ Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen', ¹⁵ le neda' goña' le'e xbab len yela' sina' čhian' cont yoži'ile xtiža'gaque' sin čbi bi gac yesene'. ¹⁶ Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'le'e. Na' yesote' balle. ¹⁷ Na' yogo'ze bene' yesegue'ede' le'e dan' chejnilaže'le neda'. ¹⁸ Perw chape Diosen' le'e na' bitw güe'le latje cuiayi'le, ¹⁹ na' goņe' yela' mban chele toli tocaņe še soale gwyo gwčhejle yogo'lol dan' yesonde' le'e.

²⁰ Na' cate' le'ele ba besela'ac soldadw zan cue'ej cuit Jerusalenna' ben' yesedillen le'e, canan' nezele ba zoa cuiayi' ciudadan'. ²¹ Cana' bene' yesenita' Jerusalén cheyala' yosoxonje'. Na' bene' že' yezica'chle yež ga mbane Judea cheyala' šja'aque' do ya'adao'. Na' bene' yesenita' yiže', bi cheyala' yesone' xbab yesyeyo'e lo' ciuda. ²² Cana' gwnežjo Diosen' castigw che xtola' bene' ca' že' Judean', cont gac can' nyojen le'e Xtiža' Diosen'. ²³ iNyaše' zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'! Leca yesesaca'zi' bene' ca' že' doxen Judean', le Diosen' ža'achgüe' legaque'. ²⁴ Soldadw ca' yesote' bale' lo gwđile na' yebale' yesече'xožje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočhinje' yo'o ca' dan' že' Jerusalenna' na' yosolej yosošožen'. Perw ba žia' Diosen' bia' žin ža cate' bene' ca' bi zjanaque' bene' Israel bich yesenabi'e nación Israel.

Yid Jesucriston' da' yoble

(Mt. 24:29-35, 42-44; Mr. 13:24-37)

²⁵ Ca nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisdaon' chas chata' gaquen. ²⁶ Na' bene' že'

yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca chac yežlion' cate' chxo'. ²⁷ Na' cana'ch bene' že' yežlion' yesele'ede' neda' naca' ben' gwsela' Dios golja beñač, za'a to lo' bejw len yela' guac xen na' yela' bene' zaca' juisyw chia'. ²⁸ Na' cate' solao gac da' quinga, le gončač laže'le na' le yebe. Ba zoa žin ža yida' da' yoble yebeja' le'e lo da' malen'.

²⁹ Na' Jesúsen' be'lene' legaue' to jempl, na' gože' legaue':

—Le na'šc can' chon yag yixgüigw na' bite'teze yag yoble, ³⁰ cate' chle'ele ba chebian laga' che'en dao' nach nezele bač zoa yela' tiemp ba. ³¹ Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

³² Da' li žia' le'e, biña' yenit diaža' che le'e nita'le na'a cate' yeyož gac yogo'lo' da' ca'. ³³ Le'e yaba na' yežlion' yesele čen, perw ca nac xtižan', gague da' te cbi gac can' žanna'.

³⁴ Na' le gon xbab cont bi gacle bene' lia na' bene' borrašw na' cont bi soale yela' yežejele. Bene' ca' yesac bene' lia na' borrašw na' bene' ca' yesyelal yesyežejde' bi yesebeze' batcan' gac yogo' da' quinga. ³⁵ Na' toz can' gac che bene' že' doxen yežlion', yesac yogo' da' quinga cate' nono chon xbab. ³⁶ Perw yogo' že le soa le cuez batcan' gac da' quinga na' le yol güiž Diosen' cont bibi gac chele na' gac yedyesoale len neda' naca' ben' gwsela' Diosen' golja beñač.

³⁷ Yogo' že gwzoa Jesúsen' bsd blo'ede' bene' yodao' blao, na' yogo' že' beyeje' lo ya'a da' nzi' Ya'a Olivos. ³⁸ Na' yogo' zil besežin bene' zan bosozenague' che' šlac bsd blo'ede' legaue' chy'o yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Na' ba zoa gala' lni pascw caten' chesagüe' yetextil da' bibi levadura yo'on. ² Na' bžox gwnabia' ca' na' bene' ca' chososed chosolo'e ley dan' bžoj da' Moisésen' besejiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaue'.

³ Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len bene' šiziñw ca' zjanaque' Jesúsen' txen, ⁴ na' gwyeye' jañe'e bžox gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo na'gaue'. ⁵ Na' leca besyebede' na' gose'e le' yosonežjue'ne' mechw. ⁶ Na' Judasen' gwxenlaže' len legaue', na' gwzologüe' gwdiłjwlaže' nacle gone' gwdie' Jesúsen' lo na'gaquen' cate' bi že' bene' zan.

Jesúsen' blo'ede' legaue' can' cheyala' yesone' šjasyeza'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bžin ža gala' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' bene' Egipto ca'. ⁸ Na' Jesúsen' gwleje' Pedroa' len Juanna' na' gože' legaue':

—Le šja'ac na' le šjasini'a dan' gagwcho lo lñin'.

⁹ Na' gose'ene':

—¿Ga che'ndo' šjasini'ato'?

¹⁰ Nach gože' legaue':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlenlne' na' gan' yežinen' ¹¹ le ye' xan yo'on': "Maestron' že': Gonašco' to yo'o ga gagua' xše' že' lni nga len bene' ca' zjanaque' neda' txen." ¹² Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

¹³ Na' gosa'aque' na' yogo' can' gož Jesúsen' legaue' goc. Nach bososini'e xše' že' lñina'.

¹⁴ Na' cate' bač gwchi'e cho'a mesen' len postlw che' ca', ¹⁵ na' gože' legaue':

—Leca gwzelaža' gagua' yela' guagw che lni nga len le'e na'a za' saca'zi'a na' gata'. ¹⁶ Chnia' le'e, na'a zelao gaguan'. Cate'ch ba blo'e Diosen' yela' gwnabia' che'na', cana'ch gaguan' da' yoble.

¹⁷ Na' gwxi'e vas gan' yože nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' güeje dan' yože lo' vas nga. ¹⁸ Chnia' le'e na'a zelao che'eja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

¹⁹ Nach gwxi'e yetextilen' na' be'e yela' choxclen che Diosen' na' bžoxjen' na' bnežjuen' legaue'. Na' gože' legaue':

—Da' nga cuerp chia' chzanlaža' neče le'e. Quinga gonle cont šjazye'ele bi zejen len le'e dan' yesote' neda'.

²⁰ Na' lecze bexue' vassen' cate' ba beyož gosagüe' xšen' na' gože' legaue':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwłalj xchenan' neche le'e.

²¹ Na' da' li ben' gwdie' neda' lo' na' bene' ca' chesegue'e neda' nga chagwlene' neda' txen.

²² Na' gac chia' can' n'zia bia' gac, neda' naca' bena' gwseła' Diosen' golja' beñach, perw nyaše' chguaze nac ben' gwdie' neda' lo' na' bene' ca'.

²³ Nach gosezolagüe' gosenabe lježgaque' noen' gon da' malen' nac ca'.

Gosacyože' noe' nacch blao

²⁴ Na' lecze gosezolagüe' gosacyože' noe' nacch blao. ²⁵ Na' Jesúsen' gože' legaque':

—Nita' bene' gwnabia' che to to naciön ca' na' chesone' byen chosozenag bene' chegaque', na' bene' gwnabia' ca' chesaclaže' yesoe' bene' diža' chegaque' zjanaque' bene' güenchgua.

²⁶ Perw le'e gague can' cheyala' gonle. Še no le'e nacchle bene' blao, cheyala' gwzexjwlaže' le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyala' soale gaclen lježle. ²⁷ Le gon xbab noe' nacch bene' blao, še bena' chi' cho'a mesen' o še xmosen' ben' chon mandadw che'. Nabria'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

²⁸ Le'e bina' cuejyichje neda' la'czla' bene' zan ba chesegue'ede' neda'. ²⁹ Na' ca' nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'.

³⁰ Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabi'a'le šižiñw cuen bene' ca' zjanaque' xi'ñ diaža che da' Israel.

Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

³¹ Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo' ne'en cont gonen cuejyichjo' bich šejnilažo' neda'. Na' dan' gonen len le' naquen ca' dan' chon bene' caten' chdie' trigon' lo' rner. ³² Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xtoło'na', gono' chach laže' bene' lježo' quinga.

³³ Nach Pedroa' gože'ne':

—Ba bečhoglaža' sa'alena' le', gague ližya na'ze, san gatlenca' le'.

³⁴ Na' Jesúsen' gože'ne':

—Pedro, žia' le', bina' cuež jean' na'aže' cate' gac šon' ni'a bi chchebo' še nombi'o neda'.

Gwne' ba zoa yosoči yososaca' bene' legaque'

³⁵ Na' gože' bene' ca' zjanaque' le' txen:

—žByažjele bi da' byažjele cate' gwseła' le'e jatixjue'ele xtiža'na'? Gwseła' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw na'a še napple mechw, cheyala' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada. ³⁷ Chnia' le'e gonle ca', le gac chia' can' nyojczen le'e Xtiža' Diosen' žan: “Gosone'ne' ca' bene' güen da' xinj.” Na' cheyala' gac yogo'łol dan' nyojen.

³⁸ Nach gose'ene':

—Xanto', gwña'šc nga noa'to' chope spada.

Na' gože' legaque':

—Güesaquenzen.

Jesúsen' choł güiže' Diosen' latje gan' nzi' Getsemani'

(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'. ⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len legaque' zito' ca' gan' zelao žin to yej da' gwzala'cho, na' bzoa xibe' na' bol güiže' Dios, ⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chñaba' gac da' žia' neda', san gac can' nao' le'.

⁴³ Na' to angl bene' za' yaba blo'elagüe' le' na' be'e le' fuerz valor. ⁴⁴ Na' šlac chžaglaochgüe' len yichjlažda'ogüe'na' gwzolao chžaglaoch' choł güiže' Diosen' beyačlołjte' yes. Na' nis yes che'na' beyaquen ca' taba' güeje chen dan' zjanaquen chelson, besyeyinjen lo' yo. ⁴⁵ Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. ⁴⁶ Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin bene' zan gála'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnop'e xague', perw gague do lažen' bene' ca'. ⁴⁸ Na' Jesúsen' gože' le':

—Judas, žchnopo' neda' cont gwdio'nda' lo na' bene' quinga? neda' naca' bena' gwseła' Diosen' golja' beňach.

⁴⁹ Na' cate' bene' ca' zjanaque' Jesúsen' txen besele'ede' can' gac che'na' nach gose'ene':

—Xanto', žgwjinto' bene' quinga spada cheton'?

⁵⁰ Na' toe' gwđinen' mos che bžoz blaon', gwchogtechgüe' nague' licha. ⁵¹ Perw Jesúsen' gože'ne':

—Bich gonle ca'.

Nach gwdane' nag mosen' na' beyone' le'. ⁵² Jesúsen' gože' bžoz gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag?
⁵³ Yogo' žaze gwzoo' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

Pedroa' bi gwchebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Nach gosoxe' Jesúsen' na' goseche'ene' liž ben' naque' bžoz blao che nación Israelen'. Nach Pedroa' na'ogüe' Jesúsen' zito' zito'le. ⁵⁵ Na' bosoxene' yi' chyo'o che bžoz blaona' na' gosebi'e cho'a yi'na'. Na' gwche' Pedroa' len legaue'. ⁵⁶ Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benganaque' txen len Jesúsen'.

⁵⁷ Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

⁵⁸ Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaue'.

⁵⁹ Gwde to hor yetoe' gwne':

—Da' licze nac benganaque' txen len Jesúsen', le naque' bene' Galilea.

⁶⁰ Na' Pedroa' gože'ne':

—Bene', bi nežda' bi dižan' cho'o.

Na' ne' choe'te Pedroa' dižan' ca', gwchež to jea. ⁶¹ Na' Xancho Jesúsen' gwyechje' gwne'e Pedroa' na' jayze'e Pedroa' diža' dan' gož Xancho' le' caten' gwne': "Biņa' cuež jean' na'aže' cate' gac šone ni'a bi chebo' še nombi'o neda'." ⁶² Na' Pedroa' beže'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' bene' ca' goseche'e Jesúsen' gosezi'diže' le', na' gosot goseyine' le'. ⁶⁴ Na' bosochje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseche'e Jesúsen' lao bene' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyeni', bene' gole blao ca' chesenabia' nación Israelen' na' bžoz gwnabia' ca' na' bene' ca' chososed chosolo'e ley dan' bžoj da' Moisés besežague' na' gosone' mandadw gwyej Jesúsen' laogaue' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaue':

—Šaca' nia' le'e neda' naca' Criston' ben' gwlej Diosen' cont nabi'a' nación chechon', bitw šejle'le čhia'. ⁶⁸ Na' šaca' bi nabda' le'e, neca yoži'ile xtižan', neca gwsanlenda. ⁶⁹ Neda' naca' ben' gwseła' Diosen' golja' beňach. Na' na'a cui'a cuit Diosen' nabi'a' txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—iNoch no chyažje no gagw xya che'! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

¹ Na' yogo' lo' bene' ca' gosezože'e na' goseche'ene' lao Pilaton' ben' nac gobernador. ² Na' gwzolaos bosocuiše' Jesúsen' gosene':

—Ba gwchoglaoto' che benga cheyala' gate' dan' chde' chgo'oyele' nación Israelen' cont yesejle' e che' na' lecz chžone' chixjwto' da' cheyala' chixjwto' lao rey César. Na' lecz že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwnabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bžoz ca' len yogo' lo' bene' ca' zjanžag lagüe'na':

—Bibi nla'lagüe' še bi dola' nap benga.

⁵ Perw na' gosenече', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bšed blo'ede' distritw Galilean' perw lencze nga bačh chsed chlo'ede' na'a.

Pilaton' gwsele' Jesúsen' lao Herodes

⁶ Cate' bene Pilaton' can gosene', nach gwnabe' še Jesúsen' naque' bene' Galilea. ⁷ Na' cate' gobce'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalenna'. ⁸ Cate' Herodes ble'ede' le' bebede', le ba goc šša che'nde' le'ede' le'. Ba benede' xtiža' Jesúsen' na' zoe' lez le'ede' gone' to da' zaca' yebande'. ⁹ Nach da' zan da' gwnabde' Jesúsen', perw ne to xtižen' ca boži'i Jesúsen'. ¹⁰ Bžoz gwnabia' ca' na' bene' ca' chososed chosolo'e ley dan' bžoj da' Moisés gosezeche' gala'ze na' bosocuiše'ne' len zan diža'. ¹¹ Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguae'ne' to lache' xdan juisyw, gosesel'ne' da' yoble lao Pilaton'. ¹² Na' žana' Pilaton' len Herodes gwzolaos gosaque' migw, la'czla' cate' za' gac ca' besegue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bžoz gwnabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'. ¹⁴ Nach gože' legaque':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr gobiernna'. Neda' bačh gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. ¹⁵ Na' lecz ca' Herodes bitw bi xtole' bželde', na' besele' le' laoto' nga. Na' nacbia' bibi ben benga da' cheyala' gate'. ¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to bene' pres lo' lni pascw chegaque'. ¹⁸ Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

¹⁹ Na' Barrabásen' goseyixjue'ne' ližya da' bžie' gwdile lo' ciudad' na' goque' to bene' güet bene'. ²⁰ Na' da' yoble Pilaton' gwnabde' legaque' še gwsane' Jesúsen', ²¹ perw bososye'e zižjeh gosene':

—iBde' e le'e yag cruz! iBde' e le'e yag cruz!

²² Da' gwyon' ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

²³ Perw gosone' byen bososye'e yelate' zižjeh gosenabe' gwde'ene' le'e yag cruz. Nach Pilaton' bzenague' chegaquen' ²⁴ na' gwchoglagüe' che' gac can' gosenabde' le'. ²⁵ Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bžie' gwdile na' bene' güet bene'. Na' Pilaton' bodie' Jesúsen' lo' na'gaque' cont yesone' len le' ca chesaclaže'.

Bosode' e Jesúsen' le' e yag cruz

(Mt. 27:32-44; Mr. 15:21-32; Jn. 19:17-27)

²⁶ Na' šlac zjanĉhe'ene' gan' yesote'ne' besyežague' to bene' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeje' gwda'ogüe' Jesúsen'.

²⁷ Na' bene' zan zjana'ogüe' le' na' zjalen zan no'ole. Na' no'ol ca' gwzola bososye'e gosebeže' che'. ²⁸ Na' Jesúsen' gwyeche' na' gože' legaque':

—No'ole Jerusalén, bitw cuežle chia'. Yejni'a le cuež chele na' che xi'inle. ²⁹ Da' li gwžin ža cate' yesene': "Mbalaz nita' no'ole güiž no'ole cono gwxa na' nono bguaze'." ³⁰ Cana' yesenablaže' yesebiže ya'a ca' cont čhenen legaque'. Yesenablaže' che' bdiňj goten legaque'.

³¹ Še yesot bene' neda' len bibi xtoła' de, inacchxe yesonde' le'e nacle bene' güen da' xinj!

³² Na' ľecze goseche'e čop bene' güen da' xinj cont bosode'e legaque' le'e yag cruz can' gosone' len Jesúsen'. ³³ Na' cate' besežine' latje gan' nzi' Latje che Žit Yichj Bene' Guat, bosode'e Jesúsen' le'e yag cruzen'. Na' ľecze bosode'e bene' mal ca' čop le'e yag cruzen' len le', toe' gwda' cuit Jesúsen' ľicha, na' yetoe' gwda' cuiten robes. ³⁴ Na' Jesúsen' gwne':

—Xa', bezi'xen che bene' quinga chesegue'ede' neda'. Gague zjanežde' bin' chesone'.

Na' gosone' rifa cate' besyeľe'e xaľane' cont gota'bia' noe' yechelen. ³⁵ Na' bene' zan besyežejde' le'. Na' bene' gwnabia' čhegaque' ca' gosonľe' che', gosene':

—Yezica'chle bene' bosle'. Še da' li naque' Criston' ben' gwlejš Diosen' yedenabi'e, žbixčhen' bi chosla cuine'?

³⁶ Nach soldadw ca' ľecz ca' gosonľe' che'. Gosebigue' gala'ze gan' zoa yag cruzen' na' bosonežjue'ne' vino zičj. ³⁷ Nach gosene':

—Še len' naco' rey che bene' Israel, bosla cuino'.

³⁸ Na' yičj yag cruz che'na' gwzoo to dan' nyojen, žan: "Bengan' rey che bene' Israel." Na' byojen diža' griego, diža' latín na' diža' hebreo.

³⁹ Na' to bene' mal ben' da' le'e yag cruz cuit Jesúsen' ľecze gwzi'diže'ne', gože'ne':

—Še le' naco' ben' gwlejš Diosen' cont yedenabi'o nación čhechon', bosla cuino' na' ľecze bosla neto'.

⁴⁰ Na' ben' yeto gwdiľe' bene' ľježen' gože'ne':

—žBi čžebo' Diosen'? Chio' ba da'cho le'e yag cruz cont gatcho can' da' le'. ⁴¹ Na' dan' gat chio' naquen ľicha cont si'cho castigw che xtoła'chon'. Perw benga, bitw bi doľa' nape'.

⁴² Nach gože' Jesúsen':

—Jesús, šjayza'laže'go' neda' cate' žin ža nabi'o.

⁴³ Na' gož Jesúsen' le':

—Da' li čhnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

⁴⁴ Na' cate' bžin guagwbiž goc čhoľ doxen ľo yežlion' bžinte do cheda šone. ⁴⁵ Bitw bseni' gwbižen'. Na' ca nac lache' dan' ze ľo' yodao' blaona', bcheza' gachoľen. ⁴⁶ Nach Jesúsen' bosye'e žižje gwne':

—Xa', chon cuina' ľo nao', bezi' spiritw chia'na'.

Na' beyož gwne' ca' gote'.

⁴⁷ Na' cate' ble'e xan soldadon' can' goquen', benxene' Diosen' na' gwne':

—Da' ľicze benga goque' bene' gwyej to ľicha.

⁴⁸ Na' bene' zan bene' besežag besele'ede' can' goc na' yogo'lole' besyeya'aque' chesebaže' ľcho'e gosacde' da' juisyw ba goc. ⁴⁹ Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

⁵⁰ Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to ľicha. ⁵¹ Ba zoe' chbeze' batcan' solao nabia' ben' seľa' Diosen'. Bitw bene' txen len bene' ca' gosečhoglagüen' yesote' Jesúsen'. ⁵² Bena' gwyeje' lao Pilaton' jaynabe' cuerp che Jesúsen'. ⁵³ Na' beľetje'ne' le'e yag cruzen' na' btobe' le' to lache' xen na' ľa' bcuaše'te' le' to ľo' bloj da' nche'ene' le'e yej. Na' naquen to ba cobe ga nono na' yosocuaše'. ⁵⁴ Na' yogo' da' ca' goc ža cate' chososini'e che ža che Dios. Na' ba bžin hor cate' cheyala' yosocueze' bite'teze žin o mandadw da' chesone'.

⁵⁵ Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxaa cuerp che'na'. ⁵⁶ Nach gosa'aque' na' gosone' to da' chľa' zix' da' yeseyebe' cuerp che Jesúsen'. Na' ža che Diosen' gosenita'cze can' ža ley čhegaquen', bibi žin gosone'.

24

*Jesúsen' bebane' ladjo bene' guat**(Mt. 28:1-10; Mr. 16:1-8; Jn. 20:1-10)*

¹ Bal dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chl'a' zix, na' yebał no'ole ja'aclene' legaque'. ² Na' cate' besežine' na' besele'ede' ba bga'a yejen' dan' bosode'e cho'a blojen'. ³ Na' goso'e, na' bitw besyeželde' cuerp che Xancho Jesúsen'. ⁴ Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua. ⁵ Na' no'ol ca' besežebe' na' bosochaque' yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyljwle to bene' mban nga ladjo bene' guat? ⁶ Notoch no nla' nga. Ba bebane' ladjo bene' guat na' mbanče'. Le šjayza'laže' can' gwne' cate' ne' zoale Galilean'. ⁷ Gwne' le' naque' ben' gwsela' Diosen' golje' benach. Na' gwne' cheyala' gague' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

⁸ Na' no'ol ca' jasyeze'ede' xtiže'na'. ⁹ Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'. ¹⁰ Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' Juana' María xna' Jacobo, na' len yebałe no'ole. ¹¹ Na' postlw ca' bitw gosejle'e che no'ol ca', gosacde' chesenazen'.

¹² Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

*Blo'elao Jesúsen' chop bene' ca' šlac zja'aque' Emaús**(Mr. 16:12-13)*

¹³ Na' ľecze ža dmigwna' chop bene' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusaléna'. ¹⁴ Na' ľegacze' bosošalje' che yogo' da' ca' ba goquen'. ¹⁵ Ne' chesone' xbab na' ne' chesoe'te' diža' chen cate' Jesúsen' gwbigue' len legaque' na' gwza'lene' legaque' txen, ¹⁶ perw bitw gosacbe'ede' noxen' zejlen legaque'. ¹⁷ Nach gože' legaque':

—¿Bi dižan' choe'le šlac ngo'ole nezen'? ¿Bixchen' chacyaše'le?

¹⁸ Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biņa' gache'edo' da' ca' ba goc lo' ciudad'? ¡Tozo' le' zo' Jerusalén na' biņa' gache'edo'!

¹⁹ Na' Jesúsen' gože' legaque':

—¿Bi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwsela' Dios cont be'e xtižen', na' Diosen' len benachen' besyebede' yela' guac chen' dan' blo'e na' diža' dan' be'e. ²⁰ Perw na' bžoz gwnabia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz. ²¹ Ba goc šone ža na'a goc da' quinga. Na' neto' gwzoato' lež Diosen' gwsela' le' cont yebeje' nación checho lo da' malen'. ²² Na' no'ol ca' zjanac txen len neto', bałe' goso'e diža' da' chebaneto', ja'aque' cho'a ban' be'e ²³ na' bitw besyeželde' cuerp che'na'. Cate' besyela'aque' gosene' besele'eda'ogüede' angl bene' gose'e legaque' ba bebane' ladjo bene' guat ca'. ²⁴ Na' ľecze to chop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesúsen'.

²⁵ Na' gož Jesúsen' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwsela' Diosen' goso'e xtižen' cani'. ²⁶ ¿Chaquale bi cheyala' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

²⁷ Na' be'e diža' len legaque' bsd blo'ede' legaque' yogo' dan' nyoj che'na' le'e Xtiža' Diosen', gwzolaoteque' len dan' bžoj da' Moisés na' len dan' bosozoj yezica'chle bene' gwsela' Diosen' goso'e xtižen' cani'.

²⁸ Na' besežine' gała'ze yežen' gan' zja'aquen', na' Jesúsen' bene' ca' chon bene' šejch yelate' zito'ch. ²⁹ Perw bene' ca' gosone' byen yega'ane' len legaque', gose'ene':

—Yega'ančo' len neto', le ba chał na' ba nac bagwže' par šejo'.

Na' gwyo'e cont yega'anlene' legaque'. ³⁰ Na' šlac zjachi'e cho'a mesen' txen, Jesúsen' gwxi'e yetextülen' na' be'e yela' choxcen che Diosen' na' bžoxjen' bnežjuen' legaque'. ³¹ Cana'ch gosacbe'ede' le'na'. Na' šlac ne' nite' ca' con benite'. ³² Nach gose' ľežgaque':

—Łeca bebe lažda'ochon' cate' be'lene' chio' diža' chanež na' bsd blo'ede' chio' can' nyojen che' le'e Xtiža' Diosen'.

³³ Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len bene' ca' yezica'chle. ³⁴ Na' bene' šnej ca' gose'e bene' ca' za' besyežin:

—Da' licze ba beban Xanchon'. Ba blo'elagüe' Simónna'.

³⁵ Nach bene' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojxe' yetextilen' cont yesagüen'.

Jesüsen' blo'elagüe' bene' ca' zjanaque' le' txen

(Mt. 28:16-20; Mr. 16:14-18; Jn. 20:19-23)

³⁶ Ne' chesoe'te' dižan' ca', cate'cze gwzecha Jesüsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

³⁷ Perw leca besežebe' na' besyebande', gosacde' še chesele'ede' bxin che da' bene' guata'.

³⁸ Nach Jesüsen' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'? ³⁹ Le na'šc ni'a na' nga cont gacbe'ele neda'. Le can neda' cont gacbe'ele. Šaca' naca' bene' guat, bi nac žit bela' čhia' ca' dan' chle'ele nga.

⁴⁰ Beyož gwne' ca', blo'ede' legaque' ni'a ne'e ca'. ⁴¹ Na' legaque' bina' yeyož yesejle'e catec chesyebande' na' catec chesyebede'. Nach Jesüsen' gože' legaque':

—¿De late' da' gagua'?

⁴² Nach bosonežjue'ne' late' yid bel gagüe' na' late' chixe beser da' yože šina'ba'. ⁴³ Gwxi'en na' gwdagüen' laogaquen'. ⁴⁴ Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol' da' ca' bsi' Diosen' xneze zjanyoj čhia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecz ca' da' nyoj le'e Salmos ca'.

⁴⁵ Nach ben Jesüsen' cont gosejni'ide' da' ca' zjanyoj che' le'e Xtiža' Diosen'. ⁴⁶ Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. ⁴⁷ Na' le'e cheyala' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheyala' yesyetinje benachen' xtola'gaquen' cont Diosen' yezi'xene' chegaque'. ⁴⁸ Le'e cheyala' güe'le diža' che da' quinga ba ble'ele dan' ba goc čhia'. ⁴⁹ Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo' ciuda nga na'a cuezle gon Xa' Diosen' le'e yela' guac da' za' yaba.

Beyep Jesüsen' yaba

(Mr. 16:19-20)

⁵⁰ Na' Jesüsen' gwche'e legaque' ja'aque' gan' chi' yež dan' nzi' Betania na' gwliis ne'e gwñabde' Diosen' gone' cont nite' mbalaz. ⁵¹ Na' ca' beyoža' beyepe' yaban'. ⁵² Na' bene' ca' gosaque' le' txen besyega'ane' yešlož dao' gosonxene' Jesüsen' nach jaya'aque' Jerusalénna', chesyebchgüede'. ⁵³ Na' gwñita'teže' lo' yodao' blaona' chesonxene' Diosen'. Da' na'ze chzoja' na'a.

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' benach

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. ² Cate' gwxe yežlion' ba zoacze' len Diosen'. ³ Len' bene' yogo' benach, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. ⁴ Le' nse'e yela' mban. Na' ben' ba zjanape' yela' mban toli' tocañe da' none', legaquen' ba yo'o be'ni' lo' yichjlažda'ogaquen'. ⁵ Ben' nzi' Xtiža' Dios bide' nse'e be'ni' che yichjlaždao' benachen', na' la'czla' bene' zan bi gosejnilaže'ne' na' bi gwyo'o be'ni' čhen' lo' yichjlažda'ogaque', bi gosezaquede' yosocue'eje' be'ni' čhe'na'.

⁶ Gwzoa to bene' le Juan, na' Diosen' gwsele'ne'. ⁷ Juanna' ben' bzoe' bene' nis bedeye'e diža' che ben' nsa' be'nin', cont yogo' benach guac yesejnilaže'ne'. ⁸ Gague Juanna' nac bene' nsa' be'nin', san le' bedeye'e xtiža' ben' nsa' be'ni' che yichjlaždao' benachen'. ⁹ Ba bžin ža be'ni' da' nac da' dogualje ba blan' yežlio nga, na' blan' cont gwseñin' lo' yichjlaždao' note'teze bene'.

¹⁰ Ben' nzi' Xtiža' Dios zoe' yežlion' cate' gwxteten. Na' la'czla' len' bene' yežlion' ben' že' yežlion' bi gosache'ede' non' naque'. ¹¹ Golje' ladjo neto' bene' gualaž che', perw zan neto' bene' gualaž che' bi gwyejle'to' čhen'. ¹² San balteze chio' gwyejle'cho che', chio' gwyejnilaže'chone', bene' cont naccho xi'in Dios. ¹³ Na' gague lagüe goljcho nita' xaxna'cho zjanaque' bene' bela' čhen ba naccho xi'in Dios. Na' gague lagüe to bene' byo gwzoalene' to no'ole ba naccho xi'in Dios, na' gague lagüe bene' byon' goclaže' soa xi'ine' ba naccho xi'in Dios, san da' chejnilaže'chone', da'nan' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' benach na' gwzoe' len neto'. Na' ble'eto' naque' bene' zaca' juisyw, le togue' naque' dogualje Xi'in Dios. Leca nži'ilaže'de' chio' benach na' bedezejni'ide' chio' diža' li čhe Diosen'. ¹⁵ Juanna' ben' bzoe' bene' nis be'e diža' che', gwne':

—Čhe bengan' bi'a diža' cate' gwnia': "Bene' za' za' zaca'che' ca neda', le ba zoacze le' cate' bina' soa' neda'."

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'. ¹⁷ Da' Moisésen' bzejni'ide' da' xozxta'o neto' bene' Israel ley che Diosen' na' chlo'en yogo'cho napcho doła', na' Jesucriston' bedelo'ede' nži'ilaže' Diosen' chio' benach na' bedezejni'ide' chio' diža' li čhe Diosen'. ¹⁸ Nono ņa' soa bene' ba ble'ede' Diosen'. Toz ben' nac dogualje Xi'in Dios bene' tliša' ba bzejni'ide' chio' benach can' nac yichjlaždao' Diosen', le chacchgüe Diosen' le'.

Juan ben' bzoe' bene' nis be'e xtiža' Jesúsén

(Mt. 3:11-12; Mr. 1:7-8; Lc. 3:15-17)

¹⁹ Bene' chesenabi'e nación Israel četon' bene' že' Jerusalén gososele' to chope bxoz na' yebale bene' gosaljé lo diaža čhe da' Levi' cont gosenabde' Juanna' non' naque'. ²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seła' Diosen' yedenabi'e nación čhechon'.

²¹ Nach gose'ene':

—¿Nax naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' čhe cuino'?

²³ Nach Juanna' gože' legaque':

—Neda' naca' ben' čne zizje to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaías ben' be' xtiža' Diosen' cani'.

²⁴ Bene' ca' ja'ac lao Juanna', bene' fariseo ca' gosesele' legaque'. ²⁵ Nach gose'ene':

—¿Bixchen' chzo' bene' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoa' beṇe' nis, na' gachoḷ le'e ba zoa to beṇe' biṇa' gombia'le. ²⁷ Len' za' gwlo'elagüe' na' zaca'che' ca neda', na' da' nacchgüe' beṇe' zaca' bitw zaca' gona xmanda-doe' le'chja' no xe'le'.

²⁸ Yogo' da' quinga goquen gan' nzi' Betábara dan' chi' yešļa'a yegw Jordán gan' chzoa Juanna' beṇe' nis.

Jesúsen' yeque'e xtoḷa' beṇachen'

²⁹ Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le ṇa' ben' za' nga, Diosen' ba gwsele'ne' cont yeque'e xtoḷa' beṇachen'. Bena' zaca'lebe' ca xila' dao' ben' chot chio' beṇe' Israel cont Diosen' chezi'xene' xtoḷa'chon'. ³⁰ Che len' bi'a diža', gwnia': "Ben' za' za' zaca'che' ca neda', na' le' ba zoacze' cate' biṇa' soa' neda'." ³¹ Neda' bi gocbe'eda' non' naque' perw Diosen' bzejni'ide' neda', na' da'nan' zedezoa' beṇe' nis cont yogo' chio' beṇe' Israel gacbe'echo non' naque'.

³² Juanna' le'ce gwne':

—Ble'eda' cate' beṭj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'ṇen len le'. ³³ Neda' bi gocbe'eda' še Jesús nan' naque' ben' gwseḷa' Diosen', nach Dios ben' gwseḷa' neda' chzoa' beṇe' nis gože'nda': "Le'edo' yetj Spiritw chia' na' yega'ṇen len beṇe' ba mbeja'. Len' naque' beṇe' gon cont soa Spiritw chian' lo' yichjlaždao' beṇe' na' ṇabian' legaque'." ³⁴ Ba ble'eda' goc can' gwne' na' cho'a diža' le bengan' Xi'in Dios.

Beṇe' nechw ca' gwlej Jesúsen' cont gosaque' le' txen

³⁵ Beteyo Juan ben' bzoa beṇe' nis zeche' da' yoble len yechope beṇe' zjanaque' txen len le'. ³⁶ Na' cate' ble'ede' gwde Jesúsen', nach gože' beṇe' ca':

—Le ṇa' ben' gwseḷa' Diosen' ben' zaca'lebe' ca xila' dao' ben' chot chio' beṇe' Israel cont Diosen' chezi'xene' xtoḷa'chon'.

³⁷ Na' cate' beṇe' ca' chope, ben' zjanaque' txen len Juanna', gosende' can' gwnen' nach ja'aclene' Jesúsen'. ³⁸ Nach beyečhj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le?

Na' gose'ene':

—Maestrw, ¿gan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'aṇlene' le' žana', le ba nac bagwže', ca do cheda tap.

⁴⁰ Na ca nac beṇe' ca' chope' bosozenag xtiža' Juanna' na' gosa'ogüe' Jesúsen', toe' Andrés, beṇe' biše' Simón Pedro. ⁴¹ Na' Andrésen' za' gone' bichle da' za' gone' na' jeḷ güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

⁴² Nach Andrésen' gwče'e beṇe' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' beṇe' le' Cefas. (Na' Cefas zeje diža' Pedro.)

Jesúsen' gwleje' Felipe na' Natanael cont bsed blo'ede' legaque'

⁴³ Beteyo Jesúsen' gwčhoglagüen' yeyeje' Galilean' na' jane'e Filipen' na' gože'ne':

—Yo'o len neda'.

⁴⁴ Filipen' goque' beṇe' Betsaida gan' nac laž Andrésen' len Pedron'. ⁴⁵ Nach Filipen' jane'e Natanaelen' na' gože'ne':

—Bač ble'eto' ben' bzoj da' Moisésen' xtižen' le'e da' ca' gan' bzoje' ley chechon', na' le'ce xtiže'na' bosozoj beṇe' ca' goso'e xtiža' Diosen' cani'. Len' Jesús beṇe' Nazaret, ben' nac xi'in José.

⁴⁶ Nach Natanaelen' gože'ne':

—¿Bat benecho yesene' Nazaret na' choj beṇe' zaca'?

Nach gož Filipen' le':

—Yo'o cont le'edo'.

⁴⁷ Na' Jesúsen' ble'ede' bač zej Natanaelen' gan' zoe'na' nach gwne':

—Na' za' to beṇe' Israel gualaž chechon' beṇe' naque' beṇe' güen. Ne late'ze bi naque' bene' gwxiye'.

⁴⁸ Natanaelen' bende' xtiža' Jesúsen' na' gože'ne':

—¿Nac chac nombi'o neda'?

Na' Jesúsen' gože'ne':

—Ble'eda' le' šlac zechao' xan yag yixgüigw cate' za' ṇe Filipen' le'.

⁴⁹ Nach Natanael' gwne':

—Maestrw, len' naco' dogualje Xi'in Dios. Len' naco' ben' chbezto' seła' Diosen' yedenabi'o nación Israel chechon'.

⁵⁰ Na' Jesúsen' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. ⁵¹ Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwsela' Dios golja' benach.

2

Gota' to yela' güešagna' yež da' nzi' Caná

¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeye' liž ben' gan' gota' yela' güešagna'na'. ² Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'. ³ Na' bebiž vino dan' chese'ej bene' ca' že'na', na' xna' Jesúsen' gože' le':

—Bich bi vino chegaque' de.

⁴ Na' gož Jesúsen' le':

—¿Bixchen' žo' ca'? le' biña' žin hor gwlo'a non' naca'.

⁵ Na' xne'ena' gože' bene' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosočin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis. ⁷ Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten. ⁸ Nach gože' legaque':

—Le gaše' laten' na'a na' le šjanežjon ben' yo'o lo ne'e lñin'.

Na' gosone' can' gwnen'. ⁹ Na' ben' yo'o lo ne'e lñin' con bñixen' bi nežde' gan' zan', con bene' ca' cheson mandadw na' ze gosenezde' nisen' beyaquen vino, le legaquen' gosaše' nisen'. Na' bena' bñixen' na' goxe' bene' byo ben' bšagnan', ¹⁰ na' gože'ne':

—Yogo'ze bene' chon lñi chdie' vino güen da' chzaca' la'ay cate' chzolao lñin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lñin'.

¹¹ Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

¹² Gwde na' Jesúsen' gwyeye' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

Jesúsen' bebeje' bene' cheson ya'a chyo'o yodao' blao

(Mt. 21:12-13; Mr. 11:15-18; Lc. 19:45-46)

¹³ Na' ba zoa gala' lñi che neto' bene' Israel da' nzi' pascw, nach Jesúsen' gwyeye' Jerusalén len bene' ca' zjanaque' le' txen. ¹⁴ Cate' bžime' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. ¹⁵ Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chyo'o yodaon', len xila' ca', len go'n ca', na' beslase' xmechw bene' chosoša' mechon' na' gwlo'onj'ane'e xmesgaquen'. ¹⁶ Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chičhgua yichja' che ližon' chonten ga saca'zi'chgua."

¹⁸ Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

¹⁹ Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, žchacdo' guac yeyonan' šone žaze?

²¹ Perw Jesúsen' bsaca'lebde' cuerp chwen yodao' cate' gwne' ca', na' legaque' gosone' xbab che yodao' na'zen' gwne' ca'. ²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' nežde' bin' yo'o lo' yichjlaždao' benachen'

²³ Šlac gwzoa Jesúsen' Jerusalénna' lo lñi pascon' bene' zan besele'ede' yela' guac ca' dan' benen' na' gosejle'e naque' bene' gwsela' Dios. ²⁴ Perw Jesúsen' bi ben cuine' lo na'gaque', le

nombi'e yichjlaždao' beṇachen'. ²⁵ Bi byažjde' no ye' le' xbab da' yo'o lo' yichjlaždao' bene' ca'. Le nezcезде' bin' yo'o lo' yichjlaždao' to to chio' beṇach.

3

Jesúsen' len Nicodemo

¹ Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'. ² Gwyeye' lao Jesúsen' šeže' le' na' gože'ne':

—Maestrw, nezetu' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

³ Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. ⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli' tocaṇe che bene' chesejnilaže' Diosen'. Da'nan' žacho chesalje' yeto. ⁷ Bi yebando' dan' gwnia' chonen byen yogo' bene' galje' yeto. ⁸ Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ži bi chejni'ido' da' quinga?

¹¹ Da' li neto' chyixjue'eto' da' nezetu' na' choe'to' diža' che da' ba ble'eto' na' bi chejle'le. ¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ Toze neda' naca' ben' gwseła' Diosen' golja' beṇach za'a yaba na' noch no zoa no ba beyep yaba cont nezde' che Diosen'. ¹⁴ Na' can' goc latje daš can' cate' gwlis da' Moisésen' beł de bronze bde'eba' to le'e yag, can' cheyala' gac yeselise' neda' to le'e yag, neda' gwseła' Diosen' golja' beṇach. ¹⁵ Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli' tocaṇe.

Chaque Diosen' beṇachen'

¹⁶ Leca chaque Diosen' chio' beṇach, na' gwseła' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli' tocaṇe. ¹⁷ Na' Diosen' gwsele' Xi'inen' yežlio nga gague cont gwnežjue' castigw che xtoła' beṇachen', san cont gwnežjue' yela' mban chegaque' toli' tocaṇe.

¹⁸ Note'tez bene' chesejnilaže' Xi'in Diosen' bene' tlišan', bi yesezi'e castigw che xtoła'gaquen', perw bene' bi chesejnilaže'ne' ba nchoglaon chegaque' yesezaca'zi'e toli' tocaṇe da' bi chesejnilaže' Xi'in Dios bene' tlišan'. ¹⁹ Na' can' naquen, bene' bi chesejnilaže' Xi'in Diosen' ba nchoglaon chegaque' yesezaca'zi'e toli' tocaṇe. Nchoglaon yesezaca'zi'e, le ba bid Xi'in Diosen' nse'e be'ni' che yichjlaždao' beṇachen' perw na' chesyebchde' dan' nac choł clcl ca be'ni' chen', dan' chesone' da' malen'. ²⁰ Yogo' bene' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal. ²¹ San note'tez bene' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

Juan ben' bzoa bene' nis be'che' diža' che Jesúsen'

²² Gwde na' Jesúsen' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' bene' nis. ²³ Na' Juanna' lecze bzoe' bene' nis yež gan' nzi' Enón da' chi' gala'ze Salim, le na' dechgua nis. Na' ja'ac bene' gan' gwzoe'n' cont bzoe' legaque' nis. ²⁴ Caten' bina' yeseyixjue' Juanna' ližyan' goc ca'.

²⁵ Nach gwche' to žaš len bene' ca' zjanaque' txen len Juanna' na' yeto chope bene' Israel gualaž cheto' che dan' chesezoa bene' nis. ²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bach chzoe' bene' nis na' yogo'ze bene' chja'aque' gan' zoe'na'.

²⁷ Nach Juanna' gože' legaque':

—Nono gacxene' še bi gon Diosen' cont yesonxen bene' le'. ²⁸ Nezczele can' ba gwnian', bi naca' Cristo ben' chbezcho seła' Diosen' yedenabi'e chio', san naca' ben' gwseła' Diosen' cont

bia' xtižen' žialaole. ²⁹ Cate' chac to yela' güešagna', toz bene' byo ben' chšagnan' chzi'e no' olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'. ³⁰ Len' cheyała' šejch yesonxen bene' le' na' neda' cheyała' šejch yesanlaže' neda'.

Bene' za' gan' zoa Diosen'

³¹ Ca nac Cristo ben' za' gan' zoa Diosen', le' naque' bene' zaca'ch ca yogo'lol bene'. Yezica'chle bena'ch zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'. ³² Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. ³³ Na' note'tez bene' chosozenag xtiža' ben' za' gan' zoa Diosen', nachbia' bena' nezde' Diosen' cho'e diža' li. ³⁴ Na' bena' gwseła' Diosen', bena' za' gan' zoe'na', len' cho'e xtiža' Diosen', le' Spiritw che Diosen' zoan len le', na' cate' Diosen' chone' Spiritw chen' bi chyisen' late' güeje. ³⁵ Diosen' chacde' Xi'ine' Criston' na' ba bene' lo ne'e yogo'lol da' de yežlion'. ³⁶ Na' bene' ca' chesejnilaže' Xi'in Diosen' de yela' mban čhegaque' toli tocañe, san bene' cheson güedenag len Xi'in Diosen', bi gata' yela' mban čhegaque', le Diosen' gone' cont yesezaca'zi'e toli tocañe.

4

Jesúsen' be'e diža' len to no'ole Samaria

¹⁻³ Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwnežde' bene' fariseo ca' gosacbe'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

⁴ Na' benen byen žajya'aque' nez da' chde Samarian'. ⁵ Ca' goquen' besežine' to yež da' nzi' Sicar lo distritw Samarian'. Yežen' čhega'anen gała'ze gan' de yežlio dan' bnežiw da' Jacob da' xi'ine' José. ⁶⁻⁸ Na' žia to bej da' nacchgua sitjw da' nzi' Bej che da' Jacob. Ca do guagwbiz Jesúsen' ba chja'xaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Ben late' nis ye'eja'.

⁹ Na' no'ole Samarian' boži'en gože'ne':

—ŽNacxechen' le' naco' bene' Israel chnabdo' neda' nis ye'ejo'? le no'ole Samaria neda'.

(Na' ca nac bene' Israel gualaž čheto' ca', bi cheseñe lježe' len bene' Samaria ca'.) ¹⁰ Nach Jesúsen' gože'ne':

—Neda' ba goša' le': “Ben late' nis ye'eja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwñabdon' neda' na' ba beña' le' nis da' choñ yela' mban toli tocañe šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ŽGaxe si'o nis da' choñ yela' mbanna' žo' ca'? ¹² ŽChacdo' zaca'cho' ca da' xozxta'ochó Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble. ¹⁴ Na' note'tez bene' ye'ej nisen' gwnežjua'ne' neda', gwbatech bilden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocañe.

¹⁵ Na' no'olen' gože'ne':

—Bene', ben neda' nisen' žo' ca' cont bich bil'dan' na' bich yida' dexian' nga.

¹⁶ Jesúsen' gože'ne':

—Beyej jel' güiž bene' čhio' na' le da nga.

¹⁷ Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' čhio' zoa, ¹⁸ le gayo' bene' čhio' ba gwñita' na' bene' zoaleno' na'a gague naque' bene' čhio'. Da' li can' ba gwnaon'.

¹⁹ Na' gož no'olen' le':

—Bene', chacbe'eda' naco' to bene' chac chyixjue'ede' bi da' ža Diosen'. ²⁰ Da' xozxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalenna' cheyała' gonxenchone'.

²¹ Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalenna'. ²² Le'e nacle bene' Samaria bi nombia'yane'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'. ²³ Chžin ža na' na'a ba gole', cate' bene' yesonxene' Xacho Diosen' can' cheya'la' cze yesonxene' le', gate' tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyljue' bene' yesonxene' le' ca'. ²⁴ Diosen' bi naque' bene' bela' chen, naque' spiritw. Da'nan' bene' yesonxen le', lo' yichjlažda'ogaque' cheya'la' yesonxene' bene' nac dogualje Dios.

²⁵ Nach no'olen' gože'ne':

—Nežda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

²⁶ Nach Jesúsen' gože' no'olen':

—Neda' choe'lena' le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'. ²⁸ Nach no'olen' bocua'añ che'e nis chen' na' beyeje' lo yežen' jayeže' bene' gualaž che' ca':

²⁹ —Le šo'o le na' to bene' ba gože' neda' yogo'te da' ba bena'. ¿še bengan' Cristo ben' chbezcho yedenabi'e?

³⁰ Na' besežaše' yežen' ja'aque' gan' chi' Jesúsen'. ³¹ Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

³² Na' Jesúsen' gože' legaque':

—Bi nezele de to yela' guagw chia'.

³³ Na' gose' lježe':

—¿Gague ba bedesesan bene' da' gwdagüe'?

³⁴ Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwsela' neda' cont gac yogo' da' chnalaže'. ³⁵ Le'e žale: "Ne' dech yetap bio' cont yedobe cosešen'." Na' neda' chnia', le na' na' le'ele to coseš da' chyažje yedob na'a. ³⁶ De da' goncho na'a cont bene' yosozenague' che Diosen' na' gata' yela' mban chogaque' toli tocan. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz. ³⁷ Diža' nga naquen da' li, žan: "Bene' yoble chaz na' bene' yoble chelap." ³⁸ Bač chsela' le'e šjajlaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

³⁹ Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': "Ba gože' neda' yogo' da' ba bena'." ⁴⁰ Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža. ⁴¹ Na' bene' zanch gosejnilaže' Jesúsen' cate' gosende' diža' da' be' cuine'. ⁴² Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

Jesúsen' beyone' xi'in to bene' gwnabia'

⁴³ Na' cate' goc chop ža, Jesúsen' len bene' ca' zjanaque' le' txen gosa'aque' jaya'aque' Galilea. ⁴⁴ Le cuin Jesúsen' ba gwne' note'teze bene' cho'e xtiža' Diosen', bi chesonla'añcze bene' gualaž chen' le'. ⁴⁵ Na' cate' besežine' Galilean' bene' gualaž chegaquen' bosolebe' Jesúsen' dan' ba besele'ede' yogo' da' güen da' bene' Jerusalenna' lo ĩnin', le lencze legaque' ja'aque' ĩnina'.

⁴⁶ Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoo to bene' gwnabia' bene' chon žin che rey, na' chacšenchgüe xi'ine'. ⁴⁷ Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' le' šeje' šjayene' xi'inen', le ba zoa gatbe'. ⁴⁸ Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

⁴⁹ Nach ben' chon žin che reyen' gota'yoede' le' gwne':

—Bene', yo'ošca šlac bina' gat bi' chian'.

⁵⁰ Na' Jesúsen' gože'ne':

—Beyej ližo', bi gat bi' chion'.

Nach gwyejle' bena' dan' gož Jesúsen' le' na' beze'e. ⁵¹ Ba zoa yežine' cate' jasešag xmore' ca' le' na' gose'ene':

—Ba beyac bi' chion'.

⁵² Na' gwñabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

⁵³ Na' xaben' goche'ede' ca hor na'czen' gož Jesúsen' le' bi gat bi' chen'. Nach gweyjnilaže' Jesúsen', le' len yogo' bene' že' ližen'.

⁵⁴ Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

5

Jesúsen' beyone' to bene' nat late' cuerp che'

¹ Na' gwde to tiemp bžin ža goc yeto lni' che neto' bene' Israel Jerusalénna', na' Jesúsen' gweyje'. ² Jerusalénna' gała'ze cho'a puert che ze'e da' nyechj ciudan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. ³ Na' bene' zan bene' güe' zjadie' chalšil ca', no bene' lchol, no bene' nxinj ni'e, no bene' natsi' late' güeje cuerp čegaquen'. Zjadie' chesebeze' batcan' ta nisen'. ⁴ Le' tgüeje betj to angl' na' bte' nisen', na' bene' nechw bene' cho'e lo' nisen' cheyož čhta anglen' len, cheyacde' bite'tez yižgüe' che'ede'. ⁵ Na' cate' bžin Jesúsen' na' de to bene' ba goc šino'šonechoa iz chacšende'.

⁶ Na' Jesúsen' ble'ede' bene' na' goche'ede' ba chac šša de' ca', na' gože'ne':

—¿Chaclažo' yeyaco'?

⁷ Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' chetje' lo' nisen':

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte' bena' na' botob xte'en na' gwzolao chde'. Perw na' goquen to ža čhe Dios cate' bi de lšens gon neto' bene' Israel žin. ¹⁰ Nach bene' gwnabia' čhe neto' bene' Israel gose'e bena' beyaquen':

—Ža čhe Dios na'a. Bi de lšens yeyoa' xta'ona'.

¹¹ Na' gož ben' legaque':

—Bena' beyon neda' gože'nda': "Botobe xtaon' na' gwda."

¹² Nach gose'ene':

—¿Non' gož le': "Botobe xtaon' na' gwda"?

¹³ Na' ben' beyaquen' bi gwneзде' non' beyon le', le' Jesúsen' benite' ladjo bene' zan ca'. ¹⁴ Gwdechle' Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejijčhjo' da' malen' bich gonon', cont bi gac čhio' to da' malech.

¹⁵ Nach beza' bena' jatixjue'ede' bene' gwnabia' čhe nació Israel čheton' gože' legaque' Jesúsen' ben' beyon le'. ¹⁶ Da'nan' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža čhe Dios cate' bi de lšens gon neto' bene' Israel žin. ¹⁷ Na' Jesúsen' gože' legaque':

—Xan' zoacze' chelałde' bate'teze na' lecze ca' neda'.

¹⁸ Da'nan' goseyiljwlaže'che' nacle yesone' yesote' Jesúsen', perw gague neche bi chone' can' ža ley gan' chgualan' che ža čhe Dios na'zen', san lecze da' gwne' Diosen' naque' Xe', le' zejen toz ca zaque' len Diosen'.

Yela' chnabia' da' nape Xi'in Diosen'

¹⁹ Na' gož Jesúsen' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. ²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele. ²¹ Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban čhe note'tez bene' chbeja' cont gata' yela' mban čegaque'. ²² Na' Xan' bi chčhoglagüe' čhe ne to bene' še nape' doła', san ba gwlo'e lo' na' choglagua' čhe yogo' benač še non' nap doła'. ²³ Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le' le'na' gwsele' neda'.

²⁴ Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban čegaque' toli' tocaņe. Na' bi yesezaca'zi'e toli' tocaņe da' bi chesejnilaže'ne'. Bich zjanaque' ca' bene' guat len yichjlažda'ogaquen' da' bi chosozenague' čhe Diosen', san ba bocobe' yichjlažda'ogaquen' neche ba chesejnilaže'ne'. ²⁵ Chnia' le'e to da' zejen, gwžin ža cate' bene' zjanac ca' bene' guat len yichjlažda'ogaque' yesende' xtižda' neda' naca' Xi'in Dios, na' bene' yosozenag čhia' gata' yela' mban čegaque' toli' tocaņe, na' bač chzolao chac ca' na'a. ²⁶ Xa' Diosen' zoacze' toli' tocaņe na' chone' cont zjamban benačen', na' lecze ba bene' cont neda' naca' Xi'ine' zoa' toli' tocaņe na' chona' cont zjamban bene'. ²⁷ Na' lecze ba bene' neda' yela' chnabia' cont nia' non' nap doła', le ba gwsele' neda' golja'

benach. ²⁸ Bi yebanele dan' chnia' nga, le gwžin ža cate' yogo' loł bene' guat že' lo' ba yesende' cate' yol' güiža' ne'. ²⁹ Na' bene' ca' goson da' güen šlac gosebane' yesyechoje' na' yesebane' toli tocane. Na' bene' ca' goson da' mal šlac gosebane' yesyechoje' na' yesezaca' z'ie toli tocane.

Jesúsen' bzejni' ide' nape' yela' chnabia'

³⁰ 'Bibi gac gona' to gualaza'. Chzenaga' bir' ža Xan' cont nia' che benachen' noe' nap doła'. Na' dan' nia' gac che to to bene' naquen da' cheyala' gac, le bi chi' yichja' gac dan' chnalaža'; san chi' yichja' gac can' chnalaže' Xan' ben' gwseła' neda'. ³¹ Šaca' toz neda' chgua'a da' bałi non' naca', bi naquen to da' šejle' le. ³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle' le. ³³ Bach gwseła' le bene' lao Juanna' cont jasenabde' le' nac nac chia', na' Juanna' be'e diža' li non' naca'. ³⁴ Perw neda' bi chyažjda' diža' da' güe' ne to benach chia'. San chnia' da' quinga cont le'e šejle' le chia' na' gata' yela' mban chele toli tocane. ³⁵ Juanna' goque' ca to yi' da' chseni' chgua dan' bzejni' ide' le'e che Diosen', na' šlož daon' bebele dan' bsed blo' eden'. ³⁶ Na' de to da' choe' xtiža' da' zaca' ch ca diža' da' choe' Juanna' chia': chona' yogolol da' ba gwlo'o Xan' lo na' gona', na' da' ca' chonan' choen' diža' le Xan' gwseła' neda'. ³⁷ Nach Xan' ben' gwseła' neda' lecze cho'e xtižan', la' cžła' biña' yenele can' chnen' na' biña' le'e le can' naquen'. ³⁸ Xtižen' bina' šon' lo' yichjlažda' olen', le'e chejnilaže' le neda' naca' ben' gwsele'. ³⁹ Chsedyañe' le gan' nyoj Xtiža' Diosen', le chaquele gapple yela' mban toli tocane neche chsedlen. Na' da' ca' chsedlen' zjanyojen chesoñ' xtiža'. ⁴⁰ Perw bi chaclaže' le šejnilaže' le neda' cont gata' yela' mban chele toli tocane.

⁴¹ Na' neda' bi chyažjda' yesena benachen' naca' bene' zaca'. ⁴² Nombi'a le'e na' nezda' bi chaquele Diosen'. ⁴³ Xan' ba gwsele' neda' chona' con da' že', perw bi chejle' le chia'. Na' cate' za' ac bene' cheson con bi da' ža xbab chegacze', nachle chejle' le chegaque'. ⁴⁴ Žnacxe gac šejle' le chia'? le chzelaže' le yesena bene' chonle güen, na' bi chzelaže' le gonle cont toz Diosen' ne' chonle güen. ⁴⁵ Bi gonle xbab neda' gwcuiša' le'e lao Xan'. Da' Moisésen' chcuiše' le'e lagüen', le chsedchuale dan' bzojen' chaquele cont soale binlo len Diosen', perw bi chejle' le xtižen'. ⁴⁶ Šaca' chejle' le xtiža' da' Moisésen', chia' neda' czen' chejle' le še ca', le xtiža' nedan' bzoje'. ⁴⁷ Na' da' bi chejle' le dan' bzoj da' Moisésen', žnacxe gonle šejle' le bi dan' žia' le'e?

6

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

¹ Gozde goc ca' Jesúsen' gwyeje' yešla' a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. ² Na' bene' zan zjanao' Jesúsen' da' ba besele' ede' yela' guac dan' chonen' cheyone' bene' güe' ca'. ³ Na' gwloze Jesúsen' to lo ya len bene' ca' zjanaque' le' txen na' gosebi'e. ⁴ Na' da' yoble ba zoa gala' lni che neto' bene' Israel da' nzi pascw. ⁵ Na' cate' gwña' Jesúsen' ble' ede' bene' zan ba zjanao' le' na' gože' Felipen':

— žGaxe si' cho da' yesagw yogo' bene' quinga?

⁶ Gwne' ca' yešque bi na Felipen', le Jesúsen' nezeczede' naquen' gone'. ⁷ Na' Felipen' gože' ne': — Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

⁹ — Nga zoa to bi' byo dao' na' de gayo' yetextil de cebada chebe' na' yechope beł ya'a. Perw žbi de gon da' quinga? le bene' zanna' že' nga.

¹⁰ Nach Jesúsen' gože' bene' ca' zjanaque' le' txen:

— Le ye' yogo' lole' yesebi'e.

Dechgua yixye latjen' na' gosebe' bene' ca' lo yixyena', ca do gayo' mil bene' byo, bi cuent no' ole len bidao'. ¹¹ Nach gwxi' Jesúsen' yetextil ca', na' beyož be'e yela' choxclen che Diosen' bnežuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len beł ya' a ca'. Na' goso' e to toe' con ca' te' te' gosaclaže' gosagüe'. ¹² Na' beyož gosagüe' ca' te' te' goseljde', Jesúsen' gože' bene' ca' zjanaque' le' txen:

— Le yotobe da' ca' bega' aň late' güeje cont bibi cuiayi'.

¹³ Nach bosyotobe' da' bixjw ca' dan' besyega' aň lao gayo' yetextil ca' de cebad, na' goquen šižinw žome. ¹⁴ Cate' bene' ca' besele' ede' yela' guac dan' benen' nach gosene':

— Da' li bengan' choe' xtiža' Dios na' naque' ben' ba gwlezcho sela' Diosen' yežlio nga.

¹⁵ Na' cate' Jesúsen' gocbe' ede' ba zoa yeseche' exoxje' le' cont yesone' le' rey chegaque', nach gozže' e gozeje' ya' adaon' toze'.

Jesúsen' gwze' e lo nisdaoñ'

(Mt. 14:22-27; Mr. 6:45-52)

¹⁶ Cate' ba gwxiñ, bene' ca' zjanaque' Jesúsen' txen jaya' aque' cho' a nisdaoñ'. ¹⁷ Na' besyeyo' e to lo' barcw zjaya' aque' ciuda Capernaum. Ba goł na' Jesúsen' biña' yežine'.

18 Na' chas chata' chac nisdakon' le chechjchgua be'. 19 Ba goc sša zjaya'aque' len barcon' lo nisdakon' cate' besele'ede' ba zjajda Jesúsen' cheze'e lo nisen' gála'ze gan' zej barcon'. Na' besežebe'. 20 Na' gože' legaque':

—Nedan', bi žeble.

21 Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdakon' gan' zjaya'aqueen'.

Beñe' zan chesyeyiljue' Jesúsen'

22 Na' beteyo beñe' zan beñe' ca' besyega'an yešla'a cho'a nisdakon' gosache'ede' nono Jesúsen' nla' na' gosache'ede' bibi barcw yoble gota'ch san toga dan' besyeyo'o beñe' ca' zjanaque' Jesúsen' txen, na' zjanezde' Jesúsen' bi beyo'e len legaque' lo' barcon'. 23 Nach besežin barcw da' za'ac ciuda Tiberias gála'ze gan' gosagüe' yetextilen' caten' beyož be' Xancho Jesúsen' yela' choxclen che Diosen'. 24 Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yela' guagw da' chnežjon bene' yela' mban toli tocañe

25 Na' cate' beñe' zan ca' besyeželde' Jesúsen' yešla'ale nisdakon' nach gose'e le':

—Maestrw, žbatca' bla'o nga?

26 Na' Jesúsen' gože' legaque':

—Chnia' le'e to da' zejen, cheyiljwle neda' neče dan' gwdagwle ca beljele na'zen', gague neče chejle'le chia' lagüe ba ble'ele yela' guac ca' ba benan'. 27 Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' gon' yela' mban chele toli tocañe. Diosen' gwsele' neda' golja' benač na' neda' gona' to da' ye'ej gagwle cont gata' yela' mban chele toli tocañe. Na' Xa' Diosen' ba blo'e naca' ben' ba gwsele'.

28 Na' gose'ene':

—žBi cheyala' gonto', cont yebe Diosen' neto'?

29 Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsejen'.

30 Na' gose'e Jesúsen':

—žBi yela' guac gono' še ca' cont le'eto' na' šejnilaže'to' le'? žBi gono'? 31 Da' xoxxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' čegaquen', žan: "Yela' guagw da' za' yaban' be'e legaque' gosagüe'."

32-33 Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xoxxta'ocho ca' yela' guagon', san Xa' Diosen' bnežjuen' legaque'. Na' bi nacho lena' zan' yaba gan' zoe'na', san de to yela' guagw da' ba gwsele' Diosen' na'a da' za' yaban' na' betjen yežlion', na' chnežjon yela' mban che note'teze beñe' chesagw len.

34 Nach beñe' ca' gose'e le':

—Beñe', beňšca neto' yela' guagon' žo' ca' gagwton' yogo' ža.

35 Nach Jesúsen' gože' legaque':

—Neda' naca' yela' guagw da' chnežjon beñe' yela' mban toli tocañe. Note'teze beñe' yosozenag chia' na' yesejnilaže' neda', guata' da' chyažje yichjlažda'ogaque' toli tocañe. 36 Na' ba gwnicza' le'e, la'czla' ba ble'ele neda' bi chejnilaže'le neda'. 37 Yogo' beñe' chbej Xan' cont yesaque' neda' txen, chžin ža chesejnilaže' neda'. Na' note'teze beñe' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. 38 Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsele' neda'. 39 Len' chaclaže' bi gua'a latje cuiayi' ne toze beñe' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo beñe' guat še ba gosate'. 40 Xan' chaclaže' yogo'lol beñe' yesejni'ide' non' naca' na' yesejnilaže' neda' cont gwnežjue' legaque' yela' mban toli tocañe, na' neda' yosbana' legaque' ladjo beñe' guaten' še ba gosate' cate' žin ža te che yežlion'.

41 Na' zan beñe' Israel gualaž četo' legacze' besežeše' che dan' gwna Jesúsen': "Neda' naca' yela' guagw da' za' yaba." 42 Gosene':

—žGague bengan' Jesúsi' in José? Nombia'cho xaxna' benga. žBi dižan' cho'e že' ze'e yaba betje' yežlio?

43 Nach Jesúsen' gože' legaque':

—Bich žešele chia'. 44 Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. 45 Le'e gan' bosozoj beñe' ca' goseyixjue'ede' xtiža' Diosen' can' žan: "Yogüe' Diosen' gwswd gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

46 'Bi nacho zoa beñe' ba ble'ede' Xan'. Toza' neda' ba ble'eda'ne', le za'a gan' zoen'.

47 Chnia' le'e to da' zejen, beñe' chesejnilaže' neda', de yela' mban čegaque' toli tocañe.

48 Neda' naca' yela' guagw da' chnežjon yela' mban toli tocanē che benachen'. 49 Da' xozxta' ocho ca' gosagüe' yela' guagw da' nzi' maná ślac gosenite' latje dašen', na' bia'cze gosat yogüe'. 50 Neda' cho'a diža' che to yela' guagw da' za' yaban' na' bene' chagw len bi gate'. 51 Neda' naca' yela' guagw dan' za' yaban' dan' nsa' yela' mban toli tocanē. Bene' šejnilaže' neda', bane' toli tocanē. Na' yela' guagw da' chnežjua' cont gata' yela' mban che benachen' naquen cuerp chia'.

52 Nach bene' Israel gualaž čheto' ca' legacze' besežeše', gosene' che':

—¿Nacxe gone' gone' cuerp čhen' gagwchon?

53 Jesúsen' gože' legaque':

—Chnia' le'e to da' zejen, Diosen' gwsele' neda' golja' benač, na' še bi chagwle cuerp čhian' na' še bi che'ejle xčhenan', bi de yela' mban chele toli tocanē. 54 Bene' chesagw cuerp čhian' na' chese'eje' xčhenan' de yela' mban čegaque' toli tocanē, na' še ba gosate', cate' te che yežlion' yosbana' legaque' ladjo bene' guat ca'. 55 Le cuerp čhian' naquen dogualje yela' guagw, na' xčhenan' naquen dogualje da' ye'ejle. 56 Bene' ca' chesagw cuerp čhia' na' chese'eje' xčhenan' de yela' mban čegaque' toli tocanē, na' zjanaque' txen len neda' na' neda' naca' txen len legaque'. 57 Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp čhian', yesenite' toli tocanē dan' zjanaque' txen len neda'. 58 Cuerp čhian' naquen yela' guagw da' za' yaba. Na' len bi naquen ca' da' gosagw da' xozxta' ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocanē.

59 Jesúsen' bšed blo'ede' da' ca' lo' yodao' che bene' Israel gualaž čheto' ca' da' zoa Capernaum.

Xtiža' Jesúsen' chnežjon yela' mban toli tocanē che bene' chosozenag čhen

60 Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

61 Gočbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže' le can' ba gwnian'? 62 ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwseła' Diosen' golja' benač. 63 Spiritw čhian' chnežjon benachen' yela' mban, na' cuerp čhian' bi gac gonē ca'. Diža' dan' bač bia' len le'e zjazacan' len yichjlažda'olen' cont banle toli tocanē še šejle'le čhen. 64 Perw ne' nita' balle bi chejle'le.

Jesúsen' gwne' ca' le gočbe'ede' cate' gosezolao bene' ca' gosedalene' le' noe' bi chesejle'e čhe' na' na' gwdie'ne' lo na' bene' ca' chesegue'ede' le'. 65 Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

66 Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. 67 Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle?

68 Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' čhen. 69 Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocanē.

70 Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

71 Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo na' bene' ca' chesegue'e le', na' Judasen' naque' to bene' šižinw ca'.

7

Bene' biše' Jesúsen' bi gosejnilaže' le'

1 Gwde na' Jesúsen' gwđacze' bšed blo'ede' ben' že' distritw Galilean'. Bich gocláže' šejche' Judean', le bene' gwnabia' che nación Israel čheton' že' na' cheseyiljue' nacle yesone' yesote'ne'. 2 Na' ba zoa gala' lni' che neto' bene' Israel da' nzi' lni' che Ranšw Yix. 3 Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag čhio' yesele'ede' yela' guac dan' chonon'. 4 Note'teže bene' še chaclaže' yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

5 Bene' biše' Jesúsen' gose'ene' ca', le ne' legaque' bi gosejnilaže'ne'. 6 Nach gož Jesúsen' legaque':

—Biņa' žin ža ša'a, san le'e guac šja'acle bate'teže. 7 Bene' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj. 8 Le šja'ac lnin'. Neda' bi sa'a ŋa'a, le biņa' žin ža čhia'.

⁹ Beyoż gože' legaque' ca' bega'ane' Galilean' yeto čhop ža.

Jesúsen' gwyeye' Jerusalén gan' yo' o ĩnin'

¹⁰ Nach gwde gosa'ac bene' biše' ca' zja'aque' ĩnin' gwza' Jesúsen' len bene' ca' zjanaque' le' txeñ zja'aque' ĩnin', perw bi ja'aque' can' nla'ze san bagaše'ze. ¹¹ Na' bene' gwnabia' che nación Israel čheton' že' Jerusalénna' besyeyiljue' le' lo ĩnin', chesene':

—¿Ganxe bena'?

¹² Na' bene' ca' zjandop zjanžag lo ĩnin' šižize goso'e diža' che Jesúsen', na' gague toze ca gosene'. Bale' gosene': "Naque' bene' güen", na' bale' gosene': "Bi naque', chonlede' bene'."

¹³ Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesacbe'ede' cheso'e diža' güen che Jesúsen'.

¹⁴ Na' do gašje zej ĩnin' cate' gwyej Jesúsen' gan' zoa yodao' blao che neto' bene' Israel na' gwzolač chsed chlo'ede'. ¹⁵ Na' besyebane bene' gwnabia' ca', gosene':

—¿Nacxečen' da' zan neze benga? le gague bi nseden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab čecza', san naquen xbab che bene' gwseła' neda'. ¹⁷ Note'tez bene' chesaclaže' yesone' can' chazlaže' Dios ben' gwseła' nedan', guacbe'ede' še dan' chsed chlo'edan' zan' che Dios o še naquen da' chaljlaže'za'. ¹⁸ Cate' to bene' chsed chlo'ede' xbab čecze', cheyljue' nacle gone' cont gacxene'. San cate' to bene' chaclaže' gacxen bene' gwseła' le', nezecho xtižen' naquen da' li na' bi chziye'e.

¹⁹ 'Da' Moisésen' bene' le'e ley dan' nseden' perw ne tole bi chonle can' žanna'. ¿Bixčen' cheyljwle nacle gonle gotlenda'?

²⁰ Bene' ca' že'na' gose'ene':

—Yo' o da' xigüen', nan' čol čhnešo'. ¿No chaclaže' got le'?

²¹ Jesúsen' gože' legaque':

—Toz yela' guac da' bena' ža che Dios cate' bi de ĩsens gon čio' bene' Israel žin, na' yogo'le chebale. ²² Da' Moisésen' bene' mandadw soacho señw dan' že' circuncisión (la'czla' bi gwzolač señon' len le' san len da' xozxta'ocho ca' bene' gwnita' cani'te), na' da'nan' čhozale bi' byo dao' ca' señwna' ža che Dios. ²³ Can' naquen, la'czla' še naquen ža che Dios, čhozale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixčen' čha'ale neda' dan' ba beyona' to bene' güe' ža che Diosen'? ²⁴ Bi cheyala' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gacbe'ele non' cheyala' yosbaga'le.

Jesúsen' gwne' ze'e gan' zoa Diosen'

²⁵ Nach to čhope bene' Jerusalén ca' gosene':

—¿Gague benga ben' chesyeyiljue' cont yesote'ne'? ²⁶ Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' čecho xbab le naque' Cristo ben' chbezcho yedenabia'? ²⁷ Perw nezecho ga bene' benga, na' cate' yid Criston' nono yeseneze ga bene' le'.

²⁸ Jesúsen' chsed chlo'ede' chalšil che yodao' blao cate' gosene' ca'. Nach gwne' ziže gože' legaque':

—Chaquale nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'le'. ²⁹ Neda' nombi'ane', le za'a gan' zoen' na' le' gwsele' neda'.

³⁰ Na' da' gwne' ca' bal' bene' gosaclaže' chgüe' yesezene' le', perw nono gwzen le' da' bina' žin ža gague' lo na'gaquen'. ³¹ Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' che Jesúsen'. Da' nan' bosoxi'e len bene' ca' zjanac bžoz gwnabia' che nación Israel čheton' na' gosesele' bene' chesape' yodao' blaon' cont šjasexene' Jesúsen'. ³³ Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseła' neda'. ³⁴ Na' yeyiljwle neda' na' bi yezelele neda', le gan' soan' bi gac yidle.

³⁵ Nach bene' gwnabia' che nación Israel čheton' gose' lježe':

—¿Gan' chacde' yeyeje' ga bi yezelechone'? ¿Yeyeje' gan' zjanaslas bene' gualaž čecho ladjo bene' griego ca' na' gwsed gwlo'ede' legaque'? ³⁶ ¿Bi zejen dan' gwnen': "Yeyiljwle neda' na' bi yezelele neda' na' gan' soan' bi gac yidle"?

Jesúsen' be'e diža' che Spiritw che Diosen'

³⁷ Ža cate' zelao chesone' ĩnin' naquen ža xench, na' Jesúsen' zeche' chsed chlo'ede' na' gwne' ziže, gwne':

—Note'tezle še lo' yichjlažda'olen' nacle ca bene' chbillaže', cheyala' šejnilaže'le neda' na' gona' le'e yeza' mban toli tocane, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to bene' chbillaže'. ³⁸ Le'e chejnlaže'le neda', gac chele can' ža Xtiza' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnlaže'chone'. Na' caten' gwne' ca' Spiriton' biña' yedesoan lo' yichjlaždao' bene', le biña' gac yogo' da' cheyala' gac cont gacbia' Jesúsen' naque' bene' zaca' juisyw.

Gosaque' chople neche Jesúsen'

⁴⁰ Bene' ca' chosozenag xtiža' Jesúsen' ba'le' gosene':

—Da' li benga naque' ben' choe' xtiža' Diosen' ben' naquen yide'.

⁴¹ Na' yeba'le' gosene':

—Benga Criston' ben' naquen yedenabia'.

Perw yeba'le' gosene':

—¿Bixe nacho bene' Galilea ba gwlej Diosen' cont yedenabi'e chio'? ⁴² Xtiža' Diosen' da' nyojen žan Criston' ben' yedenabi'e choje' lo diaža' che da' rey David na' gaque' bene' Belén gan' nac laž da' David.

⁴³ Can' goc bene' ca' gosaque' chople neche Jesúsen'. ⁴⁴ Na' ba'le' gosaclaže' yesezene'ne', perw nono gwzen le'.

Bene' gwnabia' che nación Israelen' bi gosejle'e che Jesúsen'

⁴⁵ Na' bene' chesape' yodao' blaon' jaya'aque' gan' nita' b'xoz gwnabia' ca' len bene' fariseo ca', le bene' can' gosesele' legaque' cont yesezene' Jesúsen'. Na' bene' ca' gose'e legaque':

—¿Bixchen' bi nche'elne'?

⁴⁶ Na' bene' chesape' yodao' blaon' gose'ene':

—Biña' yeneto' bene' cho'e diža' güen ca dan' choe' bena'.

⁴⁷ Nach bene' fariseon' gose'e legaque':

—¿Lente le'e ba gwxiye'e? ⁴⁸ Ne toz neto' nacto' bene' fariseo biña' šejle'to' xtižen' na' neca bene' gwnabia' chechon', ne toze' biña' šejle'e xtižen'. ⁴⁹ Perw bene' quinga že' nga bi zjanombi'e ley dan' b'zoy da' Moisésen' na' ba zjambiaye'e, da' nan' chesejle'e xtižen'.

⁵⁰ Na' Nicodemo ben' gwyej lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

⁵¹ —Ley chechon' bi choen' latje choglaochi che to bene' ba ben da' mal še biña' güe'e diža' naquen' goc na' še biña' nezecho bi dan' bene'.

⁵² Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdol' ne to bene' choe' xtiža' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaque'.

8

No'olen' besyedole'de' len xtoe'

¹ Na' Jesúsen' gwyeje' ya'a da' nzi' Ya'a Olivos. ² Na' beteyo cate' gwyeje' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzola'güe' chsed chlo'ede' legaque'. ³ Nach bene' chososed chosolo'e ley dan' b'zoy da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozech'e' le' gachol' bene' ca' chosozenag che Jesúsen'. ⁴ Na' gose'e Jesúsen':

—Maestrw, no'ole nga ba bedole'to' delene' xtoe'. ⁵ Na' ley chechon' da' b'zoy Moisésen' žan cheyala' gotcho no'ol ca' cheson ca' gwchelchone' yej. Na' žbi žo' le'? žbix cheyala' gonechone'?

⁶ Gose'e Jesúsen' ca' da' gosaclaže' yesebeje' le' diža' da' yosochine' yesagüe' xya che'. Na' Jesúsen' con bcheque' b'zoye' lo yon' len xbene'. ⁷ Na' bene' ca' gosone' byen gosenabchde' le' bi že'. Nach Jesúsen' bebe'šagüe' na' gože' legaque':

—Guaque con note'tezle bi de xto'la'le solaole gwchellene' yejen'.

⁸ Nach bcheque' da' yoble b'zoye' lo yon'. ⁹ Na' bene' ca' zjanche' no'olen' cate' gosende' can' gož Jesúsen' legaque', zjanezde' lecze ba zjanoncze' da' xinj, nach tgüje' tgüje' besyechoje' gwzolaotequen' len bene' golech na' bžinten len bene' xcuide'ch, nach bega'an yetoze no'olen' len Jesúsen' gan' že' bene' ca' chsed chlo'ede'. ¹⁰ Nach Jesúsen' bebe'šagüe' da' yoble na' ble'ede' noch no bene' ca' zjanla' na' gože' no'olen':

—No'ole, žganxe bene' ca' chosocuiš le'? ¿Ne toe' bi ben le' castigw?

¹¹ Na' no'olen' gože'ne':

—Ne toe', bene'.

Na' Jesúsen' gože'ne':

—Ne neda' bi goṇa' le' castigw. Beyej na' bich gono' da' malen'.

Jesúsen' nse'e be'ni' che yichjlaždao' beṇačh

¹² Jesúsen' gozo'e diža' da' yoble chzejni'ide' beṇe' ca' že' na', gwne':

—Neda' nsa'a be'ni' che yichjlaždao' beṇačhen'. Bene' zjanaque' neda' txen bich zjanaque' ca beṇe' yichjlaždao' lchoł beṇe' cheson da' xinj, san lo' yichjlažda'ogaque' naquen ca to da' yo'o be'ni'. Da'n'an' ba de yela' mban chegaque' toli tocaṇe.

¹³ Nach beṇe' fariseo ca' gose'e Jesúsen':

—Cho'o diža' che cuino' naco' beṇe' zaca', na' da'n'an' bi naquen to da' yesejle' beṇe'.

¹⁴ Na' gož Jesúsen' legaque':

—La'czła' cho'a diža' che cuina', xtižan' naquen da' li. Neda' nežda' gan' gwza'a na' gan' yeya'a, perw le'e bi nezele gan' za'a na' gan' yeya'a. ¹⁵ Le'e chosbaga'le neda' con can' chon benachen' xbab, san neda' nono chosbaga' bi da' yosbaga'. ¹⁶ Perw na' šaca' bi da' yosbaga' beṇe', gonan' ca cheyala', le bibi de da' chona' to gualaza', san chona' dan' ža Xan' ben' gwseła' neda'. ¹⁷ Ley chechon' dan' chsedlen' žan cheyala' šejle'cho cate' chedił diža' da' chesoe' chope testigw. ¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwseła' neda' lecze cho'e diža' čhia'.

¹⁹ Na' gose'ene':

—¿Gaxe zoa xaoṇ'?

Na' gwna Jesúsen':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

²⁰ Diža' ca' bsd blo'e Jesúsen' cate' ze' gala'ze gan' chesegüe'e mechw lo' yodao' blao che neto' beṇe' Israel. Na' nono gwzen le', le biṇa' žin ža gaque' lo na' beṇe' chesegüe'ede' le'.

Jesúsen' gože' legaque' bi gac šjaya'aque' gan' yeyejen'

²¹ Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le biṇa' yetinjele xtoła'len' cate' žin ža gatle.

²² Na' da' gwne' ca' beṇe' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

²³ Nach Jesúsen' gože' legaque':

—Le'e nacle beṇe' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'. ²⁴ Da'n'an' gwnia' biṇa' yetinjele xtoła'len' cate' žin ža gatle. Le še bi šejle'le neda' naca' doxen can' gwnian', gatle biṇa' yetinjele xtoła'len'.

²⁵ Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'. ²⁶ Ne' dech da' zan da' nia' cont gwzejni'ida' le'e nacle doła'. Perw beṇe' gwseła' neda' nežde' yogo'loł na' cho'e diža' li, na' neda' choe'lena' benachen' diža' da' ba benda' gwne'.

²⁷ Beṇe' gwnabia' ca' bi gosejni'ide' choe'lene' legaque' diža' che Xe' Diosen'. ²⁸ Nach Jesúsen' gože' legaque':

—Cate' ba gwde gwłisle neda' to le'e yag, neda' naca' beṇe' gwseła' Diosen' golja' beṇačh, cana'ch gacbe'ele le' naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenṇa' žia'. ²⁹ Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

³⁰ Na' šlac Jesúsen' choe'lene' beṇe' ca' dižan' nach beṇe' zan gosezolao chesejnilaže' le'.

Beṇe' ca' chnabia' da' malen' yichjlažda'ogaquen'

³¹ Nach Jesúsen' gože' beṇe' gualaž cheto' ca' bačh gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'. ³² Na' še soacze gonle can' ba gwnian', nachen' šejni'ile diža' li čhian' na' gaclenen le'e cont yechojle lo na' da' chnabia' le'e.

³³ Bał beṇe' ca' gose'e Jesúsen':

—Neto' nacto' diaža che da' Abrahanna' na' nono ṇa' soa beṇe' ṇabia' neto'. ¿Bixčhen' žo' yechojto' lo na' da' chnabia' neto'?

³⁴ Na' gož Jesúsen' legaque':

—Chnia' le'e to da' zejen, yogo' beṇe' cheson da' xinj zjanaque' lo na' da' mal da' chnabian' legaque'. ³⁵ Beṇe' zoa liž xan xšine' bi naque' xi'in ben' gan' chone' žinna', san slož güejze zoe' txen len legaque' len bi da' chesone'. San beṇe' golje' txen len le', bate'teze zoe' len legaque'. ³⁶ Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle. ³⁷ Nežda' nacle diaža che da' Abrahanna', perw bia'cze cheyljwlaže'le nac gonle cont gotle neda'. Na' chonle ca' da' bi chzenagle xtižan'.

³⁸ Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

³⁹ Nach bene' ca' gose'e Jesúsen':

—¿Bixchen' zo' ca'? Neto' nacto' diaža che da' Abraham.

Na' gož' Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'.

⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyljwlaže'le nac gonle gotle neda'. Da' Abrahanna' bi bene' can' chonlen'. ⁴¹ Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

⁴² Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. ⁴³ ¿Bixchen' bi chejni'ile dan' chnia' le'e? Nezda' bi chejni'ile dan' bi chaclaže'le gwzenagle chia'. ⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. ⁴⁵ Na' neda', da' cho'a diža' li, bi chejle'le chia'. ⁴⁶ Bibi da' mal nona' na' da'nana' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? ⁴⁷ Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach bene' gwnabia' che nación Israel cheton' gose'e Jesúsen':

—Can' ba gwnaczt'o' nacbja'cze naco' txen len bene' Samaria ca' na' yo'o to da' xigüe' lo' yichjlažda'oguoñ' chonen ga choļ chñenošo'.

⁴⁹ Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chnele chia'. ⁵⁰ Bi chyljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele naple doļa' da' chnele chia'. ⁵¹ Chnia' le'e to da' zejen, note'teze bene' yosozenague' xtižan', guata'cze yeļa' mban che' toļi tocanē.

⁵² Nach da' yoble bene' gwnabia' ca' gose'e le':

—Nach beyož gwñezet'o' yo'o to da' xigüe' lo' yichjlažda'oguoñ' chonen ga choļ chñenošo'. Ba got da' xozxta'och'o Abrahanna', na' len bene' ca' gosoe' xtiža' Diosen' can'i lecze ba gosate', na' chñenošo' zo' bene' chosozenag xtižon' gata' yeļa' mban che' toļi tocanē. ⁵³ ¿Chacdo' zaca'cho' ca da' xozxta'och'o Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

⁵⁴ Gož' Jesúsen' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'. ⁵⁵ Le'e bi nombia'ine', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'. ⁵⁶ Da' Abrahanna' ben' žale nac xozxta'ole bebechgüede' gwñezde' le'ede' ba za'a len benachen' na' zoe' mbalaz ba ble'eden'.

⁵⁷ Na' gose' bene' blao che nación Israel cheton' le':

—Biña' gacdo' šiyon iz. Chñenošo' zo' ba ble'edo' Abrahanna'.

⁵⁸ Jesúsen' gože' legaque':

—Chnia' le'e to da' zejen, ba zoacza' neda' cate' biña' galje Abrahanna'.

⁵⁹ Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosache'ede' cate' bedie' ladjogaque'.

9

Jesúsen' bene' cont ble'e to bene' golje' nchole'

¹ Txen zej Jesúsen' len bene' ca' zjanaque' le' txen cate' besele'ede' to bene' byo golje' nchole'. ² Na' gose'e Jesúsen':

—Maestrw, ¿non' nap doļa' golje beng'a nchole', še le' o še xaxne'en?

³ Na' Jesúsen' gože' legaque':

—Benga golje' nchole' gague da' nape' doļa' na' gague da' zjanap xaxne'en doļa', san golje' ca' cont le'ele can' chon Diosen'. ⁴ Cheyaļa' goncho xšin Dios ben' gwseļa' neda' šlac ne' de latje. Gwžin ža bich gaļa' gonchon. ⁵ Šlac ne' zoa' yežlion' chgua'a be'ni' lo' yichjlaždao' benachen'.

⁶ Beyož gwne' ca' gwcho'on xene' lo yon' na' bene' late' gona' len xene' na' gwdebe' gonan' yejlao bene' lcholen'. ⁷ Nach gože' ben':

—Gwyvej jaydib yejlaguon' cho'a yel da' nzi' Yel Siloé.

(Na' Siloé zeje diža' Nselá!.) Na' gwyeje' na' beyib yejlagüen' na' cate' beze'e zjayde' ba chle'ede'. ⁸ Na' bene' gualiz che' na' nochle bene' ba besele'e le' yogo' ža cate' ne' ncholen' gosene':

—¿Gague bengan' ba ble'echo chbe' chñabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': "Gwyvej cho'a yel da' nzi' Yel Siloé na' jaydiben'." Na' gwya'a na' beyiban' na' gwzolao chle'eda'.

¹² Nach gose' bene' ca' le':

—¿Gaxe bena'?

Na' gože' legaque':

—Bi nezda'.

Bene' fariseo ca' gosenabyože' nac goquen' ba chle'ede'

¹³ Nach goseche'e ben' goc lcholen' gan' že' bene' fariseo ca'. ¹⁴ Nac to ža che Dios caten' Jesúsen' bene' gonan' dan' gwdebe' yejlao bena' cont ble'ede' na' bi de lsens gon neto' bene' Israel zin ža che Diosen'. ¹⁵ Na' bene' fariseo ca' lecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

¹⁶ Nach bal bene' fariseo ca' gosene':

—Nezecho bi zoa Diosen' len bena' beyone' bene' lcholen', le chone' da' bi cheyala' gone' ža che Diosen'.

Na' yebale' gosene':

—¿Nac gon to bene' güen da' xinj gone' yela' guac ca dan' ben benga?

Na' legacze' besechoje' čhop cuen. ¹⁷ Na' da' yoble gose'e ben' golje' nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiža' Dios.

¹⁸ Na' bene' gwnabia' che nación Israel čheton' bi gosejle'e golje' ben' nchole' na' na'a bach chle'ede'. Nach gosaxe' xaxne'ena'. ¹⁹ Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

²⁰ Xaxne'ena' gose'e legaque':

—Nezeto' bengan' xi'into', na' nezeto' golje' nchole'. ²¹ Perw bi nezeto' nac goquen' ba chle'ede' na'a, na' neca nezeto' non' ben' cont ba chle'ede'. Ba zejczede' iz, le nabe cuine' cont güe'e diža' naquen' goc.

²² Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglagüen' bi yosolebe' lo' yodaon' note'teze bene' güe'e diža' chejle'e Jesúsen' naque' Cristo ben' chesebeze' yedenabi'e. ²³ Da'nana' xaxne'en gosene': "Ba zejczede', le nabe cuine'."

²⁴ Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen' can' gwnao' bače. Nezeto' ben' gwnao' beyon le' naque' bene' güen da' xinj.

²⁵ Na' ben' beyac yejlagüen' gwne':

—Bi nezda' še naque' bene' güen da' xinj o še bi naque'. Da' nezda', goca' bene' lchoj na' na'a ba chle'eda'.

²⁶ Na' da' yoble gose'e le':

—¿Bi bende' le'? ¿Nac benen' chle'edo'?

²⁷ Na' gože' legaque':

—Ba gwnicza' le'e na' bi chzenagle. ¿Bixčhen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés. ²⁹ Nezetot' Diosen' be'lene' Moisésen' diža', perw benga bi nezeto' ga ze'e.

³⁰ Na' ben' golje' nchole' gože' legaque':

—Da' zaca' yebanecho, bi nezele ga za' benga, na' bene' cont chle'eda'! ³¹ Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalažen'. ³² Na' gwzolaoten cate' gwxe yežlion' biṇa' yenecho zoa bene' chac chone' cont chle'e bene' golje' nchole'. ³³ Šaca' bengan' bi ze'e gan' zoa Diosen' bibi gag gone'.

³⁴ Bene' fariseo ca' beselocchgüe' na' gose'e le':

—Len' goljtio' naco' bene' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

Bene' ca' zjančhol' yichjlažda' ogaque'

³⁵ Jesúsen' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwselen'?

³⁶ Na' gož ben' le':

—Bene', gwna neda' non', cont šejnilaža'ne'.

³⁷ Jesúsen' gože'ne':

—Nedan' ben' ba ble'eczedo' na' nedan' choe'lena' le' diža'.

³⁸ Nach bena' bzoa xibe' benxene' Jesúsen', gwne':

—Xana', chejnilaža' le'.

³⁹ Nach Jesúsen' gwne':

—Za'a yežlio nga cont gata'bia' non' nap doła' na' non' bi nap doła'. Zedejena' cont bene' ca' bi chesejni'i bich yesaque' ca bene' lčhol, na' zedejena' cont bene' ca' chesacde' chesejni'ide' yesaque' ca bene' lčhol len yichjlažda' ogaquen'.

⁴⁰ Nach bał bene' fariseo ca' nita' gała'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca bene' lčhol'?

⁴¹ Nach Jesúsen' gože' legaque':

—Šaca' nacle ca bene' lčhol, bibi xtoła'le de, san žale chejni'ile, na' da'n'an' naple doła'.

10

Jempl che bene' güeye' xila' ca'

¹ Čhnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban. ² Ben' chsaljue' na' cho'e cho'a puerten', len' güeyoe' xilan'. ³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'. ⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en. ⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesúsen' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jesúsen' zaca'lebde' ca to bene' chyoe' xila' čhen' binlo'

⁷ Nach Jesúsen' bsed blo'echde' legaque' yeto, gwne':

—Čhnia' le'e to da' zejen, nedan' naca' ca cho'a puert gan' cheso'o xila' ca' lo' le'ej čegachan'. ⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'. ⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban čegaque' toli tocaṇe na' soacza' gaclena' legaque' bite'tez da' cheseyazjde'.

¹⁰ Bene' ca' žia' bene' gwban chesaclaže' yesone' cont bene' ca' žia' zjanaque' xila' čhia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yela' mban toli tocaṇe che bene' chesejnilaže' neda' cont nite' güenchgua. ¹¹ Neda' binlo chgüia čhna'a bene' chesejnilaže'nda' ca chon to bene' güeye' xila' bene' chyoe' xila' čhen' binlo. Na' da' nži'ida' legaque', da'n'an' chzane cuina' gata' neche legaque'. ¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be čegaque'. Cheso'e latje čhiz beco'yon' xila' ca' na' chesoslasba' legacba'. ¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be čegaque', san chosoyoeba' dan' chesezi' laxjuen'.

¹⁴ 'Neda' binlo chgüia chña'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a bene' ca' chesejnilaže' neda' na' legaue' zjanombi'e neda'.

¹⁵ Nombi'a legaue' ca Xan' nombi'e neda' na' neda' nombi'a Xan'. Na' da' nzi'ida' legaue' chzane cuina' gata' neche legaue'. ¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyala' šjataba' legaue' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lole'.

¹⁷ 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. ¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lec z guac yeyas yebana' ladjo bene' guaten', can' non Xan' mandadw gona'.

¹⁹ Na' da' yoble bene' nación Israel cheton' besechoje' chople neche xtiža' Jesúsen'. ²⁰ Zane' gosene':

—Yo'o da' xigüen' yichjlažda'ogüe', nan' choj chñenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol'?

Bene' gwnabia' che nación Israel besegue'ede' Jesúsen'

²² Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blaō che Diosen', ba bžin tiemp zag Jerusalénna'. ²³ Na' Jesúsen' chde' chašil che yodao' blaon' gan' nzi' Chašil che Salomón. ²⁴ Na' bene' gwnabia' che nación Israel cheton' gosechje' Jesúsen' na' gose'ene':

—¿Bixchen' chono' cont chaczejlaže'to' še naco' Cristo ben' chbezto' seļa' Diosen' cont yedenabi'e nación chechon'? Še len' Criston', gwnatega neto' zaca'lao.

²⁵ Na' gož Jesúsen' legaue':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'. ²⁶ Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e. ²⁷ Nombi'a bene' chesejnilaže' neda', na' žia' legaue' xila' chia'. Legaue' chosozenague' chia' na' chesone' con can' chzejni'ida'ne'. ²⁸ Na' chnežjua' legaue' yela' mban toli tocane na' gwbat yesebiaye'e na' nono gac yesyeca'a legaue' lo na'. ²⁹ Xan' ba gwleje' bene' ca' chesejnilaže' neda' cont chgüia chña'a legaue'. Na' nono gac yesyeca'a legaue' lo na' Xan', le nape' la'zelagüe yela' chnabia' xen. ³⁰ Neda' na' Xan' toz bene' nacto'.

³¹ Beyož gwne' ca' bene' gwnabia' ca' gosenize' yej cont yosochelenen'. ³² Na' gož Jesúsen' legaue':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

³³ Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chñeya'o che Diosen'. Con benachze le' na' chon cuino' ca Dios.

³⁴ Na' gož Jesúsen' legaue':

—Nezeczzele can' nyoj Xtiža' Diosen' dan' nsedle gan' žan: "Neda' ba gwnia', le'e nacle ca neda' Dios." ³⁵ Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'. ³⁶ Diosen' gwleje' neda' cont gaclena' benachen' že' yežlio nga na' žnacxechen' ža le'e chñeya'a che Diosen' da' žia' naca' Xi'ine'? ³⁷ Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'. ³⁸ Perw še chache'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

³⁹ Nach da' yoble gosaclaže' yesezene' Jesúsen' perw bitw bdole'.

⁴⁰ Jesúsen' beyeje' jayzoe' yešļa'a yegw Jordanna' latje gan' gwzoo da' Juanna' šlac ne' chzoe' bene' nis. ⁴¹ Na' bene' zan ja'ac gan' gwzoe' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benga naquen da' li.

⁴² Na' bene' zan gosejnilaže' Jesúsen' latje na'.

11

Can' goc cate' got Lázaro

¹⁻² Na' gwzoo to bene' gocšene bene' yež Betania le' Lázaro. Betania naquen laž María na' bene' bile' Marta, na' legaue' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'. ³ Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

⁴ Cate' gwneze Jesúsen' chacšene Lázaron', na' gwne':

—Ca nac yizgüe' chen', bi che'eden' cont yela' goten' gonen le' gan, san che'eden' cont gache'ele catec bene' zaca' nac Diosen' na' gache'ele naca' bene' zaca'chgua, neda' naca' dogualje Xi'in Dios.

⁵La'czla' Jesúsen' chacde' Martan' len bene' bilen' na' len Lázaron', ⁶cate' gwneзде' chacšene Lázaron', bega'anche' yechope ža gan' zoen'. ⁷Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸Na' gose'ene':

—Maestrw, bi ža na'zen' bene' gwnabia' che nación chechon' gosaclaže' yesote' le' yosochele' le' yej. ¿Da' yoble šejo' na'?

⁹Jesúsen' gože' legaque':

—Lagüe žan' nsa' šižiw hor, na' bene' chda lagüe ža bi chčhegüe', le nseni' gwbižen' lo yežlion'. ¹⁰Na' bene' chda ba goł chčhegüe', le nac chol.

¹¹Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

¹²Na' gose'ene':

—Xanto', še ba chtase' güeyacczede'.

¹³Jesúsen' gwne' ca' dan' gwneзде' ba got Lázaron', na' bene' ca' zjanaque' Jesúsen' txen gosacde' še chtaszen'. ¹⁴Nach Jesúsen' bochixgaten' bi zejenna' gwne' ca':

—Ba got Lázaron'. ¹⁵Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

¹⁶Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' bene' guat

¹⁷Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. ¹⁸Betanian' chin' gała'ze Jerusalenna' ca do gašiw hor. ¹⁹Na' bene' zan bene' gualaž chegaque' že' Jerusalenna' besežine' gan' zoa Martan' len Marian' cont yeso'e legaque' yela' chxenlaže' da' got bene' zangaquen'. ²⁰Nach Martan', cate' gwneзде' Jesúsen' ba bžine' cho'a yežen', na' gwze'e jašague'ne'. Na' Marian' bega'ane' yo'on'a'.

²¹Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'. ²²Na' nezda' la'czla' ba gote', bite'tez da' nabdo' Diosen' gone', gonczen'.

²³Nach gož Jesúsen' le':

—Güeban bene' zanon'.

²⁴Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

²⁵Na' gož Jesúsen' le':

—Neda' chac chosbana' bene' guat ca' le nsa'a yela' mban toli tocañe. Da'n'an' bene' ca' yesejnilaže' neda', la'czla' yesate', guata' yela' mban chegaque' toli tocañe. ²⁶Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chnie' le'.

²⁹Na' Marian' cate' bende' dan' gož Martan' le' la' gwza'te' na' gwyeje' gan' zoa Jesúsen'. ³⁰Biña' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'.

³¹Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanen', cate' besele'ede' gwza' Marian' nach gosa'aclene' le', gosacde' zeje' cho'a blojen' gan' ngaše' zjačeže'.

³²Na' Marian' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan' bilja gote' šaca'.

³³Na' cate' ble'e Jesúsen' chbež Marian' na' lecze chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yičhjałza'da'ogüen'. ³⁴Na' gože' legaque':

—¿Ga bcauše'lene'?

Na' gose'e le':

—Xanto', yo'o na' le'edo'.

³⁵Na' gwchež Jesúsen'. ³⁶Na' bene' Jerusalén ca' gosene':

—Le na' catequen' chacde' le'.

³⁷Na' bale' gosene':

—Bengan' bene' ga ble'e bene' l'cho'len, na' šaca' gwzoe' nga caten' gocšene Lázaron', benlje' cont bi gote'.

Jesúsen' bosbane' Lázaron' ladjo bene' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gweyje' gan' bosocuaše' ben'. Naquen to bloj na' da' to yej cho'enña'. ³⁹ Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chla' ben' zigw, le bačh goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

⁴¹ Nach bene' ca' goseque'e yejen'. Na' Jesúsen' gwne'e yabale na' gwne':

—Xa', choxcleno' ba bzenago' chia'. ⁴² Nežda' yogo' ni'a chzenago' chia', perw žia' ca' cont bene' ca' že' nga yesejle'e len' gwse'lo' neda'.

⁴³ Beyož bol' güiže' Diosen', gwne' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan bene' Jerusalén ca' bene' ja'ac'lene' Marían' besele'ede' yela' guac da' ben Jesúsen' na' gosejnilaže'ne'. ⁴⁶ Perw bal bene' Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázaron'. ⁴⁷ Nach b'oxoz gwnabia' ca' che'neto' bene' Israel len bene' fariseo ca' bosyotobe' yogo'lol' bene' ca' chesenabia' nación četon'. Na' bosoxi'e gosene':

—¿Nac goncho? le yela' guac zan chon benga. ⁴⁸ Na' še n'acho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao čechon' na' yosožiaje'e nación čechon'.

⁴⁹ Na' to bene' gwnabia' zoa ca horen' le' Caifás. Le' naque' b'oxoz blao lo izen'. Na' gože' legaque':

—Le'e gague bi nezele. ⁵⁰ Na' bi chacbe'ele napen chio' cuent toz ben' gat, clél ca cuiayi' yogo'cho lente nación čecho nga.

⁵¹ Gague con ca gwnalaže'ze Caifásen' gwne' ca', san da' naque' b'oxoz blao iznan', Diosen' bene' ga gwne' ca' cont gwdixjue'ede' gat Jesúsen' neče' nación četon'. ⁵² Na' ca nac dan' gaten', gague gate' neče' nación četo' na'zen' san gate' cont yogo' bene' ba gwlej Diosen' yesaque' xi'ine' gate'teže' nación, yesaque' txen yesejnilaže'ne'. ⁵³ Ca' goquen', žana' bene' gwnabia' ca' gosezolaže' bosoxi'e nac'le yesone' yesote' Jesúsen'.

⁵⁴ Na' da'nan' Jesúsen' bich gwdacze' con can' n'la'ze gan' že' bene' gwnabia' che' nación četon'. Nach gwze'e distritw Judean' na'zen' san gwche'e bene' ca' zjanaque' le' txen to yež da' nzi' Efraim da' chi' ga'la'ze latje dašen', na' besyega'ane' na'.

⁵⁵ Na' ba zoa ga'la' l'ni pascw che'neto' bene' Israel. Na' bene' zan bene' za'ac to to yež zja'aque' Jerusalenna' cate' za' ga'la'le l'nin' cont yeson cuine' xilaže' can' ža ley četon'. ⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' l'ni nga, še bi yide'?

⁵⁷ Gosene' ca' le' b'oxoz gwnabia' četo' ca' na' bene' fariseo ca' ba gosečhoguen' še note'tez bene' nezde' gan' zoa Jesúsen' cheyala' gwzende' legaque' cont yesezene' le'.

12

Marían' chgü'e set zix'ni'a Jesúsen'

(Mt. 26:6-13; Mr. 14:3-9)

¹ Na' yexop ža za' ga'la' l'ni pascon', Jesúsen' gwche'e bene' ca' zjanaque' le' txen yež Betanijan' gan' zoa Lázaron' ben' bosbane' ladjo bene' guaten'. ² Na' bal' bene' Betanian' bososini'e to xše' da' gwdagw Jesúsen' cont gosonxene'ne'. Na' Martan' bdie' yela' guagw na' Lázaron' gwche'lene' bene' ca' cho'a mesen' txen len Jesúsen'. ³ Na' Marían', de ca do tya set zix' che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' ga'la'ze xni'a Jesúsen' na' gwlo'e set zixen' ni'ena' na' beyoža' bosbižen' len yiša' yičhje'. Na' doxen yo'ona' gwla'chguan ze set zixen'. ⁴ Na' Judas Iscariote xi'in' to bene' le' Simón, le' naque' to bene' šižinw ca' zjanaque' Jesúsen' txen, na' len' ba naquen gwdie' Jesúsen' lo na' bene' ca' chesegue'ede' le'. Na' Judasen' gwne':

⁵ —¿Bixchen' bi bete' seten' na' gone' mechon' cont gaclenen bene' yaše'? le' zacan' ca no laxjw mos da' gone' gan' tgüiz.

⁶ Judasen' gwne' ca' gague da' beyaše' de' bene' yašen' san da' goque' bene' gwban. Len' bexae' mechw da' bosochin yogüe' na' gwlejlane' mechon'. ⁷ Nach Jesúsen' gože'ne':
—Bibi ye' lne', le ba bene' da' non gone' len neda' che ža cate' gaša'. ⁸ Bene' yaše' ca' nita' cze' len le'e bate' teze, san neda' bich soacza' yessa' len le'e.

Bxoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo bene' guaten'. ¹⁰ Na' bxoz gwnabia' che naciön Israel cheton' bosoxi'e lecze yesote' Lázaron', ¹¹ le bene' zan bene' Israel ba chesyecuase' len legaque' na' ba chesejnilaže' Jesúsen' dan' gosenezde' bosbane' Lázaron'.

Jesúsen' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsen' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lñin', na' zane' cate' gosenezde' žin Jesúsen' Jerusalénna', ¹³ besežaše' jaseleže' le' zjanože' no zin. Na' chesegüe'e lban' che', chesene':

—¡Leca bene' zaca' bengal! Mbalaz ben' za' nga nseła' Xancho Diosen' le' cont nabi'e. ¡Mbalaz bene' naque' Rey che naciön Israel chechon'!

¹⁴ Na' bžel to burr dao' be gwžia Jesúsen', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble;
le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsen' txen gague cate gosejni'ide' chac con can' bosozoj ben' goso'e xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le Jesúsen' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

¹⁷ Bene' ca' besele'e cate' Jesúsen' bol güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'. ¹⁸ Na' da'nan' bene' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'. ¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosenabe' yesoe'lene' Jesúsen' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo lñin'. ²¹ Na' bene' ca' besežine' gan' zoa Filipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

²² Na' Filipen' gwyeje' jane'e Andrésen' nach choptie' jaseže' Jesúsen' ca'. ²³ Nach Jesúsen' gože' legaque':

—Na'a ba bžin hor gac yogo'lo' da' cheyala' gac cont la'lagüe naca' bene' zaca' juisyw.

²⁴ Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonen. ²⁵ Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocane. ²⁶ Na' note'tez bene' chesaclaže' yesone' xšinan', cheyala' yesejnilaže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesúsen' gwduxue'ede' yesot bene' le'

²⁷ Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach bol güiže' Diosen', gwne':

—Xa', ben len neda' cont yesache'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len le' cont chesache'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebale' gosene':

—To angl gwne' le'.

³⁰ Na' Jesúsen' gwne':

—Diosen' gwne' neda' ziže gague cont nežda' neda' chzenague' chia' san cont neže le'e.

³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen. ³² Na' cate' yesełise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

³³ Gwne' ca' cont gosenezde' yesot bene' le' yosode'ene' to le'e yag cruz. ³⁴ Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nezeto' žan Cristo ben' seła' Diosen' yedenabi'e naciön chechon' soe' toli tocanē. Na' le' žbixchen' žo' naco' bene' gwseła' Dios goljo' benačh na' žo' yesote' le' to le'e yag cruz še ca'? žNox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle' da' mal dan' chnabia' le'e. Ben' chda gan' nac choł bi chache'ede' gan' zeje'. Can' naquen len le'e. ³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'ede' legaque'.

Zan bene' Israel bi gosejniłaže' Jesúsen'

³⁷ Na' la'czła' bene' Israel gualaž cheto' ca' bešele'ede' ben Jesúsen' da' zan yeła' guac, zane' bi gosejniłaže'ne'. ³⁸ Goc can' bzoj da' Isaíasen' ben' be' xtiža' Diosen' cani', gwne':

Ūxanto', nono chejle' diža' dan' chyixjue'eton',
na' nono chesache'e blo'o yeła' guac chion'.

³⁹ Bi goc yesejle'e, le' goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjanēzde' bi zejen,

na' bi chesache'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesache'ede' bi zejen dan' chlo'eda' legaque',

ba besyētinjde' na' ba beca'a xtoła'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' bene' zaca' juiswy nach be'e diža' che'.

⁴² Na' la'czła' zanch bene' Israel gualaž cheto' ca' bi gosejniłaže' Jesúsen', bia'cze bene' zan na' len no bene' gwnabia' cheto' gosejniłaže'ne', perw bi goso'e diža' chesejniłaže'ne' le' bešežebe' bich yosoleb bene' fariseo ca' legaque' lo' yodaon'. ⁴³ Gosacłaže'che' yesenite' binlo len benačhen' cl'el ca' yesenite' binlo len Diosen'.

Xtiža' Jesúsen' naquen da' žialoa

⁴⁴ Nach Jesúsen' gwne' žižje gože' bene' ca' že'na':

—Bene' chesejniłaže' neda' gague neda'zen' chesejniłaže' san lente Ūxan' ben' gwseła' neda'. ⁴⁵ Na' bene' chne'e neda' chle'ede' bene' gwseła' neda'. ⁴⁶ Neda' za'a yežlio nga chgua'a be'ni' lo' yichjlaždao' bene' ca' chesejniłaže' neda', cont bi yesenite' yesonche' da' malen'.

⁴⁷ Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le' bi za'a yežlion' cont gwnežjua' castigw che xtoła' benačhen', san za'a cont gwnežjua' yeła' mban toli tocanē che bene' yesejniłaže' neda'. ⁴⁸ Perw de da' choglaon che bene' ca' bi chesejniłaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'. ⁴⁹ Gague bia' diža' to gualaza', san Ūa' ben' gwseła' nedan' none' mandadw bin' cheyała' nia' na' bin' cheyała' gwsed gwlo'eda'. ⁵⁰ Na' nezda' dan' none' mandadw nia' nsan' yeła' mban toli tocanē che bene' yosozenag čhen. Na' da' li, con can' ža Ūxan', can' choe'lena' le'e diža'.

13

Gwdib Jesúsen' ni'a bene' ca' zjanaque' le' txen

¹ Na' Jesúsen' ba nezde' ba bžin ža yeze'e yežlion' na' yeyeje' gan' zoa Ūe' Diosen', na' godce' yogo' bene' ba chejniłaže' le' lo' yežlio nga. Da'n'an' za' gala' lni pascon' bzejni'ide' bene' ca' zjanaque' le' txen, le chacyane'czede' legaque'.

² Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le' Simón, cont gwdie' Jesúsen' lo' na' bene' ca' chesegue'ede' le'. Na' ba zjanite' chesagüe' xše'.

³ Na' Jesúsen' nezde' Ūxen' ba bene' cont nape' la'zelagüe yeła' chnabia', na' nezde' gan' zoa Diosen' gwze'e na' gan' zoe' nan' yeyeje'. ⁴ Da'n'an' gwwože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bčhej šinen'. ⁵ Nach gwxi'e nis na' gwde'en to lo' ša' na' gwzologüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nčhej šinen'.

⁶ Na' cate' ba zoa čhibe' ni'a Simón Pedro, Pedron' gože'ne':

—Ūxana', žle' čhibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje čhibo' ni'an'.

Jesúsen' gože'ne':

—Še bi čhiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' čhibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen čhibe', le doxen cuerp čhen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwnežde' non' gwde' le' lo na' bene' chesegue'ede' le'. Da'nan' gwne': "Gague yogo'le nac lažda'olen' xilaže'."

¹² Na' cate' beyož gwđibe' ni'a yogüe', nach beyaze' xe' dan' chaze' cha'le na' behi'e da' yoble cho'a mesen'. Na' gože' legaue':

—čChejni'ile bi zejen dan' ba bena' nga len le'e? ¹³ Le'e nsi'le neda' Maestrw na' Xanle, na' güenczen' žale, le can' naca'. ¹⁴ Na' neda' la'czla' naca' Xanle na' Maestrw čele, ba gwđiba' ni'alen' ca to mos, na' can' cheyala' gaclen lježle ca to mos. ¹⁵ Ba gwđiba' ni'alen' cont blo'eda' le'e cheyala' gonle can' ba benan'. ¹⁶ Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwseła' le'. ¹⁷ Še chejni'ile da' quinga na' gonle can' gwnian', nach soale mbalaz.

¹⁸ 'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nežda' gac can' ža Xiža' Diosen' da' nyojen žan: "Bene' gwđagw len neda' txen ba blej bšošje' neda'." ¹⁹ Chnia' le'e da' quinga cate' za' gac ca' cont cate' ba goc ca' soačhachle šejle'le le naca' ben' gwseła' Diosen' can' ba gwnia' le'e. ²⁰ Chnia' le'e to da' zejen, bene' ca' chosolebe' note'tez bene' chseła', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwđie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwđelenda' lo na' bene' chesegue'e neda'.

²² Na' bene' ca' zjanaque' le' txen cont chesena' cho'alao lježe' chesone' xbab che noen' gwne' ca'. ²³ Na' toe' chi'e cuiten' dan' chaquechgüe' Jesúsen' le'. ²⁴ Nach Pedron' bene' señw len bena' cont gwnabde' Jesúsen' no čhen' gwne' ca'. ²⁵ Nach gwbigue' bago gože' Jesúsen':

—čNon' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yeła' guagon', le'na' gon ca'.

Nach blo'oje' late' yetextilen' lo' nis yeła' guagon' na' bnežjuen' Judas Iscariote bene' nac xi'in to bene' le' Simón. ²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

²⁸ Na' ne to ben' zjachi' cho'a mesen' bi gosejni'ide' bixchen' gože' le' ca'. ²⁹ Bałe' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo Inin' o šjanežjue' mechw da' chyaže no bene' yaše'. ³⁰ Nach cate' beyož gwđagw Judasen' pedas yetextil dan' bnežjw Jesúsen' le', la' hchojte'. Na' ba nac ba goł gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' benač na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw. ³² Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. ³³ Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel čhechon', bi gac sa'lenle neda' gan' yeya'an. ³⁴ Na' to da' cobe čžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole. ³⁵ Na' yeseneze yogo'loł bene' nacle neda' txen še soacze gaque lježle tole yetole.

Jesúsen' gwne' Pedron' bi čebe' nombi'ene'

(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', čgan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', čbixčhen' bi gac sa'lena' le' na'a? Gwzanlaže' cuina' gata' še čhonen byen cont gaclena' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gacлено' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

14

Beñe' chesejnilaže' Jesúsen' lecze zjanombi'e Xe' Diosen'

¹ 'Bich gacžejlaže' le. Le šejnilaže' Diosen' na' lecze le šejnilaže' neda'. ² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che to tole. ³ Na' cate' yeyož šjajenšagua' yo'o chele ca', cana'ch yida' da' yoble yečhi'a le'e cont yedyezoale gan' šjajzoa' neda'. ⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' beñe' yela' mban toli tocañe. Ne toze bene' bi yežine' gan' zoa Xan' še bi šejnilaže' neda'. ⁷ Še nombia'yañe' le neda', lente Xan' ba nombia'le še ca'. Na' bačh nombia'ln'e' na'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chnabeto' le'.

⁹ Jesúsen' gože'ne':

—Felipe, šša xen ba gwzoa' nga len le'e na' žbina' gombi'o neda'? Note'tez beñe' ba ble'e neda' lencze Xan' ba ble'ede'. Žbixchen' chnabo' gona' cont le'ele Xan'? ¹⁰ Žbi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. ¹¹ Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. ¹² Na' chnia' to da' zejen, beñe' ca' chesejnilaže' neda', da' ca' chonan' lecze legaquen yesone'. Na' da' zaca'ch ca' da' ca' yesone', le yeya'a gan' zoa Xan'. ¹³ Na' bite'teze da' nabele Xan' lagüe da' chejnilaže' le neda' naca' Xi'ine', gonan', cont gwlo'a nac Xan' beñe' zaca' juisyw. ¹⁴ Bite'tez da' nabele gona' lagüe da' chejnilaže' le neda', neda' gonan'.

Jesúsen' gwne' sele' Spiritw che Diosen'

¹⁵ Še chaquele neda', gonle can' nona' mandadw. ¹⁶ Na' nabda' Xan' cont sele' Spiritw chen' soan len le'e toli tocañe na' gaclenen le'e. Na' Spiritw che Diosen' gwzejni'in le'e da' nac da' li. ¹⁷ Na' beñe' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoan lo' yichjlažda' olen' nabian' le'e. ¹⁸ Bi yocua'ana' le'e ca' bi' güezebe. Güidca' yeto gan' zoale nga. ¹⁹ Yešlož beñe' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocañe, da' nan' soale toli tocañe. ²⁰ Na' cate' žin ža yedesoan Spiritw che Diosen' lo' yichjlažda' olen', cana'ch gache'ele neda' zoa' len Xan' na' le'e zoale len neda' na' neda' zoa' len le'e. ²¹ Beñe' zjanedze' dan' nona' mandadw yesone' na' chesonen', beñe' ca' chesacde' neda'. Na' beñe' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

²² Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len beñe' bi chesejnilaže' Diosen'?

²³ Na' Jesúsen' gože'ne':

—Beñe' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoa'to len legaque'. ²⁴ Beñe' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseja' neda'.

²⁵ 'Da' quinga ba gwnia' le'e šlac ne' zoa' len le'e. ²⁶ Na' Xan' sele' Spiritw chen' soan lo' yichjlaždao' le'e chejnilaže' le neda' cont gaclenen le'e. Na' Spiriton' gwzejni'in le'e yogo' da' cheyala' nezele na' gonen cont šjajza'laže' le yogo' dan' ba gwnia' le'e.

²⁷ 'Na' hcua'ana' le'e na' chona' cont soa cuezle binlo len xbab chelen'. Chaclaža' soa cuezle binlo len xbab chelen' can' zoa' neda'. Nono beñach gac gone' cont soa cuezle binlo len xbab chelen' can' chac chona' neda'. Bi gacžejlaže' le, neca žeble. ²⁸ Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca' cheyala', nach chebele dan' yeya'a gan' zoa Xan', le Xan' zaca'che' ca' neda'. ²⁹ Na' ba gwnia' le'e na'a bibi na' gac, cont soachachle šejnilaže' le neda' caten' gac ca'.

³⁰ 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te beñe' ca' bi chesejnilaže' neda', na' tillenen neda', perw bi gonen neda' gan. ³¹ Chona' con can' non Xan' mandadw cont neze beñachen' chacda' Xan'. Le šo'o na'a, ba goje šejcho.

15

Jesúsen' zaca'lebe' ca to yag da' chbia uvas

¹ Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'.
² Na' le'e chejnilaže'le neda' zaca'lebe ca xoze' yaguen'. Na' to to xoze' yaguen' da' bibi chbian, chhoguen'. Na' to to xozen' da' chbia uvasen' chpe'en cont chbiachen da' zanch.
³ Na' le'e ba nacle ca to xozen' da' ba mpe'e, le baçh chzenagle xtižan' dan' ba be'lena' le'e.
⁴ Le soaçaçh len neda' cont soaçaça' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soaçaçhle len neda'.

⁵ Neda' zaca'leba' ca to yag da' chbia uvas na' le'e zaca'lebe ca xozen'. Note'tezle še soaçaçhle len neda' lecze soaçaça' len le'e na' gacle can' chazlaže' Diosen', ca'aczen' nac çe yag uvazen' dan' chbiachgua, le bibi gac gonle to gualazle. ⁶ Bene' bi zoaçaça' len neda', gac che' can' chac len xoze' yag da' bibi chbia, le cheseçhoguen' na' chesebižen na' chžin za chosotoben' chesadoen' yi' cont cheseyen.

⁷ Na' le'e še zoaçaçhle len neda' na' zoaçaçhle chzenagle xtižan', bite'tez da' chaclaže'le nabele Diosen'. ⁸ Chacxen Xan' cate' zoale chonçgualo dan' chazlažen', na' še chonle ca', yesacbe'e bene' da' li chejnilaže'le neda' na' chzenagle chia'. ⁹ Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e. ¹⁰ Še gonle can' nona' mandaw, nachen' gacbe'ele chacda' le'e, le neda' chona' dan' non Xan' mandaw na' chacbe'eda' chacde' neda'.

¹¹ Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw. ¹² Na' da' nga nona' mandaw gonle, gaque lježle tole yetole can' chacda' neda' le'e. ¹³ Nono zoa bene' chaquech lježe' ca bene' chzanlaže' cuine' gate' neçe bene' migw çe'. Na' can' chona' neda'. ¹⁴ Na' le'e nacle migw chia' še chonle con can' nona' mandaw. ¹⁵ Na' bich žia' nacle bene' güen žin chia', le to bene' güen žin bi neže' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'ida' le'e. ¹⁶ Gague le'e gwlejele neda' naca' Xanle. Neda' gwleja' le'e cont chejnilaže'le neda'. Na' chsel'a' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonczen'. ¹⁷ Da' nga da' chona' mandaw gonle, gaque lježle tole yetole.

Bene' bi chesejnilaže' Diosen' chesegue'ede' bene' chosozenag çe Jesúsen'

¹⁸ Še bene' bi chesejnilaže' Diosen' chesegue'ede' le'e, le gon xbab ba chesegue'eczede' neda' cate' za yesegue'ede' le'e. ¹⁹ Ša nacle txen len bene' ca' bi chesejnilaže' Diosen', nachen' yesacde' le'e can' chesague' bene' lježen' šaca'. Perw ba gwleja' le'e cont chzenagle chia'. Da'n'an' chesegue'ede' le'e da' bi nacle legaque' txen. ²⁰ Le šjasa'laže' dan' gwnia' le'e: "Note'teze mos bi naque' blaoc ca xanen'." Bosochi bososaca' bene' neda', na' lecz ca' yesonde' le'e. Na' balže bene' bosozenague' xtižan', lecze balže' yosozenague' xtiža'len'. ²¹ Na' da' bi zjanombi'e Diosen' ben' gwsela' neda', da'n'an' yesonde' le'e yogo' da' ca', le chesegue'ede' le'e da' chzenagle chia'.

²² Ša neda' bi bedzejni'ida' legaque', bi zjanape' doła' da' chesegue'ede' neda' šaca'. Perw na'a bibi de da' yosode'ede' yesene' bi zjanape' doła'. ²³ Bene' chgue'ede' neda' lente Xan' chgue'ede'. ²⁴ Ba bena' yela' guac da' nono nochle na' gon, na' šaca' bi besele'eden' bi zjanape' doła' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'. ²⁵ Na' chac can' nyoj Xtiža' Diosen' dan' chososed' gan' žan: "Besegue'ede' neda' la'czla' bibi da' mal bena'."

²⁶ Ba gwnia' le'e sela' Spiritw çe Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. ²⁷ Na' lecz ca' le'e cheyla' güe'le xtižan', le ba gwzoale len neda' šlac ba gwduxje'eda' xtiža' Xa' Diosen'.

16

¹ Ba gwnia' le'e yogo' da' ca' cont bi gaczejlaže'le. ² Le yesyebeje' le'e lo' yodao' chegaque' ca', na' gwžin za cate' note'tez bene' yesote' le'e yesacde' chebe Diosen' dan' chesonen'. ³ Yesonde' le'e yogo' da' ca' le bi zjanombi'e Xan' neca neda'. ⁴ Žia le'e da' quinga cont cate' žin za gac can' gwnian' nach šjaze'ele.

Da' chon Spiritw çe Diosen'

'Bi gwnia' le'e yogo' da' ca' gac çeche cate' za gwzolao bzejni'ida' le'e xtiža' Diosen', le ne' zoacza' chaclena' le'e. ⁵ San na'a yeya'a gan' zoa Xan' ben' gwsela' neda', na' ne tole bi chnabele neda' gan' yeya'a. ⁶ Na' ba chacyaše'le dan' ba gwnia' yeya'a. ⁷ Perw da' li napen le'e cuent yeya'a, le še bi yeya'a, Spiritw çe Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach selan' len le'e. ⁸ Na' cate' yid Spiriton' gwzejni'in benaçhen'

zjanape' dola', na' gwzejni'in non' nac bene' güen len Diosen', na' gwzejni'in gata' castigw toli tocané che bene' bi chosozenague' chia'.⁹ Spiriton' gwzejni'in legaque' zjanape' dola' da' bi chesejnilaže' neda'.¹⁰ Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'.¹¹ Na' gwzejni'in legaque' gata' castigw che xtola'gaquen' toli tocané, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoğlaon chen gwnežyw Diosen' castigw chen toli tocané.

¹² 'Ne' dech da' zan da' nia' le'e, perw naquen zdebe šejni'ilen na'a. ¹³ San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyała' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. ¹⁴ Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'. ¹⁵ Xan' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

Jesúsen' gwne' šlože yesacyaše'de' na' techle yesyebede'

¹⁶ 'Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

¹⁷ Na' ba le bene' ca' zjanaque' Jesúsen' txen gose' lježe':

—žBi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' žbi zejen dan' že' yeyeje' gan' zoa Xen'? ¹⁸ žBi zejen dan' že' yešlož? Bi chejni'icho bin' že'.

¹⁹ Jesúsen' gočbe'ede' chesaclaže' yesenabde'ne' bi zejen, na' gože' legaque':

—žBa chnabe lježe li zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? ²⁰ Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. ²¹ Cate' chzan no'olen' chžaglagüe' šlac chaque' bes che yela' san'na'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto' beñač yežlio nga. ²² Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yičhilažda'olen'.

²³ 'Na' cate' ba bžin ža šjayzoa' da' yoble gan' zoa Xan', cana'ch bich yažjele bi nabe gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gončen' le'e. ²⁴ Ža na'aža bibi na' nabele Xan' ye'line' chnablen da' chejnilaže'le neda'. Na' na'a le nabe Xan' bi da' nabelene' ye'line' ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

²⁵ 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. ²⁶ Na' cate' ba bžin žana', cana'ch nabele Xan' bi da' nabelene' ye'line' chnablen da' chejnilaže'le neda'. Na' bi yažžen nabda' Xan' gaclene' le'e. ²⁷ Le cuincze Xan' chacde' le'e dan' chaquele neda' na' chejle'le gwsele' neda'. ²⁸ Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

²⁹ Nach gose'ene':

—Bač cho'o diža' da' chejni'ito' na' bi cho'o jemplw. ³⁰ Ba chache'eto' nombi'o yogo' xbab che beñačen'. Ba nezledo' bi chesaclaže' bene' yesenezde' cate' biña' yesenaben'. Da'nan' bač chejle'to' zao' gan' zoa Diosen'.

³¹ Na' gož Jesúsen' legaque':

—žBa chejle'le na'a? ³² Ba bžin ža na' na'a ba gole' gaslasle. To tole ca'a xnez che chele na' gwcua'anle toza'. Perw bi zoa' toza', le zoa Xan' len neda'. ³³ Ba gwnia' le'e ca' cont soa cuežle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

17

Jesúsen' gwñabde' Diosen' gaclene' bene' ca' zjanaque' le' txen

¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gacbia' le' naco' bene' zaca' juisyw. ² Ba beño' neda' yela' chnabia' lao yogo' beñač cont chnežjua' yela' mban toli tocané che yogo' bene' ca' ba gwlejo' chesejnilaže' neda'. ³ Na' bene' ca' zjanape' yela' mban toli tocané zjanombi'e le', le tozon' zaco' gonxento', na' lecze zjanombi'e neda' Jesucristw bene' gwselo'.

⁴ 'Lo yežlion' ba bena' cont nacbia' naco' bene' zaca' juisyw, le ba beyož bena' yogo'lo' da' gwlo'o lo na' gona'. ⁵ Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

⁶ 'Ba gwlejo' ba le beñač chesejnilaže' neda', na' bač blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. ⁷ Na'

ba zjanezde' yogoloł da' chona' na' yogo' diža' da' choa' zjanaquen chio' le'. ⁸ Le ba be'lena' legaque' diža' dan' ba bzejni'ido' neda' na' ba bosoznague' chen, na' ba chesache'ede' da' li gwza'a gan' zon', na' chesejle'e le len' gwseło' neda'.

⁹ 'Chnaba' gacleno' legaque'. Bi chnaba' gacleno' yogo' benach, san gacleno' bene' ca' gwlejo' chesejnilaže'nda' le ba zjanaque' lo nao'. ¹⁰ Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

¹¹ 'Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwchino' yela' chnabia' chio' cont gwcuas gwcuižo' da' malen' len legaque' cont nita'cze' yesaque' toze len lježgaque', ca chio' naccho toze. ¹² Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nan' ne toe' bi gwžiai', con toz ben' ba naquen cuiaye'e cont gac doxen can' ža Xtizo' dan' nyojen.

¹³ 'Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'. ¹⁴ Neda' ba be'lena' legaque' xtizon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'. ¹⁵ Na' ca nac bene' ca' chesejnilaže' neda', bi chnaba' yeca'o legaque' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en legaque'. ¹⁶ Leagaque' bi zjanaque' txen len bene' bi chesejnilaže' le', ca neda' bi naca' txen len bene' bi chesejnilaže' le'. ¹⁷ Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. ¹⁸ Len' gwseło' neda' yežlion' cont ba bia' xtizon', na' lecze ca' chsel'a legaque' yeso'e xtizan'. ¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

²⁰ 'Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. ²¹ Xa', ben cont yogo'lole' yesaque' toze len lježgaque' na' yesaque' txen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesache'ede' len' gwseło' neda'. ²² Na' yela' bala'an dan' nono' neda' ba bnežjuan' legaque' cont zjanaque' toze len bene' lježe' ca chio' naccho toze. ²³ Leagaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesache'ede' len' gwseło' neda' na' yesache'ede' chacdo' bene' ca' can' chacdo' neda'.

²⁴ 'Xa', chacdo' neda' cate' biña' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw. ²⁵ Xa', naco' la'zelagüe bene' chon da' zej to licha. Na' ca nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwseło' neda'. ²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesache'ede' chacdo' legaque' can' chacdo' neda', na' cont neda' soacza' len legaque'.

18

Judasen' bdi'e Jesúsen' lo na' soldadw ca'

(Mt. 26:47-56; Mr. 14:43-50; Lc. 22:47-53)

¹ Beyož gwna Jesúsen' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. ² Na' Judasen' ben' ba naquen gone' Jesúsen' lo na' bene' ca' chesegue'ede' le' lecze nombi'e latjen', le zan ni'a Jesúsen' len bene' ca' zjanaque' le' txen ba besedobe' na'. ³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bxož gwgnabia' ca' na' bene' fariseo ca' cont yesezene' Jesúsen'. Zjanxobe' no lintner na' zjanoxe' no yi' yech na' zjanałe' spada. ⁴ Jesúsen' ba nežde' yogo'loł da' za' gac che', na' bchoje' jašague' legaque' na' gwne':

—¿Non' cheyiljwle?

⁵ Na' gose'ene':

—Cheyiljwto' Jesús bene' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'. ⁶ Cate' Jesúsen' gože' legaque': "Nedan', la' besyebiga'te' cosxanle na' jasechaze' lo yon'. ⁷ Na' da' yoble Jesúsen' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

⁸ Na' Jesús'en' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

⁹ Gwne' ca' cont goc can' ba gwdixjue'ede' caten' gwne': "Ne to bene' ca' ba gwlej Diosen' chesejnilaže' neda' bi yesebiaye'e." ¹⁰ Na' Simón Pedron' no'e to spada na' goljen' gwdinen' mos che bꝑoz blaon' gwꝑogtechgüe' nague' licha. Na' mosen' le' Malco. ¹¹ Na' Jesús'en' gože' Pedron':

—Bego'o spada ꝑhion' lo' ližen'. ꝑChacdo' bi cheyała' gac da' ba nžia bia' Xa' Diosen' gac chia'?

Goseche'e Jesús'en' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len bene' chesape' yodao' blao che nación Israel ꝑheton' gosezene' Jesús'en' na' bosocheje'ne'. ¹³ Na' goseche'ene' da' nechw lao Anás ben' nague' xta'obi'in' che Caifás. Na' Caifás'en' goque' bꝑoz blao che nación Israel ꝑheton' lo' izen'. ¹⁴ Na' Caifásna' ben' gože' bene' gwnabia' ꝑheton' napen legaque' cuent toz ben' gat cnel ca cuiayi' yogüe'.

Pedron' bi gwchebe' naque' Jesús'en' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' nague' Jesús'en' txen gosa'ogüe'ne'. Na' nombia' ben' nac bꝑoz blao ben' yeto. Da' nan' goc gwyo'e len Jesús'en' chy'o'o che bꝑoz blaon'. ¹⁶ Na' Pedron' bega'ane' do cho'a puerten'. Nach ben' yeto, da' nombia' bꝑoz blaon' le', gwyeye' na' be'lene' diža' bi' no'olen' chap cho'a puerten' cont gwlo'obe' Pedron'. ¹⁷ Nach bi' no'olen' chape cho'a puerten' gožbe' Pedron':

—ꝑGague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Bene' güen' žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyže'e'ede'. Na' Pedron' ze' len legaque' cho'a yin' cheže'ede'.

Goseñabde' Jesús'en' che dan' chsed chlo'eden'

(Mt. 26:59-66; Mr. 14:55-64; Lc. 22:66-71)

¹⁹ Na' ben' nac bꝑoz blaon' gwñabde' Jesús'en' che bene' ca' chosozenag che dan' chsed chlo'eden' na' che da' ca' chzejni'iden'. ²⁰ Na' Jesús'en' gože'ne':

—Ba bi'a diža' doxen latje lagüe. Zan ni'a bsd blo'eda' lo' yodao' checho ca' na' chy'o'o yodao' blaon' gan' chesežag yogo' bene' gualaž chechon'. Bibi diža' gwnia' bagaše'ze. ²¹ ꝑBixchen' chñabdo' neda'? Gwñabe bene' ca' gosende' dan' bsd blo'edan'. Legaque' zjanežde' bi dižan' bia'.

²² Beyož gwna Jesús'en' ca', to ben' chape yodao' blaon' zie' na', na' gwdape' xaguen', gože'ne':

—ꝑCa' choži'o xtiža' ben' nac bꝑoz blaon'?

²³ Jesús'en' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ꝑbixchen' chgapo' neda'?

²⁴ Nach Anás'en' bdie' Jesús'en' ncheje' lao Caifás'en' ben' nac bꝑoz blaon'.

Da' yoble Pedron' bi gwchebe' še naque' txen len Jesús'en'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—ꝑGague lenczo' len' chzenago' dan' chsed chlo'e benga?

Na' bi gwchebe', gwne':

—Bi lena' neda'.

²⁶ To xmos bꝑoz blaon' naque' biše' ljež ben' gwꝑog Pedron' nague'n', na' le' gože' Pedron':

—ꝑGague ble'eda' le' len Jesús'en' lo' le'ej gan' ze yag olivos?

²⁷ Na' Pedron' da' yoble bi gwchebe', na' la' gwchežte to jea.

Goseche'e Jesús'en' lao Pilaton'

(Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las bene' gwnabia' ca' gosebeje' Jesús'en' gan' zoa Caifás'en' na' goseche'ene' gan' zoa gobernador Pilato ben' chon yela' justis. Na' legaque' bi gosoe'len Jesús'en' yo'o gan' zoa Pilaton', le can' nac costumbr ꝑheton' bi chac yesagüe' xše' Ini pascon' še yeso'e gan' že' bene' bi zjanac bene' Israel. ²⁹ Da' nan' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' bene' gwnabia' ca' gosene':

—Šaca' benga bi naque' bene' güen da' xinj bi bdeto'ne' lo naon'.

³¹ Na' gož Pilaton' legaque':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de šsens gotto' bene'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'. ³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

³⁴ Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

³⁵ Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' bħoz gwnabia' chele ca' bosodie' le' lo na' nga. ¿Bi da' xinj benon'?

³⁶ Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedile' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benačhen' diža' li na' yogo' bene' chesone' txen len diža' li chosozenague' chia'.

³⁸ Nach gož Pilaton' le':

—¿Bi dan' diža' li?

Gosechoglagüen' yesote' Jesúsen'

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaque':

—Bibi nla' lagüe še bi da' xinj non benga. ³⁹ Perw na' de costumbr chele gwsana' to bene' de ližya lo ĩni pascon'. ¿Chaclaže'le gwsana' benga naque' Rey che le'e bene' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19

¹ Nach Pilaton' bene' mandadw goseyine' Jesúsen'. ² Na' soldadw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca da' chosočhin non rey. ³ Nach gosonle' che' gosene':

—¡Viva Rey che bene' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsen' chy'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaque':

—Le na', nga ze ben'.

⁶ Na' bħoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'ın Dios, le con to benačhen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' džebche'. ⁹ Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

¹⁰ Nach Pilaton' gože'ne':

—¿Bi choži' o xtižan'? ¿Bi neždo' napa' yela' chnabia' cont gwsana' le' na' napa' yela' chnabia' cont chogbi' an yosode'e le' le'e yag cruz?

¹¹ Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' dolja' ca le'.

¹² Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata. ¹⁴ Do guagwbiz ža cate' za' solao lni pascon' Pilaton' gože' bene' gwnabia' cheto' ca':

—Le na', nga zoa rey chelen'.

¹⁵ Nach da' yoble gosezolagüe' bososye'e gosene':

—jCheyala' gate'! jBde'e le'e yag cruz!

Nach Pilaton' gože' le'gaque':

—¿Rey chele nga gona' mandadw yosode'e le'e yag cruz?

Nach bžoz gwnabia' ca' gose'ene':

—Gague rey cheto' benga. Toze César naque' rey cheto'.

¹⁶ Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudadn'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. ¹⁸ Na' soldadw che gobernadores' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachol bene' ca' chope'. ¹⁹ Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: "Jesús bene' Nazaret, Rey che bene' Israel". ²⁰ Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen' gála'ze ciuda Jerusalénna'. ²¹ Nach bžoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' "Rey che bene' Israel", san bzoj: "Le' gwne' naque' rey che bene' Israel."

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen' to güelize, na' bibi dia chen de. ²⁴ Na' gose' lježe':

—Bi gwzojchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: "Besyele'e xalanan' legacze', na' gosone' rifa lache' dan' chazan'."

²⁵ Na' do gála'ze yag cruz che Jesúsen' zecha Marian' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. ²⁶ Na' cate' Jesúsen' ble'ede' zecha xne'ena' gála'ze len' to bene' naque' le' txen, bene' chaquechgüe Jesúsen' le', nach gože'ne':

—Bena' gague' ca xi'ino'.

²⁷ Nach gože' bena':

—Bži'iláže' xna' nga ca xnao'.

Na' žana' gwque'ene' bene'ne' ca bene' lo' yo'o.

Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsen' ba nežde' bač goc yogo' da' cheyala' gac. Nach cont goc can' ža yelate' Xtiža' Diosen' da' nyojen gwne':

—Chbiłda' nis.

²⁹ Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwlisten' blapen' cho'a Jesúsen'. ³⁰ Na' beyož gwxxop Jesúsen' vinon' na' gwne':

—Bač goc yogo'lol da' cheyala' gac.

Nach bcheque' yichjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža l̄ni xen, da' nan' bene' gwnabia' che naci3n cheton' jasenabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosaclaže' yeseda'ch bene' ca' le'e yag cruzen' ža che Dios. ³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešja'a. ³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis. ³⁵ Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. ³⁶ Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'." ³⁷ Na' yeto da' žan: "Yesene'e ben' ba bosozie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea ja' nabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gweyje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' bene' gwnabia' cheto' ca'. ³⁹ Na' len Josén' lecze gweyje' Nicodemo ben' ba gweyje' gan' zoa Jesúsen' šeže'le. Na' Nicodemon' no'e to da' chl̄a' zix' da' none' len yal dan' že' mirra, na' len to bište dan' že' aloes, ca do šona roben'. ⁴⁰ Nach bosyochele' cuerp che Jesúsen' to lache' xen na' len dan' chl̄a' zixen', ca' chon neto' bene' Israel cate' chcuase'to' bene' guat. ⁴¹ Na' gala'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseche'ene' to bloj cont yosochinen' ca to ba, na' nono bene' guat na' šo' lo'enna'. ⁴² Ža caten' got Jesúsen' naquen ža caten' chososi'ni'e che ža che Diosen'. Na' da' chesachyende' yosocuaše'ne', da' nan' jase'lo'e Jesúsen' lo' bloj coba', le naquen gala'ze.

20

Jesúsen' bebane' ladjo bene' guaten'

(Mt. 28:1-10; Mr. 16:1-8; Lc. 24:1-12)

¹ Na' bal dmigw María bene' Magdalan' gweyje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. ² Nach beza'sese' beyeje' gan' zoa Sim3n Pedron' len yeto bene' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nezeto' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'. ⁴ Choptie' goseza'sese' perw ben' yeto gwza'sesche' ca Sim3n Pedron' na' byobech bžine' cho'en'na' ca le'. ⁵ Na' bcheque' gwne'e lo'enna' na' ble'ede' lache' ca' zjachin' lo' yo perw bi gwyo'e. ⁶ La' bla'te Sim3n Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. ⁷ Na' bay dan' bosoguzje' yichjen' bi chin' gan' chi' lache' ca', san ndoben chin' šla'ale. ⁸ Nach lencze ben' yeto gwyo'e, le bina' šo'e la'cžla' byobech bžine' cho'en'na', na' ble'ede' can' naquen na' gwyejle'e. ⁹ Le bina' yesejni'ide' Xtiža' Diosen' da' nyojen žan cheyala' yebane' ladjo bene' guaten'. ¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsen'

(Mr. 16:9-11)

¹¹ Na' Marían' bega'ane' na' gwzeche' gala'ze cho'a blojen' chbeže'. Na' ne' chbežte' ca' bcheque' gwne'e lo' blojen'. ¹² Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'. ¹³ Nach gose'e no'olen':

—žBixčhen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marían' ca' gwyečhje' ble'ede' zecha Jesúsen' cožen', perw bi gocbe'ede' še naque' le'. ¹⁵ Na' gož Jesúsen' le':

—žBixčhen' chbežo', no'ole? žNon' cheyiljo'?

Marían' bene' xbab še ben' chape' yaguen' nach boł güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsen' gože'ne':

—jMaría!

Na' Marían' gwyečhje' da' yoble na' gože'ne':

—jRaboni! —naquen to diža' hebreo na' zejen Maestrw.

¹⁷ Jesúsen' gože'ne':

—Bi goxo' neda', le biña' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le ba ble'ede' Xanchon'.

Bene' ca' zjanaque' Jesúsen' txen besele'ede' mbancze'

(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc chol'že' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseyjwrtie' puert ca' da' besežebe' bene' gwnabia' che naciön Israel cheton'. Nach Jesúsen' ble'e na' gwze' gachol'legaue'. Na' gože' legaue':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaue' taque' ca' na' cuit le'ena'. Na' besyebede' cate' besele'ede' le naque' Xanchon'. ²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwseła' Xan' neda' yežlio nga bia' xtižen', lecze ca' neda' chseła' le'e güe'le xtižan'.

²² Beyož gwne' ca' blobe' legaue' na' gože' legaue':

—Le si' Spiritw che Diosen'. ²³ Bene' ca' yesyetinjje xtoła'gaquen', nape yela' chnabia' ye'ln'e' ba gwnitlaon, na' nape yela' chnabia' cont ye'le bene' bi yesyetinjje xtoła'gaquen' bitw nitlaon.

Tomás ble'ede' mban Jesúsen'

²⁴ Na' Tomás ben' bososi'e Tomás Cuaš lene' len bene' šižinw ca' ba gosedalene' Jesúsen', na' bi gwzoe' cate' Jesúsen' bedyelo'elagüe' legaue' že' dmigon'. ²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaue':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomásen' len legaue'. Na' da' yoble nreyjw puert ca', cate' bezla' Jesúsen' na' gozzeche' gachol'legaue'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásen' gože'ne':

—jXana' na' Dios chia'!

²⁹ Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' biña' yesele'ede' neda'.

Da' quinga zjanyojen cont šejle'cho Jesúsen' naque' bene' gwseła' Dios

³⁰ Da' zan yela' guac ben Jesúsen' da' besele'e bene' ca' zjanaque' le' txen da' bi nyojen nga.

³¹ Perw zjanyoj da' quinga cont šejle'le Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocanje chele da' chejnilaže'lene'.

21

Jesúsen' blo'elagüe' gaže bene' ca' zjanaque' le' txen

¹ Gwdechle yeto za yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: ² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsen' txen. ³ Na' Simón Pedron' gože' legaue':

—Ša'a gwxen bel da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdaon' na' goso'e to lo' barcw. Na' nocze no bel beseželde' že'na'. ⁴ Na' do ba zoa šeni' besele'ede' zecha Jesúsen' cho'a nisdaon', perw bi gosache'ede' še Jesús nan'. ⁵ Nach Jesúsen' gože' legaue':

—Bene' migw chia' čnono bel chdole'le?

Na' gose'ene':

—Nono chdole'to'.

⁶ Nach gože' legaue':

—Le gwzala' yixjw bel chelen' cuit barcon' lichale na' senlba'.

Nach bosozala' yixjw bel chegaquen', na' tantw be zan besedoła', bi gosezoede' yosy-ocuen' lo' barcon'. ⁷ Nach ben' chaquechgüe Jesús'en' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesús'en'. ⁸ Na' yezica'chle bene' ca' zja'aclene' barcw daon' zjanxobe' yixjw gan' že' bel ya'a ca'. Bi naquen zito' cho'a nisdaon', ca do yeto gayoa metrže. ⁹ Na' cate' besyežine' cho'a nisdaon' besele'ede' chi' yi' ya'alj na' xoa bel ya'a lagüenna' na' len yetextil. ¹⁰ Na' Jesús'en' gože' legaque':

—Le yeyoxe' ngale to chope bel ya'a ca' za' gwxenle.

¹¹ Na' Simón Pedron' gwyeye' jaxi'e yixjw belen' gan' chi' barcon' na' bexoben' ga nac yo biž. Žen' to gayoa ši'ineyon bel xen, perw bi bcheza' yixjon' la' czła' be zan gwže' lo'enna'. ¹² Na' Jesús'en' gože' legaque':

—Le da gagwle xsil.

Na' ne toe' bi besyeyaxjde' ye'ene': “¿No le’?”, le ba gosache'ede' naque' Xancho'n'. ¹³ Jesús'en' gwbigue' na' gwxi'e yetextilen' na' bnežjue' che to toe' na' lecz ca' bene' len bel ya'an.

¹⁴ Da'na' goc da' gwyon ni'a blo'elao Jesús'en' bene' ca' zjanaque' le' txen gwde bebane' ladjo bene' guaten'.

Jesús'en' be'lene' Simón Pedron' diža'

¹⁵ Na' cate' besyedagüe', Jesús'en' gože' Simón Pedron':

—Simón xi'in Jonás, ¿chacuechdo' neda' clél can' chesaque bene' quinga neda'?

Pedron' boži'en gože'ne':

—Xana', neždo' chacda' le'.

Jesús'en' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

¹⁶ Na' da' gwchop ni'a gože' le':

—Simón xi'in Jonás, ¿chacdo' neda'?

Na' da' yoble gwna Pedron':

—Xana', le' neždo' chacda' le'.

Jesús'en' gože'ne':

—Bgüia gwna' bene' ca' chesejnilaže' neda', bene' ca' zjanac ca xila' chia'.

¹⁷ Da' gwyon ni'a gož Jesús'en' le':

—Simón xi'in Jonás, ¿chacdo' neda'?

Na' Pedron' gocyäse'de' dan' gož Jesús'en' le' ca' da' gwyon ni'a, na' gože' le':

—Xana', le' neze nle'edo' yogo'lol. Neždo' chacda' le'.

Jesús'en' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'. ¹⁸ Da' li chnia' le', cate' goco' bene' güego', cuino' gwyaz xalanon' na' gwyeye' con ga žan čio'. Perw cate' gaco' bene' gole, gwli' naon' na' bene' yoble čhize' xalano' na' yečhe'e le' ga bi chaclažo'.

¹⁹ Gože'ne' ca' cont gwnežde' can' gacxen Diozen' len da' gac che' cate' žin ža gate'. Na' gwde gwna Jesús'en' can' gac che Pedron' nach gože'ne':

—Con gwyejnilaže' neda' na' bzenag chia'.

Can' gwna Jesús'en' che ben' chacchgüede'

²⁰⁻²² Na' yeto bene' naque' Jesús'en' txen na'ogüe' legaque'. Na' beyechj Pedron' na' ble'ede' le' na' gože' Jesús'en':

—Xana', ¿nac gac che benga?

Jesús'en' gože'ne':

—Še chaclaža' ne' zoacze' cate' yida' yeto ¿bin' chaczejlažo'? Con gwzoateze gwyejnilaže' neda' na' bzenag chia'.

Ben' gwne' ca' naque' ben' chaquechgüe Jesús'en' na' ben' gwche' cuít Jesús'en' txen cate' gosagüe' xše' žen' cate' za' gac Jesús'en' lo' na' bene' ca' chesegue'ede' le'. Na' cana' bena' gwñabde'ne': “Xana', ¿noxen' gwdie' le' lo' na' bene' ca'?”

²³ Na' dan' gož Jesús'en' Pedron': “Še chaclaža' ne zoacze' cate' yida' yeto ¿bin' chaczejlažo'?", da'nan' gwđitj diža' len bene' ca' chsejnilaže' Criston' gosene' bi gat bena'. Perw Jesús'en' gague gože'ne' bi gate', san gože'ne': “Še chaclaža' ne' zoacz benga cate' yida' yeto, ¿bin' chaczejlažo'?”

²⁴ Nedan' nežda' can' goc yogo' da' quinga na' da'nan' ba bia' diža' chegaquen na' ba bzojan'. Na' lecze le'e nežceze choa' diža' li.

²⁵ Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr
zan juisyw yesaqen še ca'.

Da' na'ze chzoja' ŋa'a.

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo'loł da' ben Jesúsen', na' ľeczze bzoja' yogo' dan' bsed blo'ede' cate' gwzolaote' bsed blo'ede' ² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. ³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwdalene' legaque' čhoa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e. ⁵ Da' zaque' ben Juan da' bzoe' bene' nis, perw yeto čhope ža da' zaca'ch gac čhele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teže šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel čechon' lo na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. ⁸ Perw na' cate' yedesoa Spiritw che'na' len le'e, gaclenen le'e len yela' guac čhenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samarian', na' doxen yežlion'.

⁹ Beyož gwna Jesúsen' ca', cheseña'te bene' ca' chesejnilaže' le'. beyepe' yaba to lo' bejw na' bich besele'ede' le'. ¹⁰ Na' ne' cheseña'te bene' ca' le'e yaban' gan' besele'ede' beyepe', cate'cze gosache'ede' ba zjazeera čhope angl len legaque' bene' zjanyaz lache' šiš. ¹¹ Na' bene' ca' čhope gose'e legaque':

—Bene' Galilea, žbixčhen' čhna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de ľsens yesa'aque' ža čhe Dios can' ža ley čhe bene' Israel ca'. ¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. ¹⁴ Na' gosenita'teže postlw ca' šnej chosoł güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

¹⁶ —Bene' migw, Spiritw che Diosen' benen cont rey David bzoje' na' be'e diža' čhe Judasen' ben' gwčhe' bene' ca' gosenen Jesúsen' gan' jasešague' le'. Na' benen byen goc can' nyoj Xtiža' Diosen'. ¹⁷ Judasen' goque' txen len neto' na' bene' txen len neto' yogo'loł dan' gwyo'o lo na'to' bento'. ¹⁸ Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo na' bene' ca'. Perw na' blažoe' cosyichj gan' goladite' na' gošj li'ena', doxen xjaloen' bchoj. ¹⁹ Yogo' bene' že' Jerusalénna' gosenezde' can' goc čhen' na' da'nan' bososi'e yežlion' Acéldama na' xtiža'gaque'na' zejen Yežlio Chen. ²⁰ Goc can' nyoj to salmo žan: Liže'na' gaquen to yo'o daš, nono soa na'.

Na' ľeczze nyojen žan:

Na' te bene' yoble yołane' žin dan' bene'.

²¹ Na' nga nita' bene' ba gosone' txen len chio' šlac gwdalen Xancho Jesúsen' chio'. ²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' čheyała' cuejcho toe' gone' txen len neto' postlw güe'to' diža' can' beban Xancho Jesúsen' ladjo bene' guat ca'.

²³ Na' gosebeje' čhope bene', toe' José ben' le Barsabás, na' ľeczze Justo, na' ben' yeto Matías. 24-25 Nach bosoloł güiže' Diosen' gose'ene':

—Xanto', le' nombi'o yichjlaždao' yogo'loł bene'. Lao bene' ca' čhope blo'ešca neto' noe' ba gwlejo' cont gague' postlw na' gone' xšinon' txen len neto'. Le ca nac Judasen', gwlejjichje' dan' ngo'o lo ne'e gone' na' ba zjajyde' gan' naquen yeyeje' yela' güen da' mal čhe'na'.

²⁶ Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

2

Can' goc cate' bla' Spiritw che Diosen'

¹ Na' bžin ža lni dan' že' Pentecostés, na' postlw ca' na' yogo' lo' bene' ca' ba gosejnilaže' Jesúcrison' zjandop zjanžague' toze latje. ² Na' zejzenez goc to sšag le'e yaban' ca' sšag che to be' bdono' gual na' nenxeje lo' yo'o gan' zjachi'ena'. ³ Na' besele'ede' ga'la'ze yichj to toe' gosezoa tgüejje yi' be' da' čala' nin. ⁴ Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

⁵ Na' ca' tiempen' bene' zan bene' Israel že' Jerusaléna' bene' chesonxene' Diosen', za'aque' doxen yežlion'. ⁶ Na' cate' gosende' chac sšaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'. ⁷ Bi gosejni'ide' bin' chac na' besyebande' gosene':

—žGague bene' distritw Galilea bene' quinga? ⁸ žNacxečen' to tocho chenecho cheso'e diža' can' cheso'e bene' gualaž čecho diža'? ⁹ Bałcho naccho bene' nación Partia, na' bałcho bene' nación Media, na' bałcho bene' nación Elam, na' bałcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia, ¹⁰ yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, bałcho goljcho naccho bene' Israel na' yebałcho ben cuincho txen len bene' Israel. ¹¹ Na' bałcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso'e bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

¹² Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—žBi zejen dan' chaquen'?

¹³ Na' yebałe' gosene'ye'e gosene':

—jBene' quinga chesezožde'!

Diža' dan' be' Pedroa' len bene' Israel ca' besežag

¹⁴ Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zizže gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. ¹⁵ Bene' lježa' quinga bitw chesezožde' can' chaquele, le ne' nac tempran. ¹⁶ Ba chac can' bzoj da' Joel ben' be' xtiža' Diosen' can'i bzoje' dan' gwna Diosen', žan:

¹⁷ Cate' ba zoa žin ža cont yeyož yežlion',

neda' Dios gona' cont Spiritw čian' yedesoa len bene' že' doxen yežlion'.

Na' gona' cont xi'inle ca' yeso'e xtiža'na',

na' bene' byo xcuide' ca' yesele'edagüede' bi da' gona', na' güe'lena' bene' byo gol ca' diža' lo' bišgal čegaquen'.

¹⁸ Na' yogo' bene' ca' chesejnilaže' neda', bene' byo na' no'ole,

yedesoa Spiritw čian' len legaque' cont yeso'e xtižan'.

¹⁹ Gona' cont yesele'e benačhen' da' zaca' yesyebande' le'e yaban' na' lagüe yežlion',

na' gona' yela' guac čia'na' len chen, len yi' na' len žen da' nac ca' bejw.

²⁰ Bich gwseni' gwbižen', na' bio'na' yeyaquen xna' ca' chen

cate' za' žin ža yida' da' yoble gwnežjua' castigw che yogo' bene' cbi chesejnilaže'nda', neda' naca' žanle.

Žana' gaquen to ža žialao xen.

²¹ Nach note'tez bene' yesenabe' gaclena' legaque',

neda' naca' žanle yebeja' legaque' lo' da' malen'.

Can' gwna Diosen'.

²² Na' le'e bene' Israel gualaž chia', le gwzenag čia'. Jesúsen' ben' nac bene' yež Nazaret, Diosen' blo'ede' naque' bene' zaque'. Diosen' bene' cont Jesúsen' bene' yela' guac na' bichle da' zaca' yebanecho can' nezczellen'. ²³ Lo yela' neze che Diosen' bin' za' gac, bi'e latje gwzenle Jesúsen' na' bdelene' lo' na' bene' mal ca' gosote'ne' bosode'ene' le'e yag cruzen'. ²⁴ Perw na' Diosen' bečhis bosbane'ne' ladjo bene' guat ca', le bi gwzoe yela' goten' nabian' le'. ²⁵ Quinga bzoj da' rey David xtiža' Jesúsen' cani'te, žan:

Nežda' žana' Diosen' zoe' len neda' do ža do yel,

na' zoe' chaclene' neda' cont bi chžeba'.

²⁶ Da'na'na' zoa' mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca' cate' ba gota'.

²⁷ Dios chia', nezda' bi yocua'ano' neda' gan' že' bene' guat ca',

neca go'o latje gožo' cuerp chia'na', neda' naca' xi'ino' na' nac lažda'oguan' xilaže'.

²⁸ Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

²⁹ —Bene' Israel, nezecho da' xozxta'ochō rey David gote' na' bosocuaše' le'. Na' nom-bia'cho ba gan' bosocuaše' le'. ³⁰ Na' da' rey Davin' be'e diža' can' bzejni'i Diosen' le' na' gwnezde' gwlo'o Diosen' da' balī gague da' te bi gac can' gwne'. Gwnezde' gon Diosen' cont Criston' galje' lo diaža che' na' nabi'e naciōn Israelen' can' gwnabia' le'na'. ³¹ Diosen' bene' cont da' rey Davin' gwnezde' can' gaquen' na' da'nan' be'e diža' che Criston' ben' ba gwseła' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp che'na'. ³² Na' Diosen' bechis bosbane' Jesúsen' ladjo bene' guat ca', na' yogo' neto' choe'to' diža' nezeto' beyas bebane'. ³³ Na' Diosen' len yela' guac che'na' bene' cont beyep Jesúsen' gan' zoe'na' na' chnabi'e txen len le'. Na' Diosen' bnezjue'ne' Spiritw che'na' can' gwne'. Na' Jesúsen' ba bene' yela' guac nga da' ba benele na' da' ba ble'ele. ³⁴ Gague da' rey Davin' beyep yaban', san da' David bzoje' che Jesúsen' gwne':

Xancho Diosen' gože' Xanan':

“Gwche'edo' cuita' nga nabi'a'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'.”

³⁶ 'Da'nan' yogo' chio' bene' Israel cheyala' nezecho Jesúsen' ben' betwle bda'line' le'e yag cruz, Diosen' gwleje'ne' cont naque' Xanchon' na' naque' Cristo, zeje diža' naque' ben' gwseła' Diosen' nabi'e naciōn chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, žbin' cheyala' gonto'?

³⁸ Nach Pedroa' gože' legaque':

—To tole cheyala' yetinjele xtoła'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'. ³⁹ Xancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnezjuen' yogo' bene' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon mil bene' gosejnilaže' Jesúsen' na' gosaque' txen len yezica'chle bene' chesejnilaže' le'. ⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jesúsen' na' gose'ej gosagüe' txen liž to togaque' na' gosenite' bosol güiže' Diosen' txen.

Can' goson bene' ca' gosejnilaže' Criston' da' nechw

⁴³ Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac che Diosen'. ⁴⁴ Na' bene' ba chesejnilaže' Jesúsen' gosaque' toze na' gosone' toze yogo'lol da' zjade chegaque'. ⁴⁵ Na' gosote' yežlio na' bichle da' zjadede' na' mechw dan' besele'ede' chen goseyisen' lao yogo'lole' con da' beseyažje to toe'. ⁴⁶ Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. ⁴⁷ Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Xancho Diosen' bene' cont gosanch bene' ca' gosejnilaže' Jesucriston'.

3

Beyac to bene' nxinj ni'e

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol güiže' Diosen' yogo' ža. ² Na' gwzoa to bene' nxinj ni'e ca' goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'. ³ Nach cate' bžin Pedroa' len Juan yodao'na' na' ben' nxinj ni'ena' bol güiže' legaque' yosonežjue'ne' mechw. ⁴ Nach Pedroa' len Juanna' gosebeze' na' gosena'chgüe' le' na' Pedroa' gože'ne':

—Gwñ'a' neto'.

⁵ Na' bena' bene' xbab yosonežjue'ne' mechw. ⁶ Perw Pedroa' gože'ne':

—Bibi mechw chia' de da' gona' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' bəxoe' ne'e līcha na' bsože'ene', na' gocte gwzeche' na' nī'ena' la' besyeyacten da' gual na' lecz ca' bechj nī'e ca'. ⁸ Na' cate' goche'ede' ba besyeyac nī'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choxclen che Diosen'. ⁹ Na' bene' ca' že' chašilen' besele'ede' can' chde' chxite' cho'e yela' choxclen che Diosen'. ¹⁰ Na' besyeyombi'e le' naque' ben' chbe' chnab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac nī'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac nī'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'. ¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž čhia' bene' Israel, žbixchen' chebanele? žChaquale len yela' guac čheton' bento' cont beyac benga? žše chaquele beyaque' dan' chonchguato' can' chazlaže' Diosen'? Bi naquen ca'. ¹³ Dios ben' gosonxen da' xozxta' ocho Abraham, Isaac na' Jacob, blo'e nac Xi'ine' Jesúsen' bene' zaca' juisyw. Perw le'e bdele Jesúsen' lo' na' justis ca' cont gosote'ne' na' bžonle cate' Pilaton' goclaže' gwsane'ne'. ¹⁴ Can' benle len Jesúsen' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwñable bosan Pilaton' to bene' güetw bene' na' bi gwñable yosane' Jesúsen'. ¹⁵ Na' ca' nac Jesúsen' ben' bxe yela' mban toli tocane, le'na' betwle, perw na' Diosen' bechis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'. ¹⁶ Na' chle'ele benga cbi goc se'e na' nombia'lné', na' na'a ba beyac nī'ena' len yela' guac che Jesúsen' ben' chejnilaže'to'. Le da' chejnilaže'to' Jesúsen', da'nan' besyeyacšagüe' nī'a benga na' ba chle'ele can' beyaquen'.

¹⁷ Bene' migw, nezda' le'e na' bene' gole blao chele ca' betwle Jesúsen' lagüe bi gwyejni'ile Diosen' gwsele'ne'. ¹⁸ Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosochi yososaca' bene' le'. ¹⁹ Da'nan' le yeyonšca xbab chele na' le yetinje xtola'len' cont Xancho Diosen' gwñitlagüen' na' gone' ga soale mbalaz. ²⁰ Nach Xancho Diosen' sele' Jesúsen' yežlio nga yetnī'a, ben' gwleje' cani'te cont naque' Cristo checho. ²¹ Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. ²² Da' Moisésen' be'lene' da' xozxta' ocho diža', gože' legaque': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'. ²³ Na' Diosen' gone' yesebiayi' yogo' bene' ca' cbi yosozenague' che bena' selén', na' bich yesenite' txen len bene' ca' chesonxene' le'." Can' gož Moisésen' da' xozxta' ocho ca'.

²⁴ Lecz ca' yogo'lol bene' goso'e xtiža' Diosen' cani', gwzolaozen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a. ²⁵ Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xozxta'ole ca', lecz naquen che le'e. Gože' da' Abrahanna': "To bene' galje lo diaža čhio' gone' cont bene' že' doxen yežlion' nite' mbalaz." ²⁶ Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaže' gaclene' chio' cont to tocho yetinjecho xtola'chon'.

4

Pedroa' na' Juanna' nite' lao bene' gwnabia' ca'

¹ Ne' chesoe'lente Pedroa' na' Juanna' bene' ca' diža' cate' besežin bal bžox che bene' Israel ca', na' bene' gwnabia' che ben' chesape' yodao' blao čhegaque'na' na' bene' saduceo ca' bene' cbi chesejle'e še yesyeban bene' guat ca'. ² Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsen'. ³ Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi gola' yesone' yela' justis čhegaquen' ca' cheya'la' že'na', san bosocuezen' beteyoch. ⁴ Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

⁵ Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bžoj da' Moisés, besedop besežague' ciuda Jerusalénna' ⁶ len Anás ben' naquech bžoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bžoz blaon'. ⁷ Na' gosone' mandadw jasexi'e Pedroa' na' Juanna' na' cate' ba zjzie' laogaquen' gosenabde' legaque':

—žNo ben lešens chele cont beyonle bene' nxinjen'? o žno yela' guac che bčhinle beyonlene'?

⁸ Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole blao che nación Israel chechon', ⁹ chñabe nac bento' da' güen beyonto' bena' nxinj ni'ena'. ¹⁰ Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac che' cont beyacšagüe' benga. Le'e betwle Jesucriston' bda'ne' to le'e yag cruz, perw Diosen' bechis bosbane'ne' ladjo bene' guat ca'. ¹¹ Bi gwyejle'le che Jesucriston', da'nan' zaca'leble ca' bene' cheson yo'o bene' bi chesazlaže' yej güen da' ba naquen yej squin che' yo'ona'. ¹² Toze Jesucriston' guac goņe' chio' yela' mban toli tocaņe, na' noch no zoa doxen lo' yežlion' bene' gac goņe' yela' mban toli tocaņe che chio' beñaç.

¹³ Besyebane bene' gwnabian' can' boži'i Pedroa' na' Juanna' xtiža'gaquen' sin cbi be-sežebe', le nachbia' zjanaque' bene' yiçe' na' bi zjansedteque'. Nach gosacbe'ede' legaquen' ba gosedalene' Jesúsen'. ¹⁴ Na' dan' zecha ben' beyaque ni'ena' txen len Pedroa' na' Juanna', bi besyežele bene' gwnabian' bi yesene' chegaque'. ¹⁵ Nach bene' gwnabian' besyebeje' postlw ca' chy'ole šlac bosoxi'e leçac'e nacle yesone'. ¹⁶ Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalen ni zjanezde' gosone' to yela' guac xen na' bi gac ye'cho bene' bi gosone' yela' guaquen'. ¹⁷ Leteçoze goncho cont cbi gaslas diža' dan' cheso'ena'. Da'nan' cheyala' ye'cho legaque' gata' castigw chegaque' še yesoe'che' xtiža' Jesúsen'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'. ¹⁹ Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'? ²⁰ Bi gac cuezto' bich güe'to' diža' che da' ba ble'eto' na' ba beneto'.

²¹⁻²² Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwdie' choa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'lo' can' gose' bçoz gwnabia' ca' na' bene' gole blao ca' legaque'. ²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosone':

—Xanto' Dios, len' beno' yaban' na' yežlion' na' nisdaon'. Len' beno' beñaç na' be ca' chesaš na' bica'chle da' zjade, na' len' chnabi'o doxen. ²⁵ Na' le' beno' cont da' rey David bzoje' diža' quinga dan' gož Spiritw chion' le', žan:

Bene' ca' cbi zjanaque' bene' Israel chesase' contr le', Xanto' Dios, perw bicze gac can' chesone' xbaden'.

²⁶ Bene' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwselo' cont nabi'e.

²⁷ Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesúsen' ben' nac bene' laždao' xilaže' juisyw, ben' gwlejo' cont nabi'e.

²⁸ Gosone' can' gwchogbi'o gac dan' bžio' bia' cani'te'. ²⁹ Na' na'a Xanto', gwna can' cheson bene' gwnabia' ca', le chesaclaže' yosošebe' neto' bene' güen žin chio'. Na' golen neto' cont bi žebto' güe'to' xtižo'na'. ³⁰ Na' cate' güe'to' xtižo'na' blo'ešca yela' guac che Xi'ino' Jesúsen' bene' laždao' xilaže' juisyon' cont gac yela' guac, na' yesyeyac no bene' chesacšene' na' gac bichle da' yesyebane bene'.

³¹ Na' cate' beyož bosol güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach gosoe' xtiža' Diosen' sin cbi besežebe'.

Gosone' dan' zjade chegaque' toze

³² Na' yogo' bene' ca' gosejnilaže' Criston' toz ca gosac yichjlažda'ogaque'. Na' yogo' bi da' zjade chegaque' gosonen' toze, na' nono gwna: “Chia' da' nga”, o “Chia' da' na'”, le naquen che yogo'lo' gaque'. ³³ Na' postlw ca' len yela' guac xen che Diosen' bosozejni'ide' bene' Jesúsen' bebane' ladjo bene' guat ca'. Na' Diosen' golenchgüe' legaque' len bi dan' gosone'. ³⁴ Na' bibi goc falt bi da' beseyažje bene' gosejnilaže' Criston', le bene' zjanape' no yežlio' o no yo'o gosoten'. Na' mechw dan' besele'ede' che to ton ³⁵ bosonežjuen' postlw ca', na' postlw ca' goseyisen' len bene' beseyažjen'. ³⁶ Can' ben to bene' Chipre bene' le José. Naque' xi'ij diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'. ³⁷ Joséna' bete' to yežlio che' na' mechw dan' ble'ede' chen bnežjuen' postlw ca'.

5

Da' mal dan' goson Ananías na' Safira

¹ Na' zoa to bene' le Ananías na' no'ol che'na' Safira, na' gosote' to yežlio čhegaquen'. ² Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwyej Ananíasen' na' bnežjue' postlw ca' mechon'. ³ Nach Pedroa' gože'ne':

—Ananías, žbixčhen' bzenago' čhe Satanás dan' chnabia' da' xigüe' ca' na' chacdo' xoayago' Spiritw che Diosen'? Chi' no' neto' choņo' doxen mechon' dan' ble'edo' čhe yežlion', len ba gwlo'ošagüe'le laten' par cuinle. ⁴ Čhio' yežlion' cate' biņa' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. žBixčhen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananíasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebčhgüe'. ⁶ Na' besežin to čhope bene' xcuide' gan' gwbiž da' Ananíasen' na' bosyočhele' cuerp čhen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwyo'e lo' yo'on sin čbi nežde' bin' ba goc čhe bene' čhen'. ⁸ Na' Pedroa' gože'ne':

—žTo ca'te' ble'ele čhe yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—žBixčhen' goco' toze len bene' čhion' chaquele gonle Diosen' prueba še lede' can' že' bi cheyala' xoayagcho? Cho'a puert nga zjazeera bene' ba bosocuaše' bene' čhio'na' na' na' yeso'e le'.

¹⁰ Na' la' gwbižte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' čhe'na'. ¹¹ Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen čašil che yodao' blaona' gan' nzi' Čašil che da' Salomón. ¹³ Na' yezica'chle bene' ca' že' Jerusalénna' gosapčhgüe' legaque' bala'an, la'czla' besežebe' yesaque' txen len legaque'. ¹⁴ Perw na' zane' gosejnilaže' Xančhon' na' gosaque' txen, zan bene' byo na' no'ole. ¹⁵ Na' cate' no' bene' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin čhe' na' besyeyacde' še bi yižgüen' chese'ede'. ¹⁶ Na' bene' ca' že' yež da' zjachi' gała'ze ciuda Jerusalénna' ja'aque' zjančhe'e bene' chesacšene na' bene' zjayo'o zjanyaz da' xigüe'. Na' yogo' lole' besyeyacde'.

Bene' saduceo ca' goseyixjue' Pedroa' len Juanna' ližya

¹⁷ Nach ben' nacch bxož blao na' yezica'chle bene' saduceo bene' čhi chesejle' yesyeban bene' guat, besegue'ede' postlw ca'. ¹⁸ Na' gosezene'ne' na' goseyixjue' legaque' ližya. ¹⁹ Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

²⁰ —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban čhegaque' toli tocané.

²¹ Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bxož blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. ²² Na' cate' ben' česap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'. ²³ Gose'e bene' ca':

—Nyeyjwčhach ližyan' na' lecze na' nita' soldadw ca' cho'a puerta' česapen' perw cate' gwsaljwto' puerten' gague no postlw ca' že' lo' ližyan'.

²⁴ Na' ben' nacch bxož blao na' bene' gwnabia' čhe ben' česap yodaon' na' bxož gole blao ca' cate' gosende' rsonna' besyebande', gosene':

—žNac gac da' nga na'a?

²⁵ Na' šlac chesacšejlaže', bžin to bene' gože' legaque':

—Bene' ca' gwdižjwle ližyan' zjaze' čašil čhe yodao' blaona' chososed chosolo'ede' bene'.

²⁶ Nach bene' gwnabia' čhe ben' česap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca'

še yosožie' legaque' yej. ²⁷ Na' cate' besežin postlw ca' lao bene' gwnabia' ben' nita' chosoxi'a, nach ben' nach b̄xoz blao gože' legaque':

²⁸ —Ba bento' mandadw bi güe'le diža' che Jesúsen' na' bich gwsed gwlo'ele bene' xtizen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

²⁹ Nach Pedroa' na' postlw ca' gose'e legaque':

—Nachden da' žialao xren gwzenagto' che Diosen' cdel ca' che benač. ³⁰ Le'e betwle Jesúsen' bda'lnē' to le'e yag cruz, perw Dios ben' chonxencho na' ben' gosonxen da' xozxta'ochō ca' bechis bosbane'ne' ladjo bene' guat ca'. ³¹ Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli' tocane che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xtol'a'chon' nach yezi'xene' chechon'. ³² Neto' nezeto' can' ben Diosen' len Jesúsen' na' choe'to' diža' čhen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw čhen' zoan lo' yichjlaždao' bene' chosozenag che'.

³³ Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. ³⁴ Perw gwzoa to bene' fariseo len legaque' bene' le Gamaliel. Čhed chlo'ede' bene' ley dan' bzoj da' Moisésen' na' gosapčgua bene' le' bala'an. Na' Gamalielen' gwzeche' na' bene' mandadw yesechoj postlw ca' čhyo'ole šlac güe'lene' bene' ca' že'na' diža'. ³⁵ Na' gože' bene' ca' že'na':

—Bene' gualaž, cheyała' goncho xbab nac goncho len bene' quinga cont goncho da' nac güen. ³⁶ Le yosa'laže' can' goc cate' bchoj ben' le Teudas gwne' naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin ža gosot bene' le' na' besyeyaslas ben' gosaque' le' txen, gague bi gocch yesone'. ³⁷ Na' gwdechle ca' tiempen' bosochēle' bał bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' lecze bžin ža gosote'ne' na' bene' ca' gosaque' le' txen lecze besyeyaslase'. ³⁸ Na' da'nan' žia' le'e can' čacda' cheyała' goncho, jaseye bene' quinga, bibi gonecho legaque'. Le še chososed chosolo'ede' xbab čhegacze', yeniten. ³⁹ Na' še dan' chososed chosolo'ede' naquen che Dios, bibi gac goncho cont cbi gaslasen. Cheyała' gwsaca'cho cont bi tilencho Diosen'.

⁴⁰ Na' gosazlaže' bene' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesúsen' bate'tezechle. Nach bososane' legaque'. ⁴¹ Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi' bososaca' bene' legaque' neche dan' chososed chosolo'ede' che Jesúsen'. ⁴² Na' yogo' ža bososed bosolo'ech postlw ca' che Jesucriston' do liž bene' na' cate' čhja'aque' yodao' blaona'.

6

Bene' ca' chesejnilaže' Criston' gosebeje' gaže bene' goson žin bixjw

¹ Na' ca' tiempen' zej chanch bene' ca' chesejnilaže' Jesucriston' na' bene' ca' česo'e diža' griego gwzolaō chesežeše', chesene' no'ol güezeb ca' nčixē legaque' bi chesezi'e lebe len no'ole güezeb ca' česo'e diža' hebreo cate' cheseyise' dan' chese'ej česagw to togaque'. ² Nach postlw ca' šizjnw bosyotobe' yezica'chle bene' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' bene' xtiža' Diosen' cont čhsto' dan' yese'ej yesagw bene'. ³ Da'nan' bene' migw, le cuej gaže bene' lježle, bene' zoachgua Spiritw che Diosen' len legaque', bene' zjanac bene' sina' na' bene' cheson da' güen, na' le gon lo' na'gague' yeseyise' dan' yese'ej yesagw bene' ca'. ⁴ Na' neto' soateze soato' yol' güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' legaque', na' gosebeje' to bene' le Esteban bene' chejnilaže' chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquia ben' bene' txen len bene' Israel. ⁶ Na' bosozoe' legaque' lao postlw ca' na' postlw ca' bosol' güiže' Diosen' čhegaque' na' gosexoa' na'gaquen' yičh'j' bene' ca' cont gosezi' lo' ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejni-laže'ne' na' lecze zan b̄xoz ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenčgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'. ⁹ Na' zoa to yodao' dan' chesene' Yodao' che Bene' ca' Bich Zjanaque' Esclavos. Bene' ca' česedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bał bene' ca' gwzolaō gosacyože' len Estebanna', ¹⁰ perw na' bi besyeželde'

nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'.
 11 Nach gosego'oyele' to chop bene' cont goso'e diža' güenlaže' che', gosene' Estebanna'
 gwneye'e che da' Moisésen' ben' bzoj ley che bene' Israel ca'. Na' lecze gosene' Estebanna'
 gwne' diža' ya' che Diosen'. 12 Na' bene' ca' gosacyože' che Estebanna' bosota bosone' bene'
 lo ciuda na' bene' gole blao che bene' Israel ca' na' bene' ca' chososed chosolo'ede' ley dan'
 bzoj da' Moisésen' cont gosaque' toze. Na' ja'acsese' gan' zoa Estebanna' na' gosezene'ne' na'
 goseche'ene' gan' že' bene' ca' chesenabia' nación Israelen'. 13 Na' goseyiljue' bene' goso'e
 diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj
 da' Moisés. 14 Ba beneto' že' Jesúš ben' naque' bene' yež Nazaret yochinje' yodao' blaona' na'
 yoše'e costumbr checho dan' ben da' Moisés mandadw na' ocho.

15 Na' yogo' bene' ca' zjachi' gan' chesone' yela' justisen' gosene' cho' alao Estebanna' na'
 besele'ede' chactiten ca cho' alao angl.

7

Choe' Estebanna' diža'

1 Nach ben' nacch bꞗoz blaona' gože' Estebanna':

—¿Naquen can' chesena bene' quinga?

2 Na' Estebanna' gože' legaque':

—Le'e bene' gole na' note'teze bene' gualaž, le gwzenag chia' len to chop da' nia' le'e.
 Diosen' ben' nac la'zelagüe bene' zaca' blo'elagüe' da' xozxta'ocho Abraham cate' gwzoe'
 distritw Mesopotamia cate' za' šjasoe' ciuda Harán. 3 Na' Diosen' gože'ne': "Bchoj lažo' na'
 gwlejšyichj bene' biše' lježo' na' gwwej jasoa latje gan' gwlo'eda' le'." 4 Beyož gož Diosen'
 Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin
 ža got da' xe'na' na' gwdechle Diosen' gwche'e da' Abrahanna' gan' zoacho nga. 5 Diosen'
 bi bnežjue' da' Abrahanna' yežlio gaquen che', ne late' da'ozen', san gwne' gaquen che
 xi'in diaža che' cate' ba gote', la'czla' nono xi'ine' na' soa cate' gož Diosen' le' ca'. 6 Nach
 Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'.
 7 Nach Diosen' lecze gože'ne': "Neda' gwnežjua' castigw che nación gan' yesone' xi'in diaža
 chio' ca' esclavos na' gona' cont yesyechoje' naciónna' na' yeside' yesonxene' neda' nga."
 8 Nach Diosen' gože' Abrahanna' gone' güen len xi'in diaža che'na'. Na' bene' mandadw soa
 Abrahanna' to seřw dan' že' circuncisión, le' na' len bene' byo ca' zjanaque' diaža che', cont
 gacia' le' chesejle'e che dan' gwna Diosen'. Da'na'na' cate' golje xi'ine' Isaaquen' bzo'e'be'
 seřw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben
 da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

9 Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi'
 bene' nación Egipto le'. Perw Diosen' gwzoe' len Josén. 10 Na' goclene'ne' len yogo'lol
 da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na'
 gocbe'ede' naque' bene' sina'. Na' da'nan' faraónna' gwleje' le' cont goque' gobernador che
 nación Egipton' na' bene' lo ne'e ližen' na' yežlio che'na'.

11 Na' goc gwbin doxen Egipton' na' lecze can' goc gan' nzi' distritw Canaán na' da'
 xozxta'ocho ca' bi beseželde' da' yesagüe' na' besežaglaochgüe'. 12 Perw na' bžin ža da'
 Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw.
 13 Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze
 faraónna' can' nac diaža che Josén. 14 Na' Josén' bene' mandadw šjasexi'e xagaque' Jacoben'
 na' yogo'lol biše' lježe' ca', zjanaque' ca do gayonšino' bene'. 15 Can' goc gwwej Jacoben' jasoe'
 Egipton' na' Egipton'a' gote', na' lecz na' gosac xi'ine' ca' bene' ca' gosac xozxta'ocho. 16 Na'
 gwdechle besyeyo'e žit benat chegaquen' na' jasecuše'ne' to lo' bloj ba da' gosone' yež gan'
 nzi' Siquem. Da' Abrahanna' gwxi'e ban' cani'te che xi'in da' Hamor gwduxjuen' mechw.

17 Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba
 zej chan bene' Israel ca' že' laž bene' Egipto ca'. 18 Na' ca' chac beža' rey che Egipton' na'
 rey coben' bi gwnežde' can' goclen Josén' nación chen'. 19 Na' rey nga gwdiļjwlaže' bi da'
 mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na'
 cont yesatbe'. 20 Na' ca' tiempen' golje da' Moisésen' na' bebe Diosen' lebe', na' xaxna'be'
 bososcha'ogüe'be' šone bio'. 21 Perw na' bžin ža jasecho'onšaze'be' na' xi'in faraónna' to no'ole
 beželde'be' na' beyo'e'be' liže' boscha'ogüe'be' ca' xi'ine'. 22 Ca' goquen' bsed da' Moisésen'
 tcho'a yela' sina' che bene' Egipto ca' na' bene' da' zaca' na' be'e diža' da' zaca'.

23 Na' čhoa ize da' Moisésen' cate' gwnan šjane'e bene' Israel gualaž che' ca'. 24 Na' jale'ede'
 to bene' Egipto chchi čsaque' to bene' Israelen'. Nach da' Moisésen' betue' bene' Egipton',
 boži'e da' malen' bende' bene' gualaž che'na'. 25 Bene' xbab godce' yesacbe'e bene' gualaž
 che' chaclen Diosen' le' cont yosle' legaque' lo na' bene' Egipto ca', perw bi gosacbe'ede'.

²⁶ Na' beteyo gosedił chopze bene' Israel. Na' bžin da' Moisésen' godce' gone' cont yesenite' binlo, na' gože' legaque': "¿Bixchen' chdillen lježle le'e nacle bene' gualažže?" ²⁷ Nach ben' nap dola'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'?" ²⁸ ¿Lez chaclažo' goto' neda' can' beto' bene' Egipton' neje?" ²⁹ Na' cate' bene da' Moisésen' can' gož bena' le' nach bxonje' jasoe' naciön gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

³⁰ 'Na' goc čhoa iz zoe' na', cate' to angl bene' gwseła' Dios blo'elagüe' le' latje dašen' galaže Ya'a Sinaí, yo'o anglen' to lo' yi' bel chdoljen to lo' yag xis yeše'. ³¹ Na' cate' ble'e da' Moisésen' can' chaquen' bebande' nach gwbigue' yelate' cont ble'esagüe'de' na' bende' choł güiž Xancho Diosen' le', che'ene': ³² "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwixze' catec bžebe', gague cheyaxjde' ne'e. ³³ Na' gož Xancho' le': "Gwlečj xelo'na' cont gapo' neda' bala'an, le' latje gan' zecho'na' naquen' chia'. ³⁴ Neda' ba ble'eda' yela' yaše' yela' zi' da' čde naciön chia' Israelen' bene' že' Egipton' na' ba benda' ca' chesonyaše'. Da'na'na' gaclena' legaque'. Beda na'a cont seła' le' Egipton'."

³⁵ 'Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo' na' bene' Egipto ca', na' angl che Diosen' ben' ble'e da' Moisésen' lo' yi' bel gwzoe' goclene'ne'. ³⁶ Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' čhoa iz. ³⁷ Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che benan' gwzenagle." ³⁸ Da' Moisésen' gwzoe' len da' xozxta'ocho ca' latje dašen', na' lo' Ya'a Sinaín' to angl bene' gwseła' Diosen' gože' le' diža' da' zjansa' yela' mban, na' bzoje' dižan' par chio'.

³⁹ 'Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'. ⁴⁰ Na' šlac zej da' Moisésen' lo' Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laochi tnez. Le ca' nac Moisésen' ben' bebej chio' Egipton', nono neze bin' ba goc che'." ⁴¹ Nach gosone' to me' go'ñ dao' de oro na' gosote' no beyixe' gosonxene' me' daon', na' gosone' lni che bena' gosone' len ni'a na'gaque'. ⁴² Da'nan' Diosen' gwlejjichje' naciön Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' gosoe' xtiža' Diosen' cani', žan:

Le'e bene' Israel, gague nedan' benxenle' caten' betwle beyixe' latje dašen' lao čhoa iz.

⁴³ Benle' no da' benxenle, na' bia'le yodao' da' chacte chedobe gan' benxenle' dan' nzi' Moloc, na' bia'le beljon' benxenle' dan' nzi' Renfán.

Na' dan' ba gwlejjichje' neda', da'nan' cueja' le'e gan' zoalen' na' seła' le'e naciön zito' do gan' nzi' Babilonia.

⁴⁴ Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley chegaque'na'. Na' gosonen' con can' gož Diosen' da' Moisésen' na' con can' blo'ede' le'. ⁴⁵ Nach cate' da' Josué gwče'e legaque' gan' ben Diosen' cont goseque'e yežlio che bene' zito' ca', lecze gosoe' yodao' da' chacte chedobe. Na' ne' bosochine' yodaon' bžinten tiemp che da' rey David. ⁴⁶ Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani'te. ⁴⁷ Perw na' da' xi'ine' Salomón benen'. ⁴⁸ Na' Diosen' ben' chnabia' doxen, bi nacho zoe' lo' yo'o da' chon benačhen', san chac can' gwna Diosen' dan' bzoj to bene' be' xtiže'na' cani', žan:

⁴⁹ Neda' zoa' yaba chnabia',

na' guac gona' con bi chazlaža' lo' yežlion'.

Na' ¿chaquele gonle to liža'na'?

Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ 'Dan' bi chzenagle, dan' bi chejle'le lo' lažda'olen' nacchuale bene' güedenag can' gosac da' xozxta'ocho ca'. Bicze chzenagle che Spiritw che Diosen'. ⁵² Da' xozxta'ocho ca' lecze bosochi bososaque' bene' ca' gosoe' xtiža' Diosen' cani', na' gosote' legaque' caten' gosoe' diža' can' seła' Diosen' Xi'ine' ben' nac bene' güen juisyw. Na' cate' bide', le'e bdelne' lo' na' bene' ca' gosote'ne' na' le'e nable dola' dan' gosote'nen'. ⁵³ La'czla' nombia'le ley dan' bosonežjw angl ca' da' Moisésen', bi chzenagle chen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxetje laye'. ⁵⁵ Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni'

gual gan' zoa Diosen' na' ble'ede' zecha Jesúsen' cuít Diosen' chnabi'e txen len le'. ⁵⁶ Nach Estebanna' gwne':

—Le na'šc nla'xeje yaban' na' nla' Jesúsen' ben' golje' beñaç zech'e cuít Diosen' chnabi'e txen len le'.

⁵⁷ Nach bene' ca' zjanžaguen' leca beseloque' na' bososya'adie' na' bososeyiw naggaque' na' na' to ši'ize ja'acese' gan' ze Estebanna'. ⁵⁸ Nach gosebeje' Estebanna' cho'a yež na' bosozie'ne' yej. Na' bene' ca' bosozie' le' yejen' bosonežjue' xagaque' da' zjandobe' to bene' xcuide' bene' le Saulo cont gapen'. ⁵⁹ Na' šlac chosožie' Estebanna' yej, Esteban' boļ güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo yon' na' gwne' zižje, gwne':

—Xana' bi gono' cuent xtola' bene' quinga dan' chesote' neda'.

Na' beyož gwne' ca', gote'.

8

Saulo bchi bsaque' bene' chesonxen Jesucriston'

¹⁻² Na' ca nac Saulon', gwyazlaže' dan' gosote' da' Estebanna'.

Na' bene' ca' chesejnilaže' Jesucriston' ciuda Jerusalénna' jasecuaše' da' Estebanna', na' gosebežchgüe' che'. Na' gwde gosote' da' Estebanna' gosezolagüe' bosochi bososaque' bene' ca' chesedop chesežag chesonxene' Jesucriston' Jerusalénna', na' yogo' bene' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. ³ Na' Saulon' gwzolagüe' cheje' liž to to bene' ca' chesonxen Jesucriston' chjažobe' no bene' byo na' no no'ole cont chče'e legaque' ližya.

Bene' ciuda Samaria gosende' diža' güen che Jesucriston'

⁴ Na' bene' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. ⁵ Na' ben' le Felipe bžine' ciuda Samarian' na' be'e diža' che Jesucriston'.

⁶ Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'. ⁷ Bebeje' da' xigüe' ca' zjayo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' byo na' no'ole. ⁸ Na' besyebchgüe' bene' ca' že' ciudan'.

⁹ Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e legaque' gože'ne' naque' bene' zaque'. ¹⁰ Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

¹¹ Zan iz bosozenague' che', le gwziye'e legaque' len yela' guaža' che'na'. ¹² Perw cate' Felipen' gwduxjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole. ¹³ Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

¹⁴ Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. ¹⁵⁻¹⁶ Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca hora' biña' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsen'. ¹⁷ Nach gosežoa na' postlw ca' yichjgaque' cont gwzoa Spiriton' lo' yichjlažda'ogaquen'.

¹⁸ Na' ble'e Simón can' cheson postlw ca' chesežoa ne'e yichj bene' cont chzoa Spiriton' len legaque', na' bšabde' legaque' mechw. ¹⁹ Gože' legaque':

—Le gon cont neda' gac žoa na'a yichj note'teže bene' na' soa Spiriton' len legaque' can' chon le'e.

²⁰ Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. ²¹ Bi zaco' gono' da' nga chonto', le yichjlažda'oguo' naquen mal lao Diosen'. ²² Da' cheyała' gono', betinje' da' malen' chono' na' gwñab goclen lao Diosen' cont yezi'xene' čhio' ca' nac xbaren' yo'o lo' yichjlažda'oguo'. ²³ Nachbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

²⁴ Nach Simónna' boži'e xtižen' gože' le':

—Le nab goclen lao Xanchon' cont ne to da' mal dan' baçh gwñao' nga bi gac čhia'.

²⁵ Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

Felipe na' bene' Etiopía

²⁶ Nach Xancho Diosen' gwsele' to angl bene' gože' Felipe:

—Gwyej gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeye' Jerusalénna' jexxene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo ne'e mechw che'. Na' no'ole gwnabian' le' Candace. ²⁸ Na' ben' yo'o lo' carreten' chlabe' libr dan' bzoj da' Isafasen' ben' be' xtiža' Diosen' cani'. ²⁹ Nach Spiritw che Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isafasen'. Nach gože'ne':

—¿Chejni'ido' dan' chlabo'na'?

³¹ Na' bene' Etiopían' boži'e xtižen' gože' Felipen':

—¿Naxce gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob bene' cont gote'ba',
na' ca to xila' dao' be bi chosya'a cate' chšibe'ba',
can' bene', bibi gwne' caten' gosezi' gosebague'ne'.

³³ Na' gosone' le' ca to bene' bibi zaca'.

Na' bi gosone' yela' justis che' ca cheyała' gaquen.

Na' nono diaža che' nita', le goseque'e yela' mban che' lo yežlio nga.

³⁴ Nach bene' Etiopían' gože' Felipen':

—Benšca goclen gwna neda' no čhen' ža ben' bzoj Xtiža' Diosen' ca', ¿che cuinen' že' ca' o še che bene' yoble'?

³⁵ Nach Felipen' gwzologüe' bzejni'ide' bi zejen dan' chlab bene' Etiopían', gože' le' diža' güen che Jesúsén'. ³⁶ Na' ca' chac, besežine' ga žia nis, nach bena' gože' Felipen':

—Nga žia nis, ¿cbi gac soa' nisen' na'a?

³⁷ Nach Felipen' gože'ne':

—Še chejnlažo' Jesucriston' do yičj do lažo', guac so' nisen'.

Nach gwne':

—Chejli'a Jesucriston' naque' xi'ij Diosen'.

³⁸ Nach bene' mandaww bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis. ³⁹ Na' cate' besyechoje' lo' nisen', Spiritw che Diosen' la' beče'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'. ⁴⁰ Nach Felipen' bžine' yež dan' nzi' Azoto na' gwzologüe' gwduxjue'ede' diža' güen che Jesucriston' to to yež da' zjachi' gała'ze ga gwdie' bžinte' Cesarean'.

9

Diosen' bocobe' yičjlaždao' Saulon'

(Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' bene' chesejnlaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyeye' lao bxoz blao che bene' Israelen', ² na' gwñabde'ne' gwzoje' to yiš da' goxe' yosolab bene' že' to to yodao' nita' ciuda Damascon cont yesenežde' nape' yela' gwnabia' sene' bene' ca' ba chesejnlaže' Jesucriston' na' gwcheje' legaque' cont che'e legaque' ciuda Jerusalénna' la'czla' bene' byo o la' no'ole. ³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyečjjen le'. ⁴ Na' gwbiže' lo' yon'. Na' bende' che' to bene' le':

—Saulo, ¿bixčhen' chčhi chsaco' neda'?

⁵ Na' Saulon' boži'e xtižen' gože' le':

—¿No le' bene'?

Nach bena' gože'ne':

—Nedan' Jesús ben' chčhi chsaco'. Na' dan' chgue'edo' neda', chone zi' cuino' can' chac che to go'n be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, ¿bin' chaclažo' gona'?

Nach Xancon' gože'ne':

—Beyas na' gwyej ciuda Damascon' na' zoa to bene' ye'e le' da' cheyała' gono'.

⁷ Na' bene' ca' zja'aclen Saulon' benit bechoł gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'. ⁸ Nach beyas Saulon', perw cate' bexa' lagüen' con bich ble'ede'. Nach bene' ca' nžague'na' gosoxe' ne'e goseche'ene' Damascon'. ⁹ Na' šone' ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananias.

Na' boži'e xtižen' gwne':

—Nga zoa', Xana'.

¹¹ Nach Xanchon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba choł güiže' neda'. ¹² Na' ba bena' cont ble'edagüede' le' gwyo'o gan' zoe'na' na' gwxo'a nao' yejlagüe'na' cont yele'ede'.

¹³ Nach Anaiasen' boži'e xtižen' gože'le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo' nao'. ¹⁴ Na' chesene' ze'e nga noxe' yiš che bxo'z gwnabia' ca' cont sene' yogo'loł neto' chejnilaže'to' le'.

¹⁵ Nach Xancho Jesucriston' gože' Anaiasen':

—Gwyej, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len rey chegaque' ca', na' lente le'e nacle bene' Israel. ¹⁶ Na' gwlo'eda'ne' ca' nac da' yaše' da' zi' da' gac che' dan' gwzenague' chia'.

¹⁷ Nach Anaiasen' gwyeye' gan' zoa Saulon' na' gwyo'e lo' yo'ona' na' gwxo'a ne'e yejlao Saulon', gože'ne':

—Bene' migw Saulo, Xancho Jesúsén' ben' blo'elagüe' le' tnez gan' za'ona' ba gwsele' neda' zedena'a le' cont yele'edo' na' soa Spiritw che Diosen' len le'.

¹⁸ Nach la' besyeyinjte da' ca' že' lo' yejlagüen', zjanaquen ca' yid bdi'ej, na' la' bele'etede'. Nach gwzože'e cont gwyeye' gan' gwzoe' nisen'. ¹⁹ Ca beyoža' gwdagüe' na' beyaclaže'. Na' bega'ane' Damascon' yeto' čop ža len bene' ca' chesejnilaže' Xanchon'.

Saulon' be'e xtiža' Diosen' Damascon'

²⁰ Na' la' gwzolaote gwyeye' to to yoda' be'e diža' che Jesúsén', gwne' len' naque' Xi'in Diosen'. ²¹ Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda choñit chołane' bene' ca' chesejnilaže' Jesúsén' ciuda Jerusalénna'? na' ¿gague da' na'czen' bide' nga na'a cont gwčeje' bene' ca' na' šjasane' legaque' lao bxo'z gwnabia' ca'?

²² Na' Saulon' tža tža Diosen' goclene'ne' cont be'e diža' che Jesúsén' tcho'a, gwne' Jesúsén' naque' ben' gwseła' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosache'ede' dan' che'e legaque' naquen da' li.

Saulon' bi goque' lo' na' bene' ca' chesegue'ede' le'

²³ Na' cate' ba goc sša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. ²⁴ Na' gosenite' chesape' to to cho'a puert che ze'ena' dan' nychj ciudan' cont yesezene' Saulon' yesote'ne' bate'teze choje', perw na' Saulon' goche'ede' ba zjachi'na'ogüe'ne'. ²⁵ Na' bene' ca' chesejnilaže' Jesucriston' besyeletje'ne' le'e ze'e dan' nychj ciudan' šeže'le besyegüe'ene' to lo' žome cont goc bechoje' lo' ciudan'.

Gwyej Saulon' Jerusalénna'

²⁶ Nach beže'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'. ²⁷ Nach Bernabé gwče'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsén' ślac ngüe'e nez zeje' Damascon' na' can' goc Xanchon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsén' Damascon' sin cbi bžebe'. ²⁸ Nach postlw ca' gosejle'e can' goc che Saulon', na' gwzoloa gwdalen Saulon' bene' ca' chesejnilaže' Jesucriston' Jerusalénna'. ²⁹ Na' sin cbi bi chaž chžebe' gwzologüe' chzejni'ide' bene' Israel ca' diža' che Xancho Jesúsén', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'. ³⁰ Na' cate' bene' ca' chesejnilaže' Jesucriston' Jerusalénna' gosache'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samarian' gosenite' bin'lo, noch no bosochi bososaca' legaque', na' gosenita'čhače' gosejnilaže' Xancho Jesúsén' na' bosozenague' che' do yichj

do laže'gaque'. Na' Spiritw che Diosen' benen cont gosacchach laže'gaque' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyaje' jane'e bene' ca' že' yež dan' nzi' Lida. ³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'. ³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. ³⁵ Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr chegaque' cont gosejnilaže' Xancho Jesucriston'.

Dorcas bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'. ³⁷ Perw na' gocšene Dorcasen' na' gottechgüe', na' bosoguažje'ne' na' gosexo'e'ne' to lo' cuart al' zoa yichj yo'o cha'te'. ³⁸ Na' gała'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope bene' jasata'yoede' Pedroa' gose'ene':

—Benšca goclen yo'o len neto' netec na'a.

³⁹ Na' Pedroa' la' gwzate' gwyaje' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis. ⁴⁰ Nach Pedroa' bešaše' yogo'lol bene' ca' chy'ole na' bzoa xibe' bol güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' beža'te yejlao da' Dorcasen' gwne'e Pedroa' na' la' bebe'te'. ⁴¹ Nach Pedroa' beuxe' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo na' Diosen' na' blo'ede' legaque' ba behan Dorcasen'. ⁴² Na' yogo'lol bene' Jopen' gosende' can' goquen', na' bene' zanch gosejnilaže' Xancho Jesucriston'. ⁴³ Na' Pedroa' bega'ane' Jopen' zan ža, gwzoe' liž to bene' le' Simón, bene' chonšagüe' yid.

10

Pedroa' na' Cornelio

¹ Na' ciuda Cesareana' zoa to bene' le' Cornelio, naque' xan to gayoa soldadw, na' bosozoa la soldadw che' ca' Bene' Italia. ² La'czla' Cornelion' cbi naque' bene' Israel, benxene' Diosen', na' lecze ca' goson bene' lo' yo'o che', chesezoe' chesape' Diosen' bala'an. Na' Cornelion' chaclenteže' bene' Israel bene' chyažj chchine', na' zoateže' choł güiže' Diosen'. ³ Na' goc che', to ža do cheda šone ble'edagüede' to angl bene' gwseła' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nežde' can' zo' choł güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'. ⁵ Da' nga gono' na'a, gwseła' bene' šjasexi'e to bene' zoa ciuda Jopen' bene' le' Simón na' lecze le' Pedro. ⁶ Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyala' gono'.

⁷ Cate' beza' anglen' Cornelion' goxe' chope mos che' na' to soldadw bene' chaclen le', na' soldadw lecze chonxene' Diosen'. ⁸ Na' Cornelion' bzejni'de' legaque' yogo'lolte can' goquen' nach gwsele' legaque' Jopen'. Na' gosegüe'e nez zja'aque'.

⁹ Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiz cont jel güiže' Diosen'. ¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchey tap squinen na' chetjen gan' zoe'na'. ¹² Na' lo'enna' zjaže' yogo' cuen beyix'e' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba. ¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' baçh gwnia' gago' bi ñao' be zban zjanacha'.

¹⁶ Da' gwyon ñi'a gož Diosen' le' ca' nach la' begüete lachen' le'e yaban'. ¹⁷ Šlac chaczejlaže' Pedroa' bi zejen dan' ble'edagüeden', besežin bene' ca' gwsela' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. ¹⁸ Nach zižje gosenabe' še le na' zoa to bene' lecze le Simón Pedro. ¹⁹ Na' Pedroa' ñe' chone' xbab che dan' ble'edagüede', cate' gož Spiritw che Diosen' le':

—Simón, šone bene' chesyeljvue' le'. ²⁰ Gwžoža' na' beyetj cont šejleno' legaque', na' bi gaczejlažo' la'czla' bi zjanaque' bene' Israel, le neda' gwsela' legaque'.

²¹ Nach Pedroa' beyetje' jašague' bene' ca' gwsela' Cornelion', nach gože' legaque':

—Nga zoa', nedan' Simón Pedro. ¿Biçhen' cheyljwle neda'?

²² Nach gose' bene' ca' le':

—To xan soldadw bene' le Cornelio gwsele' neto'. Le' zejzce' chone' da' güen na' chonxene' Diosen' na' yogo'lol bene' Israel ca' cheso'e xtiže' ca bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwejlene' legaque' na' gwche'e to chope bene' Jopen' bene' chesejnilaže' Jesucriston'.

²⁴ Na' beteyo cate' besežine' ciuda Cesarean', Cornelion' baçh ntobe' biše' lježe' len xmigüe' ba zjaže' liže'na' chesebeze' le'. ²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. ²⁶ Na' Pedroa' bsože'e le', gože'ne':

—Bežoža'. Lecze benach neda'.

²⁷ Na' ñe' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'. ²⁸ Nach gože' legaque':

—Nezceze ley che neto' bene' Israel žan bi cheyala' šo'to' liž bene' bi zjanaque' bene' Israel, na' žan bi cheyala' gonto' txen len le'e bi nacle bene' Israel. Perw baçh bzejni' Diosen' neda' ñe to bene' cbi cheyala' gona' xbab che' naque' bene' zban par šo'a liže'na'. ²⁹ Da'nan' cate' bene' quinga bedesexi'e neda', bi goczejlaža' še nacle gona', san ba bida' do yichj do laža', na' na' chaclaža' nezda' ¿bixchen' gwñio' neda'?

³⁰ Nach Cornelion' gože'ne':

—Na'a chac tap ža do cheda šone zoa' sin cbibi nagua', na' choj güiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'. ³¹ Nach gože' neda': “Cornelio, ca nac da' gwnabdo' Diosen', baçh bzenague' chen, na' nezde' chnežjo' da' chyažj da' chchine' bene' yaše'. ³² Na' na'a gwsela' to chope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid. Liž ben' chonšagüe' yiden' zoañ galaže cho'a nisdao'. Na' cate' la' Pedroa' ližo' nga nach güe'lene' le' diža'.” ³³ Nach la' gwsela'tia' bene' ca' bedesexi'e le', na' choxclenteco' baçh bido'. Na' nezceze Diosen' yogo'to' nita'to' nga gwzenagto' yogo'lolte dan' ba ben Diosen' mandadw ñao'.

Pedroa' be'e diža' liž Cornelion'

³⁴ Nach Pedroa' gwzologüe' be'e dižan' gwne':

—Da' li baçh nezda' nono nla' bene' nacho nzoa Diosen' le' to šla'aze. ³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'. ³⁶ Diosen' gwđixjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'lol bene'. ³⁷ Nezele dan' ba goc doxen distritw Judean' dan' gwzolao distritw Galilean' gwde gwđixjue'e da' Juanña' xtiža' Diosen' na' bzoe' bene' nis. ³⁸ Nezele Diosen' gwleje' Jesúsen' ben' naque' bene' yež Nazaret cont chaclene' chio' benach, na' be'ene' Spiritw che'na' na' yela' chnabia'. Na' gwda Jesúsen' bene' da' güen na' beyone' yogo'lol bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. ³⁹ Neto' nezeto' na' choe'to' diža' che yogo' da' güen da' ben Jesúsen' na' dan' bsd blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. ⁴⁰ Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesúsen' blo'elagüe' neto'. ⁴¹ Gague yogo'lol bene' besele'ede' Jesúsen' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwđagwłento'ne' txen gwde bebane' ladjo bene' guat ca'. ⁴² Jesúsen' bene' mandadw chixjue'eto' benachen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. ⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan not'e'z bene' yesejnilaže' Jesucriston', Diosen' yezi'xene' xtol'a'gaque'na'.

Spiritw che Diosen' gwyo'on lo' yichjlaždao' bał bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. ⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo'

yichjlaždao' bene' ca' cbi zjanaque' bene' Israel. ⁴⁶ Gosache'ede' gwyo'o Spiritw che Diosen' lo' yichjlaždao' bene' ca' ze' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'. ⁴⁷ Nach Pedroa' gože' bene' Israel ca' nžaguen':

—Bibi de da' gwžon yesezoa bene' quinga nisen', le nacbia' ba zoa Spiritw che Diosen' len legaque' can' zoan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

11

Pedroa' gože' bene' Jerusalén ca' can' goquen'

¹ Na' postlw ca' na' yezica'chle bene' ca' ze' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'.

² Nach Pedroa' beze'e gweyche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' goselagüe' che', ³ gose'ene':

—;Bixchen' ba gweyje' gan' ze' bene' cbi zjanaque' bene' Israel na' jatagwleno' legaque'? Malen' ba beno'.

⁴ Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

⁵ —Šlac zoa' ciuda Jopen' chol' güiža' Diosen', ble'edagüeda' ca' to lache' xen nchej dapte squin ca' chetjen le'e yaban' zan' gan' zoa'na'. ⁶ Na' gwna'yana' na' ble'eda' lo'emna' ze' beyixe' ca' chaš yežlion' be žia tap ni'a na', na' ble'eda' be chososa' le'eban' lo' yo, na' be žia xil be chaš le'e yaba, na' bał be ca' zjanacba' be znia. ⁷ Na' benda' gož Diosen' neda': "Gwyas Pedro, na' betw be ca' gwdagw." ⁸ Nach boži'an gwnia': "Xana', bi gagua' legacba'. Ne tni'aze biña' gagua' be zban zjanac ca', le bi de lšens len ley cheto'na' gagwto' ben' zjanac ca'." ⁹ Na' da' gwchop ni'a Diosen' gwne': "Be bač gwnia' gago' bi nao' zjanacba' be zban."

¹⁰ Šon ni'a gože' neda' ca' nach begüe lachen' le'e yaban'. ¹¹ Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'.

¹² Na' Spiritw che Diosen' bzejni'in neda' cheyała' ša'alena' legaque' sin cbi gacžejlaža', na' gwchi'a bene' lježcho quinga xop, gweyito' Cesarean' bžinto' liž ben' le Cornelio na' gwyo'oto' ližen'.

¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwseła' bene' šja'ac ciuda Jopen' šjasexi'e to bene' le Simón Pedro. ¹⁴ Bena' ye'e le' len bene' lo' yo'o chio' nac gonle cont gata' yeła' mban chele toli tocan."

¹⁵ Nach cate' gwzologua' bia' dižan' len bene' ca' ze' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'.

¹⁶ Nach jaysalaža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e."

¹⁷ Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' žnox naca' neda' gwžona' gon Diosen' dan' chaclaže' gone'?

¹⁸ Na' ca' beyož bosozenague' xtiža' Pedroa' bich bi gosene' che Pedroa' dan' gweyje' liž Cornelion', san goso'e yeła' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetingjde' xtola'gaque'na' cont gwnežjue' yeła' mban čegaque' toli tocan.

Bene' ca' chesonxen Jesucriston' ciuda Antioquia gan' mbane Siria

¹⁹ Na' gwde gosot bene' Israel ca' Estebanna', gosezologüe' bosochi bososac'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosaslase'. Bał' ja'aque' do distritw Fenicia, na' yež ca' zjachi' to lo' yežlio da' žia lo' nisaon' gan' nzi' Chipre na' do ciuda Antioquia ga mbane distritw Siria. Na' gan' zja'auen' bososed bosolo'ede' con bene' zjanac bene' Israel xtiža' Jesús'en', bi bososed bosolo'eden' bene' cbi zjanaque' bene' Israel.

²⁰ Perw na' to čhope bene' Chipre na' bene' ciuda Cirene lecze bosoxonje' ja'aque' ciuda Antioquian', na' gosezologüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel.

²¹ Na' Xancho'n' goclene' legaque' len yeła' guac che'na' na' bene' zan gosebejyichje' da' ca' chesejnilaže' na' gosejnilaže' Xancho'n'.

²² Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquian', nach bosose'e Bernabén' cont gweyje' Antioquian'.

²³ Na' cate' bžin Bernabén' Antioquian', ble'ede' da' li ba goclenchgua Diosen' bene' ca', na' bebechgüede'. Nach gwneyoede' legaque' nita'čače' yosozenague' che Xancho'n' do yichj do laže'.

²⁴ Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquian' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'. ²⁶ Na' gosenite' Antioquían' tgúiz gosone' txen len bene' Antioquia ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquia na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

²⁷ Šlac nita' Bernabén' na' Saulon' lo ciuda Antioquían', besežin bał bene' Jerusalén ben' chosozende' bene' bi dan' ba gož Diosen' legaque'. ²⁸ Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwñabia' ben' le Claudio doxen gan' mbane nación Roman', cana' goc gwbinna' can' gwña Agabon'. ²⁹ Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gacate' da' gac yosonežjue'. ³⁰ Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia cheseñe'e bene' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

¹ Na' ca tiemp'a rey Herodes bchi bsaque' bał bene' ca' chesonxene' Jesucriston'. ² Nach bene' mandawd gosote' Jacobo bene' biše' Juanna' len spada. ³ Na' goche'e rey Herodesen' chesybe bene' Israel ca' dan' bene' mandawd gosote' Jacobon', nach bene' mandawd gosezene' Pedroa' cate' goła' lni cate' chesagüe' yetextil dan' bibi levadura nchixen. ⁴ Nach Herodesen' gwdixjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lñin' cont gone' yela' justis che' lao bene' že' lo ciudad'. ⁵ Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. ⁷ Cate'cze zejzenez to angl bene' gwsela' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. ⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon' chio' na' beyo'o len neda'.

⁹ Nach bechoj Pedroa' zena'ogüe'ne' perw bi goche'ede' še da' li anglen' chon ca' len le', con gocde' še chle'edagüede'. ¹⁰ Beyož besyedie' chop cuen gan' nita' soldadw ca' chesape' ližyan', besyěžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'. ¹¹ Cana'ch goche'e Pedroa' da' li ba bechoje' ližyan', nach gwne':

—Ba cheyacbe'eda' da' liče Xana' Diosen' ba gwsele' angl che'na' na' bosle' neda' lo na' Herodesen' na' bosle' neda' lo yogo' da' ca' chesaque bene' Israel gualaż chia' ca' yesonde' neda'.

¹² Na' ne' chonte Pedroa' xbaben' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag bene' zan chosol güiže' Diosen'. ¹³ Nach bsiže' cho'a puert zaguanna' na' la' bchojte to bi' no'ole le Rode jaña'be' non'. ¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyjesbe' gan' že' bene' ca' jayežbe' legaque' ba bla' Pedroa'. ¹⁵ Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

¹⁶ Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'. ¹⁷ Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle bene' lježgaque' can' ba goquen'. Nach beze'e zjajde' ga yoble.

¹⁸ Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

¹⁹ Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

²⁰ Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwñe' chegaque' lao reyen', le' gosaclaže' gwzenag reyen' chegaque' cate' šja'aque' lagüe'na' šjaseñabe' yesenite' binlo len le'. ²¹ Nach rey Herodesen' bžie' bia' to ža gwto'be' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'. ²² Nach bene' ca' bososye'e, gosone':

—Diosen' choe' diža', gague benachen'.

²³ Na' lo hora' gwseła' Xancho Diosen' to angl ben' ben' cont gocšene reyen' gwž'e'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

²⁴ Perw ca' nac xtiža' Xancho Jesucriston' gos gwłaljchuan'.

²⁵ Na' Bernabén' len Saulon' beyož gosone' yogo' da' cheyala' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseče'e to bene' le' Juan na' lecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

¹ Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaque', na' zjalen bene' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea. ² Na' to ža bene' ca' cheseñilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'. ³ Nach bene' ca' bosol' güižche' Diosen' sin cbi zjane'ej zjanagüe', nach gosexoa na'gaque' yichj Saulon' len yichj Bernabén', gosone' ca' cont gosegüe'e xšin Diosen' lo na'gaque'. Gwdena' bosose'e legaque'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwsełan' Bernabén' len Saulon' yež gan' nzi' Seleucia. Na' Seleucia' goso'e lo' barcon' cont besežine' Chipre. Na' Chipren' naquen' to yežlio dao' dan' cheli' lo' nisdaon'. ⁵ Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che bene' Israel ca'. Na' zjanče'e Juan ben' lecze le Marcos cont chaclene' legaque'. ⁶ Na' ca' gosaše' gosedie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. ⁷ Barjesúsen' naque' xmigw gubernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'. ⁸ Na' Barjesúsen' lecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'. ⁹ Na' Spiritw che Diosen' zoachguan len Saulon' ben' lecze le Pablo, nach bcos lagüen' gwñachgüe' Elimasen'. ¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. žBičhen' cbi chbezo' chžono' yosozenag bene' diža' li' che Xanto' Diosen'? ¹¹ Da'n'an' Xanto' Diosen' gone' castigw chio' na' cholo' to tiemp, bi gac le'edo' gwbiža'.

Nach la' gwčohtie', gwde ca' to bejw lo' yejlagüe'na', nach gwzolagüe' chgan chtobe' cheyiljue' no goxe'ne'e cont cue' nez. ¹² Gubernadore' ble'ede' can' goquen' na' gwyejle'e xtiža' Xancho Jesucriston' na' bebanhgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalénna'. ¹⁴ Na' Pablon' len Bernabén' gosa'aque' yež Perge na' besežine' ciuda Antioquían' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. ¹⁵ Na' ca' beyož blab to bene'

libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodaon' na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže' le güe' le neyoele bene' quinga, guac nalen na'a.

¹⁶ Nach Pablon' gwzechede' bene' señw len ne'ena' cont yosozenag bene' ca' zjachi' na', na' gože' legaque':

—Le gwzenag le'e bene' Israel na' nochle chonxen' le Diosen'. ¹⁷ Dios ben' chonxen chio' bene' Israel gwleje' da' xozxta' ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'. ¹⁸ Na' Diosen' gwdape' yela' chxenlaže' choa iz len da' xozxta' ocho ca' šlac gosaše' latje dašen'. ¹⁹ Diosen' bonite' gaž yež da' zjachi' gan' nzi' Canaan' cont bnežjue' da' xozxta' ocho ca' yežlo chegaquon'. ²⁰ Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaše iz bžinte tiemp che da' Samuel ben' be'e xtiža' Diosen' cani'. ²¹ Nach tiemp che da' Samuelen' da' xozxta' ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te. ²² Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaí nga, le chaclaže' chone' can' chazlažan' na' chzenague' bite' tez da' chapa' ne'." ²³ Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli' tocañe can' gwne' cani'. ²⁴ Na' cate' biña' solao Jesús en' gwsele' gwlo' ede' bene', da' Juanna' gwduxjue' ede' len yogo' bene' Israel gualaž chechon' cheyala' yesyetinjide' xtoła' gaque' na' yesezoe' nis. ²⁵ Na' cate' beyož ben Juanna' dan' yo' lo ne'e gone', nach gože' bene' ca' chosozenag che': "žChonle' xbab naca' neda' ben' chbezele' selja' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

²⁶ Bene' migw, chio' naccho xi'in diaža che da' xozxta' ocho Abraham, na' nochle le'e chonxen' le Diosen' txen len neto' bene' Israel, xtiža' Diosen' dan' žan gone' chio' yela' mban toli' tocañe naquen par chio'. ²⁷ Bene' ciuda Jerusalén ca' len bene' gwnabia' chegaque' ca' bi gosejli'e gwsele' Diosen' Jesús en', na' bi gosejni' ide' da' ca' zjanyoj che' le'e libr dan' bosozoj bene' ca' goso'e xtiža' Diosen' cani' la' czla' chosolaben' lo' yodaon' yogo' ža che Dios. Na' dan' bi gosejni' ide', da' nan' gosechoglagüen' yesote' Jesús en', nach goc can' nyoj che'. ²⁸ Na' la' czla' gosenezde' bibi da' mal non Jesús en' cont yesote' le', gosenabde' Pilaton' gone' mandadw yesot soldadw che' ca' le'. ²⁹ Na' goc che Jesús en' yogo' dan' nyoj che' le'e Xtiža' Dios dan' bosozoj bene' ca' gosenita' cani'. Na' beyož gote' na' nach besežin bene' besyeletje' cuerp che' na' le'e yag cruzen' na' bosocuaše' ne'. ³⁰ Na' gwdena' Diosen' bechis bosbane' le' ladjo bene' guata'. ³¹ Na' bene' ca' zjanaque' Jesús en' txen cate' gwze'e distritw Galilea cont gweje' ciuda Jerusalén, legaque' besele' ede' Jesús en' yezan ža gwde bebane' ladjo bene' guata', na' legaque' cheso'e diža' chen' len yezica' chle bene' Israel.

³² Na' lencze neto' chyixjue' eto' le'e diža' güen cont nezele ba chac da' güen dan' gož Diosen' da' xozxta' ocho ca' cani'. ³³ Ba benen' len chio' naccho xi'in diaža che da' bene' ca', dan' bosbane' Jesús en' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'." ³⁴ Na' Diosen' lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp chen', žan: "Gona' güen len le' dołol can' goša' rey Davin'." ³⁵ Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'!" ³⁶ Nezecho da' rey Davin' gwnabi'e bene' Israel ca' gwnita' ca' tiemp chen' can' gwnalaže' Diosen' na' beyož en' gote' na' bgaše' len yezica' chle da' xozxta' ocho ca' na' lecze gožo' cuerp chen'. ³⁷ Perw na' Diosen' bosbane' Jesús en' ben' nyoj Xtižen' žan ca', na' bi gožo' cuerp chen'. ³⁸ Na' cheyala' nezele bene' migw, Jesús en' ben' choa' diža' che', chezi' xene' xtoła' note' tez bene' chejni' laže' ne'. ³⁹ Bi beyaccho bene' güen len Diosen' da' bi benyane' cho can' ža ley dan' bzoj da' Moisés en', perw note' tezcho chejni' laže' cho Jesús en', len' ba cheyone' chio' bene' güen.

⁴⁰ Le gwsacj' cont bi gac chele can' bosozoj bene' ca' goso'e xtiža' Diosen' cani', žan:

⁴¹ Cheyala' gonle' xbab, le'e chnelaole' chia', na' cheyala' yebanele, le gwžin ža cuiayi' le.

Neda' Dios gona' to da' yebanele šlac mbanle,

to da' bi šejle' le la' czla' še no chixjue' le'e can' gaca'.

⁴² Beyož bežjni' i Pablon' bene' ca' že' na' nach besyechoje' lo' yodaon'. Nach bene' ca' ba gosen cuine' bene' Israel gosata' yoede' Pablon' len Bernabén' yeside' ža che Dios xmanña' yeto cont yosozejni' ide' legaque' yelate' che da' ca' ba bosozejni' ide'. ⁴³ Nach bene' zan bene' Israel len zan bene' ca' ba gosen cuingaque' bene' Israel zja' aclene' Pablon' len Bernabén'. Nach Pablon' na' Bernabén' goseneyoede' legaque' cont nita' che' yesejnilaže' che' Diosen' ben' chaclen' legaque'.

⁴⁴ Na' cate' bežag xmanña' ža che Dios yogo'lołcze bene' lo ciudan' besežag cont bosozenague' xtiža' Diosen'. ⁴⁵ Na' gwnita' bene' bi gosejle' che Jesusen', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'. ⁴⁶ Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž čheto'. Na' na'a dan' bi chaclaže'le gwzenagle, chonle cont bi gon' Diosen' le'e yela' mban toli' tocane. Da'nan' na'a gwzejni'ito' bene' ca' bi zjanac bene' Israel. ⁴⁷ Gonto' ca' neche Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' čhian' lo' yichjlaždao' bene' ca' bi zjanac bene' Israel, cont bene' ca' že' doxen yežlion' yesache'ede' guac nitlao xtoła'gaque'.

⁴⁸ Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenčgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaque' toli' tocane, legaque' gosejle'e xtiža' Diosen' dan' be' Pablon' len Bernabén'. ⁴⁹ Can' goc bene' ca' že' doxen distritwna' gosende' xtiža' Xancho Jesucriston'. ⁵⁰ Perw bał bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo ciudan', na' bosošē'e xbab čhegaquen' cont gwzolao gosone' contr Pablon' len Bernabén' na' bičh goso'e latje yesenite' doxen distriton'. ⁵¹ Nach Pablon' len Bernabén' cate' besyeya'aque' ciuda Antioquian' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebej legaque' malen' chesone' chosolague' legaque'. Nach jaya'aque' yež Iconio. ⁵² Na' mbalazčgua gwnita' bene' ca' chesonxen Jesucriston' ciuda Antioquian', na' Spiritw che Diosen' gwzoachguan len legaque'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e che'. ² Perw na' gwnita' bene' Israel ca' bene' bi gosejle'e che Jesucriston', na' legaque' gosenelagüe' che bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon' len Bernabén'. ³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xančhon' blo'e le diža' lin' cheso'e chesene' Diosen' čhacde' benačhen', le be'e legaque' yela' guac cont gosone' da' zaca' yebanecho cont gosaclene' bene'. ⁴ Na' bene' ca' že' lo yežen' gosaque' čhople, bałe' gosede'e bene' Israel ca' ben' bi gosejnilaže' Jesucriston' na' yebałe' gosede' e Pablon' len Bernabén'. ⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čhegaque' cont yesone' contr Pablon' len Bernabén' na' yosochele' legaque' yej. ⁶ Perw cate' gwneze Pablon' len Bernabén' dan' chesacłaže' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia. ⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej ślac zoe' Listran'

⁸ Na' yež Listran' besežague' to bene' golje' nxinj ni'e ca', cate' gocte' bidao' bi goc se'e. ⁹ Con čhi'teze' chzenague' choe' Pablon' dižan'. Nach Pablon' gwne'e le' na' gocbe'ede' bena' chejle'e Diosen' nape' yela' guac cont yeyone' ni'en'. ¹⁰ Nach Pablon' boł güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'. ¹¹ Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' benačh.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le' Pablon' choe'che' dižan'. ¹³ Na' yodao' gan' chesonxene' xangaque' Júpiteren' zoan cho'a yež. Na' bžoz che Júpiteren' jaxi' e go'n be ba zjanone' xdan zjanžie' legacba' corona yej. Nach bžoxa' gwče'e bene' zan cho'a yežen' gan' zoa puert che ze'e dan' nyechj yežen' na' goclaže' yesote' go'nen' yesonxene' postlw ca'. ¹⁴ Na' Pablon' len Bernabén' cate' gosache'ede' can' yeson bene' ca', gosečeza' xagaque' dan' bi gosacłaže' yesonxen bene' ca' legaque'. Nach gosedie' gachol bene' ca' gose'e legaque' zižje:

¹⁵ —Bene', žbixchen' chonle ca'? Lecz benačh neto'. Za'to' cont chyixjue'eto' le'e cheyala' gwša' yichjlažda'olen' na' cuejyichjle costumbr quinga dan' bibi zaca' na' gonxenle' Dios ben' zoa toli' tocane. Le' bene' yaban', yežlion', nisdaon', benačh, be ca' chesaš na' bite'tezehle' da' chle'echo le'e yaban', lo yežlion' na' lo' nis. ¹⁶ Cani' Diosen' bi bžone' gon benačhen' bite'tez

da' mal da' žan yesone'. ¹⁷Perw zoacze' chone' da' güen len yogo' beñaçh cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

¹⁸Na' la'czla' Pablon' len Bernabén' gosene' yogo' da' ca', cane gosezoede' bosožone' yesot bene' Lистра ca' go'ḥna' yesonxene' legaque'.

¹⁹Nach besežin ba' bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Lистра ca' cont gosaque'ne' txen bosočele' Pablon' yej. Na' cate' gosone' xbab baçh gote' nach gosexobe' le' cho'a yeža' na' bosyocua'ane' le' na'. ²⁰Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

²¹Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. ²²Na' to to yež gan' ja'aque' gosone' çhach laže' bene' ca' chesonxene' Jesucriston' na' gose'e legaque' yesenite' yesonxene' le' do yičh do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. ²³Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

Pablon' len Bernabén' jaya'aque' Antioquía gan' mbane distritw Siria

²⁴Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. ²⁵Na' goseyixue'ede' xtiža' Jesucriston' yež Perge na' beyožen' jaya'aque' yež Atalia. ²⁶Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le bene' Antioquíanan' gosele' Pablon' na' Bernabén' canate' na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' na'a besyēžine' ba beyož gosone' dan' gosego'o bene' ca' lo na'gaque' yesone'. ²⁷Na' bosyotobe' bene' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzolao chesejnilaže' Jesucriston'. ²⁸Na' besyega'ane' Antioquían' sša len bene' ca' chesonxene' Jesucriston'.

15

Gosone' yela' güxi'a len bene' ca' že' ciuda Jerusalénna'

¹Na' šlac Pablon' len Bernabén' ne' nite' ciuda Antioquían' besežin to çhope bene' za'ac distritw Judean' na' gosezolağüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' seřw dan' že' circuncisión can' za ley dan' bzoj da' Moisésen' cont gata' yela' mban çhegaque' toli tocaņe. ²Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' goseçhoglagüen' šja'ac to çhope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia cheseņe' lježgaquen' cont yesone' yela' güxi'a len legaque' che dan' chosozejni'i bene' ca' za'ac distritw Judean'.

³Nach bene' ca' chesedop chesežag chesonxene' Jesucriston' Antioquían' gosele' legaque' Jerusalénna'. Na' bene' ca' zja'aquen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebeghüede' gosende' dižan'.

⁴Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia cheseņa' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'. ⁵Nach nita' to çhope bene' Fariseo bene' ba chesonxene' Xancho Jesucriston', na' tgüejje' tgüejje' gosozie' gosene':

—Note'tez bene' byo gonxene' Jesucriston' cheyała' soe' seřw dan' nzi' circuncisión na' cheyała' gone' can' za ley dan' bzoj da' Moisésen'.

⁶Nach besedobe postlw ca' len bene' ca' chosogüia cheseņa' lježgaque', na' bosoxi'e še naquen can' chesena bene' ca'. ⁷Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'. ⁸Na' Diosen' nombi'e yičhjaždao' yogo'lol bene', na' cont nezecho chacde' bene' ca' bi zjanac bene' Israel can'

chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda' ochon'.⁹ Toz ca chon Diosen' len chio' na' len legaue', note'tezcho ba beya' beyibe' lažda' ochon' dan' chejle'cho che Jesúcrison'.¹⁰ Ba chonle' contr Diosen' dan' chaquele' gwchile' bene' ca' bi zjanac' bene' Israel' cont yesa'ogüe' costumbr' che chio' bene' Israel. Nezele' catec' zdebe' zjanaquen, ne' chio' ne' xozxta' ocho' ca' bi goc' yesone' yogo' can' ža diža' gol' cheto' ca'.¹¹ Bi cheyała' goncho' ca', le' nezecho' note'tez' naccho, Xancho Jesúsen' chone' yela' mban' checho' toji' tocañe' dan' chacde' chio', gague' neče' dan' choncho' can' ža ley' che Moisés.

¹² Beyož' gwna' Pedroa' ca' nach' bich' bi gosena' bene' ca', san' yogüe' gosenite' šize' bosozenague' xtiža' Pablon' len' Bernabén'. Goso'e' diža' can' bnežjo' Diosen' legaue' yela' guac' cont' gosone' da' zaca' yebanecho' gan' že' bene' ca' bi zjanac' bene' Israel.¹³ Na' beyož' goso'e' dižan' nach' postlw' Jacobo' be'e' dižan', gwne':

—Bene' migw, le' gwzenag' diža' nga' gua'a.¹⁴ Simón' Pedro' nga' ba' bzejni' ide' chio' can' ben' Diosen' da' nechw' len' bene' bi zjanac' bene' Israel' cont' blo'e' chacde' legaue', ba' gwleje' bale' cont' zjanaque' lo' ne'e.¹⁵ Na' dan' goc' ca' chotiñen' da' ca' bosozoj' bene' goso'e' xtiža' Diosen' caní', le' nyojen' žan:

¹⁶ Tena' yida' da' yoble' na' gona' cont' nabia' xi'in' diaža' che' da' rey' David, la'czla' na'a' nono' xi'in' diaža' che' chnabia', na' gona' cont' soa' toe' da' yoble' nabi'e.

¹⁷ Gona' ca' cont' yogo' bene' bi zjanac' bene' Israel' guac' yeseyiljue' nac' yesone' yesenite' binlo' len' neda'.

Note'tez' bene' nación' guac' yosol' güiže' neda'.

¹⁸ Can' gwna' Xancho' Diosen' caní'te, bene' cont' goseneze' bene' can' gaquen'.

¹⁹ Na' lagüe' nyoj' Xtižen' žan' ca', chacda' neda' bi cheyała' gonecho' zed' bene' ca' bi zjanac' bene' Israel' bene' ba' chesebejyichje' costumbr' gole' chegaue' na' chesonxene' Diosen'.

²⁰ Con' gwzoycho' ye'gachone' bi yesone' txen' len' bi dan' cheson' bene' dan' chesene' naquen' che' l' gua'a' lsaca' dan' chesonxene', neca' yesata'lene' no' no'ol' cbi' nac' no'ol' chegaue' o' bene' byo' cbi' nac' bene' chegaue', neca' yesagüe' be' chesote' chosošoque' do' lba'ba', neca' yesagüe' chen' che' beyixe'.²¹ Nabcho' bi yesone' da' ca', le' cani'te' nita' bene' to' to' yež' chosozejni' ide' ley' chechon' dan' bzoj' da' Moisésen' dan' žan' bi goncho' da' ca', na' chosolabe' leyna' yogo' ža' che' Dios.

²² Nach' postlw' ca' len' bene' chosogüia' chesene'e' yezica'chle' bene' chesonxene' Jesucriston', na' len' bene' chesedop' chesežag, gosazlaže' can' gwna' Jacobon', na' bosoxi'e' choj' chope' bene' lježe' šja'aque' ciuda' Antioquían' txen' len' Pablon' na' Bernabén'. Na' gosebeje' Judas' ben' lecze' gože'ne' Barsabás, na' Silas, ben' zjanac' bene' blao' len' legaue'.²³ Na' bosozoje' to' cart' da' gosoxe' bene' ca' žan:

“Neto' postlw, len' bene' chosogüia' chesene'e' yezica'chle' bene' chesonxene' Jesucriston', na' len' yogo' bene' chesedop' chesežag' len' neto', chguapto' le'e' tiox' le'e' zoale' Antioquían' na' distritw' Siria' na' distritw' Cilicia. Bi' nacle' bene' Israel' perw' ba' nac' lježcho' chonxencho' Jesucriston'.²⁴ Ba' nežeto' to' chope' bene' besechoj' nga' ja'aque' gan' zualen' gosone' šejlaže'le' len' dan' bosozejni' ide', na' chacle' tole' dan' chesene' cheyała' soale' señw' dan' že' circuncisión' na' cheyała' gonle' yogo' bichle' dan' ža' ley' dan' bzoj' da' Moisésen'. Bi' nežeto' gosa'aque' na' gague' mandadw' che' neto' gose'e' le'e' ca'.²⁵ Da'n'an' gwzoato' txen' bento' yela' güexi'a' gwlejto' chope' bene' quinga' chsel'a'to' gan' zualen', txen' len' postlw' Pablon' na' len' Bernabén', bene' ca' chaquechgueto'.²⁶ Nežeto' Pablon' len' Bernabén' zan' las' ba' ša' yesate' dan' cheso'e' xtiža' Xancho' Jesucriston'.²⁷ Na' chsel'a'to' Judasen' len' Silasen' cont' yosozejni' ide' le'e' diža' cho'a' yogo' dan' bzojto' le'e' cart' nga'.²⁸ Chazlaže'to' can' bzejni'i' Spiritw' che' Diosen' neto', na' da'n'an' bi' gonto' mandadw' bichle' da' zdebe' gonle' san' da' quinga' chaqueto' chonen' byen' cbi' gonlen'.²⁹ Bi' gagwle' yela' guagw' dan' ba' bosozje' lo' l' gua'a' lsacan' chesonxenen', na' bi' gagwle' be' ca' chesote' chosošoque' do' lba'ba', bi' gagwle' chen' che' beyixe', na' bi' gata'lenle' no'ol' cbi' nac' no'ol' chele' o' bene' byo' ben' cbi' nac' bene' chele. Na' še' gwzenagle' che' da' quinga' ba' gwnato' bi' gonle', güenna' chonle' še' ca'. Da' na' ze' chzoyto' le'e' cart' nga. Diosen' gaclenšque' le'e.”

³⁰ Can' goquen' bene' ca' chesonxene' Jesucriston' Jerusalénna' gosesele' bene' ca' chope' len' Pablon' na' len' Bernabén' gosa'aque' zja'aque' ciuda' Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaue' carten' goseseła' bene' Jerusalén' ca'.³¹ Na' cate' bene' Antioquía' ca' bosolaben' besyebede' ca' consejon' nyoj' le'e' carta'.³² Na' Judasen' len' Silasen' lecze' gosa'aque' bosozende' bene' bin' ba' gwna' Diosen'. Nach' gosoe'lene' bene' Antioquía' ca' diža' zan' gosone' chach' laže'gaue' na' gosaclene' legaue' cont' gosonxenche' Jesucriston'.³³ Gosenite' Antioquían' zan' ža, nach' cate' bžin' ža' šjaya'aque', bene' Antioquía' ca' gose'e' legaue': “Nayežagcho", na' lecze'

gose'e legaque' yesyežine' Jerusalénna' to šagüe' to güen. ³⁴ Na' Silasen' bečhoglaže' yega'ane' Antioquían'. ³⁵ Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

Pablon' gwyeye' da' yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjaña'cho nac cheson bene' ca'.

³⁷ Nach Bernabén' goclaže' šja'aque' na' yeseche'e Juan ben' lecz le Marcos. ³⁸ Perw Pablon' gwne' bi gonen güen yeseche'ene' dan' gwlejšyichj Marcosen' legaque' cate' besežine' distritw Panfilian' na' bi benlene' legaque' xšin Diosen'. ³⁹ Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwche'e Marcosen' na' gos'o'e lo' barcw ja'aque' Chipren'. ⁴⁰ Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. ⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' čhač laže' bene' ca' chesedop chesežag chesonxene' Jesucriston'.

16

Timoteon' gwzolažüe' chonlene' Pablon' na' Silasen' txen

¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. ² Na' bene' ca' chesonxene' Jesucriston' yež Listran' len yež Iconion' cheso'e diža' čhe Timoteon' chesene' zoacze' chone' da' güen. ³ Da'n'an' Pablon' gwnabe' šejlen Timoteon' legaque', nach gwchi'ene' gan' bosozoe' le' seřw dan' že' circuncisión. Bene' ca' le yogo' bene' že' na' gosenezde' xa Timoteon' bi naque' bene' Israel na' Timoteon' bina' soe' seřon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' seřua' na' gosa'aque'. ⁴ Na' to to yež ga besežine' bosozende' bene' ca' chesonxene' Jesucriston' can' nac yela' güexi'a čhe postlw ca' len bene' chosogüia chesene'e lježgaque' Jerusalénna' čhe da' ca' cheyala' yesone'. ⁵ Na' bene' ca' chesedop chesežag chesonxene' Jesucriston' gosenita'čhače' gosejnilaže'ne' na' gwyanche' tža tža.

Pablon' ble'edagüede' to bene' distritw Macedonia čata'yoede' le' šeje' laže'

⁶ Nach Spiritw čhe Diosen' bi ben' latje šjasedixjue' Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'n'an' gosodie' yež ca' zjachi' distritw ca' gan' nzi' Frigia na' Galacia. ⁷ Besežinte' gała'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw čhe Jesúsen' latje šja'aque'. ⁸ Nach gosodie' gała'ze distritw Misian' na' besežine' ciuda dan' nzi' Troas dan' čhi' cho'a nisdao'. ⁹ Nach že'na' Pablon' ble'edagüede' zecha to bene' distritw Macedonia lažüe', čhe'e le': "Yo'o Macedonia cont gacleno' neto'." ¹⁰ Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezetoe' chaclaže' Diosen' šjazenetoe' bene' Macedonia ca' diža' güen čhe Xancho Jesucriston'. Nach bsiñi'a čheto' cont gwza'to' gwyejto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' čhi' cho'a nisdao' gwyo'oto' to lo' barcw zejto' licha gan' čhi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. ¹² Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to čop ža. Filipos naquen ciuda blaoch čhe distriton' gan' že' bene' Roma. ¹³ Na' cate' bžin ža čhe Dios bchojto' ciudan' na' gwyejto' cho'a yegw gan' chaqueto' chjaseł güiže' Diosen', nach gwche'to' na' be'lento' no'ol ca' ba zjandoben' diža' güen čhe Jesucriston'. ¹⁴ Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' čhe dan' bzejni'i Pablon' le'. ¹⁵ Nach le' len bene' lo' yo'o čhe' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

¹⁶ Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac čhneya'abe', na' gan xen chombe' par xambe' ca' čhneya'abe'. ¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban čhele toli tocaņe.

¹⁸ Ba chac zan ža chombe' ca' cate' goque Pablon' zed, na' gwyečhje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

¹⁹ Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaue' lagüe ya'a gan' že' bene' ca' chesenabia' ciudan'. ²⁰ Na' cate' besežine' gan' že' justis ca', gose'e legaue':

—Bene' Israel quinga chesaše' chesebeque' da' zed lo' ciuda nga. ²¹ Na' chosolo'ede' costumbr da' bi de lens gao' chio' naccho bene' Roma.

²² Nach bene' ca' lo' ciudan' gosae' contr Pablon' len Silasen', na' bene' gwnabia' ca' gosone' mandawd goselechje' xagaue' cont goseyine' legaue' xis. ²³ Beyož goseyinchgüe' legaue' nach bosožie' legaue' ližya, chese'e ben' chape' ližyan' gwna'yañe' legaue' cont bi yesyechoje'. ²⁴ Beyož gose'e le' ca', nach bži'e' legaue' lo' cuart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca' do chel, chosol'güze' Diosen' na' chesole' no himno chesonxene' Diosen', na' yezica'chle bene' ca' zjade ližyan' chosozenague'. ²⁶ Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'. ²⁷ Bosbanen ben' chape' ližyan' na' cate' ble'ede' ba zjanyaljo puert ca', la' gołite spada chen' cont yeyot cuine', le bene' xbab ba bosyoxonj yogo' bene' ca' zjade ližyan'. ²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'. ³⁰ Na' la' bebejte' legaue' lo' cuart gan' zjajo'en', che'e legaue':

—¿Bi cheyała' gona' cont gata' yela' mban čhia' toli tocañe?

³¹ Nach gose'e le':

—Gwyejnilaže' Xancho Jesucriston', le' na' bene' lo' yo'o čhio', na' gata' yela' mban čhele toli tocañe.

³² Nach ben' chape' ližyan' gwčhe'e legaue' ližen' na' gosoe'lene' le' len bene' lo' yo'o chen' xtiža' Xancho Jesucriston'. ³³ Nach ca' hora' ben' chap ližyan' gwđibe' lo' güe' che Pablon' na' che Silasen', na' gwdena' jasoe' len bene' lo' yo'o che' ca'. ³⁴ Nach ben' chape' ližyan' beče'e Pablon' len Silasen' liže' bgüe' ej bguagüe' legaue'. Mbalaz zoe' ba chejnilaže' Diosen' txen len bene' lo' yo'o che'.

³⁵ Cate' ba gwyeni' bene' gwnabia' ca' gosesele' xa'agjaseže' ben' chap ližyan' yosane' bene' ca' šjaya'aque'. ³⁶ Nach le' gože' Pablon':

—Bene' gwnabia' ca' bač gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis čheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebetje' neto'.

³⁸ Nach xa'ag ca' jasyeyeže' bene' gwnabia' ca' can' gož Pablon' legaue'. Na' bene' ca' besežebe' cate' goseņezde' Pablon' len Silasen' zjanaque' bene' nación Roma. ³⁹ Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaue' yesyeyi'xene' can' ba goquen', na' diža' šagüe' gose'e legaue' yesyechoje' yesyeya'aque' lo' ciudan'. ⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' čhach laže' bene' ca' chesonxene' Jesucriston' na' beyožen' besyeya'aque'.

17

Bene' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyēžine' to ciuda da' nzi' Tesalónica gan' zoa to yodao' che bene' Israel. ² Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' legaue' diža'. ³ Bzejni'ide' legaue' gože'ne' bene' ca' goso'e xtiža' Diosen' cani' bosozoje' xtiža' Criston'. Gosene' ben' seła' Dios yedenabi'e, cheyała' yosochi yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesús'en' ben' choa' diža' che', le'na' Criston' ben' gwseła' Dios cont nabi'e.

⁴ Nach bał bene' Israel gosejle'e xtiža' Pablon' len Silasen' na' gosaque' txen len legaue', na' lecze zan bene' griego bene' chesonxen Diosen' na' zan no'ole blaō lecze gosejle'e. ⁵ Perw gwnita'ch bene' Israel bene' bi chesejle'e xtiža' Diosen'. Legaue' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo' ciudan' ja'aque' liž ben' le' Jasón chesacde'

yesyebeje' Pablon' len Silasen' liže'na'. ⁶ Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebal bene' chesonxene' Jesuscriston' na' goseče'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. ⁷ Jasón ni ba blebe' legaque' ližen', na' bi chesone' can' za ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' čegaque' ca' gosebecche' žaš. ⁹ Nach Jasónna' len bene' lježe' ca' bosožie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'. ¹¹ Na' bene' Israel ca' že' Berean' zjanacche' bene' šagüe' cdel ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan. ¹² Na' zane' gosejle'e xtiža' Xancho Jesucriston' na' lječz zan bene' griego ca' na' zan no'ole blao. ¹³ Nach bene' Israel ca' že' Tesalónican' bene' ca' chi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lječz gosone' contr Pablon'. ¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca nac Silasen' len Timoteon', legaque' besyega'ane' Berean'. ¹⁵ Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lječz šja'aque' cate gan' zoe'na'.

Pablon' bsd blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l gua'a šsaca' da' chesejnilaže' bene' ca'. ¹⁷ Da'nan' bzejni'ide' bene' Israel ca' lo' yodao' čegaque'na' len yezica'chle bene' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'. ¹⁸ Nach bene' ca' že'na' gwzolao chesoe'lene' le' diža'. Bale' chesejle'e dan' bzejni'i to bene' le' Epicuro, na' yebale' chesejle'e dan' bosozoj bene' ca' chesene' estoico. Na' bale' gosene':

—žBin' chon ža benga?

Na' yebale' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsben' na' ba be'e diža' Jesúsben' bebane' ladjo bene' guat. ¹⁹ Nach goseče'e Pablon' to latje dan' nzi' Areópago gan' chesedobe bene' blao čegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsd chlo'edo'. ²⁰ Bi'na' yenetoto' diža' can' nac dan' cho'nga na' chaclaže'to' nezeto' bi zejen yogo' da' ca'.

²¹ Ca nac bene' Atenas ca', de costumbr čegaque' yogo' ža con chesaše' cheso'e diža' o chosozenague' che bi da' cobe da' de, na' lječz ca' cheson no bene' zito' že' Atenas.

²² Nach Pablon' gwzeche' gachol'legaque' gan' chesone' ye'la' güxi'a na' gože' legaque':

—Le'e bene' Atenas, chacbe'eda' leca chejnilaže'le zan l gua'a šsaca'. ²³ Cate' gwdia' tnez ble'eda' gan' chonxenle zan l gua'a šsaca', na' ble'eda' to latje gan' nyojen žan: "Che Xancho ben' nono nombia'." Na' ca nac ben' chonxenle sin cbi nombia'ine', che benan' chyixjue'eda' le'e.

²⁴ Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon be'achen' cont soe' len chio'. ²⁵ Bibi chyažje Diosen' gwnežjo be'achen' le', na' bibi gac yesone' yesaclene' le'. Diosen' cho'e ye'la' mban che yogo' lo' bene', cho'e legaque' biš grasyw na' cho'e legaque' yogo' bi da' zjanape'.

²⁶ Diosen' bene' bene' nechon', na' toz ca nac yogo' be'ach xi'in diaža che'. Na' bsi'e xneze bat nita' to toe' na' ga yesenite'. ²⁷ Diosen' bnite' yogo' be'achen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. ²⁸ Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': "Naccho diaža che Diosen'." ²⁹ Na' dan' naccho diaža che Diosen' bi cheya'la' goncho xbab nac Diosen' ca no l gua'a šsaca' de oro, de plata o de yej. Chesaljlaže' be'achen' chesone' da' ca'. ³⁰ Cani' Diosen' be'e latje goson be'achen' con ca gwna xbab čegaque' ye'la' cbi chejni'i čegaque', perw na'a Diosen' chone' mandadw yogo' lo' bene' že' doxen yežlion' yesebejijchje' da' malen' chesonen'. ³¹ Diosen' chaclaže'

cuejyichjo da' malen', le ba mbeje' Jesucriston' gone' yela' justis che yogo' beñach na' gwnežjue' castigw che yogo' bene' cbi chesejnilaže' le', na' Diosen' zejcz'e to liča dan' gone' ca'. Na' Diosen' ba nžie' bia' bat gone' yela' justis che beñach. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis che beñachen'.

³² Cate' bene' Atenas ca' beyož gosende' gwna Pablon' yesyeban bene' guat ca', baļe' gosezi'diže' le' na' yebale' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' bene' ca'. ³⁴ Perw baļ bene' Atenas ca' gosaque' Pablon' txen na' gosonxene' Jesucriston'. Na' bene' ca' gosaque' Pablon' txen len to bene' byo le Dionisio na' yeto no'ole le Dámaris. Na' Dionision' naque' txen len bene' gwnabia' ca' ben' cheson yela' güexi'a gan' nzi' Areópago.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto. ² Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca' hora' doxen gan' mbane naciónna', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'. ³ Xšingaque' naquen chesone' yo'o de lache', na' toze ca' nac xšin Pablon'. Nach bega'ane' gosenite' txen na' gosone' žinnā' txen. ⁴ Na' yogo' ža che Dios Pablon' gwyeje' yodao' che bene' Israel ca' jazejni'ide' legaque' che Jesucriston', cont baļ bene' Israel len baļ bene' bi zjanac bene' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'ch Pablon' bsane' xšinen' cont gota'ch latje gwdixjue'ede' xtiža' Jesús'en' na' bzejni'ide' bene' Israel ca' Jesucristwnan' naque' bene' chesebeze' sela' Diosen' yedenabi'e. ⁶ Perw bene' Israel ca' besežie' yela' ya' che'. Nach Pablon' gwšibe' xe'na' cont blo'e chbejyichje' legaque' gwne':

—Bibi doļa' napa' dan' cuiayi' le toli' tocaņe. Le'e nape doļa'. Na' na'a šjased šjalo'eda' bene' ca' bi zjanac bene' Israel.

⁷ Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodao'na'. ⁸ Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' txen chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. ⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. ¹⁰ Neda' zoa' len le' na' bi goņa' latje no gone' le' da' mal, le bene' zan že' lo' ciuda nga bene' chesonxene' neda'.

¹¹ Ca' goquen' bega'an Pablon' Corinton' tgüiz yogašje bsed blo'ede' legaque' xtiža' Diosen'.

¹² Na' ca' tiempen' ben' le Galión naque' gubernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gubernadoren' yela' justisen'. ¹³ Na' cate' besežine'na' gose'e gubernadoren':

—Benga chde' chgo'yole' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

¹⁴ Bač zoa ne Pablon' cate' gubernador Galiónna' gože' bene' Israel ca':

—Ca' nac xya dan' chagwle nga, šaca' naquen to da' xinj o to da' malchgua, gonan' yela' justis. ¹⁵ Perw naquen che diža', na' che bene', na' che ley chechen'. Da'nān' le gwye' nacle gonle. Bi co'o lo' na' gona' yela' justis che dan' nac ca'.

¹⁶ Nach bešaše' legaque' gan' chone' yela' justisen'. ¹⁷ Nach bene' ca' bi zjanac bene' Israel gosenize' Sóstenes ben' ba' nac bene' gwnabia' che yodaon', gosot goseyine' le' lao gubernador Galiónna', perw bena' bibi cuent bene' legaque'.

Pablon' beyeje' Antioquían' da' yoble

¹⁸ Na' bega'añch Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': "Nayežagcho", nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bač beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. ¹⁹ Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios. ²⁰ Na' bene' ca' že' lo' yodaon' gosata'yoede' le' yega'anche' len legaque', perw bi goclaže'. ²¹ Nach gože' legaque':

—Nayežagcho, le chonen byen soa' lni dan' šo' ciuda Jerusalenna', perw güidhcza' dena' le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. ²² Cate' bežine' ciuda Cesarean' bechoje' lo' barcon' na' gwyeje' Jerusalenna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquian'. ²³ Gwde to tiemp zoe' Antioquian', nach gwze'e da' yoble gwyeje' to to yež dan' nita' distritw Galacia' na' Frigia, bene' chach laže' bene' ca' chesonxene' Jesucriston'.

Apolos gwduxje'ede' xtiža' Diosen' ciuda Efeson'

²⁴ Na' ca tiemp na' bžin to bene' Israel ciuda Efeson' bene' le Apolos. Naque' bene' ciuda Alejandria. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. ²⁵ Apolosen' chejle'e dan' bzejni' Juanna' che Xancho Jesusen' na' nezde' can' bzo'e' bene' nis caten' besyetingde' xtola'gaquen'. Na' Apolosen' be'e diža' do yichj do laže' bzejni'ide' binlo che Jesúsen', la'czla' con dan' bsd blo'e da' Juan na'zen' nezde'. ²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin chi chaž chžebe'. Na' cate' Priscilan' na' Aquilan' gosende' can' chzejni' Apolosen', legaque' gosebejže' le' na' bosozejni'ichde' le' che Jesucriston' da' ca' biža' nezde'. ²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bežue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchuan' legaque'. ²⁸ Bzejni'ide' yogo' lo' bene' gože'ne' cleden' cheson bene' Israel gualaž chen' bi chesejle'e che Jesúsen'. Bzejni'ide' legaque' can' nyoj Xtiža' Diosen' žan Jesúsen' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bal' bene' chesonxene' Jesucriston'. ² Na' gože' legaque':

—¿Zedesoa Spiritw che Diosen' lo' yichjlažda'olen' caten' gwzolao chejnilaže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' gože'e legaque':

—¿Bi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni' da' Juanna'.

⁴ Nach gož Pablon' legaque':

—Da' Juanna' bzo'e' bene' nis cate' besyetingje xtola'gaque' na' lecze gože' legaque' cheyala' yesonxene' bena' za' seła' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsen'. ⁶ Nach Pablon' gwzoa ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyxje'ede' bi dan' gož Diosen' legaque'. ⁷ Na' yogo' bene' ca' zjanac da do šižinue'.

⁸ Na' do šone bio' Pablon' bsd blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo' na' Diosen' cont nabi'e' legaque' len xbab čegaquen'. ⁹ Na' bchoj bal' bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni' Pablon'. Da'nana' Pablon' bechoje' gan' že' bene' ca' na' bebeje' ben' ba chesonxene' Jesucriston' na' gwche'e' legaque' gan' zoa to yo'o xen che to bene' le' Tiranno na' bzejni'ide' legaque' yogo' ža. ¹⁰ Na' gwzoa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsen', bene' zjanac bene' Israel lente bene' bi zjanac bene' Israel. ¹¹ Na' Diosen' bchine' Pablon' cont bene' yela' guac da' besyebanchgüe' bene'. ¹² Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o nyaz da' xigüe' yichjlažda'ogaque'na' lecze besyechojen.

¹³ Lecze chesaš bal' bene' Israel chesyebeje' da' xigüe' da' zjayo'o lo' yichjlaždao' bene' na' gosaclaže' yosochine' la Xancho Jesúsen' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsen' ben' choe' Pablon' xtiže'na' chonto' mandadw yechojle.

¹⁴ Na' zoa to b̄xoz gwnabia' che bene' Israel le' Esceva, na' nita' gaže xi'ine'. Na' bene' quingan' bosochine' la Jesúsen' gosaclaže' yesyebje' da' xigüen'. ¹⁵ Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsen' na' ba benda' diža' che Pablon', perw bi nombi'a le'e cont šejli'a xtiža'len'.

¹⁶ Nach bena' yo'o nyaz da' xigüen' bxite' gwnize' bene' ca' betlate' legaque' na' gwcheze' xašana'gaque'. Nach bosyoxonje' liž bena' ga'lyide' na' bedo chen zjanaque' dan' bene' legaque' zi'. ¹⁷ Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosache'ede' Xancho Jesúsen' naque' bene' zaque'.

¹⁸ Nach bene' zan ba chesejle'e xtiža' Xancho Jesúsen', na' zane' gosexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. ¹⁹ Na' bene' ca' gosac bene' guaža' na' bene' güene ya'a bosyotob libr čhegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. ²⁰ Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

²¹ Nach gwde goc da' ca' Pablon' bene' xbab yeyeje' Jerusalénna', na' goclaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecze cheyala' šeje' ciuda Roma. ²² Na' gwleje' čhope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anče' distritw Asian' yeto čhope ža.

Bene' ca' besegue'ede' Pablon' gosebēcchgüe' da' zed ciuda Efeson'

²³ Na' gwche' to da' zed gual ciuda Efeson', le nita' bene' beseže'e xtiža' Jesúsen' dan' bšed blo'e Pablon'. ²⁴ Quinga goc: gwzao to bene' le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan. ²⁵ Nach btobe' bene' ca' goson žin txen len le' na' nochle bene' goson žin nac ca', na' gože' legaque':

—Nezele ca nac žin dan' nlancho choncho nga, chonlenchon gan xen. ²⁶ Na' ba beneczele na' ba ble'eczele can' chon to bene' le Pablo chsed chlo'ede' bene' lo ciuda Efeso čhecho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l' gua'a l'saca' da' cheson benačhen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. ²⁷ Le gonšc xbab nacle goncho, le xož yesene' che žin dan' choncho nga, na' gague lezen, san lecz xož yesone' cont yodao' che xonax Diana čhechon' yega'añen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana čhechon', yogocze bene' distritw Asia nga na' bene' gate'tezechle chesonxene' le'.

²⁸ Beyož gosende' xtiža' Demetron' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

²⁹ Nach gwche' da' zed doxen lo ciudan', na' gosaque' toze' jasenize' čhope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo ciudan'. ³⁰ Na' Pablon' goclaže' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo ciudan' bi goso'e latje šo'e. ³¹ Ba l' bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'. ³² Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjanezde' bichen' zjandobe'na'. ³³ Bene' Israel ca' bosožigüe' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyala' ne'. Na' Alejandro' gwliš ne'e cont gwnabe' nite' šize yosozenague' diža' dan' güe'e laogaquen' gwleo' rson che bene' ca' chesejnilaže' Jesucriston'. ³⁴ Perw cate' besele'ede' le' gosache'ede' lecze naque' bene' Israel, na' besyazolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do čhop hor bososye'e ca' da' bi chesonxen bene' Israelen' xonax čhegaquen'.

³⁵ Na' bene' güezoj čhegaquen' cane goc bebecžie' legaque'. Na' gože'ne':

—Le'e bene' gualaž, yogu' bene' že' doxen yežlon' zjanezde' naquen čhecho gapši'icho yodao' che xonax Dianan'. Naque' bene' zaque', le l' gua'a l'saca' čhen' blažon' le'e yaba. ³⁶ Na' nono gac na da' yoble. Da'n'an' le soa šize na' bich gonle da' bi zejen. ³⁷ Na' ca nac bene' quinga nche'ele nga, bibi na' yesebane' lo' yodao' čhecho ca' na' neca načo chosožie' yela' ya' che xonax Diana čhechon'. ³⁸ Na' Demetrio nga len yezica'chle bene' lježe', še chac bi chac čhegaque' len bene' yoble, nita' bene' gwnabia' čhechon' cont yesone' yela' justis čhegaquen', con šja'aque' yeso'e legaque' part še ca'. ³⁹ Na' še bichle da' čnabile gac, cheyala'

goncho to yela' güexi'a cont choglaon. ⁴⁰ Perw ca nac žaš da' nga chac na'a, xož бага'cho choncho cont gobiern can' že'cho nga, na' bibi de ye'gacchone' še yesenabe' bixčhen' goc žaš da' nga chac na'a.

⁴¹ Beyož gože' legaque' ca' bene' mandadw besyežaše'.

20

Pablon' gweyjeche' distritw Macedonia na' nación Grecia

¹ Nach cate' beyož gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' chač laže'gaque' cont yesenite' yesejnilaže' Jesucriston'. Nach gože' legaque': "Nayežagcho", na' goseyela' lježe' na' beze'e beyeje' da' yoble distritw Macedonia. ² Na' gwdie' to to yež da' zjachi' gała'ze Macedonian' bene' chač laže' bene' ca' chesonxene' Jesucriston', na' beyožen' gweyjeche' nación da' nzi' Grecia. ³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwñezde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. ⁴⁻⁵ Na' xonj' bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo ben' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tiquico len Trófimo. ⁶ Na' gwde ljin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' bene' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmigw besedobe bene' ca' chesonxene' Jesucriston' lo' ciuda Troasen' na' gweyje'to' güe'ej gwdagwto' txen len legaque', na' Pablon' bzejni'ide' legaque' xtiža' Diosen'. Na' dan' ba zoa yeza' Pablon' ca' gwxeze nach be'e diža' bžinte do chel. ⁸ Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. ⁹ Na' to bi' güego' lebe' Eutico žiabe' cho'a ventan. Na' Pablon' ton' zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'. ¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' bene' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te' dižan' ca' cate' gwyeni'. Nach beze'e. ¹² Nach bi'na' blažo' cho'a ventanna', bene' ca' že'na' besyech'e'ebe' besyebchgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³⁻¹⁴ Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez belate' Asónna' cont gwyo'e lo' barcon' txen len neto'. Nach gweyje'to' ciuda gan' nzi' Mitilene. ¹⁵ Bezsa'to' Mitilenen' na' beteyo bežinto' gała'ze to yežlio da' chi' lo' nisdaon' gan' nzi' Quío. Na' gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gweyje'to' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. ¹⁶ Ca' bento' bi' gwdeto' ciuda Efeson', le Pablon' bi' goclaže' šede' yež ca' zjachi' do distritw Asian'. Chachyende' yob žine' Jerusalénna' še gała' soe' na' ža lni' dan' nzi' Pentecostés.

Pablon' bšaljlene' bene' chosogüia chesene'e bene' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'. ¹⁸ Na' cate' besela'aque' Pablon' gože' legaque':

—Nezele can' bena' caten' gwzoa' distritw Asia gan' zoa lažlen', bena' da' güen šlac gwzoa' len le'e gwzolaotia' ža nechw žan' bžina' na'. ¹⁹ Gwzoa' bena' xšin Diosen' na' bi' benxen cuina'. Zan ni'a gwchežhgua' chele. Na' da' zan da' bosochi' bososaca' bene' Israel ca' neda'. ²⁰ Bzejni'ida' le'e yogo' dan' byaže' šejni'ile, neca bezi'laža', bzejni'ida' le'e do gan' chdop chžagle na' len liž tole. ²¹ Bzejni'ida' bene' zjanac bene' Israel gualaž chia' lente bene' chi' zjanac bene' Israel can' chaclaže' Diosen' yesyetinje xtoła'gaquen' na' yesejnilaže' Xancho Jesucriston'. ²² Na' na'a yeya'a Jerusalén, le Spiritw che Diosen' chonen byen yeya'a, na' bi' nezda' bin' gac chia' yezina' na'. ²³ Con nezda' to to yež gan' ba bedia' Spiritw che Diosen' ba bzejni'in neda' dolja' gata' ližya na' gac bichle da' saca'zi'a. ²⁴ Perw bi' chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo' na' gona', na' soa' mbalaz lo' yichjlažda'oguan' šlac chonan', le Xancona' gwleje' neda' cont chyixjue'eda' diža' catequen' nzi'ilaže' Diosen' bepačhen'.

²⁵ 'Ca nac le'e, ba bzejni'ida' le'e che yeĵa' chnabia' che Diosen', perw na'a ne tole bich le'ele neda'. ²⁶ Da'nan' chnia' le'e bibi doĵa' napa' še nole cuiayi'. ²⁷ Baĉ bzejni'ida' le'e yogo' dan' chaclaže' Diosen' nezele, bibi bcuaša'. ²⁸ Da'nan' cheyaĵa' cuec yichĵle che yogo' loĵ dan' ba bzejni'ida' le'e na' lecze ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelaĵ xĉhene' beque'e xtoĵa'chon' cont bozoe' chio' binĵo len Diosen' da' yoble. ²⁹ Nezda' cate' bich zoa' len le'e yesela'ac bene' yese'nde' yesexoayague' le'e cont cuejyichĵle bich gwzenagle che Jesucriston'. ³⁰ Ladjw le'e yesechoj bene' yososed yosolo'ede' diža' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaque'. ³¹ Da'nan' le gwsaca' cont nono yesexoayag le'e. Na' le gon xbab, le šon izen' ba gwzoa' bzejni'ida' le'e na' gwneyoeda' le'e do ža do yel gwchežtia' chele.

³² Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenĵe Diosen' txen len yezica'chle bene' ba gwleĵ Diosen' zjanaque' lo ne'e. ³³ Bi chzelaža' bi da' de che bene', neca chzelaža' xmechwgaque' na' neca xagaque'. ³⁴ Nezczele can' bena' žin cont bžel da' byažjda' len da' beseyažje bene' ca' gosenite' len neda'. ³⁵ Na' bena' žinna' ca' cont blo'eda' le'e cheyaĵa' gaclencho bene' še bi cheseyažjde'. Na' šjasa'laže'le can' gwna Xancho Jesúsen': "Mbalazech zoacho caten' chnežjwcho bi dan' chnežjwcho bene' clal ca caten' chesoņe' chio' bi dan' chesoņe' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'. ³⁷ Na' yogo' loĵe' gosebeže' che Pablon' na' goseyeĵe' le' na' bosonope' ne'ena'. ³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nisdan' da' nzi' Cos, na' beteyon' bežinto' gan' chi' yeto yežlio lo' nisdan' da' nzi' Rodas, nach bezsa'to' bezžinto' ciuda Pátara. ² Na' cate' bežinto' Pátaran' bžeĵeto' yeto barcw dan' chzan' šejen distritw Fenicia, na' beyo'oto' lo'enna'. ³ Na' ba zjaydato' lo' barcon' cate' ble'eto' yežlio dan' chi' lo' nisdan' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeĵetje' yoa' da' zonsa' barcon' na' neto' bechojto' lo' barcon'. ⁴ Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen' legaque' cont gosata'yoede' Pablon' bi šeje' ciuda Jerusalénna'. ⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' boĵ güižto' Diosen' cho'a nisdan'. ⁶ Beyožen' bze diža' lježto' na' gwdeĵa' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža. ⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yeřop ben' chesaclene' postlw ca' len žin bixjw da' gota'. Na' Filipen' zoateze' cho'e diža' che Jesucriston'. ⁹ Filipen' nita' tap xi'ine' no'ol güego' na' chosozende' bene' bi dan' ba gož Diosen' legaque'. ¹⁰ Zan ža ba gwzoato' liž Filipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'. ¹¹ Nach Agabon' gwnabe' xpant Pablon' na' bĉhejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosoĉheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

¹² Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'. ¹³ Nach Pablon' gwne':

—Bi cuežle chia' o gonĵe ga soayaša'. Chzane cuina' yosoĉheje' neda' na' yesote' neda' Jerusalénna' dan' chyixjue'eda' xtiža' Xancho Jesúsen'.

¹⁴ Na' cate' goĉbe'to' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xanĉon'.

¹⁵ Nach bsiņi'ato' beza'to' zjaydato' Jerusalén. ¹⁶ Na' to chope bene' Cesarean' bene' chesonxen Jesucriston' gosa'aque' txen len neto', na' goseĉhe'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jane'e Jacobon'

¹⁷ Na' cate' bežinto' ciuda Jerusalenna' bene' lježto' ca' že'na' besyebede' bosoguape' neto' tiox. ¹⁸ Na' beteyo gwyejlento' Pablon' jana'to' Jacobon', na' bžinto'na' ba zjandop zjanžag yogo' bene' blao ben' chosogüia chesene'e yezica'chle bene' ca' chesonxene' Jesucriston' na'. ¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'. ²⁰ Na' cate' bosozenague' dan' gož Pablon' legaque', nach gosoe' yela' choxclen che Diosen' na' gose'e Pablon':

—Bene' migw, neždo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés. ²¹ Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' seřw dan' že' circuncisión. ²² ¿Nacxe ye'to' legaque'? le zane' yesežag nga cate' yesende' bach zo' nga da' yoble. ²³ Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. ²⁴ Na' cheyala' čhi'o'legaue' yodao' blaon' na' gono'ne' txeñ chixjo' beyixe' ca' gwnežwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'. ²⁵ Na' ca nac bene' ca' bi zjanac bene' Israel bene' ca' chesonxene' Jesucriston' gaž yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l'gua'a l'sacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

²⁶ Beteyo gwza' Pablon' gwče'e bene' ca' tap cont yesyexi yesyeyache' yodao' blaona' can' ža' ley chegaque' na'. Nach Pablon' gwyo'e gana' zoa bxozen' gwdixjue'ede' le' bi ža yanen' yeyož yesaque' xi'laže' cont yosonežjue' beyixe' ca' gote' che to to'legaue'.

²⁷ Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bał bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. ²⁸ Bososya'adie', gosene':

—Le'e bene' gualaž, le gon txeñ sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

²⁹ Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwče'e le' lo' yodao' na', la'czla' bi bene' ca'.

³⁰ Na' gosonchgüe' to žašyey. La' besedobte bene' zan cho'a yodaon' na' gosoe' lo' yodaon' gosenize' Pablon', besyebeye' le' na' la' bosyoseyjwte' puert ca'. ³¹ Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwnežde' ba chac to žašyey juisyw doxen ciudan', ³² nach btobe' soldadw ca' len bene' gwnabia' chegaque' ca', na' gosa'aque' zja'acese' gan' čhi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. ³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' chope gden. Nach gwnabde' bene' ca' že'na' no nac Pablon' na' bi bene'. ³⁴ Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandaw goseče' e Pablon' cuartel. ³⁵⁻³⁶ Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' gosenen' soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Goño' latje gua' to chope diža'?

Nach bena' gože'ne':

—¿Chaco' diža' griego? ³⁸ ¿Bi naco' bene' nación Egipto ben' gwda btob tap mil bene' güet bene' bat ngaze na' gwče'e'legaue' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beñ latje güe'lena' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo nepen' bene' señw len ne'e cont bene' ca' ze'na' gosenite' šize bosozenague' che'. Nach gwzologüe' be'e diža' len legaque' diža' hebreo.

22

¹ Gože' legaque':

—Bene' gole len bene' xcuide', le gwzenag diža' dan' gua' laole nga.

² Na' cate' gosache'ede' chne' legaque' diža' hebreo gosenite' šize. Nach Pablon' gože' legaque':

³ —Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseada' len maestrw blao ben' le Gamaliel. Bzejni'ide' neda' doxen can' ža ley che da' xoxxta'ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a. ⁴ Na' bchi bsaca' zan bene' ca' chesejnilaže' Jesucriston', goclaža' gotto' legaque'. Na' gwxena' no bene' byo na' no no'ole chesonxene' le' na' gwche'egaca'ne' ližya. ⁵ Bxoz ben' naquech bene' blao na' nochle bene' gole blao ca' chesenabia' nación Israel chechon' zjanezde' can' bena'. Legaque' gosone' yiš dan' bexua' gwya'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 26:12-18)

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'. ⁷ Na' gwbiža' lo yon' benda' to bene' gože' neda': "Saulo, Saulo žbixchen' chchi chsaco' neda'?" ⁸ Nach boži'a xtižen', goša'ne': "žNo le' bene'?" Nach gwne': "Nedan' Jesús bene' Nazaret na' neda' chchi chsaco'." ⁹ Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesús'en neda'. ¹⁰ Nach goša'ne': "žBin' cheyała' gona' Xana'?" Nach Xana' Jesús'en gwne': "Beyas na' gwyejteze ciuda Damascon', na' cate' žino'na' to bene' ye'e le' dan' cheyała' gono'." ¹¹ Na' gwchoła' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

¹² Na' to bene' le Ananias zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisés'en. Na' yogo'loł bene' gualaž checho ca' ze'na' cheso'e xtiža' Ananiasen' naque' bene' chon da' güen. ¹³ Ananiasna' bide' gan' zoan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'. ¹⁴ Nach gože' neda': "Dios ben' chonxencho na' ben' benxen da' xoxxta'ocho ca', len' ba gwleje' le' cana'te cont nezdo' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'. ¹⁵ Nachen' go'o xtižen' len bene' zan bene' ze' lo yežlion' gwzejni'igacdo'ne' da' ca' ba bendo' na' ba ble'edo'." ¹⁶ Na' lecz gož Ananiasen' neda': "žBičhen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguo'n len da' malen'." Can' gože' neda'.

Diosen' gwleje' Pablon' cont be'e xtižen' len bene' ca' bi zjanaque' bene' Israel

¹⁷ Na' gwdena' beyeda' ciuda Jerusalén ni na' gwya'a lo' yodao' blaon' jel güiža' Diosen', na' šlac chol' güiža'ne' ble'edagüeda' Xancho Jesucriston'. ¹⁸ Na' Xanchon' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o čhian'." ¹⁹ Nach goša'ne': "Xana', legaque' zjanezde' neda' gwya'a to to yodao' jet jatina' bene' ca' chesonxene' le' na' bseyjwgaca'ne' ližya. ²⁰ Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon' che bene' ca' gosot le'." ²¹ Nach Xancho Jesucriston' gože' neda': "Bchoj na' selja' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

²² Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezologüe' chososye'e, chesene':

—Le got bena'. Bich cheyała' bane'.

²³ Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. ²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yesejine'ne' cont güe'e diža' bi da' malen' ba bene'. Goclaže' nezde' bičhen' bene' lo ciudan' chososya'adie' che'. ²⁵ Na' ba zjancheje' Pablon' cont yesejine' le' cate' gože' to soldadw ben' zena' bene' chnabi'e' lao to gayoa soldadw:

—Can' ža ley, bi de' lsens čhinle neda' sin cbi nezele še bin' nona', le neda' naca' bene' nación Roma.

²⁶ Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdolan', le naque' bene' nación Roma.

²⁷ Nach ben' yo'o lo ne'e soldadw ca' gwyeye' lao Pablon' gože'ne':

—Gwna neda' ĵle bene' nación Roma le'?

Nach Pablon' gože'ne':

—Bene' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

²⁹ Nach bene' ca' ba nita' cont yeseyine' Pablon' la' besyecuaste' cuiten', na' ben' yo'o lo ne'e yogo' soldadw ca' lecze bžebe' dan' ba bčeje' Pablon' cont yeseyine'ne'.

Gosele' Pablon' gan' chosoxi'a bene' ca' chesenabia' Israelen'

³⁰ Nach beteyo ben' yo'o lo ne'e soldadw ca' gwseže' gdena' nchej Pablon'. Na' bene' mandaw besedobe bħoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

¹ Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ĵa na'aža nezda' lo' lažda'ogua' ba bena' can' chazlaže' Diosen'.

² Nach Ananías ben' nach bħoz blao bene' mandaw len bene' ca' zjaze cuit Pablon' yesebaže' cho'ena'. ³ Na' Pablon' gože'ne':

—ĵDiosen' gone' le' castigw, bene' gūexoayag! Chi'o nga cont gono' yeļa' justis chia' can' ĵa ley cħechon' na' chono' contr ley beno' mandaw yesebaže' choa'.

⁴ Bene' ca' že' gaļa'ze gose'e Pablon':

—Bi cheyaļa' yoži'o xtižen' ca', le naque' bħoz blao cħe Dios.

⁵ Nach Pablon' boži'en gwne':

—Bene' migw, bi gwnezda' še benga bħoz blaon'. Nežda' Xtiža' Diosen' dan' nyojen žan: "Bi yoži'ile diža' zi' len bene' gwnabia' cħelen'."

⁶ Pablon' goche'ede' bene' ca' chesenabia' nación Israelen' zjanaque' chople. Baļe' chesejle'e can' cħsed chlo'e bene' ca' zjansi'e saduceo na' yebaļe' can' cħsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'ĩn bene' fariseo. Na' zoa' nga chonle yeļa' justis chia' neche chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag' na' gosezolaģü'e chosošaše', na' besechoje' chople. ⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw. ⁹ Yogo' ben' že'na' chesosye'e chosošaše'. Nach to cħope bene' zjansed ley dan' bzoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwneleñ le', bi cheyaļa' goncho contr le', le contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandaw besežin soldadw cħe' ca' cont jasyeleje' Pablon' ladjo bene' ca' na' besyeche'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecž ca' cheyaļa' go'o xtižan' ciuda Roma.

Bosoxi'e yesote' Pablon'

¹² Na' beteyo baļ bene' Israel besedobe' na' bosoxi'e yesote' Pablon'. Na' gosecħogbi'en, gosene':

—Diosen' gone' chio' castigw še ye'ej gagwcho sin cbiņa' gotcho Pablon'.

¹³ Nde cħoa bene' bosoxi'e yesote' Pablon'. ¹⁴ Nach ja'aque' gan' že' bħoz gwnabia' ca' len bene' gole bene' blao ca' chesenabia' nación Israelen' na' gose'e legaque':

—Bač gwchogbia'to' goñ Diosen' neto' castigw še ye'ej gagwto' sin cbiņa' gotto' Pablon'.

¹⁵ Na' le yotobe lježle le gon yeļa' gūexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiļjwožečle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'ĩn bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'. ¹⁷ Nach Pablon' goxe' to bene' cħnabi'e to gayoa soldadw na' gože'ne':

—Ben goclen gwčħe' bi' nga lao bene' gwnabia' cħelen'. De to da' ye'be' le'.

¹⁸ Bene' gwnabia' che soldadon' gwçhe'e bi'na' lao ben' yo'o lo ne'e yogo' soldadw ca' na' gože' le':

— Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' bexue' na'be' gwçhe'ebe' to šla'ale gwñabde'be':
— iBi che'ndo' nao' neda'?

²⁰ Nach bi'na' gožbe' le':

— Bene' blao che bene' Israel gualaż çheto' ca' ba bosoxi'e yesenabe' cuejo' Pablon' gwçxe' na' yosode'ede' se'lo'ne' gana' chesežag bene' gwnabia' chegaquen' cont yeseyiljwyože' bi' da' xinj non Pablon'. ²¹ Perw bi šejli'o chegaque'. Nde çhoa bene' ca' yesebe'na'ogüe' Pablon' tnez cont yesote' le' na' ba goseçhogbi'en bibi yese'ej yesagüe' šlac bi'na' yesote'ne'. Na' ba chesebeze' gwzenago' chegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

— Gwsaco' bi' go'o diža' che rsonna' ba bedesano' lagua' nga.

Gosešele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososi'na' chegaque' cont šja'aque' ciuda Cesarea do cheda ga šeže'le na' yeseçhe'e çhop gayoa soldadw bene' yesa'ac ni'aze na' gayonši bene' yesebia cabayw na' yechop gayoa soldadw bene' yesoxe' lanza. ²⁴ Lecze gože' legaque' chyažje cabayw be cuia Pablon', le le'na' yeseçhe'e gana' zoa gubernadore'n ben' le Félix, na' yesape' Pablon' cont bibi gac che' tnez. ²⁵ Nach bzoje' to cart che gubernadore'n da' bgoxe' legaque', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiiox. ²⁷ Bene' Israel ca' ba gosezene' benga na' ba bosoxi'e yesote'ne', perw cate' gwñezda' naque' bene' nación Roma, gwy'a len soldadw chia' ca' jasla'ne' lo na'gaquen'. ²⁸ Na' cont nežda' biçhen' chosocuiš' le', gwçhi'ane' gan' chosoxi'a bene' gwnabia' che nación Israelen'. ²⁹ Nach gwñezda' chosocuiš' le' che bize da' chesac che' len ley chegaque'na', na' bi'naçho bi' da' mal ba none' cont yesote' le' o' cont gate' ližya. ³⁰ Perw na' ba gwñezda' ba bosoxi'a bene' Israel ca' yesote' le', da'nan' la' chsel'a'tia'ne' laguo' le' na' lecze bena' mandadw len bene' ca' chosocuiš' le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga çhneyoeda' le'. Claudio Lisias.”

³¹ Nach soldadw ca' gosone' can' ben' bene' gwnabia' chegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antipatris. ³² Na' cate' gwyeni' besyebi' soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. ³³ Na' cate' besežine' ciuda Cesarean' bosonežjue' gubernadore'n carten' zjanoxe'na' na' lecze gosone' Pablon' lo ne'e. ³⁴ Na' gubernadore'n cate' beyož blabe' carten' gwñabde' Pablon' ga bene' naque'. Na' cate' gwñezde' naque' bene' distritw Cilicia, ³⁵ nach gože'ne':

— Gwzenaga' bin' nao' cate' yesela'ac bene' ca' chosocuiš' le'.

Nach bene' mandadw bososeyjue' Pablon' lo' yo'o gan' çbbe' rey Herodesen' cate' chone' yela' justis.

24

Pablon' be'e diža' lao gobernador Félix

¹ Cate' baçh goc gayo' ža zoa Pablon' ciuda Cesarean', nach bžin Ananías ben' nac bçox blaoc che bene' Israelen' na' nçhe'e to chope bene' gole blao chegaque' na' len to bene' le Tértulo ben' chac çhne' lao bene' gwnabia'. Na' ja'aque' lao gubernadore'n gosagüe' xya che Pablon'. ² Na' cate' jaxexi'e Pablon', Tértulon' gwdağüe' xya che', gože' gobernador Félixen':

— Si'xeno', señor gobernador, za'to' laguo' nga. Binlo juisyw zoa nación chechon' na' da' zan da' šagüe' ba chac da' çhnabi'o neto'. ³ Gate'tez zoato' žato' choçcleno' can' chono'na', señor gobernador, catec çhbeto' can' çhnabi'ona'. ⁴ Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a. ⁵ Ben' ba goxo' laguo' nga, nežeto' naque' to bene' çhbecçhua da' zed. Çhde' doxen yežlion' chone' cont neto' bene' Israel chacto' çhople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret. ⁶ Na' goçlaže' gone' da' mal juisyw lo' yodao' çheton' na' da'nan' gwzento'ne' cont çhogbia'to' che' con can' ža ley çheton'. ⁷ Perw na' gwyaz Lisiasen' ben' nac bene' gwnabia' che soldadw ca' na' beque'ene' lo' na'ton'. ⁸ Na' gože' neto' cheya'la' yidto' laguo' nga cont gwçuišto'ne'. Guac nabdo' Pablon' cuino' cont neždo' nac da' li can' çhçuišto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le' can' naquen.

¹⁰ Nach gubernadore'n bene' seřw len Pablon' cont ne', na' Pablon' gwzologüe' gwne':

—Nezda' ba goc zan iz chono' yela' justis che nación ni, na' da'nan' chbeda' gwzoa' rson chian' laguon'. ¹¹ Na'a chac šižinw ža gwy'a Jerusalénna' jénxena' Diosen'. Na' guac nabdo' bene' ca' besele'e neda' še leca' naquen. ¹² Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo ciudan'. ¹³ Na' bibi gac yeson bene' quinga cont yosolo'e napa' doła' ca dan' chosocuiše' neda'. ¹⁴ Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'loł Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. ¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' can' nite' lez gon Diosen' ca'. ¹⁶ Da'nan' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi doła' napa' lao Diosen' ne lao benachen'.

¹⁷ Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. ¹⁸ Ca' goquen' zoa' lo' yodao' blaon' ba bexi beyacha' can' cheyala' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa' na'. Na' bi nacho mbeca' žaš, neca' ndop nžaga' bene' zan. ¹⁹ Na' bene' ca' za'ac distritw Asian' cheyala' yesid cuine' yosocuiše' neda' laguo' nga še bi da' mal chesacde' chona'. ²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. ²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

²² Gobernador Félixen' ba nezde' can' choszejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca' hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beče' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw čhen' le' jasesane' bi dan' byažjde'.

²⁴ Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le' Drusila. Na' Drusilan' naque' no'ole Israel. Nach gobernadoren' bene' mandadw gosaxe' Pablon' da' yoble na' bzenague' be' Pablon' diža' gwne' yogo'loł bene' cheyala' yesejnilaže' Jesucriston'. ²⁵ Nach Pablon' be'lenche' le' diža' can' cheyala' gaccho bene' güen lao Diosen', na' can' gwsaca'cho cont bi goncho da' mal, na' lecz be'lene' le' diža' can' gon Diosen' cate' žin ža gone' justis che yogo' benach na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadore'n' godce' še gwnežjo' Pablon' le' mechw cont yosane' le'. Da'nan' goxe' Pablon' güeltze be'lene' le' diža'. ²⁷ Ca' chac gwde chop iz nach yeto bene' yoble bene' le' Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'nan' bene' mandadw bega'an Pablon' ližyan'.

25

Pablon' bzoa rson che' lao gobernador Feston'

¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeye' Jerusalénna'. ² Nach bžox gwnabia' ca' len nochle bene' blao che bene' Israel ca' ja'aque' jaseñe'e le' cont bosocuiše' Pablon'. ³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez. ⁴ Na' gobernador Feston' boži'e xtiža'gague', gwne':

—Yega'anche' Cesarean' gan' die' ližyan' le' neda' bich chžeda' ša'a na'. ⁵ Na' le cuej no bene' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa' gobernadoren' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyey Pablon' lagüen'. ⁷ Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. ⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'ane' binlo len bene' Israel ca', da'nan' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césaren' ba nzo'e le' cont gono' yela' justis, na' cheyała' gac yela' justis chia' laguo' nga. Ca nac bene' Israel leu'inga, le' nezczedo' bibi da' xinj na' gona' len legaque'. ¹¹ Šaca' ba gwdapa' doła' o bichle da' ba bena' da' cheyała' gata', bi žia' bi gata'. Perw bibi nona' ca nac dan' chosocuiš'e neda' nga, na' nono zaca' gwde neda' laogaque'na'. Da'nana' chnaba' tia' lao rey Césaren' cont gone' yela' justis chian'.

¹² Nach Feston' bene' yela' güexi'a len beñe' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

Gobernador Feston' bdi'e Pablon' lao rey Agripan'

¹³ Na' cate' ba gwde yeto chope ža, rey Agripa len no'ol che' ben' le Berenice besežine' Cesareana' bedeseaguape' Feston' tiox. ¹⁴ Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to beñe' nyixjw Félixen' ližya nga cate' bechoje'. ¹⁵ Na' cate' gwy'a Jerusalénna' b'ox gwnabia' ca' na' nochle beñe' blao che beñe' Israel ca' gosnabe' choglaguan' cont gaque' castigw. ¹⁶ Perw na' goše'gaca'ne' bi de costumbr che chio' beñe' nación Roma gwdecho beñe' yesaque' castigw še bi yesyedil'lagüen' len beñe' ca' chosocuiš' le' cont yosozoa rson chegaque'. ¹⁷ Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'. ¹⁸ Na' cate' bosocuiš' beñe' ca' le', ne toz da' mal dan' chacda' yosobague'de' le' bibi gosene'. ¹⁹ Dan' chac chegaque', bi cheñilaže' Pablon' can' cheseñilaže' legaque', na' cheso'e diža' che to bene' ba got, beñe' le Jesús, na' Pablon' že' mbancze'. ²⁰ Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'. ²¹ Nach Pablon' gwñabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

²² Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

²³ Nach beteyo gosacxen'chua rey Agripan' len Berenice cate' goso'e gana' chi' gobernadores, na' lecz zjachi' beñe' ca' chesenabia' soldadw ca' na' yogo' no beñe' blao che ciudan'. Na' gwdena' Feston' bene' mandadw jasexi'e Pablon'. ²⁴ Na' Feston' gwne':

—Rey Agripa, na' len yogo' le'e že'le nga len neto', ca nac benga ze' laole nga, yogo' beñe' Israel beñe' že' Jerusalén len beñe' že' Cesarea nga ba gose'e neda' benga naque' beñe' mal na' yogo'cze' chesene' bi cheyała' bane'. ²⁵ Na' ba gwñabyoža' na' gota'bia' bibi none' da' zaca' choglaguan' che' gate'. Na' ba gwñabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césaren'. ²⁶ Na' chacžellaža', le bibi chežellaža' gwzoja' reyen' yapa'ne' bin' none'. Da'nana' bačn gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. ²⁷ Chacda' bi naquen to liča sel'a'ne' Roman' sin cbi gwzoja' še bin' none'.

26

Pablon' bzoe' rson che' lao rey Agripan'

¹ Nach rey Agripan' gože' Pablon': —Guac nao' bi da' gaclenen le'.

Nach Pablon' gwliš ne'en lao beñe' ca' gwzolagüe' bzoa rson chen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš' beñe' Israel gualaž checho ca' neda'. ³ Le' nombi'o costumbr che chio' beñe' Israel na' nezd'o can' chesacyož beñe' gualaž checho ca' legacze'. Da'nana' chata'yoeda' le' gapšco' yela' chxenlaže' gwzenago' chia' nga.

Quinga ben Pablon' cate' biña' šejnilaže' Criston'

⁴ 'Yogo' beñe' Israel gualaž chechon' zjanezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. ⁵ Na' še chese'nde' yeso'e diža', lecz zjanezde' goca' txen len beñe' ca' zjansi'e fariseo cate' nactia' bi' xcuide' na' beñe' fariseo ca' chesonche' yogoło' costumbr gole can' nyoj ley chechon' clal can' cheson yezica'ch beñe' Israel gualaž checho ca'. ⁶ Na' legaque' chesagüe' xya chia' neche chejli'a gwžin ža cate' Diosen' yosbane' beñe' guat ca' can' gože' da' xoxxta'ocho ca'. Neche da'nana' zoa' nga na'aža cont gac yela' justis chian'. ⁷ Beñe' zan lo šižinw cue' chio' beñe' Israel nite' chesebeze' batcan' yosban Diosen' beñe' ca' ba gosat, can' že' gone'. Da'nana' chesonxene' le' do ža do yel. Lecz neda' zoa' lez gac ca', na' da'nana' bał beñe' Israel gualaž chechon'

chosocuiše' neda' nga rey Agripa. ⁸ Na' le'e chi'le chzenagle chia', žbixčhen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ 'Cana' neda' godca' cheyala' gue'eda' bene' ca' chesonxen Jesúsen ben' nac bene' Nazaret, na' da' zan benchgua' contr legaque'. ¹⁰ Bene' zan bene' chesejle' che Jesúsen' Jerusalénna' gwdixjua' ližya, gwdapa' yiš dan' bosozoj bžox gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'. ¹¹ Na' zan las gwy'a to to yodao' jasaca' legaque' cont yesebejyichje' bich yesonxene' Jesúsen'. Na' catec bgue'eda' legaque' gwy'a yež zito' jalagšiba' legaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noxa' yiš che bžox gwnabia' ca' dan' žan gwchi gwsaca' bene' ca' chesonxene' Jesúsen'. ¹³ Ca do guagwbiz zya'a ngua'a nezen' seňor rey, cate'cze ble'eda' to be'ni' juisyw da' za' le'e yaba, chseni'chen ca' gwbižen', na' gwyechjen neda' len bene' ca' zya'alena' txen. ¹⁴ Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo žbixčhen' chchi chsaco' neda'?" Dan' chondo' neda', chone zi' cuino' ca chon to go'n be chlibe lo ya dan' zoa lao carroš' cheban'." ¹⁵ Nach boł gižža'ne', goža'ne': "žNo le' bene'?" Nach Xana' Jesúsen' boži'en, gwne': "Neda' Jesús na' neda' chchi chsaco'. ¹⁶ Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. ¹⁷ Na' na'a sela' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. ¹⁸ Chsela' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtoła'gaque', na' lecz checlaža' yesaque' txen len nochle bene' chesejnilaže' neda' bene' ba zjanac lo na' Diosen'."

Pablon' bšed blo'ede' bene' xtiža' Criston'

¹⁹ 'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez. ²⁰ Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyala' yesebejyichje' xtoła'gaque' na' yosozenague' che Diosen' na' yesone' da' güen cont gachbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. ²¹ Na' neče dan' chona' ca', bene' gualaž checho bene' cheseque'ede' neda' gosezene' neda' yodao' blaon' na' gosaclaže' yesote' neda'. ²² Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bžoj da' Moisésen' len yezica'chle ben' goso'e xtiža' Diosen' cani'. ²³ Gosene' Criston' ben' za' sela' Diosen' saca'zi'e na' gate' na' gaque' bene' nechw yebane' ladjjo bene' guat ca'. Na' lecz gosene' le'na' gwzende' bene' Israel len bene' bi zjanac bene' Israel can' cheyala' yesone' cont šo' be'ni' che' lo' yichjlažda'ogaque'.

Pablon' goclaže' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' ziže gože'ne':
—čChactonton' Pablo! Dan' ba bšedteco' nan' bač chactonto'.
²⁵ Nach Pablon' gože' gubernadoren':
—Bi chactonta' seňor gobernador, san diža' lin' cho'a, diža' da' zaca' gwzenago'. ²⁶ Na' rey Agripa nga nombi'e da' quinga choa' diža' čhen, da'nan' bi chžeba' choa' diža' lagüe' nga. Nezda' chache'ede' choa' diža' li, le dan' goc che Jesúsen' bi nacho goquen bagaše'ze. ²⁷ Le' rey Agripa, čchejli'o da' ca' bosozoj bene' ca' goso'e xtiža' Diosen' cani'? Nezda' chejli'on.
²⁸ Nach rey Agripan' gože' Pablon':
—čChacdo' bedao' co'oyelo' neda' cont šejnilaža' Jesucriston'?
²⁹ Nach Pablon' gože'ne':
—ČHnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.
³⁰ Beyož gwna Pablon' ca' bežoža' rey Agripan' len no'ol čhen' Berenice, na' len gobernador Feston' na' len bene' ca' gosebe' len legaque'. ³¹ Nach cate' ba besyeyo'e ga yoble, rey Agripan' na' gobernador Feston' gose' lježe':
—Bi nacho ba non benga da' zaca' gate' o da' zaca' chixjwchone' ližya.
³² Nach rey Agripan' gože' Feston':
—Šaca' bi gwñabe' tie' lao rey Césaren' cont gac yela' justis čhe'na' guac yosančhone'.

27

Gosesele' Pablon' ciuda Roman'

¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo' na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'.
² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia. ³ Nach ža beteyo bžinto' ciuda da' nzi' Sidón. Na' xan soldadw ben' le Julio bencze' güen len Pablon', be'e latje gwyeje' gan' že' bene' migw che' ca' cont bosonežjue' le' bi dan' byažjde'. ⁴ Na' cate' bechojto' ciuda Sidónna' beza'to' bedeto' gala'ze gan' nla' yežlio dan' chi' lo' nisdao' dan' nzi' Chipre. Chechjchgua be' clele ca horen', na' yežlion'a' bcue'ejen neto' len be'na'. ⁵ Na' beyož gwdeto' lo' nisdao' dan' de gala'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandria da' za' šej distritw Italia, na' bene' mandadw gwyo'oto' lo'en txen len Pablon'. ⁷ Nach gwza'to' zejto' lo' nisen' da' yoble. Zan ža zejto' šolaže', cane bžinto' gwdeto' ciuda gan' nzi' Gnido. Na' dan' ne' chechj ben' clele gan' zejton', da'nan' bi goc šejto' liča, nach gwca'ato' zejto' chcue'ej cuinto' len yelate' yežlio dan' nga'an lo' nisdaon' dan' nzi' Creta, gan' bitec gwyečj be', na' gwdeto' gala'ze gan' zoa to ya'a da' nzi' Salmón. ⁸ Na' zejto' gala'ze ga zoa yo biž chcue'ej cuinto', cane bžinto' gan' nzi' Buenos Puertos gala'ze yež dan' nzi' Lasea.

⁹ Goc zan ža zejto' ca' na' bach chžebto' šjažiyai' cuinto' lo' nisdaon', le ba bžin tiemp zag cate' chechjchgua be'. Nach Pablon' gwneyoede' bene' ca' yesebeze' na'ze. ¹⁰ Gože' legaque':

—Le'e bene' le'e chsa'le barcon', ba chacbe'eda' can' zejcho nga cane chac chzan', xož cuiyai' barcon' len yoa' chelen', na' lente chio' yo'ocho lo' barcon' xož cuiyai'cho.

¹¹ Nach xan soldadw ca' bzenagche' che xan barcon' na' che ben' chsa' len clal ca che Pablon'. ¹² Le bi nac latje güen cho'a nisdao' gan' zoaton' ga'ant'o' tiemp zaguen', na' gwyan bene' ca' gosacde' cheyała' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyečjen lo' nisdaon'

¹³ Cate' gwzolao chechj to be' gol dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo' nisen' da' yoble to lcu'e'ej che Cretan'.
¹⁴ Gague goc sša cate' ba chac to be' gual da' nzi' Noreste chechjchguan clele gan' zej barcon'.
¹⁵ Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chechjenna'. ¹⁶ Nach bžinto' to lcu'e'ej yežlio da' nga'an lo' nisen' dan' nzi' Clauda, gan' bitec chechj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'. ¹⁷ Beyoža' bchejto' barcw cha'ona' do gual cont gwlo'oto' fuers čhen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo' nisen' con gan' gwyej barcon'. ¹⁸ Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzolao bosozala'sazen' lo' nisen'. ¹⁹ Na' ža gwyo'one goclento' legaque' bžala'to' xšinlaz barcon' lo' nisen'. ²⁰ Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyečj be', na' bich gwzoato' lez yelato'.

²¹ Bach goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiyai' yoa' che barcon' len xšinlazen. ²² Perw na'a bi soayaše'le, ne tole cbi cuiyai' yela' mban čele, san barcw ngazen' cuiyai'. ²³ Neda' chonxena' Diosen' na' ba ben cuina' lo' ne'e, na' le' ba gwsele' to angl bene' blo'elagüe' neda' nže'e. ²⁴ Nach angla' gože' neda' diža' nga: "Bi žebo' Pablo. Cheyała' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'." ²⁵ Na' dan' gwna anglen' ca', bene', le yebe. Nežda' Diosen' gone' gac dołol can' gož anglen' neda'. ²⁶ Da' gac čecho yecho'onen chio' yo biž da' nga'an late' lo' nisen'.

²⁷ Na' cate' ba goc žta'gwbiž zejto' lo' nisen' nžiga' ben' neto' nile nale lo' nisdaon' dan' nzi' Adria, nach ca do chel bene' ca' zjansa' barcon' gosacbe'ede' ba zejto' gala'ze yo biž. ²⁸ Nach beseletje' to plom lo' nisen' cont bosochixe' ca do gaca'te' sitjw nac nisen'. Beyož bosochixen'na' goseņezde' goquen šino'tchoa metr. Nach goseždie' yelate' na' bosozchixen' da' yoble na' ca horen' goquen gažechoa metr. ²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochjejen' xan barcon' cont gosoxen' len, na' do chesežebze' chesebeze' batcan' šeni'. ³⁰ Nach bene' ca' zjansa' barcon' gosaclaže'

yosyoxonje'. Besyeletje' barcw dao' dan' ncu'a xina' barcon', con bosode'ede' yeseletje' ancla ca' dan' ncu'a lagüen'. ³¹ Nach Pablon' boł güiže' xan soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolaogwneyoede' yesagw bene' ca' že' lo' barcon', gože' legaue':

—Ba chac žta'gwbiz zoale bi chtasle na' bi che'ej chagwle. ³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bexue' to yetextil, be'e yela' choxcen che Diosen' lao yogo' neto' že'to' lo' barcon' na' gwxi'e to pedasen' gwdagüen'. ³⁶ Nach yogo'to' bebeto' na' lecze gwzolaoto' gwdagwto'. ³⁷ Chop gayoa gayonšino'to' nacto' že'to' lo' barcon'. ³⁸ Na' beyož gwdagwto' ca beljeto', nach trigon' da' ne' nga'añch lo' barcon', gosebejen' bosozalen' lo' nisdaon' cont barcon' bich goctequen zi'.

Goxj barcon'

³⁹ Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enña' nac laše' lo' yox. Nach gosaque' toze gosaclaže' yesone' cont žin barcon' šjačhen' laše' lo' yoxen'. ⁴⁰ Na' gosechogue' do che ancla ca', gosebejyichjen' lo' nisen'. Lecze goseseže' do dan' bosocheje' yag dan' chsa' barcon' liča na' gosełise' lache' dan' zoa yichj barcon' cont bžiga' ben' len, nach zja'aque' cho'a yo bižen'. ⁴¹ Na' gosodie' ga chedił nisdaon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzolaogwzoxjen barcon' catec fuers nsan'. ⁴² Nach soldadw ca' gosaclaže' yesote' pres ca' cont bi yeseyele' nisen' na' yosyoxonje'. ⁴³ Perw xan soldadw ca' goclaže' yosle' Pablon', da'nana' bžone' yeson soldadw ca' can' chesacclaže' yesonen'. Bene' mandadw len pres ca' še noe' chac chyela' nisen' zgua'tec legaue' yesexite' lo' nisen' cont yesyechoje' yo biž. ⁴⁴ Na' bene' mandadw bene' ca' bi chac yesyela' nis yosochine' no yagla' o bichle xšinlaz barcon' cont yesyehine' lo' yo. Na' can' gosone' na' yogüe' besyehine' lo' yo bižen'.

28

Dan' goc che Pablon' šlac zoe' Malta

¹ Cate' bechojto' lo' nisdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo' yežlio da' nga'anen' lo' nisdaon'. ² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. ³ Nach Pablon' btobe' xonj xis bcue'en lo' yin', cate' bchoj to beł be nac venen lo' xis ca' gwdi'inja' ne'e goła'ditban'. ⁴ Na' besele'e bene' Malta ca' nala'dit belen' na' Pablon', na' gose' lježe':

—Benga nacłje' bene' güet bene'. Da'nana' la'czła' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo' yin' na' bexope belen', na' bibi godce'. ⁶ Yogo' bene' ca' chesebeze' batcan' solao gata' ne'en yi' o batca' gate'. Gosebeze' šša na' besele'ede' bibi godce'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden gała'ze latje gan' bžinton', na' blebe' neto', gwzoato' ližen' šone ža. ⁸ Na' xa Publion' chacšenčgüede' yo'e da' la' na' che'ede' yiž chen. Nach Pablon' gwyo'e gan' de'na' boł güiže' Diosen', nach gwžo'a ne'en yichj bene' güen' na' beyaque'. ⁹ Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaue', na' lecze besyeyaque'. ¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo' nisen' yo'oto' to lo' barcw da' za' ciuda Alejandria da' gwlezen latjen' šlac gwde da' zaguen'. Na' mben le'e barcon' l' gua'a lsača' che bene' ca' le' Cástor na' Pólux. ¹² Na' bžinto' ciuda dan' nzi' Siracusa gan' bega'anto' šone ža. ¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolaogwechj be' dan' za' che'el'e, na' beza'to' da' yoble beteyo bežžinto' ciuda da' nzi' Puteoli na' bechojto' lo' barcon'. ¹⁴ Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaue' to xman. Na' gwdena' gwza' ni'ato' zejto' Roman'. ¹⁵ Na' cate' za' žinto' ciuda Roman' goseneze bene' lježto' že' Roman' ba zoa žinto', na' bałe' bedeseleze' neto' latje gan' nzi' Šone Tiend na' yebałe' lagüe ya'a dan' nzi' Che Apio. Cate' ble'e Pablon' legaue' be'e yela' choxcen che Diosen' na' gwbede' lo' yichjlažda'ogüe'. ¹⁶ Na' cate' bžinto' Roman', xan soldadw ca' bene' yezica'chle pres ca' lo' na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdpape' le'.

Pablon' be'e xtiza' Jesucriston' Roman'

¹⁷ Beyoŋ ŋa bŋinto', Pablon' goxe' bene' blao che bene' Israel ca' ze' ciuda Roman'. Na' cate' beyoŋ besedobe'na' goŋe' legaque':

—Bene' migw, bene' gualaŋ checho ca' ze' ciuda Jerusalén gosezene' neda' gosone' neda' lo na' bene' gwnabia' che nación Roman', la'czla' bibi bena' contr bene' gualaŋ ca' na' ne contr costumbr che da' xozxta'ochon'. ¹⁸ Nach bene' gwnabia' che nación Roman' gosenabyoŋe' na' gosacŋaŋe' yososane' neda' cate' gosacbe'ede' bibi nona' da' zaca' yesote'nda'. ¹⁹ Nach bene' gualaŋ ca' ze' Jerusalénna' bosozoncze' yososane' neda'. Da'n'an' gwnaba' tia' lao rey Césaren' cont gac yela' justis chia'. Perw bi nacho gagua' xya che bene' gualaŋ checho da' gosonde' neda' ca'. ²⁰ Da'n'an' zoa' nga baŋch goxa' le'e cont le'eda' le'e na' güe'lena' le'e diŋa'. Na' ncheja' gden ni neŋche dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

²¹ Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diŋa' ŋe bin' chac len le', na' nono bene' gualaŋ na' la' bene' ne mal chio'. ²² Perw chaclaŋe'to' yeneto' go'o diŋa' che dan' chejli'o che Jesúsen', le nezeto' doxen chesene' che le'e chejle'le che'.

²³ Na' bosozie' bia' to ŋa cont ŋjasene'e le' da' yoble, na' cate' bŋin ŋan' bene' zan ja'aque' gan' zoen'. Nach Pablon' be'lene' legaque' diŋa' do ŋa. Be'e diŋa' che dan' cheyaŋa' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle bene' goso'e xtiŋa' Diosen' cani' che Jesucriston', cont yesejle'e che'. ²⁴ Na' baŋ bene' ca' gosejle'e xtiŋen' da' be'e na' yebaŋe' bi gosejle'en'.

²⁵ Dan' bi gosone' toz ca yesone' xbab, gwzolaŋ besyeya'aque'. Nach Pablon' goŋe' legaque': —Dan' goŋ Spiritw che Diosen' da' Isaiasen' dan' bzoje' che da' xozxta'ocho ca' naquen da' li, ŋan:

²⁶ Gwyey goŋ bene' gualaŋ chio' ca' xtiŋan':

Da' li yenele, perw na' bitw ŋejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

²⁷ Nacle bene' güedenag na' baŋch natcze yichjlaŋda'olen'.

Bi chazlaŋe'le gwzenagle dan' chenele na' dan' chle'ele;

con nacle bene' güedenag.

ŋaca' bi nacle bene' güedenag, ŋejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yichjlaŋda'olen'.

²⁸ Che'nda' nezele ba gwzolaŋ na'a Diosen' chsele' bene' cheseyixjue'ede' xtiŋen' len bene' bi zjanac bene' Israel cont yosozenague' che' na' gata' yela' mban chegaque' toŋi tocanē.

²⁹ Beyoŋ gwna Pablon' ca', bene' Israel ca' besyeŋaŋe' chesacyoŋchgüe' che dan' gwnen'.

³⁰ Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'lol bene' jasene'e le'. ³¹ Na' bzejni'ide' legaque' Diosen' chnabi'e doxen, na' lecŋ bzejni'ide' che Xancho Jesucriston'. Nono bŋon gwzejni'ide' bene', na' be'e xtiŋa' Diosen' con can' goclaŋe'.

CART DAN' BZOJ POSTLW SAN PABLO CHE BEÑE' CA' ŽE' ROMA

¹ Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. ² Diosen' ba gwzolağüe' bzende' beñachen' diža' güen che', bene' cont gwnita' bene' goso'e xtizen' cani' na' bozozojen'. ³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' beñach lo diaža che da' rey David. ⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. ⁵ Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtizen'. Na' gwsele' neto' chyixjue'eton' cont šanch bene' yesejnilaže'no' na' yosozenague' che'. Na' Xancho Jesucriston' soe' biaoč cate' bene' že' yogo' nación yosozenague' che Diosen'. ⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda' olen'.

Pablon' goclaže' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa' yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. ⁹ Nezcze Diosen' yogo' ni'a cate' chol güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'. ¹⁰ Chnaba' lao Diosen' gone' latje yedena'a le'e še ca' chnalaze' gona', le ba chac šša zelaža' yida'. ¹¹ Chaclaža' yedena'a le'e na' gwzejni'ichda' le'e cont soachachle šejnilaže'le Diosen'. ¹² Na' le'e len neda' soacho gonchachlaže' lježcho dan' chejnilaže'cho Jesucriston'.

¹³ Bene' migw, che'nda' nezele zan ni'a ba goclaža' yida' yedena'a le'e, perw bina' gac yedena'a le'e. Chaclaža' yida' gona' xšin Diosen' gan zoač cont šanle gwzenagle che Jesucriston' ca' ba goc yezica'chle yež ga ba gwy'a. ¹⁴ Nežda' cheyla' gua' diža' güen che Jesucriston' len yogo'lol bene', bene' že' ciudan', na' bene' že' yixe', na' bene' chesac letr na' bene' cbi chesac letr. ¹⁵ Da'n'an' che'nchğüeda' gua' xtizen' len le'e že'le Roman' can' ba bian' ga yoble.

Diža' güen che Jesucriston' nsan' yela' guac che Diosen'

¹⁶ Bi cheto'eda' gua' diža' güen che Jesucriston', le xtizen' nsan' yela' guac che Diosen' cont bene' chesejle' čhen gata' yela' mban chegaque' toli tocañe. Nsan' yela' guac len neto' bene' Israel, na' lezce len le'e bi nacle bene' Israel. ¹⁷ Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de biche' da' gac goncho cont gaccho bene' güen len le'. Can' nyoj Xtiza' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocañe."

De xtoła' beñachen'

¹⁸ Diosen' zoe' yaban' na' ba blo'ede' beñachen' toli tocañe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' bene' yoble diža' li che Diosen'. ¹⁹ Na' Diosen' gone' yesezaca'zi'e, le ba zjanezde' zoe' da' ba blo'ede' legaque' can' ba benen'. ²⁰ Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beñach chesele'ede' da' ca' ba bene'. Da'n'an' bibi de da' yosode'e beñachen' yesene' bi zjanezde' še zoe'. ²¹ La'cžla' zjanezde' zoa Diosen', bi chesonxene' le', neca cheso'e yela' choxclen che'. Xbab chegaquen' bibi zacan' na' zjančoļ yichjlažda'ogüen' yela' bi chejle' chegaquen'. ²² Chesene' zjanaque' bene' sina' perw chesone' xbab da' bibi zaca'. ²³ Chosozoe' Diosen' to šla'ale la'cžla' naque' la'zelagüe' bene' zaca' na' zoe' toli tocañe. Na' gualaz le', chesejnilaže' no l' gua'a šsaca' che beñach bene' te che, na' no l' gua'a šsaca' che be zoa xil, che be žia tap ni'a na'ba' na' che no be xigüe'.

²⁴ Da'n'an' Diosen' ba gwlejiyichje' legaque' cont chesone' da' xinj can' ža lo' lažda'ogaquen', na' bale' ba chesonchğüe' da' nac yela' zto' len cuerp chegaquen' toe' len yetoe'. ²⁵ Diosen' gwlejiyichje' legaque' cont chesone' yela' zto', le legaque' gosebejiyichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyla' šejnilaže'cho na' gonxencho toli tocañe. Ca'czen' gacšca.

²⁶ Da'n'an' Diosen' gwlejiyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole beñe' bich chesone' can' cheyla' yeson no'olen',

san chesegue'e ljež no'olgaque' cont chesone' len legaque' da' bi cheyala' yesone'. ²⁷ Na' nita' bene' byo bene' bitw chesende' yesenitale' no'ole, san chesezelaže' ljež bene' hyogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheyala' yesezi'e yela' güen da' xinj chen'.

²⁸ Bi chesaclaže' beñachen' yosozenague' che Diosen', da'nan' ba gwlejyichje' legaque' len xbab mal chegaquen'. Da'nan' nite' chesone' da' bi cheyala' yesone'. ²⁹ Chesonchgüe' yogog' da' xinj. Bene' byo chesata'lene' no'ole bi nac no'ol chegaque', na' no'olen' chesata'lene' bene' byo bi nac bene' chegaque'. Chesexi'e bene'. Chesezelaže' bi da' de che bene'. Zjanaque' bene' xi'a juisyow, chesegue'e lježe', chesot lježe', chesedi'e', cheseziye'e, zjanacchgüe' bene' güedenag, na' chja'aque' chjaseleje' diža' che bene'. ³⁰ Chesene' mal che bene' yoble, chesegue'ede' Diosen', na' bibi bala' an chesezoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljaže' bichle da' mal da' yesone'. Bi chosozenague' che xaxne'e. ³¹ Bi chesejni'ide'. Bi chesone' da' ba gosene' yesone'. Bi chesacde' bene' yoble. Bi chesyezi'xen che lježe' na' bi chesyeyaše' lježe'. ³² Zjanezde' Diosen' že' toli' tocañe yesezaca'zi' ben' cheson da' ca'. Na' la'czla' zjanezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson legaquen'.

2

Diosen' zejzce' to licha da' chone' castigw che xtola'chon'

¹ Še nacho che bene' yoble da' xinjen' chone', bibi zaca' ye'cho Diosen' gague bi xtola'cho de, note'tez naccho. Cate' chnecho che da' chon bene' yoble, na' cheyechjen chio', le toz can' choncho len da' cheson legaque'. ² Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtola'chon' na' zejzce' to licha da' gone' ca'. ³ Čhaquele Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyala' gaguecho bi gone' da' saca'zi'cho, le goncen'. ⁴ Či chache'ele Diosen' nacchgüe' bene' šagüe' na' bene' xenlaže' len chio' napcho dola' na' chone' ca' cont gacbe'echo da' xinjen' choncho na' yetinjechon? ⁵ Le'e bi chetinjele xtola'len' nacle bene' yid, na' chorle cont Diosen' ža'ache' le'e na' gonche' ga saca'zi'le cate' žin ža' chogbi'e che beñachen'. Cana' gwlo'e zejzce' to licha can' chogbi'en saca'zi' to to beñach che xtola'gaquen'. ⁶ Na' cana' to tocho saca'zi'cho o gone' ga gac güen checho con ca' nac da' ba bencho. ⁷ Na' še cheyiljwlaže'cho nac goncho cont šjayzoacho len Diosen' toli' tocañe, na' cont yebe Diosen' chio', na' cont gone' gacchcho bene' zaca', soacho goncho da' chon bite'teze da' gwžaglaoch. Nach Diosen' gone' cont bancho toli' tocañe. ⁸ Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža' ayichje' chio' na' gone' ga saca'zi'cho toli' tocañe. ⁹ Yogo' beñach bene' chon da' xinj saca'zi'e na' žaglagüe', zgua'tec žagla'o neto' bene' Israel na' tech vezica'chle bene'. ¹⁰ Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

¹¹ Toz ca' chon Diosen' len yogo'lol beñach. ¹² Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. ¹³ Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'. ¹⁴ Bene' bi zjanac bene' Israel na' bi zjanombi'e ley dan' bzoj Moisésen', tgüje lo' lažda'ogaquen' chonen cont chesone' da' güen can' ža leyna' cheyala' yesone', na' la'czla' bi zjanombi'e leyna' dan' ža yichjlažda'ogaquen' chžian bia' yesone' da' güen, naquen ca' to ley len legaque'. ¹⁵ Nacbja' zjanezde' lo' lažda'ogaque' cheyala' yesone' da' ca' nžia bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal. ¹⁶ Can' gac caten' žin ža Diosen' gone' lo' na' Jesucriston' choglagüen' che to tocho ca' nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

Bene' Israel bi chesone' can' ža' leyna'

¹⁷ Na' le'e nacle bene' Israel gualaž čhia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. ¹⁸ Nezele bin' chazlaže' Diosen' na' chache'ele bin' nac da' güen na' bin' nac da' mal, le nsedle xtizen'. ¹⁹ Chaquele zaca'le cont co'ole be'ni' lo' yichjlaždao' bene' bi nombia' Diosen'. ²⁰ Na' chaquele guac gwzejni'ile bene' cheson clele nac cheyala' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li chen' na' len nšan' doxen da' cheyala' nezele. ²¹ Le'e chsed chlo'ele bene' yoble, čbixchen' bi chsed chlo'e cunlže? Le'e žale bi

cheyala' no cuan, ¿bixchen' chbanle? ²² Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', ¿bixchen' chonle da' che'le bene' bi gone'? Le'e chgue'ele l' gua'a lsaca' da' chesejnilaže' bene' ¿bixchen' chjalanle bi da' de lo' yo'o gan' že' l' gua'a lsaca' ca'? ²³ Cha'laže'le da' nseidle ley da' bzoj Moisésen', perw chzoale Diosen' to šla'ale da' bi chonle can' ža leyna'. ²⁴ Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

²⁵ Še choncho can' ža leyna' zaca'czen dan' ba gwzoacho seřw lo cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho seřw dan' nzi' circuncišión. ²⁶ Bene' bi naque' bene' Israel bi zoe' seřua', na' še chone' can' ža ley che Diosen', Diosnan' ne' naque' txen len chio' zoacho seřua'. ²⁷ Na' bene' cheson can' ža leyna', la'czla' bi zjanaque' bene' Israel na' bi zjazoe' seřw dan' nzi' circuncišión lo cuerp chen', chesone' cont nacbia' de xtoła' le'e nseidle leyna' perw bi chonle can' žanna'. ²⁸ Bi načo naccho dogualje bene' Israel da' na'ocho costumbr che nación chechon' na' dan' zoa seřw lo cuerp chechon'. ²⁹ Naccho dogualje bene' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'n'an' Diosen' güe'e diža' güen checho, la'czla' še notno chne güen checho.

3

¹ ¿Bi da' güen da' chga'an' che chio' bene' Israel da' goljcho lo diaža che da' xozxta'ochon' še ca'? ¿Bi da' güen da' chga'an' da' ba zoacho seřw da' nzi' circuncišión? ² Da' xen da' chga'an. Na' da' blaoch da' chga'an, Diosen' bnežjue' da' xozxta'ocho ca' Xtižen' da' nyojen par yogo' benačh. ³ Na' la'czla' žan bene' gualaž checho bi gosejle'e chen, bi načo Diosen' bi gone' güen can' gwne' gone' len chio' naccho nación che'na'. ⁴ Goncze' con can' že'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan:

Le' gwlo'edo' benačhen' le cho'o diža' li.

Na' ca' nac bene' ca' cheson xbab bi chono' can' žon', yesache'ede' chonczo' can' žo'na'.

⁵ Bał bene' chesene' cate' choncho da' xinj chlo'en ca' bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. ⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benačh. Perw gonczen'.

⁷ Na' nita' bał bene' chesone' xbab clele, chesene': "Cate' choe'cho diža' güenlaže' chlo'en ca' bene' güen juisyw nac Diosen' da' cho'e pur diža' li. Da'n'an' bi cheyala' ne' napcho dola' cate' chonlaže'cho." ⁸ Lecze chesonlaže' bał bene' chesene' neda' bzejni'ida' gague goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

Yogo'cho napcho dola' lao Diosen'

⁹ ¿Bixen' ša? ¿Naquech chio' bene' Israel bene' güen ch ca' bene' bi zjanac bene' Israel? Bi naccho ca'. Ba bzejni'ida' toz ca' nac che chio' bene' Israel len che bene' bi zjanaque' bene' Israel, yogo'cho de xtoła'cho. ¹⁰ Na' Xtiža' Diosen' nyojen žan:

Nono zoa bene' zej to licha, ne toe'.

¹¹ Nono nla' bene' chejni'i cont gwzenague' che Diosen',

nono nla' bene' cheyjiljue' le'.

¹² Yogo' benačh ba zjanaque'e nez mal.

Yogüe' ba zjanaque' ca' to da' bibi zaca'.

Ne to nono zoa bene' chone' da' güen.

¹³ Len xtiža'gaquen' chesexoayague' bene'.

Ca' zban chla' cho'a ba che bene' guat še bi nyeyjon binlo, ca' zban chla' xtiža'gaquen'.

Na' ca' venen che beł znia nac xtiža'gaquen' da' cheso'e.

¹⁴ Pur diža' mal diža' bya' že' cho'agaquen'.

¹⁵ Con bize da' chosode'ede' cont chesote' bene'.

¹⁶ Gate'teze chja'aque' zjanse'e yela' yaše' yela' zi' ca' nac da' chesone'.

¹⁷ Bi chesezoe' binlo len lježe'.

¹⁸ Bi chesežebe' Diosen' len bi da' mal chesone'.

¹⁹ Na' nezecho Diosen' bene' chio' bene' Israel ley chen'. Da'n'an' ne' tocho bi chac načo bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' benačh, le yogüe' bi chesone' can' ža ley chen'. ²⁰ Bi načo zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

Bene' šejnilaže' Jesucriston' gague' bene' güen len Diosen'

21-22 Na' ña'a Diosen' ba blo'e can' goncho cont gaccho bene' güen len le', na' bich bi že' che da' ca' za leyna' cheyala' goncho, san že' cheyala' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen can'i'te chzejni'in cheyala' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol beñač. 23 Le yogo'cho ba bencho da' xinj, na' ñe tocho bi naccho bene' güen can' chaclaže' Diosen' gaccho. 24 Perw na' Diosen' nži'ilaže'de' chio', na' gague bi chzi'e par že' naccho bene' güen len le', le Cristo Jesús'en' ba bñitlagüe' xtoła'chon'. 25 Diosen' gwsele' Jesucriston' bnežiw cuine' gosote'ne' neče xtoła' beñač. Na' note'teže bene' yesejnilaže'ne' ñitlao xtoła'gague'. Diosen' gwsele'ne' cont nacbia' zeje' to liča da' gwdape' yela' chxenlaže' bezi'xene' xtoła' bene' ca' gwnita' cani' bene' gosejnilaže'ne'. 26 Na' lecze gwsele'ne' cont nacbia' zeje' to liča da' že' che yogo' chio' chejnilaže'cho Jesús'en' naccho bene' güen.

27 Bi cheyala' gonxen cuincho güe'cho diža' naccho bene' güen. Šaca' choncho doxen dan' za leyna' zaca' gonxen cuincho güe'cho diža' naccho bene' güen, perw nono chon can' za leyna'. Con da' chejnilaže'cho Jesucriston', da'n'an' zaca' cont yeyaccho bene' güen len Diosen'. 28 Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' za leyna'.

29 ĆChaquale Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel. 30 Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho seřw dan' že' circuncisión na' len bene' cbi zjazoa seřwna'. 31 ĆChaquale choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

4

Can' ben da' Abraham

1 Na' le'e bene' gualaž chia' len le'e bi nacle bene' Israel, da' xozxta'oto' Abraham ĳbixe ñacho che'? 2 Šaca' Abrahanna' bene' doxen can' za leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. 3 Quinga za Xtiža' Diosen' da' nyojen: "Abrahanna' gwejnilaže' Diosen' na' da'n'an' Diosen' gwne' naque' bene' güen len le'." 4 Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. 5 San to goclen chon Diosen' že' che chio' chejnilaže'chone' naccho bene' güen len le', le bi choncho da' güen. Choncho da' xinj, na' Diosen' chñitlagüe' da' xinj chechon' še chejnilaže'chone'. 6 Lecz da' Davin' be'e diža' ca mba chzoa ben' chñitlao Diosen' xtołen' na' bibi cuent chone' še ba ben ben' da' güen o ba bene' da' mal. 7 Bzoj Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoła'chon'.

8 Mba zoacho še Diosen' že' checho bibi xtoła'cho de.

9 ĆChaquale neto'zen' zoato' seřw dan' že' circuncisión gac soato' mba can' gwne'neto'zen'? Gague neto'zen'. Lencze le'e bi zoale seřw dan' že' circuncisión guac soale mba. Nezeche Diosen' gwne' da' Abrahanna' naque' bene' güen len le' da' gwejnilaže'ne'. 10 Gwne' che da' Abrahanna' naque' bene' güen len le' cate' biña' soe seřw dan' že' circuncisión, gague beyož gwzoen'na' gwne' ca'. 11 Na' gwdechle gwzoe seřwna' cont gwnezde' Diosen' bñitlagüe' xtole' da' ba chejnilaže'ne'. Na' da'n'an' Abrahanna' naque' xozxtao' yogo' bene' chesejnilaže' Diosen' cont ñitlao xtoła'gauen' la'czla' bi zjazoe' seřwna'. 12 Na' lecze naque' xozxtao' neto' bich bi xtoła'to' de da' chejnilaže'to' Diosen', neto' zoato' seřw dan' že' circuncisión. Perw gague naque' xozxta'oto' da' zoato' seřwna', san da' chejnilaže'to' Diosen' can' gwejnilaže' da' Abrahanna' le'.

Diosen' bene' güen len da' Abrahanna' da' gwejnilaže'ne'

13 Diosen' gože' da' Abrahanna' gone' cont le' len bene' za' yesalje ĳo diaža' chen' yesac čhegague' doxen yežlion'. Gož Diosen' da' Abrahanna' ca' da' gwejnilaže'ne'. Da'n'an' gwna Diosen' naque' bene' güen gague da' bene' can' za leyna'. 14 Šaca' za Diosen' con bene' yeson doxen can' za leyna' yesac čhegague' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje ĳo diaža' che da' Abrahanna'. 15 Na' leyna' nsan' castigw che beñačen', le bi chesone' can' žanna'. Šaca' bibi ley de da' gwžian bia' bi da' cheyala' gon chio' beñač, bibi xtoła'cho de šeca'.

16 Can' naquen, note'teže bene' chesejnilaže' Diosen', none' legaque' ca xi'in diaža' che da' Abrahanna', na' Diosen' gone' cont legaque' yesac čhegague' yežlion' can' gože' da' Abrahanna'. Gague neto'zen' nombia'to' ley da' bzoj da' Moisés'en' gac čheto' yežlion'. Na' naccen da' ĳi gon Diosen' güen len note'tez bene' chejnilaže'ne'. Na' gone' ca' cont gacbia'

to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca' xozxtao' yogo' chio' chejnilaže'chone', ¹⁷ chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' bina' gac.

¹⁸ Abrahanna' bi gwnezde' nac gac can' gwna' Diosen' gac, san con gwzoe' gwejle' che Diosen' na' gwzoe' lez gon Diosen' cont nita' bene' zan xi'in diaža' che'. ¹⁹ Gwzoacze' gwejle' can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. ²⁰ Gwzoateze' gwejnilaže' Diosen' na' bi goczejlaže' len da' gož Diosen' le' gone', san gwzoachache' gwejnilaže'ne' na' benxene'ne'. ²¹ Abrahanna' gwnezde' Diosen' nape' yela' guac cont gone' can' gwnen'. ²² Da'n'an' Diosen' gwne' naque' bene' güen da' gwejnilaže'ne'.

²³ Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'. ²⁴⁻²⁵ Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwnitlagüe' xtoła'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bečhis bosbane'ne' ladjo bene' guat ca' cont beyone' chio' bene' güen.

5

Zoacho binlo len Diosen' da' chejnilaže'cho Jesucriston'

¹ Na' ca' nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'n'an' ba zoacho binlo len le'. ² Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjajzoacho txen len le'. ³ Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwčhejchcho cate' de bichle da' saca'zi'cho. ⁴ Na' še chonxenlaže'cho cate' chzaca'zi'chon', chlo'en zoachagcho chejnilaže'cho Diosen'. Na' še zoachagcho chejnilaže'chone', nezecho šjajzoacho txen len le'. ⁵ Na' dan' zoacho lez šjajzoacho txen len Diosen', bi načo naquen to da' güenlaže' chaquecho gac checho ca'. Le Diosen' ba gwsele' Spiritw čhen' zolan len chio' na' čhnen lo' lažda'ochon' žan chacčgüe Diosen' chio'.

⁶ Chio' beñač naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'. ⁷ Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'. ⁸ San Diosen' blo'ede' chacčgüede' chio' da' gwsele' Criston' gote' neče chio' la'czla' zoacho choncho da' xinj. ⁹ Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol bene'. ¹⁰ Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjajzoacho len Diosen'. ¹¹ Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

Adánna' gwleque' da' mal yežlio nga, san Jesucriston' gwleque' da' güen

¹² Yela' güedenag che bene' nechw ben' le Adán gwxe da' malen' yežlio nga, na' da' malen' nšan' yela' got. Can' goc, gwzolaw chesat yogo' benachen', le yogo'le' chesone' da' mal. ¹³ Benachen' gwzolaw chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. ¹⁴ Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'le' gosate' can' chesat bene' ža na'aža. La'czla' legaque' bi gosone' güedenag len to da' gož Diosen' legaque' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxi'e' yela' mban toli tocaņe.

¹⁵ nŽa' xen ca' dan' gwxe caten' Adánna' bene' da' xinjen' na' ca' dan' gwxe cate' Diosen' gwsele' Jesucriston'! Yogo' chio' beñač gatcho lagüe da' ben Adánna' da' xinjen', san yogo' chio' beñač guac soacho mba da' nži'i Diosen' benachen' na' gwsele' Xi'ine' Jesucriston' cont chaclene' note'tezcho. ¹⁶ Toz Adánna' bi bzenague' che Diosen' na' da'n'an' Diosen' gwne' yesezaca'zi' yogo'cze benachen' toli tocaņe che xtoła'gaquen'. Nach Diosen' gwsele' toz bene' güen cont bñitlagüe' xtoła' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho. ¹⁷ De yela' got che chio' beñač neče da' xinj da' ben toz ben' gože' Adán, san mbalaz juisyw chac che chio' beñač neče da' güen da' ben Jesucriston' bnežjw yela' mban che' neče yogo'cho. Diosen' nži'ide' chio', nachen' bibi

chghixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocanē cont nābia'cho txen len Jesucriston'.

¹⁸ Can' naquen, da' ben toz Adánna' da' xinj, Diosen' gwchogbi'en saca'zi' yogo' benāchen' che xtoła'gaquen'. Na' neche da' güen da' ben toz Jesucriston' da' bnežjw cuine' gosote'ne', da'nān' nītlao xtoła' note'tezcho chejnilaže'chone', cont none' chio' ca bene' güen. ¹⁹ Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benāch. Na' da' bzenag Jesucriston' che Diosen' na' bnežjw cuine' cont nītlao xtoła' benāchen', da'nān' note'tezcho chejnilaže'chone' none' chio' ca bene' güen.

²⁰ Cate' Diosen' bnežjue' ley chen' da' bzoj Moisésen' na' gwcha'o gwxench da' xinj da' goson benāchen', le bi bosozenague' chen. Perw na' la'czla' gwcha'o gwxcn da' malen', gwcha'o gwxcnch yela' ži'ilaže' che Diosen' len chio' benāch. ²¹ Can' chac, de yela' got che yogo' chio' benāch da' naccho bene' chon da' xinj, ca'cze Diosen' nzi'ide' yogo' chio' benāch cont note'tezcho gaccho bene' güen len le' na' gata' yela' mban checho toli tocanē še šejnilaže'cho Xancho Jesucriston'.

6

Bi cheyala' soacho goncho da' xinj san soacho goncho can' chazlaže' Criston'

¹ ¿Nacxen' cheyala' goncho na'a ba nezecho nzi'ilaže' Diosen' chio'? ¿Goncho da' malen' cont yezi'xenchce Diosen' che chio'? ² Gague can' goncho. Cate' gwzoloa chejnilaže'cho Criston' bich goclaže'cho nābia' da' malen' chio'. Da'nān' guac nācho ba gotcho len da' xinjen' cont bich gonchon. ³ ¿Bi chache'ele can' zejen da' gwzoacho nis? Zejen da' chejnilaže'cho Jesucriston' ben' got neche chio', bačh naccho ca to bene' guat len da' xinjen' cont bich gonchon. ⁴ Na' dan' gwzoacho nis leze guac nācho bgaše'cho can' bosocuaše' Criston'. Na' con can' bečhis bosban Xancho Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

⁵ Na' can' žacho ba gotcho len da' xinjen' dan' chejnilaže'cho Criston', leze guac nācho bečhis bosban Diosen' chio' can' bečhis bosbane' Criston', le ba bocobe' yichjlažda'ochon'. ⁶ Cana' ne' chnābia' da' malen' chio' len yogo' da' choncho. perw na'a da' chejnilaže'cho Criston' ben' got neche chio', ba none' chio' ca to bene' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan nābian' chio'. ⁷⁻⁸ Bene' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nābia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli tocanē. ⁹ Na' nezecho Criston' beyas bebane' ladjo bene' guaten' na' gwbat gate' da' yoble le bich soe yela' gotten' le'. ¹⁰ Na' cate' gosote' Criston', tñ'aze bnežjw yela' mban che' neche xtoła'chon'. Bich chyažjen gwnežjw cuine' da' yoble, san ba zualene' Diosen' chone' con bi da' chazlaže' Diosen'. ¹¹ Nach dan' gote' neche xtoła'chon', cheyala' soacho goncho cont da' mal dan' yo'o lo' yichjlažda'ochon' bich nābian' chio', na' cheyala' soacho txen len Xancho Jesucriston' cont goncho dan' chazlaže' Diosen'.

¹² Da'nān' bi güe'cho latje nābia' da' malen' cuerp chechon' dan' nac da' gat na' goncho bi da' xinj da' selažen'. ¹³ Bi cheyala' gon cuincho lo' na' da' gwxiyen' cont goncho da' mal len cuerp chechon'. Cheyala' gon cuincho lo' na' Diosen' cont goncho da' güen. Guac nācho Diosen' bečhis bosbane' chio' ladjo bene' guaten' da' bocobe' yichjlažda'ochon'. ¹⁴ Bich nābia' da' malen' chio', le nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' bene' šagüe'.

Bene' chzenag che da' malen' naque' ca bene' zoa xan, bene' chnābia' le' cont gonche' da' malen'

¹⁵ ¿Gontezcho da' xinjen' da' nezecho nzi'i Diosen' chio' na' nezecho bi chone' cuent še ba bencho da' ža leyna' cheyala' goncho? Bitw goncho ca'. ¹⁶ Nezecho še ba chzenagcho che to bene' cont goncho bite'tez že', choe'cho latje chnābi'e chio'. Na' ca'cze naquen len chio' še chzenagcho che da' malen' na' chontezchon, ba chnābia' da' malen' chio' še ca'; na' bi gac šjayzalencho Diosen' toli tocanē še ca' choncho. San še zoacho chzenagcho che Diosen', nachen' zejczcho choncho da' güen na' šjayzalencho Diosen' toli tocanē. ¹⁷ Na' choa' yela' choxcen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle cana'. ¹⁸ Diosen' ba bebeje' le'e lo' da' malen' na' ba ben cuinle lo' ne'en cont soale gonle da' güen. ¹⁹ Ba bzejni'ida' le'e bia' diža' che bi da' chac che chio' benāch cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chechen', na' benchgualē da' malen', leze can' cheyala' gon cuinle lo' na' Diosen' gonle da' güen cont chazlaže' Diosen' can' chonlen'.

²⁰ Caten' ne' zejcho choncho da' malen' bi chzenagcho che Diosen' neca choncho da' güen. ²¹ Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' chesontezē da' malen' gata' castigw chegaque' toli tocanē. ²² Na' chio', Diosen' ba

bebeje' chio' lo da' malen' na' yo' ocho lo ne'ena'. Da'nan' zejeh choncho da' güen can' chazlaže' Diosen' na' šjayzoacho len le' toli tocañe. ²³ Še zoacho choncho da' xinjen', gata' castigw checho toli tocañe cate' gatcho. San Diosen' chondadze' chio' to da' güen juisyw, chio' chejnilaže' cho Xancho Jesucriston', chone' cont šjayzoacho len Diosen' toli tocañe.

7

Naccho ca to bene' ba got len ley da' bzoj Moisésen'

¹ Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheyala' cze yosozenague' che leyna'. ² Ca to no'ole nšagna', šlac mban bene' che' cheyala' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'. ³ Še no'olen' soalene' bene' yoble šlac ne' mban bene' chen', nape' dola' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xinj yošagne'e.

⁴ Bene' migw, can' naquen len chio' chejnilaže' cho Criston'. Ba belacho len leyna' da' žan saca'zi'cho che xtoła'chon' toli tocañe. Na' ba gwnitlao xtoła'chon' dan' bnežjw Criston' yela' mban chen' gosote'ne' le'e yag cruzen'. Da'nan' ba zoacho t xen len Criston' ben' beban ladjo bene' guaten', na' zoacho cont goncho can' chazlaže' Diosen'. ⁵ Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocañe cate' gatcho. ⁶ Perw na'a ba belacho len ley da' žan cheyala' si'cho castigw toli tocañe, le Criston' beque'e xtoła'chon'. Na' ba chaclaže' cho goncho can' chazlaže' Diosen', na' chonchon gague cont na' Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

Bi güe'cho latje nabia' da' malen' chio'

⁷ Bi cheyala' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyala' gona' cont gocbe'eda' chona' da' xinj. Na' gwnežda' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'." ⁸ Na' cate' gwnežda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj. ⁹ Neda' gwzoa' to tiemp bi gocbe'eda' bi cheyala' selaža'. Perw cate' bžin ža gwnežda' nžian bia' bi cheyala' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nan' gwnežda' cheyala' sia' castigw che xtolan' toli tocañe. ¹⁰ Leyna' nyojen cont gwzenagcho chen na' gata' yela' mban checho toli tocañe, perw da' bi bzenaga' chen, bzejni'in neda' gata' castigw chia' toli tocañe. ¹¹ Can' goc, cate' bembia' leyna', da' malen' da' yo'o lo' yichjlažda'oguan' gwžoayaguen neda' cont bencha' da' malen', nach gwchoglaon chia' gata' castigw che xtolan' toli tocañe.

¹² Ley dan' bzoj Moisésen' naczen che Dios, na' to to da' nžian bia' goncho naquen güen na' zejen to licha. ¹³ Nacho leyna' da' naquen güenchguan' chonen cont saca'zi'cho che xtoła'chon' toli tocañe? Bi nac len. Da' mal da' yo'o lo' yichjlažda'ochon' bi ben' latje goncho can' cheyala' goncho, na' da'nan' gwchoglaon checho saca'zi'cho che xtoła'chon' toli tocañe. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. ¹⁵ Bi choncho da' güen da' chaclaže'cho goncho, san da' xinj da' chgue'echo lelen' choncho. Bi chache'echo bixchen' choncho ca'. ¹⁶ Na' dan' chgue'echo da' mal dan' chonchon', zejen chache'echo nac leyna' güen. ¹⁷ Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. ¹⁸ Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. ¹⁹ Bi choncho da' güen da' chaclaže'cho goncho, san choncho da' xinj da' bi che'necho goncho. ²⁰ Da'nan' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. ²² Lo' yichjlažda'ochon' chbecho goncho can' ža ley che Diosen', ²³ perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

²⁴⁻²⁵ Nyäše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chbecho goncho can' ža ley che Diosen', ²³ perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'. Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nan' si'cho castigw toli tocañe. Choçxen Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

8

Spiritw che Diosen' chonen chio' yela' mban toli tocane

¹ Na' na'a da' ba naccho txen len Cristo Jesúsen', bich gata' castigw checho toli tocane, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. ² Cate' ne' zoacho chontezcho da' malen' nchoglaon checho si'cho castigw che xtol'a'chon' toli tocane, perw na'a Spiritw che Diosen' ba benen chio' yela' mban toli tocane da' chejnlaže'cho Cristo Jesúsen' na' Spiritw chen' chnabian' yichjlažda'ochon'. Da'n'an' bich saca'zi'cho toli tocane. ³ Ley da' bzój Moisésen' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goczze cuerp chen' ca cuerp che chio' bene' güen da' xinj. Na' Jesucriston' bnežw cuine' neche xtol'a'chon' cont da' malen' bich nabian' chio' len xbab da' yo'o lo' yichjlažda'ochon'. ⁴ Diosen' gwsele'ne' cont soacho goncho da' güen can' ža ley chen' cheyala' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

⁵ Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. ⁶ Le še zoacho chebecho da' malen', nachle si'cho castigw toli tocane, na' še chebecho da' ca' chazlaže' Spiritw che Diosen', guata' yela' mban checho toli tocane na' soa cuezcho binlo len xbab dan' yo'o lo' yichjlažda'ochon'. ⁷ Choncho ze bene' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. ⁸ Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

⁹ Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnlaže' Criston'. (Spiritw che Criston' lecze naquen Spiritw che Dios.) ¹⁰ Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocane la'czla' yesat cuerp chechon' neche da' malen' dan' de yežlion'. ¹¹ Diosen' bechis boshane' Cristo Jesúsen' ladjo bene' guaten', na' lecze gwžin ža cate' Diosen' yečhis yosbane' chio' len cuerp checho quinga da' chesat, le Spiritw chen' zoon lo' lažda'ochon'.

¹² Da'n'an' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'. ¹³ Le še soacho gwzenagcho che da' mal dan' yo'o lo' lažda'ochon', saca'zi'cho toli tocane. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocane.

¹⁴ Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios. ¹⁵ Diosen' bene' chio' Spiritw chen' caten' gwque'e chio' ca xi'ine'. Da'n'an' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': "Xa". ¹⁶ Na' lecze Spiritw chen' chnen lo' lažda'ochon' cont nezecho naccho xi'in Dios. ¹⁷ Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

¹⁸ Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. ¹⁹ Diosen' bene' beňach, bene' beyixe', len bica'chle da' zjade. Na' yogo'cho len bichle da' ca' bene' zoacho lo juisyw chbezcho batcan' gon Diosen' gacchgua mba che chio' naccho xi'ine'. ²⁰ Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' beňach. Na' txen chbezcho gone' cont gac checho binlo. ²¹ Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te chegaquen. ²² Nezecho ža na'aža yogo' da' ca' ben Diosen' chesežaglaon ca to no'ole bene' chzan. ²³ Na' gague da' ca'ze chesežaglaon, san lencez chio' beňach chžaglaoho na' chbežgüe'cho. Ba beň Diosen' chio' Spiritw chen' cont nezecho gwžin ža gaguech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. ²⁴ Cate' Diosen' bene' yela' mban checho toli tocane gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. ²⁵ Na' še biňa' le'echo da'na' chbezcho gac, cheyala' cezcho gaquen sin cbi chjxaque'laže'cho.

²⁶ Na' Spiritw che Diosen' chaclenen chio', le bi nezecho can' cheyala' goncho yol güižcho Dios, san Spiritw che Diosen' chache'en cate' con chebanecho na' cate' bi cheželecho diža' da' güe'lencho Diosen', nach chnen gualazcho len diža' da' bi chejni'icho. ²⁷ Na' Dios ben'

chna' chgüie' yichjlaždao' yogo' cze bene', chejni' ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chnab Spiriton' lagüen'.

Diosen' de'e chio' na' da'nan' nono soe chio'

²⁸ Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaze'. ²⁹ Cate' biña' galjcho Diosen' gwnežde' šejnilaže' chone' na' bsi'e xnezen' gac yichjlažda' ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo' cho na' chio' gaccho ca biše' lježe' bi' xcuide' ch. ³⁰ Can' naquen, cani'te Diosen' bsi'e xnezen' gac yichjlažda' ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacchgua güen checho txen len Jesucriston' yaban'.

³¹ Catec güenna' chon Diosen' len chio' ba bsi'e xnezen' gac checho yogo' da' ca'! Len' de'e chio', nachen' notno soe chio'. ³² Diosen' bi bžone' saca' zi' Xi'ine' Jesucriston', san gwsele' ne' cont yeque'e xtoła' chon'. Da'nan' nezecho yebede' gone' chio' yogo' bite'tez da' yažjecho. ³³ Diosen' ba gwleje' chio' naccho lo ne'e, na' beque'e xtoła' chon'. Na' notno soe gwcuiš chio' lagüen', le ba gwne' bibi xtoła' cho de. ³⁴ Nono zoa no gac gon cont na Diosen' de xtoła' cho. Criston' bzanlaže' cuine' gosote' ne' cont beque'e xtoła' chon', na' beyas bebane' ladjo bene' guat ca', chi'e chnabi'e txen len Diosen'. Na' len' chnie' gualaz chio' lao Diosen'. ³⁵ De da' gwžon cont Criston' bich gacde' chio'? Gwžon no da' mal da' gac checho? Gwžon no yela' yaše' yela' zi' da' gac checho? Gwžon no yela' xi'a che bene' chgue'e chio'? Gwžon no yela' chbił chdon checho? Gwžon cate' bi de xalana' cho? Gwžon še bi da' xož gac checho? Gwžon še za' no bene' gote' chio'? Bibi de da' gwžon cont Criston' bich gacde' chio'. ³⁶ Chac can' nyojce Xtiža' Diosen' žan:

Xanto' Dios, da' chejniłaže'to' le' nita' bene' chesaclaže' yesote' neto' do ža do yel.

Chesone' xbab nacto' ca to xila' be yesote'.

³⁷ Na' la' cžla' yogo' da' mal ca' za' ac len chio', bi chac chop laže' cho, san chebechgüecho le nezecho zoacze Criston' chacde' chio'. ³⁸ Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za' za'. ³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Xancho Jesucriston' beque'e xtoła' chon'.

9

Diosen' gwque'e bene' Israel ca' ca xi'ine'

¹⁻² Neda' naca' txen len Criston' na' choa' diža' li, bi chonlaža', chnia' chacyaše' chgüeda' na' chacchgüeda' lo' lažda' ogua' che bene' gualaz chia' bene' bi chesejniłaže' Criston'. Spiritw che Diosen' chaclenen neda' cont nezda' diža' lin' choa'. ³ Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaz chia' ca' yesejniłaže' Criston'. Chacda' legaque', le gosalje' zjanaque' bene' Israel ca neda'. ⁴ Diosen' gwque'e xoxxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene' ne', na' bnežjue' legaque' ley da' bzoj Moisésen'. Na' blo'ede' ne' naclen' yesonxene' ne', nach gože' legaque' bichle da' güen da' gone' len legaque'. ⁵ Bene' gole blao bene' za' che'elte gosaque' xoxxtao' neto' bene' Israel. Na' lo diaža' chegaque' na' golje Criston' ben' gwseła' Diosen'. Criston' lecze naque' Dios na' chnabi'e yogo'te benač, yogo'te beyixe' na' yogo' loł bichle da' de yežlio nga na' gate'teze. Cheyala' gonxenchone' toli tocañe. Na' can' gonšcacžcho.

⁶ Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža' che da' Israelen' na Diosen' nacto' bene' Israel, le gague yogo'to' chejniłaže'to' ne'. ⁷ Na' gague yogo' neto' goljto' lo diaža' che da' Abrahamna' nacto' dogualje xi'in' diaža' che', le gague yogo'to' chejniłaže'to' Diosen' can' gwejniłaže' da' Abrahamna' le'. Quinga gož Diosen' Abrahamna' cani', gwne': "Xi'in' diaža' che da' Isaaquen' gona' cuent lo diaža' chion'." ⁸ Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosalj' lo diaža' che bene' Israelen', san bene' chesejle'e gon Diosen' gac chegaque' can' že' con can' gwejle' da' Abrahamna', legacze' zjanaque' xi'ine' na' zjanaque' xi'in' diaža' che da' Abraham. ⁹ Quinga gož Diosen' Abrahamna' gone', gwne': "Cate' žin tienpen' bžia' bia' yida', cana' ba zoa to bi' che no'ol chio' Sara ni."

¹⁰ Na' gague da' na'zen', san lecž ca' Diosen' be'e diža' che xi'in' da' Rebecan' bin' gosac choptebe' xi'in' da' xoxxta'oto' Isaac. ¹¹⁻¹² Cate' biña' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože' ben' nabi'a' be' lebe'." Gwne' ca' cont nezecho chbeje' bene' gac güen

chegaque', gague lagüe da' chesone' bi da' güen, san cont gac can' chnalažen'. ¹³ Na' ga yoble nyoj Xtiža' Diosen' žan: "Gocda' Jacob na' b'gue'eda' Esau."

¹⁴ Bi cheyała' goncho xbab Diosen' cbi chone' da' zej to licha dan' chone' ca'. Zejczje' to licha. ¹⁵ Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." ¹⁶ Diosen' chbeje' beñe' cont yeyaše'laže'de' le', gague can' chaclaže' benachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. ¹⁷ Na' Xtiža' Diosen' nyojen can' gože' beñe' gwnabia' che Egipton', gwne': "Neda' bena' naco' rey cont chlo'eda' beñe' yela' guac chia' da' chona' len le'. Chonan' cont yeseneze beñe' že' doxen lo yežlion' zoa' chnabi'a." ¹⁸ Can' naquen, Diosen' cheyaše'laže'de' con non' chazlaže' yeyaše'laže'de', na' lecze beñe' zjanaque' bene' güedenag, lecze chazlaže' gone' legaque' beñe' güedenag.

¹⁹ Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' benač. žBixčhen' že' de xtoła'chon' še ca'?" ²⁰ Perw žno nac chio' benač gacyožlencho Diosen'? Ca to no yeso' xguague bi gac yen' beñe' ben' gom: "žBixčhen' beno' neda' quinga?" ²¹ Beñe' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

²² Na' bi nācho chon Diosen' con can' chazlaže' len chio' benač yogo' nī'a, nžie' bia' gwnežjue' castigw toli tocañe che beñe' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czla' zjazaque' yesebiaye'e. ²³ Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. ²⁴ Chion' ba gwleje' gac güen checho balcho naccho beñe' Israel na' balcho bi naccho beñe' Israel. ²⁵ Can' ža le'e libr dan' bzoj Oseas ben' be' xtiža' Diosen' cani', žan:

Beñe' ca' bi zjanaque' yež chia', neda' Dios nīa' legaque' yež chia',
na' beñe' ca' bi gocda', yapegacane' chacda' legaque'.

²⁶ Na' yež gan' gož Diosen' beñe' ca': "Bi nacle yež chia'",
na'teze Dios ben' zoa toli tocañe ye'e legaque' xi'ine'.

²⁷ Na' Isaias ben' be' xtiža' Dios cani' gwne' quinga che da' xozxtao' neto' beñe' Israel: "La'czla' chio' beñe' Israel šancho ca' yox da' chi' cho'a nisdao', bał gacho šjayzoacho len Diosen'." ²⁸ Le Diosen' gone' can' ba nčhoglagüen' len chio' benač, na' bedao'nez gone' doxen can' ba ngüie' gone'." ²⁹ Gac can' ža yeto da' bzoj Isaiasen' cani', žan:

Šaca' Xancho Diosen' ben' nape yela' guac xen bi bocua'añe' to chope beñe' lo nación Israel
chechon',

ba gwžiai'i'cho can' gosac che beñe' Sodoma na' beñe' Gomorra ca'.

Beñe' Israel beñe' bi chesejnilaže' Criston'

³⁰ Quinga ba goc, beñe' bi zjanaque' beñe' Israel bi besyeyiljue' nacle yesone' cont Diosen' ne' zjanaque' beñe' güen len le', perw bale' ba chesejnilaže' Criston' na' da'nān' ba zjanaque' beñe' güen len Diosen'. ³¹ Na' zan beñe' Israel gualaž cheto' zjanao' to ley da' chžian bia' naclen' yesone' cont yesaque' beñe' güen len Diosen'. Perw bi zjanaque' beñe' güen len le', le bi chesone' doxen can' žanna'. ³² Na' bi goc yesaque' beñe' güen len Diosen', le gosacde' yesone' da' güen cont yesaque' beñe' güen len le' na' bi gosacbe'ede' con beñe' yesejnilaže'ne' yesaque' beñe' güen len le'. Goc chegaque' ca' chac che beñe' jati'i' to yej. ³³ Quinga nyoj Xtiža' Diosen' chegaque':

Gan' nzi' Sión sela' to beñe',

na' bena' zaca'lebe' ca' to yej da' chego' beñe' na' ca' to yej xen da' šjati'i' beñe' na' bixe',
le beñe' zan bi yesejnilaže' ben' sela'.

Na' note'teze' yesejnilaže' bena' selan', gwbat yesyetingde' che dan' gosejnilaže'ne'.

10

¹ Beñe' migw, lo' lažda'ogua' che'nchgüeda' beñe' Israel gualaž chia' yesejnilaže' Jesu-criston' cont gata' yela' mban chegaque' toli tocañe, nachen' choł güiža' Diosen' chnaba' gaclene' legaque'. ² Nezda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'. ³ Bi chesejni'ide' cheyała' yesejnilaže' Criston' cont yesaque' beñe' güen, san chesyeyiljue' bi da' güen da' yesone' chesacde' cont yesaque' beñe' güen len le'. Da'nān' bi chesejnilaže' Jesucriston' can' chaclaže' Diosen' yesone'. ⁴ Le yogo' beñe' chesejnilaže' Criston' ba besyeyaque' beñe' güen len Diosen'. Na' chio' chejnilaže'chone' ba nezecho nono gac gonyane' can' ža ley dan' bzoj Moisésen', nēca gac yeyaque' beñe' güen da' na'ogüe' lezen.

⁵ Da' Moisésen' bzoje' can' cheyała' gon beñe' cont gague' beñe' güen len Diosen', gwne': "Note'teze beñe' chone' cayanen' ža leyna', nachen' guac bane' toli tocañe." ⁶⁻⁷ Na' chio' ba

naccho bene' güen len le' da' chejnilaže'chone', na' bich choncho xbab načo: "¿No gac cue yaban' na' no gac yetj gan' že' bene' guaten?" Šaca' nacle goncho šjaxi'cho Criston' cont gaclene' chio'.⁸ San diža' güen da' chyxijue'eto' žan: "Ba nombia'cho diža' da' chaclenen chio'. Choncho xbab che len na' choe'cho diža' can' žan." Lenña' diža' da' chyxijue'eto' bene' cont yesejnilaže' Jesucriston'.⁹ Che'to' bene': "Še güe'lenle bene' diža' cont yeseñezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban chele toli tocañe'."¹⁰ Le cheyala' šejle'cho lo' yichjlažda'ochon' cont yeyaccho bene' güen len Diosen' na' lecze cheyala' güe'lencho bene' diža' che dan' chejnilaže'cho Criston' cont gata' yela' mban checho toli tocañe'.

¹¹ Xtiza' Diosen' nyojen žan: "Note'tez bene' yesejnilaže' Diosen', gwbat yesyetinjde' che da' gosejnilaže'ne'." ¹² Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'lol bene', na' cheyaše'laže'de' note'tezcho chñabcho gaclene' chio'.¹³ Can' gwne': "Note'tez bene' yesenabe' gaclena' legaue', neda' naca' Xanle yebeja' legaue' lo' da' malen'." ¹⁴ Na' žnacxe yeson bene' yesenabe' goclen lagüen' še bi chesejnilaže'ne'? Na' žnacxe yesone' yesejnilaže'ne' še biña' yesende' xtižen'? Na' žnacxe yesende' xtižen' še nono zoa no güe'lene' legaue' xtižen'? ¹⁵ Na' žnacxe yeson bene' yeseyxijue'ede' xtiža' Diosen' še Diosen' bi sele' legaue' yeseyxijue'eden'? Chac can' nyoj Xtiza' Diosen' žan: "Chbechgüecho caten' za'ac bene' cheseyixijue'ede' diža' güen chosozejni'ide' guac soacho binlo len Diosen'."

¹⁶ Perw gague yogo' bene' gualaž cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." ¹⁷ Bia'cze cheyala'cze yesene bene' diža' güen da' chzejni'in che Criston' cont yesejnilaže'ne'.

¹⁸ Na' chñaba': žbiña' yesene bene' Israel gualaž cheton' diža' güen da' chzejni'in che Criston'? Baçh gosenden'. Chac can' nyoj Xtiza' Diosen' žan:

Bene' že doxen lo' yežlion' ba gosende' xtižen';
ba zej xtižen' doxen.

¹⁹ Na' chñaba' da' yoble: žbi gosejni'i bene' Israel gualaž cheton' diža' dan' chzejni'in che Criston'? Ba gosejni'iczen'. Le da' Moisésen' bzoje' da' gwna Diosen' chegaue', žan:

Neda' Dios gona' güen len bene' bi zjanac bene' nación chia', na' gue'ele legaue'.

Na' gona' güen len bene' nación ca' bene' bi chesejni'i, na' ža'ale.

²⁰ Nach Isaíasen' ben' be' xtiža' Diosen' cani' bi bžebe' gwduxijue'ede' da' nga gwna Diosen', žan:

Bene' bi besyeyiljw neda', besyeželde' neda'.
Na' bene' bi gosenab neda', blo'elagua' legaue'.

²¹ Na' Diosen' gože' bene' Israel gualaž cheton', gwne': "Yogo' ni'a chñeyoeda' le'e cont gwzenagle chia', na' zoačhaçhle chonle güedenag len xtižan'."

11

Bal bene' Israel yesejnilaže' Jesucriston'

¹ Bi cheyala' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín. ² Biña' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elias ben' be' xtiža' Diosen' cani', gwdağüe' xya che da' xozxta'oto' ca', gože' Diosen': ³ "Xana', bene' gualaž chia' quinga ba gosote' bene' ca' goso'e xtižon', na' ba bosyochinje' mes de yej ca' gan' cheyala' yesonxene' le'. Yetoga neda' zoa' chzenaga' chio' na' lençe neda' chese'nde' yesote'." ⁴ Nach Diosen' boži'e xtižen' gože'ne': "Ne' nita' gaže mil bene' ba gwleja' bene' biña' yosozoa xibe' yesonxene' l' gua'a lsaca' dan' nzi' Baal." ⁵ Na' ca'cze naquen ža' na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxonto'ne', le nži'ilaze'de' neto'. ⁶ Diosen' gwleje' neto' cont chonxonto'ne' da' nži'ilaze'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' bene' šağüe' che' cate' chbeje' neto' še ca', san naquen to goclenze.

⁷ Zan bene' nación Israel cheton', la'czla' chesonchgüe' da' chesacde' cheyala' yesone', bi chesyeželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca' to bene' güen. Na' bene' yezica'chle zjanaque' güedenag len Diosen'. ⁸ Chac chegaue' can' nyoj Xtiza' Diosen' žan: "Diosen' bene' cont zjanaque' ca' bene' bicze nte. Na' ža' na'aža zjanaque' ca' to bene' bi chle'e len yejlagüen', na' ca' to bene' bi chene len naguen'." ⁹ Na' da' Davin' gwne' chegaue':
Yogo' da' de da' chesyebede' yesaquen ca' to da' yeben' legaue',

na' yesaquen ca to ga šjaselažoe' yesaque' castigw.

¹⁰ Yesechol yichjlažda'ogaquen', na' yedote yesezaca'zi'e can' chzaca'zi' ben' nlegw cože' no'e yoa' zi'i.

Diosen' gwleje' bał bene' bi zjanac bene' Israel cont chesejnilaže'ne'

¹¹ Nezececho zan bene' Israel gualaž četon' bi chesejnilaže' Criston'. Na' chnaba', čzjanaque' ca bene' gwyo'o yeja' ni'e? Čše zjanaque' ca bene' gwbiže' na' gote'? Zjanaque' ca to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'nan' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. ¹² Da' yoble chnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel četon' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

¹³ Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao čhaque'da' cont bene' yosozenague' che Diosen'. ¹⁴ Le čhaclača' gona' cont bene' gualaž čhia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čegaque' tołi tocañe. ¹⁵ Diosen' ba bnite' zan bene' Israel gualaž četon' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž četo' len le'. Na' leca mba gac cate' yesyebigue' len Diosen'. ¹⁶ De costumbr che neto' nacto' bene' Israel cate' chonto' yetextil, na' chnežjwto' Diosen' to bloł dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze zoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebbe' ca bloł dao' cuazina' na' ca' loe yaguen'.

¹⁷ Nación Israel četon' zaca'leben ca zoze' yag da' ba nčhog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'lebe ca zoze' yag olivo da' ze do yixe', da' ba gwčhogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' čenna' chac banlenle. ¹⁸ Bi gaguele naquechle bene' güen ca bene' Israel gualaž četo' da' chac čhele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

¹⁹ Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwčhogue' xozen' cont goc bozoe' chio' gualaz legaque'." ²⁰ Da' li can' žalen'. Perw da' bi gosejnilaže' Criston', Diosen' bene' len legaque' ca zoze' yag da' ba gwčhog xan yaguen' len, na' ba bozoe' le'e lagüe da' chejnilaže'le Criston'. Da'nan' bi ga'laže'le, san le gwsaca' cont soachachle šejnilaže'lene'. ²¹ Da' bi gosejnilaže' Criston', Diosen' bene' cont gwdi gwxcaca' bene' Israel gualaž četo' ca' bene' zjazaca'lebe' ca zoze' yag güenna', na' lecze ca' gone' saca'zi'le še bi soachachle šejnilaže'lene'. ²² Le gonšc xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soachachle šejnilaže'lene' cont bi gone' saca'zi'le can' ba bene' len bene' Israel gualaž četon' bi gosejnilaže'ne'. ²³ Na' Diosen' yebede' si' lo ne'e bene' Israel gualaž četo' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca zoze' yag da' bezyone' toze len yag čen da' yoble. ²⁴ Le'e nacle ca zoze' yag olivo da' ze yixe', Diosen' gwčhogue' le'e na' bozoe' le'e lo zoze' yag güen la'czla' bi nacle dogualje xozen'. Na' naquechxe yebede' yozoe' bene' Israel gualaž četo' ca' le'e yaguen' da' yoble bene' ca' zjazaca'lebe' ca dogualje zoze' yaguen'.

Bene' zan bene' Israel yesyeyaque' lo na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaguele zaca'chle cdel ca bene' Israel gualaž četo' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'.

²⁶ Nach gwžin ža yogo' bene' Israel gualaž četo' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle, le'e za'le lo diaža che da' Jacob.

²⁷ Na' cate' žin ža yeca'a xtoła'len',

cana'ch ba goc can' ba gwnia' gona'.

²⁸ Dan' bi chesejle' zan bene' Israel gualaž četon' diža' güen che Diosen', da'nan' ba bzoe' šla'ale nación četon' na' ba gwleje' le'e bi nacle bene' Israel cont chejle'le che'. Perw na' Diosen' ne' chacde' bene' ca', le gwleje' da' xozxta'oto' ca' cont yesaque' nación che'. ²⁹ Na' Diosen' bi chetiñjde' che bene' mbeje' yesaque' nación che', neca chetiñjde' che goclen da' chone' len benachen'. ³⁰ Cana'te le'e bi bzenagle che Diosen' na' da' bi gosaclaže' bene' Israel gualaž četon' yosozenague' che', nach beyaše'laže' Diosen' le'e na' goclene' le'e cont

chzenagle che'. ³¹ Na' da' bi chosozenag bene' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše' laže' de' legaue' can' cheyaše' laže' de' le'e. ³² Diosen' ba gwchoglagüe' che yogo' benachen' de xtoła'gaue' da' bi chosozenague' che', na' ba bene' ca' cont lecze gwlo'ede' cheyaše' laže' de' yogo'cze'.

³³ Leca bene' sina' Diosen'. Nezczede' yogo'lol. Gwbat šejni'icho da' nžie' bia' gac o da' nžie' bia' gone' lo yela' sina' che'. ³⁴ Nyoj Xtizen' žan: "Nono neze yogo' xbab che Xancho Diosen'; nono nape yela' sina' cont gwzejni'de' le' can' cheyala' gonen'. ³⁵ Na' nono cheyala' gon xbab yebi' i Diosen' güen len le' še bi da' ba be'ene'." ³⁶ Yogo'lol da' de naquen che Dios. Bene' benach, beyixe' na' bica'chle da' zjade. Na' lagüe yogo'lol da' bene' zoe' blao. Len' gacxene' toli' tocane. Can' gacšca.

12

Cheyala' gon cuincho lo na' Diosen'

¹ Bene' migw, Diosen' ba cheyaše' laže' de' chio'. Da' nan' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže' gonxenchone'. ² Bi goncho ca cheson bene' bi zjanombia' Diosen'. San cheyala' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to liča.

³ Diosen' nži'ilaže' de' neda' na' ba gwsele' neda' cont chixjue'eda' xtizen'. Da' nan' chnia' bi cheyala' gonxen cuincho, san cheyala' gacbe'echo Diosen' ba goclene' chio' cont chejnilaže' chone' na' none' grasyw checho cont goncho bi da' goncho. ⁴ Can' nac cuerp chechon', zan cuen naquen na' gague toze žin da' cheson to to cuenen. ⁵ Lecze can' naquen len chio', bene' zan naccho chejnilaže' cho Criston' na' yogo' chion' naccho txen len le' na' len lježcho zaca'lebocho ca toze cuerp.

⁶ Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyala' chixjue'echon na' šejle'cho gaclene' chio' gonchon. ⁷ Na' še Diosen' ba none' checho gaclencho bene', cheyala' gaclencho legaue'. Na' še ba none' checho gwsed gwlo'echo bene', cheyala' gwsed gwlo'echone'. ⁸ Na' še Diosen' ba none' checho neyoecho bene' cont yesone' da' güen, cheyala' neyoechone'. Na' še ba none' checho gwnežjwcho da' chyažje bene', cheyala' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyala' cue' yichjcho güia na'cho legaue'. Na' še ba none' checho yeyaše'cho no bene' yaše', no bene' gole o no bene' güe', cheyala' yebecho gaclenchoe'.

Da' cheyala' gon chio' chejnilaže'cho Jesucriston'

⁹ Cheyala' gaue ljež benachcho do yichj do laže'cho, na' cheyala' gue'echo da' malen' na' soacžcho goncho da' nac da' güen. ¹⁰ Ca chaque biše' goljcho, ca'cze cheyala' gaquecho note'teze bene' lježcho na' gonchone' bene' xench ca cuincho.

¹¹ Bi gaccho bene' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

¹² Cheyala' yebecho da' nezecho šjazyocho len Diosen'. Cheyala' gwyo gwchejcho cate' chy chzaca'cho. Na' lecze cheyala' yol' güižcho Diosen' zan ni'a yogo' ža.

¹³ Cheyala' gaclencho bene' lježcho bene' chesejnilaže' Diosen' še bi da' cheseyažjde' na' gwlebchone' ližcho še zjanaque' bene' zito'.

¹⁴ Cheyala' nabcho lao Diosen' gac güen che bene' chosoči chososaca' chio'. Nabcho gac da' güen chegaue', gague da' mal.

¹⁵ Cheyala' yebecho txen len bene' chesybe na' cuežcho txen len bene' chesebež.

¹⁶ Yogo'cho cheyala' goncho toze xbab. Bi cheyala' ga'laže'cho, san yol' güižcho bene' yaše' bene' bibi chac na' bi gon cuincho bene' sina'.

¹⁷ Še bi da' mal chone bene' chio', bi nacho lecze da' mal yebi'icho len le'. Cheyala' cue' yichjcho goncho da' güen cont yesena bene' le naczen güen dan' chonchon'. ¹⁸ Cheyala' goncho bi da' gac goncho cont soacho binlo len yogo'lol bene'. ¹⁹ Chacda' le'e, nachen' chnia' cheyala' gwdecho to šla'ale bite'teze da' chesone bene' chio'. Diosen' gwyoezce' nac gone' len bene' chosoči chososaca' chio'. Xtizen' nyojen žan: "Xancho Diosen' že': Neda' yoži'a che da' mal da' chesone', na' neda' gwnežjua'ne' castigw." ²⁰ Na' lecze žan: "Še chbil chdon bene' chgue'ede' chio', cheyala' güe'chone' da' ye'ej gagüe'; le še goncho güen len le', guacbe'eljede' chone' da' mal." ²¹ Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaue' cont yesyetinjde' che da' malen' chesonen'.

13

¹ To tocho cheyała' gwzenagcho che justis bene' chesenabia', le Diosen' bnite' legaue' chesenabi'e. ² Še bi chzenagcho che bene' chesenabia', bi choncho da' n'zia bia' Diosen' goncho, na' lecze chylijwze xtoła'cho na' gaccho castigw da' bi chzenagcho chegaquen'. ³ Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaue', con soacho goncho da' güen da' yesyebede'. ⁴ Justis ca' chesone' xšin Dios cont soacho güen. Perw še choncho da' xinj, cheyała' žebcho legaue', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. ⁵ Da'nan' cheyała' gwzenagcho chegaue' cont bi si'cho castigw na' lecze cont gache'echo lo' yichjlažda'ochon' choncho can' cheyała' goncho. ⁶ Lecze da'nan' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaue', le Diosen' ba bzoe' legaue' cont chesone' dan' cheyała' yesone'.

⁷ Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an bene' cheyała' dap bala'an. Na' gonxencho bene' cheyała' gacxen. ⁸ Cheyała' chixjwcho doxen bi da' čala'cho che bene', na' lecze cheyała' gaue' yogo' ljež benachcho, le še chaquecho legaue', ba choncho da' non ley che Diosen' mandadw goncho. ⁹ Leyna' žan: "Bi gata'lenle no'ole bi nac no'ol chele o bene' byo bi nac bene' chele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' n'zia bia' leyna' goncho, bačh chonchon še chzenagcho che dan' žanna': "Le gaue' ljež benachle ca chaque cuinle." ¹⁰ Še chaque lježcho, bibi da' mal gonechone'. Da'nan' choncho doxen can' n'zia bia' leyna' še ba chaque lježcho.

¹¹ Caten' gwzolaacho chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'nan' bich cheyała' gaccho ca bene' čhtas, bene' bi chon xbab. ¹² Yežlio nga zaca'leben ca ga nac čhoj, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'. ¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo' lin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto, na' bi cheyała' tilen lježcho o gue'echo bene'. ¹⁴ Cheyała' gon cuincho lo' na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi n'bian' chio'.

14

Toz Diosen' nezde' še bene' lježcho nape' doła'

¹ Še zoa to bene' ba chejnilaže' Criston' na' biña' šejni'ide' nac cheyała' gone', con zoe' čacčejaže', le gwlebe' gaue' txen len le'e, perw bi gacyožlenle' che xbab chen'. ² Nita' bene' chesejnilaže' Diosen' chesacde' bi zjanape' doła' da' chesagüe' bite'teze yela' guagw, na' lecz nita' bene' yoble biña' yesejni'ide' bite'teze da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yiçe' cuanze. ³ Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. ⁴ ČNuxe nac chio' gwlaže' checho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

⁵ Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho. ⁶ Bene' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbabben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' chočlen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' chočlen che'.

⁷ Ne tocho bi yo'o lo' na'cho gwžiacho bia' can' soa cuezcho šlaque mbancho, na' neca yo'o lo' na'cho gwžiacho bia' nac gatcho. ⁸ Šlac mbancho zoacho cont goncho da' čaclaže' Xancho Jesucriston', na' še gatcho lecze cate' čaclaže' len' gatcho. Can' naquen, mbancho o gatcho, yo'ocho lo' na' Xanchon'. ⁹ Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

¹⁰ Bi cheyała' nacho che bene' lježcho zjanape' doła' še bi da' chesone', na' bi cheyała' gue'e lježcho. Yogo'czechcho techo lao Criston' cont le' chogbi'en checho še de xtoła'cho o še bibi de.

¹¹ Nyojczje Xtiža' Diosen' žan:

Ẁancho Diosen' že':

Da' li naca' Dios, zoa' mbana',

na' yogo' bene' yedesezoa xibgaque' laguan',

na' yogüe' yesene' toz neda' zaca' yesonxen benach.

¹² Can' naquen, yogo'czechcho yodecho cuent lao Diosen' che bite'teze da' ba bencho šlac mbancho.

Bi goncho da' gwžigan' bene' lježcho gone' da' mal

¹³ Da'nan' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjo bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'. ¹⁴ Ẁancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. ¹⁵ Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezhon. Criston' bnežjw cuine' gote' neche bene' lježchon', na' chio' bi cheyała' gagwcho bi da' gonon cont gac choplaže' bene' lježchon' cuejyichje' Criston' na' cuiaye'e.

¹⁶ Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. ¹⁷ Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. ¹⁸ Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

¹⁹ Da'nan' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'. ²⁰ Diosen' ba bnitlagüe' xtoła' bene' lježcho na' bi cheyała' gagwcho da' gonon gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho. ²¹ Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. ²² Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. ²³ Na' de xtoła'cho še chagwcho to yela' guagw na' chaczejlaže'cho chaquecho bilja cheyała' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

15

Cheyała' cue' yichjcho bene' lježcho

¹ Bałcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyała' gapcho yela' chxenlaže' len bene' biña' yesejni'išagüe'de', na' bi goncho con da' žan checho. ² To tocho cheyała' goncho bi da' güen da' chazlaže' bene' lježcho ca' goncho, cont gaclenen legaque' yesejnilaže'che' Diosen'. ³ Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." ⁴ Na' Xtiža' Diosen' da' bosozoj bene' cani' chzejni'in chio' cont gwyo gwčhejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. ⁵ Diosen' chone' chio' yela' chxenlaže' cont chy chčhejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesús'en'. ⁶ Na' gone' ca' cont toze can' nale gonxenle Dios ben' nac Ẁa Ẁancho Jesucriston'.

Diosen' chaclaže' bene' bi zjanac bene' Israel yesonxene' le'

⁷ Da'nan' cheyała' le'e to to bene' lježcho binlo ca' Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. ⁸ Can' goc len Cristo Jesús'en', bzejjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaque'. ⁹ Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan:

Da'nan' gua' yela' choxcen chio' gan' že bene' bi zjanac bene' Israel,
gola' gonxena' le'.

¹⁰ Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' naci6n che'.

¹¹ Na' ľecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le g6e' diža' che yela' gwnabia' che'.

¹² Na' da' Isaias ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isai.

Le' nabi'e bene' že' to to yež na' to to naci6n,

na' bene' ca' bi zjanac bene' Israel yesebeze' gaclene' legaque'.

¹³ Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soaghačhle yebele da' nezele šjayzoale len le'.

¹⁴ Bene' migw, nezda' ba nacle bene' šag6e' bene' chon da' g6en, na' nezda' chejni'ichg6ele na' chac chneyoe ľježle. ¹⁵ Pero ľe'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'. ¹⁶ Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclen Cristo Jes6sen' neda' chona'. ¹⁸ Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'. ¹⁹ Spiritw che Diosen' goclenen neda' cont bena' yela' guac na' bichle da' besyebane bene' gate'teze gwy'a'a be'lena' legaque' xtiža' Diosen', gwzolagua' Jerusal6n na' bžintia' gan' nzi' llirico. Na' ba gwdixjue'eda' xtižen' doxen gan' gwsele' neda'. ²⁰ Na' ba bena' byen ba bia' diža' g6en da' chzejni' in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'. ²¹ Da'nan' chac can' nyoj Xtiža' Diosen' žan:

Bene' ca' biņa' yesende' xtižen' yesombi'ene',

na' bene' ca' biņa' yesenezde' che' yesejni'ide' che'.

Pablon' šje' Roma

²² Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czla' zan ni'a ba goclaža' yida'. ²³ Cana'te zelaža' yed6na'a le'e, perw na'ach ba beyož bena' da' gwlo'o Diosen' lo na' gona' do nga. ²⁴ Nach cate' ša'a España cana' chacda' tia' yed6na'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. ²⁵ Na'a ša'a Jerusal6n šjasana' mechw da' gaclenen bene' ľježcho ca' že' na' bene' ca' ba gwlej Diosen' chesejnilaže'ne'. ²⁶ Le bene' ľježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' ľježcho ca' chesejnilaže' Diosen' Jerusal6n ben' zjanac bene' yaše'. ²⁷ Bene' ca' bosotoben' besyebede' bosonežjue' mechon', na' naquen to goclen da' cheyla' yesone' len bene' Israel gualaž cheto' ca', le ľa'czla' legaque' bi zjanaque' bene' Israel, ba zjanone' čhegaque' yogo' da' g6en da' ba bzejni'i Diosen' neto' bene' Israel, na' da'nan' cheyla'cze yesaclene' bene' gualaž cheto' ca' len da' cheseyažjde'. ²⁸ Cate' bač beyož bena' lo na' bene' Jerusal6n ca' mechon' bdozen', cana'ch sa'a ša'a Españan' na' tia' na'a le'e. ²⁹ Na' nezda' Criston' gaclene' neda' la'a gan' zoalen' cont g6e'lena' le'e diža' g6en che' da' gaclenen yichjlažda'olen' na' soaghuacho mba.

³⁰ Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque ľježcho tocho yetocho. Da'nan', bene' migw, chnaba' gacle neda' txen yoľ giužcho Diosen' cont gaclene' neda'. ³¹ Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' ľecze nabechone' cont bene' ľježcho ca' že' Jerusal6n bene' yo'o lo na' Diosen' yesazlaže' ca' dan' g6e'gaca'ne'. ³² Nach še Diosen' gone' latje, mbalaz yed6na'a le'e na' yeyaclaža' soa' na' len le'e. ³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcace' gač.

16

Pablon' chguape' tioxbaľ bene' že' Roma

¹ Chneyoeda' le'e le gon txen len bene' zanchi Febe cate' le'e gan' zoalen'. Ba benchg6e' xšin Diosen' len bene' ca' chesedop chesežag chesonxene' Jesucriston' lo yež Cencrea. ² Le gwlebe' ca' cheyla' gonle len ľjež chio' yo'ocho lo na' Diosen'. Na' le gaclene' še bi da' chyažjde', le len' ba goclene' bene' zan na' ľecze ba goclene' neda'.

³ Le gwguap tiox Priscila len bene' che' Aquila. Legaque' ba gosone' žin che Cristo Jesúsén' t xen len neda'. ⁴ Besezanlaže' cuingaque' yesate' cont bososle' neda' lo na' yela' goten'. Choa' yela' choxclen čhegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxclen čhegaque'. ⁵ Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'. ⁶ Nach le gwguap tiox María no' olen' ba benchgua xšin Diosen' gan' zolen'. ⁷ Na' le gwguap tiox bene' gualaž četo' Andrónico len Junias. Legaque' byobch gosejnilaže' Criston' cdel ca' neda' na' t xen gota'to' ližya. Lecz ca' postlw ca' yezica'chle cheso'e diža' güen čhegaque'.

⁸ Le gwguap tiox bene' xmigua' Amplias, le chacda'ne' da' ba chejnilaže' Xancho Criston'. ⁹ Na' le gwguap tiox Urbano ben' chon xšin Criston' t xen len chio', na' lecze Estaquis, le chacda'ne'. ¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulu. ¹¹ Na' le gwguap tiox bene' gualaž čhia' Herodión na' lecze bene' ca' že' liž Narciso, con noe' chesejnilaže' Criston'. ¹² Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox bene' zanco Pésida. Chaquechone' da' ba benchgüe' xšin Xancho'. ¹³ Na' le gwguap tiox Rufo. Naque' bene' blao len chio' chejnilaže' cho Xancho Jesucriston'. Na' lecze le gwguap tiox xne'ena', le ba none' neda' ca' xi'ine'. ¹⁴ Le gwguap tiox Asincrito, Flegonte, Hermas, Patrobas na' Hermes len bene' lježcho zjanita' len legaque'. ¹⁵ Na' le gwguap tiox Filólogo na' Julia na' len Nereo na' bene' zanen', na' Olimpas na' yogo' bene' lježcho nita' len legaque'.

¹⁶ Na' cate' chežagle t xen le gwnopa' na' lježle cate' chguap lježle tiox cont nachia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwy'a' chosoguape' le'e tiox.

¹⁷ Bene' migw, čhneyoeda' le'e le gwsaca' cont bi gwzenagle che bene' zjanac bene' güetil, bene' chesaclaže' gonle da' xinj, le bi chesone' t xen len dan' ba bsedle che Diosen'. ¹⁸ Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'. ¹⁹ Yogo'ze bene' zjanezde' chzenagle che bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal. ²⁰ Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

²¹ Timoteo ben' chon len neda' xšin Criston' nga chguape' le'e tiox, na' lecze ca' cheson bene' gualaž četo' Lucio na' Jasón na' Sosípater.

²² Neda' Tercio chzoja' cart nga con can' ža Pablon', na' lecze chguapa' le'e tiox, le naccho t xen chejnilaže' cho Xancho'.

²³ Lecze Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len bene' biše' Cuarto.

²⁴ Soašca Xancho Jesucriston' gaclenšcace' yogo'le. Na' cašcace gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' bene' che Jesucriston'. Na' chzejni'ida' xtiža' Diosen' da' nono na' neze cate' za' xete yežlion', ²⁶ perw na'a Diosen' ba bzejni'ide' chio' bi zejjen da' ca' none' mandaw bosozoj bene' ca' bosozoj Xtižen' cani'. Na' Dios ben' zoa toli tocané chaclaže' šej diža' čhen' yogo' yež cont yogo' chio' benač šejnilaže' cho Jesucriston' na' gwzenagcho che'.

²⁷ Toze Diosen' zaque' gonxen chio' benač, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nán' chac chonxenchone' toli. Cašcace gac.

CART NECHW DAN' BZOJ POSTLW SAN PABLO CHE BENE' CA' ZE' CORINTO

Pablon' chzoje' bene' chesedop chesežaque' chesonxene' Jesucriston' Corinto

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiow txen len bene' migw checho Sóstenes ben' lecze chejnilaže' Jesucriston'. ² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nar' Diosen' ba gwleje' le'e cont yo'ole lo ne'e, can' gwleje' yogo' ben' chosol' güiže' Xancho Jesucriston' na' zjanaque' le' txen gate'tezechle, le lecze naque' Xangaquen'. ³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'. ⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen. ⁶ Na' ba chonle cont nacia' xtiža' Criston' da' chejle'le naquen da' li. ⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. ⁸ Na' Diosen' gaclene' le'e soachachle gonle can' chazlažen' cont bibi dola' gaple caten' yid Xancho Jesucriston' yeto. ⁹ Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena bene' chesonxen Jesucriston' Corinton'

¹⁰ Bene' migw, le'e chejnilaže'le Jesucriston'. Da'nar' chñeyoeda' le'e, le gon txen len lježle na' bich gacle chople o šon taple len da' chonle xbab na' len da' žale. ¹¹ Chnia' ca' bene' migw, le bene' nita' liž Cloé ba gose'e neda' chdiže' chšaše. ¹² Chnia' chdiže' chšaše, le baļle žale: "Naca' txen len da' chsed chlo'e Pablon'." Na' yebaļle žale: "Naca' txen len da' chsed chlo'e Apolosen'." Na' yebaļle žale: "Naca' txen len da' chsed chlo'e Pedron'." Na' yebaļle žale: "Naca' txen len da' chsed chlo'e Criston'." ¹³ ¿Chaquele bid Criston' neche to chopezle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'. ¹⁴ Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. ¹⁵ Da'nar' noch no zoa len le'e bene' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'. ¹⁶ Na' neda' lecze bzoa' nis bene' ca' ze' liž Estéfanas, na' bi za'laža' še zoa nochle bene' bzoa' nis. ¹⁷ Nezda' Criston' bi gwseļe' neda' cont gwzoa' bene' nis san cont chixjue'eda' diža' güen chen'. Na' bi cheyljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

Criston' bedelo'ede' yela' guac che Diosen' na' yela' sina' che'

¹⁸ Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtoļa'gaque' le'e yag cruzen'. San chio' chejnilaže'chone', chio' ba de yela' mban checho toļi tocaņe, nezecho diža' nan' naquen da' zaca'chgua, le nsan' yela' guac che Diosen'. ¹⁹ Chac can' nyojen žan: Neda' gona' cont nacia' gague da' li zjansina' bene' ca' chesene' zjanaque' bene' sina'. Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele žchixe bene' ca' zjansed yela' sina' che benachen'? na' žchixe bene' chososed chosolo'ede' ley che Diosen'? na' žchixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. ²¹ Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toļi tocaņe, la'czļa' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego chesejiljue' no diža' da' chesacde' naquen da' sina'. ²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'. ²⁴ Perw chio' ba gwlej Diosen' naccho xi'ine', la'aczļa' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwseļe' Criston' bnežjw cuine' neche chio'. ²⁵ Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e

latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela' guac xench ca benachen'. ²⁶ Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che benachen', gague zanle nacle bene' chnabia', gague zanle golje lo diaza che bene' blao. ²⁷ Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque benachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che benachen' yesacbe'ede' na' yesacde' zto'. ²⁸ Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benach, na' gwleje' chio' cont gwlo'ede' bene' zjanaque' blao len benachen' bibi zjazaque' len le'. ²⁹ Diosen' bene' cont nono gac gonxen cuine' laguen'. ³⁰ Diosen' ba none' chio' txen len Cristo Jesusen', na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'. ³¹ Da'nan' Xtiža' Diosen' nyojen žan: "Bi cheyala' gonxen cuincho san gonxencho Xanchon'."

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetižue'eda' xtiža' Diosen' len le'e, bitw bia' diža' zdebe da' bi gwyejni'ile na' gague bia' diža' xdan cont gaquele naca' bene' sina'. ² San bechoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xtoła'chon', na' bi be'lena' le'e bichle diža'. ³ Na' cate' gwzoa' len le'e gocbe'eda' bibi chac gona', na' leca bžeba' na' gola' gwxiža' bena' xbab še bi gwzenagle xtižan'. ⁴ Na' diža' da' be'lena' le'e gague bian' len yela' sina' che benachen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. ⁵ Goclaža' šejnilaže'le Criston' gague neče yela' sina' che benachen', san neče da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'. ⁷ Diosen' ba bzejni'ide' neto' to yela' sina' da' nono gwyejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocanē. ⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. ⁹ Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.

Nono na' yende' diža' can' gone',

neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

¹¹ Can' naquen len benachen', nono neze bi xbab chon bene' yoble, con to tocho nezecho bi xbabben' choncho. Na' ca'cze naquen len Diosen', con Spiritw che' na'zen' nezen bi xbab chone'. ¹² Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'nan' bi choncho xbab can' cheson bene' bi chosozenag che Diosen'. ¹³ Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' bene' bi yo'o Spiritw che Diosen' lo' yichjlažda'ogaque' bi chesejle' che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. ¹⁵ Na' cate' yo'o Spiritw che Diosen' lo' yichjlažda'ochon' chache'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. ¹⁶ Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

3

Gaccho txen len nochle bene' cheson xšin Diosen'

¹ Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'nan' zaca'leble ca bidao'. ² Cate'

gwzolao be'lena' le'e xtiža' Diosen' žinten ža na'aža, biņa' šejni'ile da' ca' chaclaže' Diosen' šejni'ile. Da'nan' ba bsd blo'eda' le'e da' bi naquen zdebe šejni'ile. ³ Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdile chšašle, nacia' chzenagle che xbab chezle can' cheson bene' bi chesejnilaže' Criston'. ⁴ Chnia' chonle ca bene' bi chesejnilaže' Diosen', le balle žale: "Nacto' txen da' chsed chlo'ede Pablo", na' yeballe žale: "Nacto' txen da' chsed chlo'e Apolos."

⁵ Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwyejni'laže' le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaže'. ⁶ Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsd blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e. ⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsd blo'echde' le'e, san Diosen' zaca'chgüe' da' bene' cont gwyejle'le xtižen'. ⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. ⁹ Neto' chzejni'ito' le'e xtiža' Diosen', guac nacho nacto' bene' goz go'oñ che Diosen' na' le'e nacle yežlio gan' chac žinņa'.

Na' le'e chdop chžagle chonxenle Criston' lecze zaca'leble ca to yo'o che Diosen'. ¹⁰ Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyala' gonyane' xbab še xšinen' gonen txen len lene yo'o dan' ba gwlecan'. ¹¹ Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'. ¹² Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. ¹³ Na' cate' žin ža yid Criston', gone' cont gacia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. ¹⁴ Na' še bencho da' naquen da' zaca', lenņa' bi yeniten, na' Diosen' gone' cont soacho mbalaz da' benchon. ¹⁵ Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nachguaze gac yechojcho bi šeycho.

¹⁶ ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebocho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? ¹⁷ Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocanē che bene' gon ca', le Diosen' zoe' len chio' na' nacho lo ne'e.

¹⁸ Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gacbe'ele yela' sina' chelen' bi gaclenen le'e len Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'. ¹⁹ Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyain' legaue'." ²⁰ Na' yeto gan' nyojen žan: "Xancho nan' nezde' da' yesede che xbab che bene' sina' ca'." ²¹ Da'nan' bi cheyala' ga'laže'le da' nacle txen len note'teze bene' chsed chlo'ede' le'e, le yogo'lol bi da' de zjanaquen chele cont yesaclenen le'e. ²² Neda', len Apolosen', na' len Pedron', gwseļa' Diosen' neto' cont chaclento' le'e. Na' yežlio nga na' yela' mbanņa', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e. ²³ Na' nacle lo na' Criston' na' Criston' naque' lo na' Diosen'.

4

Da' yo'o lo na' postlw ca' yesone'

¹ Cheyala' gacbe'ele neto' ba gwdixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'. ² Na' chonen byen gonto' con can' ngüe'e lo na'to' gonto'. ³ Na' ca' naca' neda', bibi nonen len neda' še no justis che yežlio nga o še le'e nalc bi chona' can' cheyala' gona'. Na' neca chnia' de cuina' še chona' can' cheyala' gona'. ⁴ Lo' lažda'ogua' chacda' bibi doļa' napa' len bite'tez da' chona', perw gague da'nan' na Diosen' chia' bibi xtola' de. Xancho Jesucriston' ne' še chona' can' cheyala' gona' o še bi chonan'. ⁵ Da'nan' bi cheyala' žialaole nalc che note'teze bene' še chone' can' cheyala' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gacbe'echo can' nac xbab da' yo'o lo' yichjlaždao' benachen'. Na' cana' na Diosen' še nocho chon güen.

⁶ Beñe' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyala' ga'laže'le da' nacle txen len to bene' chsedde' le'e na' gue'ele yetoe'. ⁷ Na' ¿bixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyala' ga'laže'le. ⁸ Chacļjele bibi chyažjele na' chacļjele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquele' cont soato' mbalaz txen len le'e. ⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon čegaque' yesate'. Na' beñachen' len angl ben' že' gan' zoa Diosen' chesene'e can' chac čheto' ca to bene' chñe'e to da' yežje'. ¹⁰ Na' da' chonto' xšin Criston' da'nan' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teže. Chesonxen bene' le'e na' chesegue'ede' neto'. ¹¹ Ža na'aža zan ni'a chdeto' gwbin chbił chdonto', bibi xalana'to' de, chesebaže' bene' neto' na' bibi ližto' de. ¹² Len ni'a na'to' chonto' žin cont chabanto'. Cate' chesezi'diža' bene' neto', con chnabto' nite' mbalaz, na' cate' chosoghi chosoaque' neto', chyo chčejo'to' bi da' chesonde' neto'. ¹³ Cate' chesene' čheto', choļ güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. ¹⁵ Na' la'czla' bene' zan yesaclaže' yososed yosolo'ede' le'e čhe Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwđixjue'eda' le'e diža' güen čhe Jesucriston' cont chejnilaže'lene'. ¹⁶ Na' da'nan' chneyoeda' le'e gonle can' chonan'.

¹⁷ Da'nan' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyala' gone'. Na' chsela'ne' cont šjays'e'ede' laže'le can' gwzoa gwleza' šlac bzejni'ida' le'e čhe Criston', na' da' bzejni'ida' le'e naquen lebe len da' chzejni'ida' bene' gate'teže chesedop chesežague' chesonxene' Criston'. ¹⁸ Na' balle cha'laže'le chaquele bich yida' gan' zoalen'. ¹⁹ Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'. ²⁰ Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gague' na'zen' gwlo'en še chnabi'e yichjlažda'ogaque'. ²¹ ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen chaclaže'le yedeyena'.

5

To bene' gwzoalene' xna'zie' ca xo'ole'

¹ Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. ² Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. ³ La'czla' bi zoa' na' len le'e, zoaczcho txen na' ba gwchoglua' can' cheyala' gonle len ben' chon da' malen', can' gonle la'czla' ca zoa' len le'e. ⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesús'en' chaclene' le'e len yela' guac čhen'. ⁵ Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocane cate' žin ža yid Xancho Jesusen' yeto.

⁶ Bi cheyala' gaquele chonchgual güen lao Diosen'. ¿Bi chache'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosochine' cate' chesone' yetextil chonen cont cheyas doxen cuazin'?" ⁷ Beñe' Israel gualaž čheto' bi chesagüe' yetextil da' nchixen levadura lo lni pascw čheto' na' bi cheso'e latje yega'an ne late'ze levaduran' lo' ližgaque' lo lnin'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjo yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž čheton' lo lni pascon'. ⁸ Da'nan' cheyala' cuejyichjo bite'teže da' mal, cont gaccho ca to bene' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyala' soacho binlo len bene' chosoza xtoe' na' bene' cheson bichle da' nac da' yela' zto' len cuerp čegaque'. ¹⁰ Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de čhe bene', na' bene' chesegue'ede' da' de čhe bene' na' bene' chesonxene' l'gua' a'lsaca'. Na' can' gwnia' bi gac soacho binlo len legaque', cho'a diža' čhe ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'. ¹¹ San

da' žia' cheyała' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheyała' gagwlencho bene' lježcho bene' cheson ca'. ¹² Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyała' chogbi'acho che lježcho še chesonteze' da' mal. ¹³ Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Bene' Corinto chesejnilaže' Criston' chesagüe' xya che lježgaque' lao justis ca'

¹ Chebanda' chele can' chonle da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheyała' nabe lježle le'e ba gwlej Diosen' nacle lo ne'e cont legaque' yesone' yela' justis chele. ² ¿Bi nezele žin ža cate' chion' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. ³ Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. ⁴ Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab chegaquen' bi naquen da' zaca'chgua len chio' chejnilaže'cho Criston'. ⁵ Žia' ca' cont yeto'ele che dan' chonle na' bich gonle ca'. ¿Ne tole bi nacle bene' sina' cont gon yela' justis che lježle cate' bi chac chele? ⁶ ¿Da'nan' chjatagwle xya che lježle len justis ca' bene' bi chesejnilaže' Criston'?

⁷ Da' chacyož len lježle na'zen' chlo'en leca clemen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de chele. ⁸ Perw le'e chca'ale bi da' de che lježle na' da' zan da' chone lježle.

⁹ ¿Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen l gua'a lsaca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej. ¹⁰ Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de chegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e. ¹¹ Bałle benle da' mal dan' zjanac ca', perw na'a da' chejnilaže'le Xancho Jesúsen', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

Cheyała' goncho da' güen len cuerp chechon'

¹² Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho bite'teze, bi cheyała' güe'cho latje nabia' bi dan' gonchon' chio'. ¹³ Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp chechon'. ¹⁴ Diosen' bosbane' Xancho Jesucriston' ladjo bene' guat ca', na' lecze žin ža cate' yosbane' chio' ladjo bene' guat ca' len yela' guac chen'.

¹⁵ ¿Bi nezele naccho txen len Criston' na' cuerp chechon' zjanaquen che'? Na' bi cheyała' goncho cuerp chechon' da' nac che Criston' lo na' no no'ole zle'. ¹⁶ Note'teizele še chata'le len no'ole bi nac no'ol chele o bene' byo bi nac bene' chele, cuerp chelen' gaquen toze len cuerp chen', can' ža Xtiža' Diosen' da' nyojen žan: "Bene' ca' chope yesaque' toze cuerp." ¹⁷ Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

¹⁸ Da'nan' bi cheyała' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiyin' cuerp chechon', perw da' ca' zjanac ca' chosožiyin' cuerp chechon'. ¹⁹ ¿Bi chache'ele Spiritw che Diosen' zoan lo' yichjlaždao' to tocho ca zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. ²⁰ Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyała' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

7

Pablon' cho'e diža' che yela' güešagna'

¹ Na' che dan' chñabele neda' le'e cart chelen', še bene' byon' bi chaclaže' si'e no'olen' gague' xo'ole', güenna' chone'. ² Perw na' že' chgua bene' chesedalene' no'ole bi nac no'ol chegague', na' bene' cheson bichle da' nac da' yela' zto' len cuerp chegaquen', na' da'nán' yejni'a gwšagna' le na' to to bene' byo soa xo'ole' na' to to no'ole soa bene' che'. ³ Na' to to bene' byo cheyala' gone' da' naquen gone' len no'ol che' na' to to no'ole cheyala' gone' da' naquen gone' len bene' che'. ⁴ No'olen' bi gac ne' to gualaze' nac gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyala' yosozenag che lježe'. ⁵ Na' le'e nšagna' le bi gwžonle gonlen lježe da' cheyala' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yoł güižle Diosen'. Na' te termen' yezoalen lježe da' yoble, le Satanás dan' chnabia' da' xigü'e' ca' co'oyelan' le'e gonle da' mal še leca žan soalen lježe.

⁶ Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna' le. ⁷ Chebeda' šaca' soa yogo' le can' zoa' neda' nono xo'ola' zoa. Perw nža' le grasyw da' non Diosen' to tocho che bi da' goncho.

⁸ Na' le'e nac to gualaze, chacda' güench bi gwšagna' le, na' lecze le'e ba got bene' chele bi yošagna' le, san soale to gualazle can' zoa' neda'. ⁹ Perw še leca žan soalenle no'ole o soalenle bene' byo, yejni'a gwšagna' le cont bi nabia' yela' chzelažen' le'e.

¹⁰ Na' le'e no'ole le'e nšagna' le, chona' mandadw bi yela' ale len bene' chelen'. Na' gague neda' ze žia' ca', le naquen da' chon Xancho Criston' mandadw. ¹¹ Na' še no'olen' yele'e len bene' che', cheyala' soa to gualaze' bi yeque'e bene' yoble o cheyala' yeyeje' šjayzoalene' bene' che' da' yoble. Na' lecze le'e bene' byo le'e nšagna' le, bi yela' ale len xo'ollen'.

¹² Na' le'e bene' yezica' chle, nia' can' chona' xbab cheyala' gonle, la' czla' Xancho' bibi gwne' che da' ca'. To to le'e bene' byo še ba nšagna' lenle no'ole bi chejnilaže' Criston' na' chaclaže' soalencze' le', bi cheyala' yela' ale len le'. ¹³ Na' to to le'e no'ole še ba nšagna' lenle bene' bi chejnilaže' Criston' na' chaclaže' soalene' le', bi yela' ale len le'. ¹⁴ Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže' lene' tole. Šaca' bi naquen ca', xi'inle ca' zjanacbe' ca' xi'in bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže' lene' tole. ¹⁵ Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela' a, le Diosen' chaclaže' soacho binlo len lježcho. ¹⁶ Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

¹⁷ To tocho cheyala' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. ¹⁸ Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señoñ'. Na' še bina' soale señoñ' cate' gwlej Diosen' le'e nacle xi'ine', bi nable yosozoe' le'e señoñ'. ¹⁹ Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyala' goncho con bi chaclaže' Diosen'. ²⁰ Con can' naccho caten' gwlej Diosen' chio' naccho xi'ine', ca'tezeczen' cheyala' soa cuzcho. ²¹ Še nacle esclavo cate' Xancho Diosen' gwleje' le'e, bibi sa'laže' le che dan'. Perw še guata' latje chixjwle cont chojle lo na' xanlen', le chixjon na' yechojle. ²² Na' la' czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' bina' gaccho esclavo che bene', nac Criston' Xancho, na' guac nacho naccho esclavo che'. ²³ Da' zaca' xen da' ben Xancho Criston' cont bechojcho lo na' gwxiyen'. Da'nán' bi cheyala' goncho xbab no benach naque' xancho. ²⁴ Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuzcho, le lao Diosen' chzoa chbezcho.

²⁵ Na' can' cheyala' gac che no'ol güego' ca', Xancho Criston' bi bene' mandadw can' gac chegacbe', perw neda' nia' can' chacda' cheyala' gac, na' ba beyaše' beži'ilaže' Xancho' neda', na' da'nán' diža' da' choa' zacaczen gwzenagle chen. ²⁶ Ba za' da' saca' zi'cho na'a, na' da'nán' chacda' güench soa cuzcho con can' ba zoacho. ²⁷ Le'e nšagna' le, bi yela' ale len xo'olle, na' le'e bina' soa xo'olle, bi chiljw xo'olle. ²⁸ Perw bi nacho naquen mal še gwšagna' le, na' neca naquen mal še no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

²⁹ Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'nán' le'e zoa xo'olle cheyala' soale gonle xšin Diosen' ca' bene' nono xo'ole' zoa. ³⁰ Na' še de da' yegüine' le, cheyala' soale gonle xšin Diosen' ca' bene' bi chegüine'. Na' še zoale mbalaz, cheyala' soale gonle xšine' ca' bene' bi zoa mbalaz. Na' še si'le bi da' si'le,

cheyala' soale gonle xšin Diosen' ca bene' bibi gwxi'e. ³¹ Na' še bi da' chčinle da' de yežlio nga, bi cheyala' cue' yichjle che len, le da' te che yogo' da' chle'echo yežlio nga.

³² Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xanchon' gone'. ³³ Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. ³⁴ Na' lecze nža' can' chac che no'ole' nšagna' na' che no'olen' bi nšagna'. No'ole' bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole' nšagne'e chbec yichje' che da' chac yežlio nga na' bi da' chaclaže' bene' che' gone'.

³⁵ Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquele Xancho Diosen' do yichj do laže'le sin cbi gwžonen gonle can' chazlaže'.

³⁶ Na' še to bene' chacde' cheyala' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chñabe' le'. ³⁷ Perw še zoa to bene' chacde' güenench nono si' xi'ine' no'olen' na' bi načo chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'. ³⁸ Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güenench.

³⁹ Na' note'teze no'ole' nšagna', cheyala' soe' len bene' che'. Perw še ba got bene' che', guac yeque'e bene' yoble, con še bene' chejniłaže' Xancho Criston'. ⁴⁰ Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

8

Yela' guagw da' chosožia bene' lao l' gua'a lsaca' chesejniłaže'

¹ Na' gwnable nac cheyala' goncho len yela' guagw da' chosožie' lao l' gua'a lsacan' chesejniłaže'. Da' li' yogo'cho chejni'icho bibi zjazaca' l' gua'a lsaca' ca'. Na' cate' choncho xbab che da' chejni'icho, con chonzen cuincho, perw cate' chaque lježcho, cheyiljwlaže'cho nacle goncho cont gaclen lježcho. ² Na' še chaquecho ba gwejni'icho to da' zejen, cheyala' gacbe'echo bibi de da' chejni'icho ca' cheyala' šejni'ichon. ³ Perw cate' chaquecho Diosen', nachle Diosen' nombi'e chio'.

⁴ Gwnable še guac gagwcho yela' guagw da' chosožia bene' lao l' gua'a lsacan' chesejniłaže'. Nezecho l' gua'a lsaca' ca' bibi zjazacan', na' toz Diosen' zaque' šejniłaže'chone'. ⁵ Da' li' de da' zan da' chesena benachen zjanaquen xangaque' da' chesejniłaže'. Na' la'czla' nita' bene' chesejniłaže' da' de yaba na' yežlion' chesene' da' ca' zjanaquen xangaque', ⁶ chio' nezecho toze Xacho Diosen' zaque' gonxenchon, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benač, beyixe' na' bichle da' zjade, na' le' chone' yela' mban checho.

⁷ Gague yogo' bene' lježcho bene' chesejniłaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l' gua'a lsaca' ca', na' cate' chesagüe' yela' guagw da' ba bzia bene' lao l' gua'a lsacan', chesacde' chesagüe' da' naquen che l' gua'a lsacan'. Da'nan' lo' yichjlažda'ogaque' chesacde' malen' chesone', le' bina' yesejni'isagüe'de' naquen' naquen.

⁸ Na' yela' guagon' bibi zaca' gonon cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. ⁹ Perw bal' bene' bina' yesejni'isagüe'de' gague bi nonen len Diosen' še bin' ye'ej gagwcho. Na' neče legaque' cheyala' gwsaca'cho can' goncho cont bi goncho ca' yeselažoe' lo da' malen' neče dan' che'ej chagwchon'. ¹⁰ Le'e nezele nono nac l' gua'a lsaca' ca', na' da'nan' guac cue'le ye'ej gagwle ga chesone' lni' che l' gua'a lsacan' sin cbi bi doła' gapple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. ¹¹ Na' guacte gwžiai'cho bene' lježcho yela' chejni'i' checho, la'czla' Criston' bnežjw cuine' gote' neče le'. ¹² Cate' choncho cont bene' lježcho chesone' to da' ža' yichjlažda'ogaque' naquen da' mal, choncho contr Criston' še ca'. ¹³ Da'nan' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca' lažoe' lo da' malen'.

9

Pablon' ž'e' naque' dogualje postlw

¹ Nezele neda' naca' postlw na' guac naba' gonele neda' ca' chonle len yezica'chle postlw ca'. Neda' ble'eda' Xancho Jesúsen' na' bena' xšine' gan' zoale na' da'nan' chejniłaže'lene'. ² Na' la'czla' še yezica'chle bene' bi chesejle'e naca' postlw, perw le'e chejle'le' chia', le da' chejniłaže'le' Xanchon' ben' gwseła' neda', chlo'en da' li' naca' postlw.

³ Quinga choži'a' xtiža' bene' ca' chesene' bi gwseła' Diosen' neda' naca' postlw: ⁴ Guac naba' yeson bene' da' ye'ej gagua' šaca' chaclaža' gona' ca'. ⁵ Na' guac gwšagna'lena' no'ole

chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. ⁶ Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldadw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lezce ca' nono bene' chyoē šib xila' ca' nacho bi che'eje' late' xiže'ba' cate' chsien'. ⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésen'. ⁹ Quinga bzoje' le'e ley: "Bi gwseyjwle cho'a go'n ca' šlac chosolej chosošojba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'. ¹⁰ San že' ca' chzejni'iczde' chio' che bene' ca' cheson xšin Diosen'. Da'n'an' že' bene' chgua'ane' go'n na' bene' chonšagüe' trigw cheyala' yesenite' lez yesezi'e late' güeje cosešen'. ¹¹ Na' ca neto' ba bzejni'ito' le'e xtiža' Diosen', le gon xbab žnaquen da' zčha'och ca da' cheyala' gonle šaca' gonle da' ye'ej gagwto' na' bichle da' chyažjeto'? ¹² Naquen da' cheyala'cze gonle dan' choe'le da' cheseyaže yezica'chle bene' chososed chosolo'ede' le'e, perw nacchen da' cheyala' gonle gonle neto' da' chyažj chchine neto' c'el ca' legaque'.

Perw bi gwnabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. ¹³ Nezele bene' cheson mandadw lo' yoda' che neto' bene' Israel chesacbane' len da' chosozjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. ¹⁴ Na' ca'czen' non Xancho Criston' mandadw, bene' chosozenag xtižen' cheyala' yosonežjue' da' cheseyaže ben' cheseyixjue'ede' diža' güen chen'. ¹⁵ Perw neda' bi gwnaba' gonle da' chyažj chhinda', na' gague chzoja' da' nga cont gonle ca'. Yejni'acle gata' c'el ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'. ¹⁷ Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca' laxjua'. Perw chona' da' gwlo'o Diosen' lo' na' gona', na' gague chona' to da' ža xbab chezan'. ¹⁸ Na' še nable bi hcua'anen len neda' da' chyixjue'eda' xtiža' Diosen', nach nia' hcua'anen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

¹⁹ Bi naca' xmos bene', perw chzexjw yichja' chon cuina' ca' xmos yogo'te bene' cont šanch bene' yesejnilaže' Criston'. ²⁰ Cate' zoa' len bene' Israel gualaž cheton', chona' can' cheson legaque' na' chona' ca' nac costumbr che ley dan' bzoj Moisésen' cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'. ²¹ Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'. ²² Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol güen' cont gaclena' legaque' na' bale' yesejnilaže' Criston'. ²³ Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

²⁴ Nezecho cate' chosoxonj zan bene' cont choj to bene' gon gan, yogüe' chesa'acse', la'czla' tozen' gon gan na' si'e premio. Na' ca' chesa'acses bene' ca' do yichj do laže', ca' to to chio' cheyala' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. ²⁵ Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. ²⁶ Da'n'an' bi gona' ca' to bene' chxonj, to bene' bi nezde' ga cheyala' yežine', o ca' to bene' chdile' len ponet, bene' bi nezde' ga cuaže'. ²⁷ Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len bene' yoble.

10

Cheyala' na'yane'cho cont bi goncho da' malen'

¹ Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna. ² Na' yogüe' gosaque' txen len da' Moisésen' cate' gwche' legaque' gan' gwžialao bejon' laogaque' na' cate' gosodie' nisdao'n'.

³ Na' yogüe' gosagüe' toze yela' guagw da' bnežjw Diosen' legaque'. ⁴ Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwejlene' legaque'. ⁵ Na' la'czla' Diosen' goclene' yogüe', zane' bi gosone' cont yebe Diosen' legaque', na' da'n'an' gosebiaye'e latje dašen'.

⁶ Na' yogo' da' goc chegaque' chzejni'in chio' bi cheyala' selaže'cho goncho bi da' mal can' gason legaque'. ⁷ Da'n'an' chnia' le'e, bi šejnilaže'cho l gua'a lsaca' can' gason bal da' xozxta'oto' ca'. Le nyoj Xtiza' Diosen' zan: "Gosebi'e gose'ej gosagüe' na' gosenite' gosone' lni." ⁸ Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' gason zan da' xozxta'oto' can', na' da'n'an' šonechoa mile' gosate' yela' güen da' xinj chegaque' lao toze ža. ⁹ Bi cheyala' goncho Xancho Criston' prueba še gone' can' ba gwnen'. Can' bal da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' bel znia gosotba' legaque'. ¹⁰ Na' lecze bi cheyala' bixjwcho len Diosen' can' gason bal da' xozxta'oto' ca' can', na' Diosen' gwsele' to angl che' bene' betue' legaque'.

¹¹ Yogo' da' ca' gosac chegaque' zjanyojen le'e Xtiza' Diosen' cont chosozejni'in chio' nac cheyala' goncho zoacho na'a, le ba zoya yeyož yežlion'. ¹² Da'n'an' note'tezcho še chaquecho ba zoachachcho chejnilaže'cho Jesucriston', cheyala' na'yane'cho naquen' goncho cont bi lažo'cho lo da' malen'. ¹³ Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

¹⁴ Da'n'an' bene' migw ben' chacda', le cuejijchj yogo' bi da' cheson bene' chesejnilaže' l gua'a lsaca' ca'. ¹⁵ Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. ¹⁶ Na' da' ca' che'ej chagwcho chjajze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. ¹⁷ Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

¹⁸ Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. ¹⁹ Bi chaclaža' gonle xbab žia' l gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. ²⁰ Gague can', le cate' bene' chosožie' bi da' chosožie' lao l gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. ²¹ Bi gac ye'ej gagwcho da' che'ej chagwcho chjajze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. ²² Ža'a Diosen' chio' še goncho ca'. Na' bi naccho bene' gual ca' Diosen' cont soecho bi da' gone' gac checho.

Bi goncho da' chaque bene' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. ²⁴ Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

²⁵ Bite'teze bela' chesote' lagüe' ya'a le gagon' na' bi nable še bosožien' lao l gua'a lsacan' chesejnilaže', cont bi gaczejlaže'le še naple doła' gagwlen. ²⁶ Le Xtiza' Diosen' nyojen žan: "Che Xancho Dios yežlio nga, benač, beyixe' na' yogo'te da' zjade lo yežlion'."

²⁷ Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosožien' lao l gua'a lsacan', le Diosen' bi che'nde' gaczejlaže'cho še napcho doła' che'ej chagwchon. ²⁸ Perw še no ye' chio': "Da' nga bosožie' lao l gua'a lsacan'", bi gagwchon cont bene' gwna ca' bi gacde' lenczcho chejnilaže'cho l gua'a lsacan', o gacde' napcho doła' chagwchon. ²⁹ Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnabile žbixchen' cheyala' cuejijchjcho bich goncho bi da' choncho še bene' lježcho chesacde' napcho doła' chonchon? ³⁰ Na' chonle xbab žbixchen' ža bene' lježcho choncho da' mal chagwcho to yela' guagw še choe'cho yela' choxclen che Diosen' neche len? ³¹ Quinga naquen, cate' che'ej chagwcho o bite'teze da' choncho, cheyala' gonchon cont gaxcen Diosen'. ³² Na' bi cheyala' goncho bite'teze da' choncho še gonon cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'. ³³ Can' chona' neda', bite'teze da' chona' cheyljwlaža' nacle gona' cont to to bene' soe' mba. Na' bi cheyljwlaža' nacle gona' da' gaclen cuina' san da' gaclen bene' zan cont gata' yela' mban chegaque' toli' tocanē.

11

¹ Neda' chona' con can' ben Criston', na' chneyoeda' le'e gonle can' chonan'.

Can' cheyala' yeson no'ol ca' cate' chdop chzagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e.
³ Na' chaclaža' šejni'ile da' nga. Yogo' bene' byo cheyala' yosozenague' che Criston', le Criston' naque' blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. ⁴ Note'teze bene' byo še nzoa xłape' cate' chol güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. ⁵ Na' note'teze no'ole še chol güiže' Diosen' o chyixjue'ede' xtiža' Diosen' sin cbi gwcušaše' yichje' cate' chdop chzagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. ⁶ Na' še no'olen' bi chaclaže' gwcušaše' yichje' can' ba gwnian', yejni'a gwšib doxen yichjen'. Da'n'an' še chaquele zto' gwšiben, nach gwcušaše'czlen can' cheson yezica'chle no'ol ca'. ⁷ Na' le'e bene' byo, bi cheyala' gwcušaše' yichjen' cate' yol güiže' Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che tole bene' zaca'. ⁸ Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. ⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. ¹⁰ Da'n'an' no'ol ca' cheyala' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. ¹¹ Perw nacho txen len Xancho Jesucriston' la'czla' še naccho bene' byo o še no'ole, na' bi cheyala' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. ¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwaxan le', na' Diosen' bene' yogo' beñač len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole chol güiže' Dios sin cbi chcušaše' yichje', le can' nac costumbr chechon'. ¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. ¹⁵ Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcušašen' yichjen'. ¹⁶ Še nole chaquele gwšaše' che da' nga ba gwnia', cheyala' nezele neto' postlw bi choe'to' latje yesone' nža' le gate'teze chesedop chesežag bene' chesejnilaže' Diosen'.

Bi chjasyze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chzagle chonxenle Criston' na' bi chaclenen le'e, san chonen mal. ¹⁸ To da' bi chonle güen, chesene' cate' chdop chzagle chonxenle Criston' bi chonle txen len lježle, na' chacda' nacjan' li can' chesenen'. ¹⁹ Na' ca'ljan' cheyala'cze gac da' bi chon lježle txen, le chlo'en non' chejnilaže' Criston' to yichj do laže' na' non' gague da' li chejnilaže'ne'. ²⁰ Na' cate' chežagle chagwle txen, bi chonle xbab bnežjw cuin Xancho Jesucriston' neche xtola'chon', la'czla' chdop chzagle cont šjayze'elen. ²¹ To tole che'ej chagwle da' chyoč chdoxe'le, neca chbez lježle. Da'n'an' balle ne' chdonle cate' chedagwle na' yeballe che'ej chagwłattele na' chože'le. ²² Yejni'a yega'an liže ye'ej gagwle clcl ca gagwle lao bene' yaše' bene' bi de čhegaque'. Da' chonle ca', nachbia' chgue'e lježle bene' cheyala' yesaque' txen len le'e da' chonxenle Diosen', na' chonle cont chesaque' tole da' bi de čhegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neche xtola'chon'

(Mt. 26:26-29; Mr. 14:22-25; Lc. 22:14-20)

²³ Xancho Jesúsen' bzejni'ide' neda' can' šjayze'echo da' bnežjw cuine' neche xtola'chon'. Na' neda' ba bzejni'ida' le'e can' goquen', že' cate' Judasen' bdi'e'ne' lo na' ben' besegue'ede' le', Xancho Jesúsen' beuxe' to yetextil. ²⁴ Na' be'e yela' chočclen che Diosen' na' beyož be'e yela' chočclen che' na' bzoxjen', na' gwne': "Le gagw yetextil nga. Lenna' naquen cuerp chia' da' chnežjua' neche xtola'le. Na' quinga gonle šjayze'ele bi zejen len le'e dan' gwnežjw cuina' yesote' neda'." ²⁵ Na' lecze ca' bene' cate' beyož gosagüe' xše', beuxe' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'." ²⁶ Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtola' beňachen'. Na' can' gonchczcho šlac bina' yide' da' yoble.

Naquen' goncho cate' chjayze'echo yela' got che Xancho Jesúsen'

²⁷ Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsen' perw še bi chonxenhone' cate' choncho ca', napcho doła', le

chonchon ca da' bibi zaca' cuerp che' dan' bnežjue' na' xchene' da' blalje' neche xtoła'chon'.²⁸ Da'n'an' cheyala' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsen'.²⁹ Le še ye'ej gagwcho sin cbi gonxencho Xancho Jesúsen' da' bnežjw cuine' gote' neche xtoła'chon', Diosen' gone' chio' castigw.³⁰ Na' zanle' bi zoale güen na' chacšenele na' bał bene' ba gosate' da' bi gose'ej gosagüen' do laže'.³¹ Na' še gache'echo na' goncho byen soacho binlo len Xancho Diosen', bi gone' chio' castigw cate' che'ej chagwchon.³² Na' cate' napcho doła' can' che'ej chagwchon, Xancho Diosen' choñe' chio' castigw cont yetinjecho da' malen' choncho na' bi si'cho castigw toli tocane can' yesezi' bene' bi chesejnilaže'ne'.

³³ Da'n'an' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen.³⁴ Na' še chbił chdonle, yejni'a yega'añ ližle ye'ej gagwle, clcl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw che Diosen' chaclenen to tocho cont choncho bi da' choncho

¹ Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

² Nezele cate' bina' šejnilaže'le Criston' gweyjele'le diža' güenlaže' na' da'n'an' gweijnilaže'le l gua'a Isaca' da' bibi biš grasyw nye'.³ Na' da'n'an' chaclaža' šejni'ile da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

⁴ Toz Spiritw che Diosen' zoa, perw nža' nža' da' chaclenen to tocho choncho o nezecho.⁵ Toz Xancho Jesucriston' chonxencho la'czla' nža' nža' ca chon to tocho xšinen'.⁶ Na' la'czla' nža' nža' da' chon to tocho, toz Diosen' chone' cont to tocho chac choncho xšinen'.⁷ Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho.⁸ Diosen' ba nsi'e xnezen' chon Spiritw chen' cont bałcho chac chzejni'icho bene' yoble xbab sina' chen', na' lecze Spiriton' chonen cont yebałcho nezecho to da' nezecho na' chzejni'ichon bene'.⁹ Na' lecze toz Spiritw chen' chonen cont bałcho chejnilaže'chguacho Diosen' na' chac bite'teze da' chnabechone'. Na' da' chaclen Spiriton' chio', bałcho chac choncho cont chesyeyaque bene' chesacšene.¹⁰ Na' lecze Spiritw nan' chonen cont bałcho chac choncho yela' guac, na' bałcho chac chyixjue'echo bi da' ba gwna Diosen' chio'. Na' Spiritw che Diosen' chonen cont bałcho chache'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont bałcho choe'cho gwde gwdele diža' da' bi nsedcho, na' yebałcho chac che'cho bene' lježcho bi zeje diža' ca'.¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp chechon'

¹² Cuerp chechon' nsan' zan part, perw zjangoden' txen na' naquen toze. Na' lecze ca' chio' chejnilaže'cho Criston' naccho toze len le' na' len bene' lježcho ca'.¹³ Bał chio' naccho bene' Israel na' yebał chio' bi naccho bene' Israel. Bałcho naccho esclavo na' yebałcho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

¹⁴ Cuerp chechon' nsan' zan part, na' nža' can' nac to to parten'.¹⁵ Ni'acho guac nan: "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'.¹⁶ Na' nagcho guac nan: "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'.¹⁷ Šaca' doxen cuerp chechon' naquen yejlaecho, bi gac yenecho. Na' šaca' doxen cuerpen' naquen nagcho, bi gac le'echo.¹⁸ Perw Diosen' bžie' bia' nsa' cuerp chechon' zan part da' cheson žin con can' gwyazlaže'.¹⁹ Na' bi nya' cuerp chechon' šaca' nsan' toze part.²⁰ San cuerpen' nsan' zan part da' naquen txen cont naquen toze cuerp.

²¹ Da'n'an' yejlaecho' bi gac yen' na'chon': "Bi chyažjda' le'." Na' naca' gac ye' yichjchon' ni'achon': "Bi chyažjda' le'." ²² Na' la'czla' bał part cuerp chechon' chaquecho bitec naquen da' gual, perw chyažjecho. ²³ Na' la'czla' bał part cuerp chechon' chaquecho bitec bi zacan', perw chi' yichjchon, da'n'an' cheyacw xacho. Na' part che cuerp chechon' da' bi chaclaže'cho le'e bene', chcuase'chon len xacho. ²⁴ Perw part da' nsa' cuerp chechon' da' naquen xdan, bi chcuase'chon. Na' Diosen' none' cont chi' yichjcho che part ca' da' bi zjanaquen xdan. ²⁵ Na' none' cuerp chechon' toz cont to to parten' chapši'i lježen lebze na' chesonen žin txen. ²⁶ Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. ²⁸ Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bal' bene' cont cheseyixjue'ede' da' ba gož Diosen' legaque'. Na' da' gwyone gwleje' yebał bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont chesyeyaque bene' chesacšene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. ²⁹ Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. ³⁰ Gague yogo'cho chac choncho cont chesyeyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. ³¹ Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyała' soa cuezcho.

13

Cheyała' gague lježcho

¹ La'czła' še chaccho gwde gwdele diža' da' chesac benachen' na' da' chesac angl' ca', perw še bi chaque ljež benachcho, bibi zaca'cho. Zaca'lebcho ca ya da' chonen šsag cate' chososižen' o ca platiy da' chososiž bene' güecuež. ² Na' la'czła' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež benachcho. Na' la'czła' še nezecho yogo'lol' da' nono na' neze, na' la'czła' še chejni'icho yogo'lol' da' naquen da' zaque', bibi zaca'cho še bi chaque ljež benachcho. Na' la'czła' še leca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. ³ Na' še gwnežjwcho bene' yaše' yogo' bi da' de checho na' gwnežjw cuincho yosoyez bene' yelo', bi gaclenen chio' lao Diosen' še bi chaque lježcho.

⁴ Še chaque lježcho, chapcho chio' chxenlaže' len legaque', na' choncho güen len legaque', bi chgue'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. ⁵ Na' cate' chaque lježcho bi choncho nacteze len legaque', bi choncho xbab che cuincho, bi chbixjwcho, na' bi chgo'olaže'cho. ⁶ Na' cate' chaque lježcho bi chbecho še chon bene' lježcho da' mal, san chbecho še chone' da' zej to li. ⁷ Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'lol' bene', na' zoacho lez yesone' güen yogo' las, na' chyo chchejlaže'cho bite'teze da' chesone' bene' chio'.

⁸ Gwbat te che da' cheyała' gague ljež benachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yaže bichle da' šejni'icho. ⁹ Biņa' nezecho na'a yogo' da' za' nezecho, na' biņa' gac chixjue'echo binlo yogo'lol' da' ba gož Diosen' chio'. ¹⁰ Perw gwžin ža cate' gon Diosen' cont yogo' da' de gaquen can' cheyała' gaquen. Cana' te che da' bi naquen ca cheyała' gaquen.

¹¹ Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwejni'icho can' chesejni'i bidao'. Na' na'a ba gwcha'ocho na' ba gwlejyichjo bich choncho can' cheson bidao'. ¹² Na'a biņa' nezecho binlo da' nac che Diosen'. Zaca'lebcho ca bene' chne'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. ¹³ Nachen' da' quinga šone non Diosen' mandadw goncho toli tocanē: šejnilaže'chone', soacho lez gone' ga gacch güen checho, na' gaguecho Diosen' na' ljež benachcho. Na' da' zejehen goncho lao da' ca' šone, gaguecho Diosen' len ljež benachcho.

14

Bene' ca' chesoe'lene' Diosen' diža' da' bi zjansede'

¹ Cheyała' cue' yichjle gaguele Diosen' na' len ljež benachle, na' lecze cheyała' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen bene' bi da' chesone', da' zaca'chen da' cheseyixjue'ede' bi da' ža Diosen'. Lenņa' cheyała' selaže'chgualē gonle. ² Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho benachen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czła' bi chejni'ichon. ³ Perw bene' chyixjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' chesyeyacxenlaže' še bi da' chesac chegaque'. ⁴ Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen',

chaclenen yogo' chio' chdop chžagcho chonxencho Criston'. ⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejechen clcl ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita' chache' yesejnilaže'ne'. ⁶ Bene' migw, nezda' bi gaclenen le'e še güe'lenna' Diosen' gwde gwdele diža' da' bi chejni'ile caten' yedena'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nezda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

⁷ Ca nac bžejo, bi mbanen perw zoa ši'in cate' chcuež bene' len, na' lecze ca' arpan' cate' chyiñ bene' len. Na' še toz nota da' chcuež ben' len bžejoa' o toz nota da' chyiñ ben' cate' chyiñe' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. ⁸ Cate' zoa to bene' chcueže' trompeta cont cheseneze soldadw ca' naquen' yesone', še bi gwcuežen' binlo, bi yesejni'ide' cheyala' šja'aque' lo gwđile. ⁹ Ca'cze naquen len chio', še güe'lencho Diosen' diža' da' bi chesejni'i bene', bi gaclenen legaque', le len legaque' naquen ca' che bene' chšalj toze'. ¹⁰ Nezecho bene' že' doxen yežlion' gwde gwdele diža' da' chesaque', na' to to benač chesejni'ide' dižan' goljelene'. ¹¹ Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'. ¹² Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyala' cue' yichjle gaclenen le'e gonle da' gaclen lježle cont yogo'le soačachle šejnilaže'le Diosen'.

¹³ Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyala' nabcho lecze gaclenen chio' gwzejni'icho bene' bi zeje diža' dan' choe'lencho Diosen'. ¹⁴ Le cate' Spiriton' chonen cont choļ güiža' Diosen' len diža' da' bi nseada', con nezda' lo' yichjlažda'ogua' choe'lenna' Diosen' diža', perw bi chona' xbab čen, le bi chejni'idan'. ¹⁵ Quinga cheyala' goncho cate' choļ güižcho Diosen', cheyala' güe'lenchone' bite'teze diža' da' chon Spiritw čen' chio' la'czla' še bi chejni'ichon, na' lecze cheyala' güe'lenchone' diža' da' chejni'icho. Na' cheyala' gołcho bite'teze da' chon Spiritw che Diosen' gołcho la'czla' še bi chejni'ichon, na' lecze cheyala' gołcho da' chejni'icho. ¹⁶ Le še chonxencho Diosen' o choe'cho yela' choxclen che' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'. ¹⁷ La'czla' še choe'cho yela' choxclen che Diosen' binlo, perw bi chaclenen bene' yoble še bi chesejni'ide' xtiža'chon'. ¹⁸ Choa' yela' choxclen che Diosen' da' choe'lencha'ne' gwde gwdele diža' da' bi nseada' clcl ca' le'e. ¹⁹ Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clcl ca' gua' ši mil diža' da' bi yesejni'ide'.

²⁰ Bene' migw, bi cheyala' šo'cho xbab che bidao' biña' šejni'i, san šo'cho xbab che bene' chejni'i. Perw len da' malen' cheyala' gaccho ca' bidao' bi' bina' gon da' mal. ²¹ Xtiža' Diosen' nyojen žan: "Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yosozenague' chia'." Can' ža Xancho Diosen'. ²² Da'n'an' nezecho Diosen' chčhine' gwde gwdele diža' da' choe'lenchone' cont bene' bi yesejnilaže'ne' yesache'ede' zoacze' len chio'. Na' chio' chejnilaže'chone', Spiritw che Diosen' chonen cont bene' cheseyxjue'ede' chio' bi da' ba gož Diosen' legaque'. Can' chone' chzejni'ide' chio'. ²³ Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bal' bene' bi chesejni'i naquen' choncho chonxenchone' o bene' bi chesejnilaže'ne', legaque' yesene' chactontcho. ²⁴ Perw še bene' ca' bi chesejnilaže' Diosen' o bene' ca' bi chesejni'i naquen' chonxencho yese'la'aque' šlac yogo'cho chzejni'i ljezcho bi da' ba gož Diosen' chio', nach yesache'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. ²⁵ Le yesache'ede' Diosen' nombi'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' liče zoa Diosen' len bene' quinga."

Cheyala' gonxencho Diosen' binlo na' bi gonchon nacteze

²⁶ Bene' migw, cate' chežagle chonxenle Diosen' quinga gonle: Balle de to da' goļle gonxenle Diosen', na' balde de da' gwsed gwlo'e lježle, na' balde de da' ba gož Spiritw che Diosen' le'e, na' balde de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna bene' lježlen'. Naquen' güen gonle yogo' da' ca' con še gonlen ga gaclenen lježle. ²⁷ Na' še nole güe'lenle Diosen' gwde gwdele diža' da' bi nsedle, le güen', perw do čopzle o še šonzle na' tgüeje tgüejle, na' tena' choj bene' yozejni'ide' bi zejen diža' dan' ba be'le. ²⁸ Na' še nono zoa no yozejni'i bi zeje dižan', bi cheyala' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. ²⁹ Na' še chixjue'ele bi da' ba gwna Diosen', lecze do čopzle o šonzle chojle chixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen' lebze len Xtiža' Diosen' dan' nyoj.

³⁰ Na' še ślac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'le ben' yeto dižan'. ³¹ Yogo'le guac chixjue'ele da' gož Diosen' le'e, perw gonlen tgüje tgüjele cont yogo'le šejni'ichle na' gaclenen le'e. ³² Na' le'e chixjue'ele bi da' ba gwna Diosen', cheyała' chixjue'elen con baten' naquen güen chixjue'elen. ³³⁻³⁴ Le Diosen' chaclaže' gwsa'le binło da' chonle caten' chdop chžagle chonxenlne' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' ślac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'. ³⁵ Na' še bi da' chesaclaže' no'ol ca' yesenežde', guac yesenabde' bene' chęgaque' cate' yesyežin ližgaque', le naquen da' yela' zto' še no'ole güe'e diža' ślac ndop nžagcho.

³⁶ Le gon xbab, gague le'e gocle bene' nechw bene' gwyejnilaže' xtiža' Criston', na' bi nacho nezechle ca' bene' chesedop chesežag ga yoble chesonxene'ne'. ³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gache'ele da' quinga chzoja' le'e naquen da' non Xancho Criston' mandadw goncho. ³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yičhjele gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. ⁴⁰ Perw binło gonle yogo' da' chonle cate' chdop chžagle na' bi gonlen nacteze.

15

Beban Criston' ladjo bene' guaten'

¹ Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle čhen na' zoaghachle chejle'len. ² Na' nezele šjayzoale len Diosen' še soatezle gwzenagle che diža' güen čhen'. Na' še bi gwzenagle čhen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bačh gwđixjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. ⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. ⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'. ⁶ Beyoža' jayezlo'elagüe' gwđete gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czła' bałe' ba gosate'. ⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸⁻⁹ Bzēbte bedyelo'elagüe' neda', zaca'leba' ca' bi golje cate' biņa' žin ža, le cana' bchi bsaca' bene' ca' chesedop chesežag chesonxene' Criston'. Na' da'nān' chacda' bicze zaca' yososi'e neda' postlw. ¹⁰ Perw Diosen' nži'ilāže'de' neda' na' gwleje'nda' naca' postlw che', na' choncha' xšinen' clel ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'. ¹¹ Da'nān' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le čhen'.

Yesyeban bene' guat ca'

¹² Yogo' neto' chyixjue'eto' beban Criston' ladjo bene' guat ca'. Da'nān' čbixčhen' ža baļle bi yesyeban bene' guat ca'? ¹³ Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. ¹⁴ Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'. ¹⁵ Ba be'lento' le'e diža' güenlaže' gwnoto' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. ¹⁶ Le šaca' bi chosbane' bene' ba gosat, lecze bi bosbane' Criston'. ¹⁷ Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtoła'chon'. ¹⁸ Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. ¹⁹ Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilāže'cho Criston' clel ca' che yezica'chle bene' še ca'.

²⁰ Perw na' da' li Diosen' bosbane' Criston' ladjo bene' guat ca', na' da'nān' nezechle žin ža yosbane' yezica'chle bene' chesejnilaže'ne' še ba gosate'. ²¹ Gwxē yela' goten' yežlio nga da' gwzoa' to bene' bene' da' mal, na' lecze ca'čzen' goc, to bene' bene' cont žin ža yebancho ladjo bene' guat. ²² Le gwxe yela' goten' cate' Adanna' bene' da' malen', da'nān' yogo' beňachen' chesate'. Nach Criston' bene' cont yogo' bene' yesaque' txen len le' yesenite' toļi tocanē. ²³ To tocho yebancho ladjo bene' guaten' cont soalencho Criston' con caten' ba bsi'e xnezenna'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. ²⁴ Nach te che yežlio nga. Na'

Criston' gwñitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo' na' Xe' Diosen' yogo' da' nlane' chnabi'e na' yogo' non' chnabi'e. ²⁵ Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. ²⁶ Na' cate' yeyož gwlej gwšošje' yogo' bichle da' bi chon txen len le', nach gwcueze' yela' goten'. ²⁷ Diosen' ba nsi'e xnezen' cont yogo'lo' da' zjade zjanaquen lo' na' Criston'. Perw bi nacho zejen Diosen' naque' lo' na' Criston', san Diosen' nsi'e xpnezen' cont yezica'chle bene' na' bica'chle da' zjade yesaquen lo' na' Criston'. ²⁸ Nach cate' ba ben Diosen' cont yogo' da' zjade ba zjanaquen lo' na' Criston', nach Criston' gwlo'e leceze le' naque' lo' na' Xe' Diosen'. Can' gac cont yogo' benač na' yogo' angl yesacbe'ede' Diosen' naque' Xangaque', na' leceze yesacbe'e da' xigüe', beyixe' na' bichle da' zjade.

²⁹ Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

³⁰ Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. ³¹ Bene' migw, choa' diža' li chnia' chbechgüeda' ba chejnilaže'le Xancho Jesucriston', na' leceze ca' choa' diža' li chnia' yogo' ža chzanlaže' cuina' gac bi da' gac chia'. ³² Guac nacho bež znia' ba gwdilena' Efeso nga ga ba gosodabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

³³ Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal leceze solao gone' can' chesone'na'." ³⁴ Le yeyon xbab šagüe' na' cuejyichjle xbab mal dan' chorlen', le balle bina' šejni'ile che Diosen'. Chnia' ca' da' chaclaža' gaquele zto' che da' malen' chonle.

Cuerp che bene' yesyeban ladjo bene' guat ca'

³⁵ Balle nabliale nac gac yesyeban bene' guat ca' o nac gac cuerp čhegaquen' cate' yesyebane'. ³⁶ Ncho' yičhlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'. ³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čhen. ³⁸ Diosen' chone' cont chla' yag dao' dan' chazchon', bi chla' yag yoble da' bi gozcho. ³⁹ Na' gague toze ca nac cuerp che chio' benač len cuerp che be žia tap ni'a na'ba'. Nža' cuerp che benač na' nža' cuerp che be žia xil, na' leceze nža' cuerp che be chesaš lo' nis. ⁴⁰ Nža' cuerp che benač, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che benač na' che beyixe' ca' chesaš lo' yežlion'. ⁴¹ Na' nža' ca' chseni' gwbiž, nža' ca' chseni' bio' na' leceze nža' ca' chseni' to to beljw ca'. ⁴² Nach cate' yesyeban bene' ca' ba gosat, cuerp čhegaquen' bi gaquen ca' cuerp da' gosape' cate' gosebane'. Cuerp čhegaque' da' bosocuaše' lo' ban' ba beyožon', perw cuerp cobe čhegaquen' gague da' te čhen. ⁴³ Bibi zaca' cuerp che bene' guat ca', zjanaquen cuerp šen, na' cheyožon', da'nana' chcuasaš'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp čhegaque' da' güen juisyw na' da' gual. ⁴⁴ Cuerp čhegaquen' zjanaquen de bela' čhen cate' chosocuašen' perw cate' yesyebane' ladjo bene' guat ca' nža' ba zjanac cuerp čhegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp čhechon' da' de na'a naquen de bela' čhen, na' leceze cheyala' nezecho žin ža cate' yeyaquen da' cobe na' gonon con can' ža Spiritw che Diosen'.

⁴⁵ Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebbe' da Adánna', le Criston' chone' yela' mban toli tocanē. ⁴⁶ Na'a cuerp čhechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. ⁴⁷ Diosen' bene' bene' nechw len bište yo cont gwzoe' lo' yežlio nga, perw Xancho Criston' ben' zaca'lebbe' ca' bene' nechon' ze'e yaba. ⁴⁸ Na' chio' benač, cuerp čhechon' naquen ca' cuerp che bene' nechon' da' ben Diosen' len bište yo, da'nana' naccho che yežlio nga. Na' chio' chejnilaže'cho Criston', žin ža cate' cuerp čhechon' yayaquen da' cobe can' nac cuerp che Criston' bene' za' yaba. ⁴⁹ Na'a šlac zoacho yežlion' naccho ca' bene' ben Diosen' len bište yo, perw cate' žin ža šjayzoacho yaban', gaccho ca' Cristo ben' za' yaba.

⁵⁰ Bene' migw, chnia' le'e bi gac yežincho yaba gan' zoa Diosen' len cuerp čhechon' de bela' čhen. Da' te che cuerp čhecho quinga, da'nana' bi gac šjayzoalenchon len Diosen' toli tocanē. ⁵¹ Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho. ⁵² Bedao'nez, ca' bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'.

Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. ⁵³ Le cuerp chechon' da' mbanecho yežlio nga da' te chen. Naquen da' chat, na' cheyała' yayaquen da' cobe da' bi gat, da' bi gožo' na' da' bi te che. ⁵⁴ Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiza' Diosen' gan' žan: "Diosen' gwzoede' bcueze' yela' goten', na' chone' yela' mban toli tocane. ⁵⁵ Bich soe yela' goten' chio' da' yoble. Gwbatech gatcho šo'cho lo' ba." ⁵⁶ De yela' got checho na'a le chio' beñačh choncho da' mal. Da' neze chio' beñačh can' ža ley che Diosen' cheyała' goncho na' bi chzenagcho gonchon, da'nan' chnabia' da' malen' chio'. ⁵⁷ Choçcled Diosen' gwsele' Xancho Jesucriston' beque'e xtoła' chio' chejnilaže' chone'. Da'nan' bi soe yela' goten' chio', san de yela' mban toli tocane checho.

⁵⁸ Da'nan' bene' migw chia', chacda' le'e na' chneyoeda' le'e le soachach len toze xbab. Na' le gonchgua xšin Xanchon', le nezczecho cate' choncho xšinen' chejnilaže' chone', gague da' chondadzchon'.

16

Bene' Corinto chosotobe' mechw cont yesaclene' bene' Jerusalén ca'

¹ Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusaléna'. Le gon can' bena' mandadw yeson bene' ca' chesedop chesežag chesonxene' Criston' to to yež da' zjachi' distritw Galacia. ² Yogo' ža dmigw to tole cheyała' cuejle late' güeje mechw según gacate' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e. ³ Nach cate' la'a gan' zoalen', cana' gwzoja' cart da' yesože' bene' ca' chaclaže'le šjasesane' xmechwlén' Jerusaléna'. ⁴ Na' še chonen byen ša'a, cuina' čhi'a legaque' Jerusaléna'.

Pablon' chone' xbab šjane'e bene' Corinto ca'

⁵ Na' yida' gan' zoale cate' yeyož yedia' Macedonia, le cheyała' šjajna'a bene' lježcho ca' nita' na'. ⁶ Na' chacda' yega'ana' le'e do tbio' do čop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. ⁷ Bi chaclaža' yedena'a le'e na'a, le con teza' še ba za'a, na' chaclaža' soa' šša len le'e cate' yida' še Xancho Diosen' gonšque' latje. ⁸ Chaclaža' yega'ana' Efeso nga žinch ža gala' lni dan' že' Pentecostés. ⁹ Le bene' zan že' nga bene' chesaclaže' yosozenague' che Criston' na' lecze že' bene' zan bene' bi chesaclaže' čixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'. ¹¹ Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šägüe' to güen, le chbeza'ne' txen len yezica'chle bene' lježcho ca'.

¹² Na' ca' nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle bene' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

Yeto čope diža' da' choe'len Pablon' bene' Corinto ca'

¹³ Le soa le na' can' chonlen', na' le soa len toze xbab šejnilaže'le Criston'. Bi žeble, san le soachach gonle can' chazlaže' Diosen'. ¹⁴ Na' le gaque lježle bite'teze da' chonle.

¹⁵ Bene' migw chia', nezele bene' ca' že' liž Estéfanos gosaque' bene' nechw gosejnilaže' Criston' distritw Acayan' na' ba gosaclenchgüe' yezica'chle bene' lježcho bene' chesejnilaže'ne'. ¹⁶ Da'nan' chneyoeda' le gwzenag chegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'. ¹⁷ Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. ¹⁸ Ba gosone' cont beyaclaža' can' ba gosoncze' len le'e cana', na' da'nan' cheyała' güe'cho yela' choçcledn chegaque' che dan' ba gosonen'.

¹⁹ Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox. ²⁰ Nach yogo' bene' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gacbia' chaque lježle.

²¹ Cuinca' neda' Pablo chzoja' late' dao' le'e cart nga chguapa' le'e tiox.

²² Na' še ne' nchixe balle bi chaquale Xancho Jesucriston', Diosen' gone' cont cuiaye'e toli tocane. Xancho Jesucristo, yidšco' da' yoble.

²³ Gaclenšca Xancho Jesucriston' le'e. ²⁴ Chacda' yogo'le da' naccho txen chejnilaže'cho Cristo Jesúsen'. Da' na'zen' žia' le'e.

CART GWCHOPE DAN' BZOJ POSTLW SAN PABLO CHE BEÑE' CA' ŽE' CORINTO

Postlw Pablo chzoje' beñe' chesonxen Jesucriston' ciuda Corinto

¹ Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxenle Diosen' lo ciuda Corinto, na' che note'tezechle bene' že' doxen distritw Acaya beñe' ba gwlej Diosen' cont zjanaque' lo ne'e. Neda' len bene' migw checho Timoteo chguapto' le'e tiox. ² Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo' lo' yichjlažda' olen'.

Da' ca' gwdi gwxcaca' Pablon'

³ Cheyla' soacho gonxencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho. ⁴ Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'. ⁵ Leca chyi chzaca'to' can' gwdi gwxcaca' Criston', na' ca'cze leca cheyoe'xen Diosen' neto' da' chejnilaže'to' Criston'. ⁶ Da' zan da' chac cheto' da' chsd chlo'eto' xtiža' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjayzoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. ⁷ Chbezto' gwyo gwchejele da' chac chele, le nezeto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Bene' migw, chaclaža' nezele can' gwdi gwxcaca'to' caten' gwzoato' distritw Asia. Gwdi gwxcaca'chguato', con bich bi goc gonto' na' bento' xbab gatzeto'. ⁹ Da' li bento' xbab lo' yichjlažda'oto' ba za' yela' goten'. Na' goc cheto' ca' cont gočbe'eto' bi soeczeto' gwyo gwchejto' dan' chzaca'zi'ton' san cheyla' šejnilaže'to' Diosen' cont gone' chač laže'to', Dios ben' chosban beñe' guat ca'. ¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. ¹¹ Zoato' lez yoslacze' neto' con še gaclenle neto' yo' güizlene' cheto'. Na' še zanle gonle ca', nach lecze zanle güe'le yela' choxclen che' cate' ba goclene' neto'.

Pablon' gwžede' šjeje' ciuda Corinto

¹² Chbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezechle bene'. Bi načo chonto' güen neče da' nacto' bene' sina', san da' nži'ilaže' Diosen' neto', da'nan' chaclene' neto' chonto' güen len yogo'lol bene'. ¹³ Cart quinga chzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo. ¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba chache'ele late' dao' na'a. Na' cate' žin ža yid Xancho Jesusen' da' yoble, yebele güe'le diža' nacle neto' txen na' neto' yebeto' güe'to' diža' nacto' le'e txen.

¹⁵ Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e. ¹⁶ Goclaža' tia' yedena'a le'e caten' gwya'a Macedonia na' lecze goclaža' yedia' gan' zoalna' cate' beza' Macedonian'. Na' godca' yeyoža' gaclenle neda' yeya'a Judean'. ¹⁷ Do laža' godca' gona' ca', gague chona' con can' žan chia' ca' cheson ba' bene' bi chesejnilaže' Diosen', to chesene' yesone' to da' yesone' na' to chesene' bi yesonen'. ¹⁸ Ca' Diosen' chone' con can' že', lecze ca' neto' chnato' do laže'to' cate' chnato' to da' gonto'. ¹⁹ Na' lecze Jesucriston' beñe' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwdižue'eto' xtižen' len le'e, neda', Silvano na' Timoteo. ²⁰ Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'nan' len yela' chaclen che Jesucriston' chonxencho Diosen' che'chone': "Gacšca ca'." ²¹ Na' Diosen' chone' cont neto' na' le'e zoačhačho chejnilaže'cho Criston'. Na' beñe' chio' Spiritw che'na' cont gac gončo xšinen'. ²² Na' lecze zoa Spiriton' lo' yichjlažda'ochon' cont nezecho Diosen' ba gwqu'e chio' ca' xi'ine' na' cont nezecho yogo' da' güen da' gwne' gone', žin ža cate' gonon'.

²³ Da' biña' yida' da' yoble Corinto gan' zoalen' yedena'a le'e can' gwnia' gona', biña' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. ²⁴ Nezeto' gague neto' ye'to' le'e da' ni da' na' šejle'le. Ba zoačhačle chejnilaže'le Criston', na' neto' con chaclento' le'e cont soachle mbalazch.

2

¹ Ca' goquen' bechoglaža' bi yedena'a le'e, le gocbe'eda' šaca' bedena'a le'e gocyaše'cho. ² Na' šaca' bena' cont gocyaše'le, nono zoa no yeyon cont yezoa' mbalaz, le ba bena' cont gocyaše'laže'le še ca'. ³ Bzoja' carten' ca' cont cate' yida' gan' zolna' bich gonle da' mal da' gonen gocyaše'da', le cheyała' gonle cont yebeda'. Na' zoa' lez lece mbalaz soa le'e cate' gonle soa' neda' mbalaz. ⁴ Bzoja' le'e do chegüine'laža', da' gwzoachgua' gocyaše'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüine'le, san gwzelaža' gache'ele leca chacda' le'e.

Gwne' cheyała' yesyezi'xene' che bene' ben da' malen'

⁵ Da' li gocyaše'da' can' ben bena' ben da' malen', perw gague neda'zen' gocyaše'da'. Yogo'czle ba gocyaše'laže'le late' güeje can' ba goquen'. Chnia' gocyaše'le late' güeje cont bi nia' benche' chio' zi'ch ca' cheyała' nia'. ⁶ Ndog nžagle txen gwchoglaole castigw che', na' da' na'zen' cheyała' si'e. ⁷ Bich güe'lene' castigw, san yezi'xenle che' na' le gon chačh laže' cont soede' yela' chacyaše'laže' chen' na' bi cuejyichje' Diosen'. ⁸ Da'nana' chneyoeda' le'e le gon cont gache'ede' chaquelene'. ⁹ Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle. ¹⁰ Na' na' chaclaža' nezele note'teze bene' chezi'xenle che', lece neda' chezi'xena' che'. Na' cate' chezi'xena' che bene', še zoa da' cheyała' yezi'xena', chezi'xenan' lao Criston', na' ba bezi'xena' che bena' cont chaclena' le'e. ¹¹ Na' chezi'xencho che bene' cont Satanás dan' chnabia' da' xigüe' ca' bi soen gonen chio' gan, le nezecho can' chaclažen' siye'czen chio'.

Pablon' goclaže' yežague' Titon'

¹² Cate' bžina' Troas gan' gwduxje'eda' diža' güen che Criston', nachbia' Diosen' ba bene' cont bene' že' na' gosaclaže' bosozenague'. ¹³ Perw benchgua' xbab che bene' migw checho Titon' da' bi bžine' na'. Da'nana' goša' bene' ca': "Nayežagcho", na' beza' beya'a distritw Macedonian'.

Zoacho mbalaz da' nombia'cho Criston'

¹⁴ Chočlen Diosen', none' cont Jesucriston' ba bebeje' chio' lo na' gwxiyen' na' mbalaz cheche'e chio' soacho len le'. Na' gate'teze zoacho, Diosen' chone' cont chesache'e bene' naquen da' güen juisyw nombia'cho Criston'. ¹⁵ Diosen' chebede' choncho cont chesache'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yela' mban chegaque' toli tocane, na' yebale' bi chesejnilaže'ne' na' chesebiaye'e. ¹⁶ Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba golenchone' cont ba de yela' mban chegaque' toli tocane. Perw chio' bi chaccho to gualazcho gwlo'echo bene' ca' güenna' naquen yesejnilaže' Criston'. ¹⁷ Bene' zan chosoše'e diža' da' cheso'e che Diosen' cont chesyebe bene' len xtiža'gague' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

3

Da' cobe da' gwna Diosen' gone' cont gaclene' benačen'

¹ Bi gonle xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzojle cart da' goxe'to' cate' šejto' ga yoble. ² Chaqueto' le'e da' gwduxje'eto' xtiža' Criston' len le'e cont gwejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yesenezde' can' chonto' xšin Diosen'. ³ Gwejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nachbia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

⁴ Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'. ⁵ Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac. ⁶ Na' Diosen' ba bene' cont chac chyixjue'eto' da' coben' da' gwne' gone' gaclene' chio' benačen'. Na' da' coben' bi naquen ca ley che' dan' byoj cani' chejzni'in chio' benačen cuiayi'cho yela' güen da' mal chechon', san na'a Spiritw chen' chonen yela' mban toli tocane che chio' chejnilaže'chone'.

⁷ Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosache'ede' ley chen' naquen da' zaca'. Na' cana' catec goctitechgua cho'alao Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in benačen' cuiayi'cho yela' güen da' mal chechon'. ⁸ Da'nana' nezecho leca zaca'ch da' chon Spiritw che Diosen' na'a cont gata' yela' mban checho toli tocane. ⁹ Diosen' blo'e yela' zaca' che ley chen' la'czla' bzejni'in chio' benačen si'cho castigw da' bi choncho can' žanna'. Na' zaca'ch xtiža' Diosen' da' de na'a da' chejzni'in

cheyone' chio' bene' güen. ¹⁰ Da' naquen da' zaca'chgua cani', biçh naquen da' zaca' ña'a, le ba de yeto da' zaca'chgua da' xench. ¹¹ Na' da' blo'e Diosen' yela' zaca' che da' ben' žin šlozže cani', cheya'la' gache'echo leca da' xench zaca' da' coben' da' bi' te che.

¹² Na' da' ñezeto' gague da' te che da' cobe da' ba gwđixjw Diosen' cont chaclene' benaçhen', da'nan' bi chedi'to' chyixjue'eto' xtižen' sin chi chžebto'. ¹³ Da' Moisésen' bucaše' cho'alagüen' len to lache' bxin cont bene' Israel ca' bi besele'ede' cheni' late' güeje yela' chactit che cho'alagüen'. Perw na'a gague chcušaše'to' yela' zaca' che da' chon Diosen'. ¹⁴ Bene' Israel gualaž cheto' ca' bi gosejni'ide', ñe ža ña'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaue'. Con bene' ca' chesejnilaže' Criston' chesejni'ide' bi zejen. ¹⁵ Ža ña'aža cate' bene' Israel gualaž cheto' ca' chosolabe' da' ca' bzoj Moisésen', zjanaquen ca to da' ngaše' len legaue' yela' bi chejle' chegaquen'. ¹⁶ Perw note'teze' cate' chesejnilaže' Xancho Criston', da' ca' zjanyoj biçh chesaquen ca to da' ngaše' len legaue'. ¹⁷ Xancho Criston' naque' toze len Spiritw che Diosen'. Na' cate' ba zoa Spiritw che Xancho' lo' yichjlaždao' bene', baçh zoe' binlo len Diosen'. ¹⁸ Yogo' chio' chejnilaže'cho Criston', yela' zaca' juisyw che Xancho Criston' biçh ngašen' len chio', na' ba zejeh cheyaquechcho bene' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

4

¹ Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. ² Na' bibi chonto' bagaše'ze ca no da' nac da' yela' zto'. Bi chonleto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li. ³ Con bene' ca' ba zjambiyi' yela' bi chejle' chegaquen', legacze' bi chesejni'ide' diža' güen dan' choe'lento' legaue'. ⁴ Le bene' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nçho' yichjlažda'ogaquen'. Da'nan' diža' güen che Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. ⁵ Na' ca' nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. ⁶ Na' Dios ben' gwne' gata' be'ni' yežlio nga gan' goc çho', ba gwlo'e be'ni' çhen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chache'echo can' nac yela' bene' zaca' che Diosen'.

Pablo cho'e xtiža' Diosen' lagüe' da' chejnilaže'ne'

⁷ Cuerp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' çhen' lo' yichjlažda'ochon' ña'a šlac ñe' mbancho len cuerp checho quinga cont gache'echo bibi chac goncho še bi gone' yela' guac xen çhen' cont gac bi da' goncho. ⁸ Na' neto', da' zan da' chyi chzaca'to', perw bi chbejyichjto' xšin Diosen'. Zan ñi'a bi chežellaže'to' nacle gonto', perw ñezeto' Diosen' chaclene' neto'. ⁹ Chosolagšibe' neto', perw Diosen' bi chbejyichje' neto'. Chosochi chososaque' neto', perw Diosen' bi cho'e latje yesote' neto'. ¹⁰ Gate'teze chejto', con yogo' ñi'a chosochi chososaque' bene' neto' na' chesaclaže' yesote' neto' can' gosote' Jesúsén'. Na' Diosen' cho'e latje chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga. ¹¹ Na' šlac ñe' mbanto', yogo' ža nita'cze bene' chesaclaže' yesote' neto' lagüe' da' chyixjue'eto' xtiža' Jesúsén'. Na' chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga da' yesat. ¹² Can' chac, tža tža chesaclaže' yesote' neto', san le'e ba de yela' mban chele toli tocane.

¹³ Xtiža' Diosen' nyojen žan: "Chejnilaža' Diosen' na' da'nan' choa' diža' che'." Na' ca ben' bzoj da'na' gwyejnilaže' Diosen', ca'çzen' chejnilaže'to'ne' na' da'nan' choe'to' xtižen'. ¹⁴ Le ñezeto' Dios ben' bosban Xancho Jesúsén' ladjo bene' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. ¹⁵ Neçe le'e bžaglaoto' yogo'lo' da' ba goc cheto'. Le chaclaže'to' gac zancho gaclenchgua Diosen' chio' cont šejnilaže'cho Xancho Jesúsén', na' lecze gac zancho güe'cho yela' choxclen che' catec bene' zacan' naque'.

¹⁶ Da'nan' bi chjaxaque'laže'to'. La'czla' tža tža zej chaxo'ch cuerp cheto' quinga, lecze tža tža Diosen' chocobche' yichjlažda'oto'. ¹⁷ Yob te che bite'teze da' dao' da' chžaglaochio yežlio nga. Na' da' ca' chyi chzaca'cho chesaclenen chio' cont soacho mbalaz juisyoch cate' šjayzoacho len Diosen' toli tocane, na' lenna' da' zaca'ch ca bite'tezchle. ¹⁸ Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che

da' ca' zjade yežlio nga da' chle'echo, na' da' ca' bi chle'echo, gague da' yesede čhegaquen, nita'czen toli tocane.

5

¹ Cuerp čhechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen čhecho yaban' da' soa toli tocane; na' lenna' gague naquen to da' ben beňach. ² Na' šlac ne' zoacho mbancho yežlio nga, chbežyaše'cho lo' lažda' ocho zelaže' chguacho šjayzoacho lo' yo'o da' non Diosen' čhecho yaban'. ³ Chona' xbab cuerp cobe da' gone' zaca'leben ca to xacho da' chyažjen čhazcho cate' yežincho yaba. ⁴ Da' li chio' ne' chžaglaecho len cuerp čhecho quinga chbežyaše'cho lo' lažda' ochon'. Gague da' chaclaže'cho gatcho, san chaclaže'cho yeža' cuerp čhecho quinga da' te čhen len to da' soa toli tocane. ⁵ Na' Diosen' gwleje' chio' cont šjayzoacho len le' na' gwsele' Spiritw čhen' zoan lo' yichjlažda' ochon' cont nezecho dech da' gone' čhecho.

⁶ Da'nan' bi chacžejlaže'cho, le nezecho šlac mbancho len cuerp čhecho quinga bina' šjayzoacho len Xancho Criston'. ⁷ Na' la'czla' bina' le'echo da' ca' gone' čhecho, zoacho chejnilaže'chone'. ⁸ Na' da'nan' bi chacžejlaže'cho, le chaclaže'cho cuejyichjcho cuerp čhecho quinga cont šjayzoacho len Xancho Criston'. ⁹ Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. ¹⁰ Le to tocho cheyała' techo lao Criston' gan' chone' yela' justisen' cont čhogbi'en čhecho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Benachen' guac yesenite' binlo len Diosen'

¹¹ Na' dan' nezeto' yogo'cho yodecho cuent lao Xancho Criston' che yogo'lol da' ba bencho, da'nan' chñeyoeto' bene' yosozenague' che'. Diosen' nezde' do laže'to' chñeyoeto' bene' yosozenague' che', na' zoa' lez lecze le'e chache'ele lo' lažda' olen' zoato' chonton' do laže'to'. ¹² Bi nacho chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'. ¹³ Še chaquele chacontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. ¹⁴ Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neče yogo'cho, na' da' naccho txen len le' guac nacho yogo'cho ba gotcho len le'. ¹⁵ Bnežjw cuine' gote' neče yogo' chio' beňach, cont soa ezecho goncho can' chazlaže' na' bich soa cuezcho goncho con ca žan čhecho. Gote' na' bebane' ladjo bene' guaten' neče chio'. ¹⁶ Neto' cate' bina' šejnilaže'to' Criston' goqueto' bibi zaque', le bento' xbab zaca' bene' še no naque' lo yežlio nga o še bi da' de che'. Perw na'a bich chonto' xhaben' ca' che Criston' o che note'teze bene'. ¹⁷ Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

¹⁸ Diosen' bozoe' chio' binlo len le' na' bene' cont beyaccho ca bene' cobe cate' gwejnilaže'cho Criston'. Na' gwlo'e lo na'cho ye'cho bene' can' yesenite' binlo len Diosen'. ¹⁹ Ye'cho legaue' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyała' ye'cho bene' cont yesenite' binlo len Diosen'. ²⁰ Criston' gwsele' chio' ca cuine' na' Diosen' chaclaže' neyoecho bene' ca cuincez Criston' chñeyoede' legaue', ye'chone': "Le soa binlo len Diosen'." ²¹ Criston' bibi da' mal bene'. Perw na' Diosen' bene' cont Criston' gwxcaca'zi'e neče xtoła'chon' cont none' chio' bene' güen da' chejnilaže'chone'.

6

¹ Neto' chonto' xšin Diosen' txen len le'. Da'nan' chñeyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. ² Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a bač bžin žan' chaclen Diosen' beňachen', le ža na'aža chnežjue' yela' mban toli tocane che bene' chesejnilaže' Jesucriston'.

³ Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe bene' che xšin Diosen' da' chonto'. ⁴ Da'nan' bite'teze da' chonto' chlo'eto' chonto' xšin Diosen' ca cheyała'. Chyo chčhejto' cate' chosoči chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'. ⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejto' bišgal na' gwbił gwdonto'. ⁶ Na' da' chi' yichjto' chonto' xšin Diosen' can' chazlažen',

bitw bi da' yela' zto' chonto'. Chzejni'ito' bene' len yela' chejni'i che Diosen', napt'o' yela' chxenlaže' len yogo'loł bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'loł bene'. ⁷ Zoato' chzejni'ito' bene' diža' li, na' chonto' yogo'loł da' chonto' len yela' guac che Diosen'. Na' da' zoato' chonto' da' zej to' licha, chaclenen cont soeto' tillento' da' malen' na' cont bi gwzenagto' che gwxyien'. ⁸ Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' cheseņe' güen čheto' na' cate' cheseņe' mal. Choe'to' diža' li, cate' bene' chesejle'e čheto' na' cate' bene' chesacde' chonlaže'to'. ⁹ Bał bene' bi chesejle'e chonto' da' zaca', perw yebale' zjaņezde' chonto' da' zaca'. Zan las chonto' xbab gatczto', perw ne' mbanto'. Na' la'czła' yogo' da' ca' chac čheto', biņa' yesote' neto'. ¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czła' bibi de čheto', yogo'loł bi da' de naquen čheto' da' nacto' Criston' txen.

¹¹ Le'e bene' Corinto, bačh be'lento' le'e yogo' diža' da' yo'o lo' lažda'oton', le' chacčgüeto' le'e. ¹² Nži'ilaže'to' le'e, perw be' bitec nži'ilaže'to' le' neto'. ¹³ Chata'yoeda' le'e ca' chon to' bene' len xi'ine', le' gaque neda' ca' chacda' le'e.

Spiritw che Diosen' z oan lo' yichjlaždao' chio' chejnilaže'chone'

¹⁴ Bi cheyała' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyała' goncho txen len bene' bi yo'o be'ni' chen' lo' yichjlažda'ogaque'. ¹⁵ Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyała' gone' txen len bene' bi chejnilaže' Criston'. ¹⁶ Nezecho bi gac še' l gua'a l saca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še' zoa bichle da' chejnilaže'cho. Chac can' gwna Diosen':

Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež čhia'.

¹⁷ Da'nan' cheyała' goncho can' gwna Xancho Diosen':

Le' yečhoj len bene' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

7

¹ Le'e bene' chacda', ba nezecho can' gwna Diosen' gone' güen len chio'. Da'nan' cheyała' cuejyichjcho bich goncho bite'teže da' xinj da' gwchenen cuerp chechon' o' yichjlažda'ochon'. Na' cheyała' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

Ba bža' xbab che bene' Corinto ca'

² Le' gaque neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'.

³ Gague žia' ca' cont tila' le'e, le' can' ba' gwnia' cana', chacda' le'e na'a šlac mbancho na' lecz ca' gacda' le'e cate' ba gota'. ⁴ Nezda' lo' lažda'ogua' gonle can' chazlaže' Diosen', na' chbeda' choe'lena' bene' diža' ca' güenna' chonle. Ba beyacxenlaža' da' gwņezda' chonle güen, na' zoa' mbalaz la'czła' da' zan da' chac čhia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxcato'. Gwnita' bene' bososašlene' neto' na' lecze bžebto' lo' yichjlažda'oto' goqueto' nac gacto'. ⁶ Na' Dios ben' cheyoe'xene' bene', beyoe'xene' neto' da' bela' Titon'. ⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le' che dan' ba goquen' na' chi' yichjle gonle can' gwgnian'. Nachen' leca bebechda' gwņezda' da' ca'.

⁸ Chache'eda' gocyase'le can' gwnia' le'e carten' bzoja' le'e. Na' gwdechle betinjda' da' bena' cont gocyase'le, perw na'a bich chetinjda' da' gwseła' carten', le' šložzen' gocyase'le. ⁹ Chbeda' na'a, le' goclennen le'e cont begüine'laže'le che da' xinjen' benle na' betinjle čhen, can' goclaže' Diosen'. Na' can' goquen' bi bchojen mal dan' gocyase'len'. ¹⁰ Cate' ba bencho da' xinj, Diosen' chaclaže' yegüine'cho che dan' benchon' na' yetinjehon. Na' chone' yela' mban toli tocaņe che chio' chetinje xtola'chon', na' leca mbalazch soacho še ba betinjecho xtola'chon'. Perw bene' zan cate' chesegüine'laže' bi chesyetinjde' xtola'gaquen', nach yesebiaye'e. ¹¹ Chebe Diosen' can' begüine'len', le' goclennen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nachbia' bich bi xtola'le de can' benlna'. ¹² Na' ca' nac carten'

bzoja' le'e, gague gwche' yichja' che ben' ben' da' xinj' na'ze, o che ben' bende' ca', san gwche' yichja' che le'e cont gache'ele lao Diosen' ne' chaquele neto' na' ne' chaclaže'le gonle can' che'to' le'e. ¹³ Na' na'a ba beyacxenlaže'to' da' bzenagle cheto'.

Na' lecze chebechgüeto' ca mbalaz zoa Titon', le yogo'le benle ga bezoa Titon' binlo len xbab da' yo'o lo' yichjlažda'ogüen'. ¹⁴ Goša' Titon' nezda' gonle güen. Na' bi cheto'eda' da' goša'ne' ca', le ca da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nachbia' be'to' diža' li. ¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. ¹⁶ Da'n'an' chebeda' na' nezda' yeyož gonle can' chazlaže' Diosen'.

8

Besezande' da' gota' chegaque' gosaclene' bene' yoble

¹ Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. ² Gocchgua yela' yaše' yela' zi' chegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebchgüede' bosotobe' mechw xen cont gosaclene' bene' yoble. ³ Nezda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'. ⁴ Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. ⁵ Na' gosonche' can' bento' xbab yesone', le zgua'tec gason cuingaque' lo na' Xancho Criston' na' lecze gason cuine' lo na' neto' dan' gosaclaže'chgüe' yesone' can' chazlaže' Diosen'. ⁶ Da'n'an' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzoloa btoble cana'. ⁷ Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lecze le gon güenchgua na' le gwtobe da' cheseyažje bene'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' gason bene' Macedonian' da' chesacde' Diosen' na' lježgaque'. ⁹ Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'lo' da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btoble mechon' do yichj do laže'le. ¹¹ Na' chacda' güen yeyož gwtoblen na'a do yichj do laže'le can' gwzolaole, na' gwnežjwle can' ca zelao saque'le. ¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

¹³ Bi žia' gonle cont bich bi yega'an' chele na' gata' che bene' yoble. ¹⁴ Con chaclaža' gata' da' chyažje yogo'le. Šlac na'a de che le'e, cheyała' gaclenle bene' ca' cheseyažjde'. ¿Chixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. ¹⁵ Nach gac can' nyoj Xtiža' Diosen' žan: "Bene' botobe' da' zčha'o, bitw nacho becho'onen che', na' bene' botobe' late'ze, gota'cze da' byažjde'."

Titon' na' bene' lježe' ca'

¹⁶ Chožclen Diosen' bene' cont Titon' zelaže'chgüe' gaclene' le'e con can' zelaža' neda'. ¹⁷ Na' cate' goša'ne' yede'ne' le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

¹⁸ Na' chsel'a'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che beng a chsel'a'to', chesene' binlo chyixjue'ede' diža' güen che Jesucriston'. ¹⁹ Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwo mechon' cont gacxen Xancho Jesucriston' na' cont gwlo'ele chbele chaclen bene' lježle. ²⁰⁻²¹ Yo'o yichjto' gonto' da' nac güen lao Xancho' na' lao bena'chen', le mechw xenna', na' bi chaclaže'to' yesene' chonto' clele len len.

²² Na' lecze chsel'a'to' yeto bene' lježcho len legaque'. Zan ni'a ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chguale gonle can' chazlaže' Diosen'. ²³ Na' ca nac Titon', chone' xšin Diosen' txen len neda' cont chaclento' le'e. Na' bene' ca' yehope, zjanite' chesone' cont Criston' chacxene', na' bene' ca' chesedop chesežag chesonxene' Jesucriston' gosebeje' legaque' na' chesesele' legaque'. ²⁴ Da'n'an' chnia' le gon güen len legaque' cont bene' ca' chesonxene' Criston' to to yež yesenezde' chaquele legaque', na' le gwlo'e chonle güen can' gwnato' cate' be'to' diža' güen chele.

9

Bosotobe' mechon'

¹ Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble. ² Nežda' chaclaže'le gaclenle legaue'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nana' bene' ca' že' zan yež distritw Macedonia lecze ba chesone' ca'. ³ Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaclen ca' da' güenlaže'. Chaclaža' yeyož gwtoble mechua' cont ba den cate' yida'. ⁴ Le še sa'len no bene' Macedonia neda' cate' yedena'a le'e da' yoble, na' yeto'eda' chele še bina' gata' mechua', na' lecze le'e yeto'ele da' bi benle can' gwnia' gonle. ⁵ Da'nana' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yičhj do laže'le, gague gwnežjwche'elen.

⁶ Le gon xbab can' chesene': "Bene' chaz late'ze, late'ze chelape', na' bene' chaz da' zcha'o, da' zcha'o chelape'." ⁷ Da'nana' to tole cheyała' gwnežjwle gaca'te' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. ⁸ Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'loł da' chyažjecho bate'teze neche gac gwnežjwcho da' chyaže bene' yoble na' goncho bichle da' güen. ⁹ Quinga nyoj Xtüža' Diosen' che bene' chzande' da' de che', žan: Ba bnežjue' da' beseyaže zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' bin' na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont cha'o xenchen, na' gone' cont šeichle gonchle da' güen. ¹¹ Bite'teze da' chac chele, Diosen' gone' cont gata' da' zcha'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxclen che Diosen'. ¹² Le da' gwnežjwle da' cheseyaže bene' chesejnilaže' Jesucriston' ga yoble, bene' zan yeso'e yela' choxclen che Diosen'. ¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yičhj do laže'le. Nach legaue' yeso'e yela' choxclen che Diosen' da' gwsela'le da' zcha'o mechw da' gaclenen legaue'. Lecze yeso'e yela' choxclen che' da' chaclenle yogo' bene' chesejnilaže' Criston'. ¹⁴ Na' do chesacde' le'e yosol güiže' Diosen' yesenabe' gaclenche' le'e, le nacbia' ba nži'ilaže'chgua Diosen' le'e. ¹⁵ Choxclen Diosen' gwsele' Xancho Jesucriston' len chio'. Bibi diža' de da' nacho catec zaca' goclenna' da' bene' len chio' gwsele'ne'.

10

Diosen' gwleje' Pablon' cont bzejni'ide' bene'

¹ Chesena bał bene' chžeba' tila' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'. ² Chneyoeda' le'e gonle da' güen cont bi tila' le'e caten' yedetila' bene' chesacde' chona' con can' žan chia'. ³ Na' la'czla' zoato' lo yežlion' na' nacto' benačhze, cate' chdillento' da' malen' bi chdillenton' ca' benačhze. ⁴ San Diosen' nonē' neto' yela' guac cont choeto' chlej chšoštjo' yogo' da' chon gwxiyen', le bi soeto' tillenton' to gualazto'. ⁵ Can' chac, Diosen' chaclene' neto' chonto' cont chosozexjwyičhj bene' chosozenague' che Criston' na' chesebejyichje' xbab mal čegaquen' na' bichle da' cheseza'laže' da' chžonen yesombi'e Diosen'. ⁶ Na' cate' yeyož gata'bia' še yogo'le gwzenagle che Diosen', cana' ngüiato' gonto' castigw che nole bi chzenagle che'.

⁷ Le gon xbab che dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'. ⁸ Na' bi yeto'eda' güe'cha' diža' yelate' can' ba bian', le chebeda' gwsela' Xancho Criston' neto' cont bzejni'ito' le'e diža' da' goclennen le'e, gague da' bžiyain' le'e. ⁹ Bi chaclaža' no gacde' še chzoja' cart quinga cont gwšeba' le'e. ¹⁰ Bene' ca' chesenelagüe' chia' chesene' cate' zoa' zito' chzoja' cart znia' ca' che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle. ¹¹ Bene' ca' chesenelagüe' chia' cheyała' yesenezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

¹² Bi chaclaže'to' gonlebetō' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güench clēl ca' cheson bene' lježe', na' bibi zejen chesone' ca'. ¹³ Neto' bi gonxen cuinto'. Con güe'to' diža' che da' ca' goclēn Diosen' neto' bento' gan' ba gwsele' neto', le lecze gan' zoalen' ba gwsele' neto'. ¹⁴ Da'nana' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'. ¹⁵ Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan'

zoalen'. ¹⁶ Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

¹⁷ Bi cheyala' gonxen cuincho, san cheyala' gonxencho Xancho Dios. ¹⁸ La'czla' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

11

Pablon' na' bene' ca' cheson cuingaque' postlw

¹ Chaclaža' gwzenagle yeto čop diža' güen da' gua' che cuina' la'czla' še chaquele naquen diža' da' bibi zaca'. Le gwzenag chia'. ² Neda' bzejni'ida' le'e xtiža' Criston' da' nechw cont gwejnilaže'lene', na' Diosen' chone' cont chacda' le'e do yičh do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši' cuine' da' chacde' toz bene' byo bene' si' le'. ³ Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' belen' da' no'ole nechon', no'olen' gože' Eva, da' nacha' be xigüe'. ⁴ Cate' chesela'ac bene' gan' zoale na' chosozejni'ide' le'e che Jesúsen' nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen čhen', la' chzenagtele čhegaque'. Da'n'an' chxožda' yeseziye'e le'e. ⁵ Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. ⁶ La'czla' bi choa' diža' xdan ca chesoe' legaque', ba ble'eczele yogo' dan' ba bento' na' nezzele chejni'ito' xtiža' Diosen' binlo.

⁷ Čhaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. ⁸ Gwxia' mechw da' goson' bene' ca' chesedop chesežag chesonxen' Criston' ga yoble cont be'lena' le'e xtiža' Diosen'. ⁹ Na' cate' gwzoa' len le'e, la'czla' bi gota' da' byažjda', bi gwñabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj čhchinda'. ¹⁰ Chebeda' chac chnia' bibi gan chona' chixjue'eda' xtiža' Diosen' len le'e o len bene' že' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj čhchinda'. ¹¹ Perw gague da' bi chacda' le'e bi gonda' le'e zed. Diosen' nezde' chacda' le'e.

¹² Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. ¹³ Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseļa' Criston' legaque'. ¹⁴ Bi yebanel can' chesonen', le ca'czen' chziye' Satanásen' chio', cheyon cuinen ca to angl' bene' chactichgua cont gaquecho naquen to angl' güen bene' za' gan' zoa Diosen'. ¹⁵ Na' ca'czen' cheson bene' ca' chosozenag čhen, chesonlede' le'e cont gaquele chosozejni'ide' diža' güen. Perw žin ža yesezaca'zi'e toli' tocane yela' güen da' mal čhegaquen'.

Da' ca' gwdi gwxcaca' Pablo da' naque' postlw

¹⁶ Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' šlac gua' to čhope diža' güen che cuina'. ¹⁷ Gua' diža' güen che cuina' la'czla' nezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. ¹⁸ Bene' zan cheso'e diža' güen che cuingaque' che bi da' ba gosone' o bi da' ba goc čhegaque', na' ca'czen' gona' neda'. ¹⁹ Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'. ²⁰ Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de čhele na' chontezle bi da' chesene'. Chesonxen cuingaque' na' chesebaže' le'e cont chzenagle čhegaque', na' bia'cze choe'le latje chosozejni'ide' le'e. ²¹ Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', leče cheyaxjda' gua' dižan' nac ca' che cuina'. ²² Chesonxen cuingaque' da' gosalje' gan' že' bene' chesaque' diža' hebreo. Nezzele leče goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezzele leče bene' Israel neda'. Na' chesonxen cuingaque' da' gosalje' lo diaža' che da' Abraham. Na' nezzele leče diaža' che da' Abrahanna' neda'. ²³ Chesene' Criston' gwseļa' legaque' cont yesone' xšine'. Nezzele Criston' gwseļa' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clel ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližya clel ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. ²⁴ Gayo'

ni'a goseyin bene' Israel gualaž chia' neda' tašw de yid togaljechoa ni'a güeje. ²⁵ Šone ni'a bene' justis ca' goseyine' neda' xis. Na' tni'a bosotacue' neda' jej yelate'ze ca' gosote' neda'. Na' cate' zya'a yež zito' to lo' barcw, šon ni'a boghinj nisdaon' barcon', na' cañe bžina' yo biž. Na' lo šon ni'an beyinjenna', tni'a gwdeja' nisdaon' tža tyel. ²⁶ Zan ni'a ba gwya'a yež zito' jatixjue'eda' xtiža' Criston'. Zan ni'a cañe goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nisdaon' yelate'ze bi gota'. Na' yogo' ža chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'. ²⁷ Zan ni'a ba bena' xšin Diosen' benten ga jažaque'chgüeda', na' zan ni'a bchejda' bi gwtasa'. Nombi'a yela' chbil chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

²⁸ Da' zanch da' ba gwdi gwxcaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež. ²⁹ Note'tezle cate' bi zoachachle len Criston' o bi chzoeele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'. ³⁰ Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. ³¹ Dios bene' cheyała' gonxenho toli tocañe nežda' choa' diža' li. Len' naque' Xa Xancho Jesucriston' na' chonxen Jesucriston' le'. ³² Na' yeto da' goc chia', cate' gwzoa' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyečh ciudan' cont yesezene' neda' cate' yechoja'. ³³ Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyechje ciudan' cont bi gosezene' neda'.

12

Da' ble'edagüe' Pablon'

¹ Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'. ²⁻³ Ba chejnlaža' Criston' cate' goc chia' quinga ba goc žta' iz. Diosen' bene' neče gwya'a yaban' gan' zoen'. Bi nežda' še gwya'a len cuerp chia', Dios nan' nežde'. ⁴ Con nežda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' benač yežlio nga. ⁵ Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'. ⁶ Šaca' žan gonxen cuina', da' zan da' güen ba bena' da' gac gua' diža' čhen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca' cheyała'. Yejni'a yesone' xbab še zaca' con ca' nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca' cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'. ⁸ Šone ni'a ba gwnabda' Xancho Criston' yeque'e dan' chžaglagua' len cuerp chian'. ⁹ Nach Xancon' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyała' gono'." Da'n nan' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac čhen'. ¹⁰ Na' da'n nan', cont gacxen Criston', chbeda' bite'teže da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yela' guac čhen'.

Pablon' gwche' yichje' che bene' chesonxen Criston' Corinto

¹¹ Ba bia' diža' benxen cuina' ca' chon bene' bi chejni'i. Le'e cheyała' güe'le diža' chia' naca' bene' zaca', perw bi chonle ca'. Da'n nan' benen byen bia' dižan' ca'. Da' juisyw chonxenle bene' ca' ba nonele ca' postlw čele. Na' neda' ne late'ze bi chyažžen cont gaca' bene' zaca' ca' legaue'. Žia' ca' la'czla' chache'eda' bibi zaca' šaca' bi zoa Diosen' len neda'. ¹² Ba ble'ele naca' dogualje postlw, le cate' gwzoa' len le'e, Diosen' blo'e zoa yela' guac čhen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zoen'. ¹³ Toze ca' güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

¹⁴ Chaclaža' yida' dena' le'e da' gwyoñe ni'a. Na' bi gonda' le'e zed cate' yida'. Bi chaclaža' gonle neda' bi da' de čele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da'

chyažje lebe', ca'czen' naquen len le'e na' len neda'. ¹⁵ Chbeda' chzanda' bite'teze da' de chia' na' lente cuina' cont gaclencha' le'e, la'czla' šlac neda' chaquechda' le'e, le'e bi chaqueteclen neda'.

¹⁶ Na' balle, la'czla' chache'ele bi benda' le'e zed len da' byažj bchinda', žale gwziya'a le'e. ¹⁷ ŽBi nezele bi gwziya'a le'e cate' gwseła' note'teze bene' ca' ba gwseła' gan' zoale na'? ¹⁸ Gwneyoeda' Titon' bedene'e le'e na' gwseła' yeto bene' lježcho len le'. ŽBi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

¹⁹ ŽChaquale ba bia' diža' quinga cont nezele bibi da' xinj chonto'? Gague da'nana' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezele yogo' da' ba gwnia' le'e, na' naca' Criston' txen chzejni'ida' le'e. ²⁰ Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šo'laže'le can' gona' len le'e. Chacda' chixe še chdile chšašle na' chgue'e lježle o chloc lježle o chazlaže'le gac güen che cuinzle. Chixe še chne che lježle, še chchitje diža', še cha'laže'le o še de da' zed chele. ²¹ Chžeba' cate' yedena'a le'e še gata'bia' zanle bina' cuejyichjle da' malen' ba benle, na' bina' yetinjele che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine' da' chele še naquen ca'.

13

Plablon' že' gone' castigw che no chon da' malen'

¹ Na'a gac šone ni'a yedena'a le'e. Cate' gagwcho xya che note'teze bene', guata'bia' nape' dola' še yotilen can' chesena chope o šone bene' cheso'e diža' can' goquen'. ² Goša' le'e šlac gwzoa' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e. ³ Chaclaže'le gona' to da' gwlo'en chne Criston' len neda'. Da'nana' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle. ⁴ Na' la'czla' Criston' ben cuine' ca' bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca' bene' bibi chac gon, perw gwlo'eto' le'e zoa yela' guac che Diosen' len neto'.

⁵ Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'. ⁶ Na' zoa' lez lecze gacbe'ele zoe' len neto' na' nacto' postlw che'. ⁷ Chol' güižto'ne' chele chnabto' bich bi da' mal gonle, gague cont gacbe'ele zoa Jesucriston' len neto', san cont soale gonle da' güen. Le toze ca' nonen še chesacbe'e bene' zoe' len neto' o še bi chesacbe'ede'. ⁸ Na' bibi castigw gonto' le'e še chzenagle diža' li che Jesucriston', con gaclento' le'e, še ca'. ⁹ Yebeto' gonto' ca' bene' bibi yela' chnabia' nape', con še le'e ba chnabia'le chonle can' cheyala' gonle. Na' zoaczto' chol' güižto' Diosen' chnabto' gaclene' le'e gonle doxen can' cheyala' gonlen'. ¹⁰ Ba bzoja' da' quinga za' yedena'a le'e cont yetinjele xtola'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwžiaya'a le'e.

¹¹ Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chač laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chnaba' soašcace' len le'e. ¹² Le gwnopa' na' lježle gwguap lježle tiox cate' chežagle txen, cont gacbia' chaque lježle tole yetole. ¹³ Yogo' bene' ca' chesejnilaže' Criston' do nga chosoguape' le'e tiox.

¹⁴ Na' chnaba' Xancho Jesucriston' gaclenšcace' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.

CART DAN' BZOJ POSTLW SAN PABLO CHE BENE' GALACIA CA'

Pablon' chguape' tiox bene' ca' chesonxene' Criston' Galacia

¹⁻² Neda' Pablo chzoja' le'e chdop chzagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague beňach gwlej neda' cont gona' xšine', san Jesucriston' txen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw chegaque'. ³ Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole. ⁴ Jesucristnan' bnežjw cuine' neče xtola'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen' ⁵ ben' cheyala' gonxencho toli tocaņe. Na' ca'šcaczze goncho.

Bich bi yeto diža' de da' gac nacho diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen. ⁷ Perw bi naquen diža' güen. Con nita' bene' chososed chosolo'ede' xtiža' Diosen' clele na' chesone' cont chaczejlaže'le che diža' güen che Criston' dan' bsd blo'eto' le'e. ⁸ Šaca' neto' chixjue'eto' yeto da' bi naquen diža' güen che Criston', chnabda' Diosen' gone' cont cuiayi'to'. Na' la'czla' to angl bene' za' gan' zoa Diosen' chixjue'ede' yeto da' bi naquen diža' güen che Criston', lecze chnaba' gon Diosen' cont cuiaye'e. ⁹ Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chnaba' gon Diosen' cont cuiaye'e toli tocaņe.

¹⁰ Chnia' ca' cont na Diosen' chona' güen, gague cont yesena beňachen' chona' güen, na' gague cont yebe beňachen' neda'. Šaca' chi' yichja' nacle gona' cont yebe beňachen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Bene' migw, che'nda' nezele diža' güen che Criston' dan' ba be'lena' le'e bitw naquen xbab che beňach. ¹² Gague beňachen' bzenden' neda', na' neca nacho beňachen' bene' cont gwejjni'idan', san cuin Jesucriston' bzejni'ide' neda' diža' güen čhen'.

¹³ Ba beneczele diža' can' ba bena' cate' ne' na'ogua' costumbr che neto' bene' Israel. Lecza bchi' bsaca' bene' ca' chesonxene' Criston', goclaža' yesyenite'. ¹⁴ Na' gwche'chgua yichja' che costumbr dan' gosa'o da' xozxta'ogua' ca' na' bsdchan' clel ca zan bene' l' gualja' bene' lecze zjanac bene' Israel. ¹⁵ Perw cate' bina' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone', ¹⁶ nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesúsen' len bene' ca' bi zjanac bene' Israel. Na' cate' ben Diosen' ca' len neda' notno gwnabda' gwejjni'ide' neda'. ¹⁷ Na' neca gwya'a Jerusalenna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwya'atia' gan' nzi' Arabia, na' gwdechle beza' Arabia bežina' Damasco.

¹⁸ Na' gocch šon' iz gwya'a Damascon', nach beza' beya'a Jerusalenna' cont bembia' Pedron' na' jaso'a len le' žta'gwbiž. ¹⁹ Perw bitw bšaga' yezica'chle postlw ca' san toze Jacobo bene' biše' Xanchon'. ²⁰ Nezcze Diosen' da' nga chzoja' naquen diža' li.

²¹ Nach gwya'a yež ca' zjachi' gan' nzi' Siria na' Cilicia. ²² Na' bene' ca' chesedop chesežag chesonxene' Criston' yež ca' zjachi' distritw Judean', legaque' bina' yesombi'e neda' ca hora'. ²³ Con ba gosende' chesena bene' čhia': "Ben' bchi' bsaque' neto' bich chone' ca'. Ba chyixjue'ede' cheyala' šejnilaže'cho Criston', la'czla' cana' goclaže' gone' cont nono yesejnilaže' Criston'." ²⁴ Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

2

Yezica'chle postlw gosazlaže' can' chon Pablon'

¹ Na' gocch žta' iz gwya'a Jerusalenna' nach da' yoble gwya'a len Bernabén', na' lecze gwčhi'a Titon'. ² Diosen' bzejni'ide' neda' cheyala' ša'a, na' da'nan' gwya'a. Na' btoba' bene' ca' zjanaque' blaol len bene' ca' chesonxen Criston' Jerusalenna' na' legacze' bzejni'ida' bin' chyixjue'eda' len bene' ca' bi zjanaque' bene' Israel cate' choe'lena' legaque' diža' güen che Criston'. Bzejni'ida' legaque' bin' chsed chlo'eda', le goclaža' yesenezde' cont bi yesene' bibi zaca' dan' chona' na' da' ba bena'. ³ Ca' goquen' bitw chole gosone' byen soa bene' lježa' Titon' seřw dan' nzi' circuncišion' la'czla' bi naque' bene' Israel. ⁴ Goc ca' la'czla' gwnita'

bał bene' gosaque' txen len bene' lježcho ca' Jerusalénna' ca hora', bene' gague do laže' gosejnilaže' Criston', con bedeseñe'e še na'oto' costumbr ca' zjanyoj le'e ley che neto' bene' Israel. Legaque' gosaclaže' yesone' byen ga'oto' costumbr ca', la'czła' nezecho chebe Diosen' chio' dan' chejnilaže'cho Criston', gague dan' choncho can' ža leyna'. ⁵ Perw neto' ne late'ze bi bzenagto' che legaque', le goclaže'to' bi gata' da' gwžon gwzenaguechle diža' güen che Criston' da' naquen da' li. ⁶ Na' ca nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czła' bitw bi nonen len neda' še gosaque' bene' blao o še bi gosaque', le len Diosen' tozcze can' zjazaca' yogo'lol bene'.) ⁷ Gosacbe'ede' Diosen' ngüe'e lo na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo na' Pedron' chyixjue'eden len bene' Israel gualaž cheto' ca'. ⁸ Le Diosen' ben' chaclene' Pedron' len yela' guac chen' cont chyixjue'ede' xtiža' Criston' len bene' Israel gualaž cheto', leczen' chaclene' neda' len yela' guac chen' cont chyixjue'eda' xtiža' Criston' len bene' bi zjanaque' bene' Israel.

⁹ Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' len bene' Israel gualaž cheto' ca'. ¹⁰ Toze dan' gose'e neto' gonto', gaciento' bene' yaše' ca'. Na' da' licze chí'chgua yichja' chona' ca'.

Pablon' gwđile' Pedron' gan' nzi' Antioquía

¹¹ Na' gwdechle gwy'a'a gan' nzi' Antioquía. Na' šlac zoa' na' bid Pedron', na' gwđila'ne' can' chone', le bla'alaon chone' da' mal. ¹² Cate' za' bžine' Antioquían', gwzologüe' che'ej chagüe' txen len bene' ca' chesejnilaže' Criston' la'czła' bi zjanaque' bene' Israel; perw gwdechna' cate' besežin bene' Jerusalén ben' gwseła' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teze bene' chejnilaže' Criston' cheyała' soe' señw dan' že' circuncisión. ¹³ Nach yezica'chle bene' Israel ca' chesejnilaže' Criston' lecze besyebiže' bich gose'ej gosagüe' txen len bene' ca' bi zjanaque' bene' Israel, na' gosego'oyele' Bernabén' cont lencze' bebibiže'. Na' gosone' ca' cont yesebe bene' Jerusalén ca' legaque', la'czła' gosenezde' bi naquen mal yese'ej yesagüe' txen len bene' ca' bi zjanaque' bene' Israel. ¹⁴ Goche'eda' bi chesone' can' cheyała' gon chio' nombia'cho diža' li che Criston'. Na' da'n'an' gwđila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejšyichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'n'an' bitw cheyała' gono' byen yeson bene' ca' bi zjanaque' bene' Israel can' nac costumbr che chio' bene' Israel."

Con bene' chesejnilaže' Jesucriston' zjanaque' bene' güen len Diosen'

¹⁵ Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. ¹⁶ Perw ba nezeto' Diosen' bitw že' nacto' bene' güen len le' neče da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'n'an' lencze neto' chejnilaže'to' Criston' cont Diosen' že' cheto' ba nacto' bene' güen lagüe'na'; že' ca' gague neče dan' chonto' can' ža leyna'. Le bi nacho zoa' bene' nac bene' güen len Diosen' neče chone' bi da' ža leyna'.

¹⁷ Bał neto' bene' Israel ba chejnilaže'to' Criston' cont Diosen' none' neto' ca' bene' güen. Da'n'an' chache'eto' toz ca' bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca' clelen' cheson bene' xbab še chesacde' ca'. ¹⁸ Nezecho bi chyažjen ga'ocho costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejšyichjo' costumbr ca' na' yezola'cho yeya'ochon da' yoble, gwlo'elaon naccho bene' güen da' xinj. ¹⁹ Ley dan' bzoj da' Moisés ba bzejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'n'an' bich chonxenan', san yo'o yichja' soacza' gwzenaga' che Diosen'. ²⁰ Criston' bnežjw cuine' gote' neče xtolan', na' dan' chejnilaža'ne' da'n'an' ba none' neda' ca' to bene' guat len da' xinjen' cont bich gonan'. Na' bich zoa' to' gualaza', san Criston' zualene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Len' chacde' chio' na' bnežjw cuine' gote' neče chio'. ²¹ Diosen' nži'ilaže'de' chio' na' da'n'an' gwsele' Criston', perw chzoacho to šla'ale dan' bnežjw cuine' gote' še chaquecho naccho bene' güen len le' neče choncho dan' ža leyna', le bitw byažjen bnežjw cuin Criston' neče chio' šaca'.

3

Naccho bene' güen len Diosen' dan' chejnilaže'cho Criston'

¹ Le'e bene' Galacia, n̄chol̄ yichjlažda'olen'. ¿No gwziye' le'e cont chaquele cheyala' gonxenle costumbr che da' xoxxta'oto' ca'? Ba bzejni'iyane'da' le'e che dan' got Criston' le'e yag cruzen' neche chio'. ² Da' ngazen' ch̄nabda' le'e: ¿Zoa Spiritw che Diosen' lo' yichjlažda'ole neche dan' chonle can' za ley dan' bzoj da' Moisésen'? Bitw naquen ca', san zoan len le'e neche dan' chejnilaže'le Criston'. ³ Spiritw che Diosen' gwyo'on lo' yichjlažda'olen' caten' gwzoloa chejnilaže'le Criston'. ¿Da' leca n̄chol̄ yichjlažda'olen' chaquele chyažjen gonle can' za leyna' cont yeyož gacle can' chazlaže' Diosen'? ⁴ Da' zan da' bosochi bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyala' gonle can' za leyna'? ⁵ Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' za leyna'.

⁶ Da' Abrahanna' gwejnilaže' Diosen', na' da'nan' Diosen' gwne' naque' bene' güen lagüen'. ⁷ Da'nan' cheyala' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'. ⁸ Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'nan' Xtižen' dan' nyojen žan gože' da' Abrahanna' diža' güen qui cate' biña' žin za gaquen': "Dan' chejnilažo' neda' gona' güen len bene' ca' že' yogo' nación'." ⁹ Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gwejnilaže'ne'.

¹⁰ Na' note'tez bene' chon xbab gague' bene' güen len Diosen' lagüe' chone' bi dan' za ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogo'lo' can' za leyna' bate'teze."
¹¹ Na' Xtiža' Diosen' nyojen, žan': "Bene' chesejnilaže' Diosen' zjanaque' bene' güen lagüe', na' da'nan' guata'cze yela' mban čegaque' toli tocaņe." Na' da' žan ca' nezecho bitw že' che note'tezcho naccho bene' güen lagüen' neche choncho bi dan' za leyna' goncho. ¹² Na' leyna' bi žan cheyala' šejnilaže'cho Diosen', san con žan: "Note'teze bene' chon doxen can' za leyna' gac bane' toli tocaņe."

¹³ Perw Criston' bn̄itagüe' xto'la'chon' cont bi gac da' mal juisyw checho dan' bi chzoecho goncho doxen can' za leyna'. Bnežjw cuine' goc da' mal juisyw che' laz chio'. Goc che' can' nyojen, žan: "Da' mal juisyw chac che note'tez bene' chesote' chosode'ene' le'e yag." ¹⁴ Goc ca' cont lence le'e bi nacle bene' Israel šejnilaže'lene' na' soale mbalaz ca' mbalazen' gwzoo da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsén', Diosen' gwsele' Spiritw chen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benačže. ¹⁶ Na' ca nac dan' gož Diosen' Abrahanna' gone' da' güen le'le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. ¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šicho iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'. ¹⁸ Šaca' Diosen' že' con bene' cheson doxen can' za leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwejle'e gon Diosen' can' gože'ne'.

¹⁹ Še naquen ca' žbixchen byažje ley dan' bzoj da' Moisésen'? Diosen' bnežjuen' da' xoxxta'oto' bene' Israel cate' ba gwde tiemp che da' Abrahanna' cont gosache'ede' bi chesone' can' non Diosen' mandadw yesone'. Na' bžie' bia' gonen žin šlac biña' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxxta'oto' bene' Israel ca' can' žanna'. ²⁰ Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

Da' chzejni'i leyna' chio'

²¹ Na' bitw cheyala' gaguecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' za leyna' nach gaccho bene' güen len Diosen' šaca'. ²² Perw Xtiža' Diosen' dan' nyojen žan yogo'lo' benačhen' yesezi'e castigw toli tocaņe neche

xtoła'gaquen', na' con bene' yesejnilaže' Jesucriston' nitlao xtoła'gaque' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

²³ Ca nac neto' bene' Israel, cate' bina' nezeto' cheyała' šejnilaže'to' Criston', nchoglaon cheto' si'to' castigw toli tocanē dan' nombia'to' leyna' na' bitw chonto' can' žanna'. ²⁴ Len neto' leyna' zaca'leben ca to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'. ²⁵ Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

²⁶ Yogo' chio' chejnilaže'cho Cristo Jesúsēn' naccho xi'in Dios. ²⁷ Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'. ²⁸ Na' tozeczē can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neče dan' naccho txen len Cristo Jesúsēn'. ²⁹ Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

4

¹ To bene' gwñ'a še zoa xi'ine', bi'nān' gac lo na'be' da' de che'. Perw na' šlac ne' nache' bidao' bitw nacho mbalazech chac chebe' clel ca che to bene' güen žin la'czla' žin ža gac lo na'be' yogo' dan' de che xaben'. ² Bene' güen žin ca' nite' lo' yo'o chosogüia chesene'ebe' na' chesenabi'ebe' šlac bina' cha'obe' na' šlac žin ža co'o xaben' lo' na'be' dan' de chen'. ³ Can' goc len neto' bene' Israel šlac bina' yid Criston', gwxaca'lebo'to' xi'in bene' gwñ'an'. Na' leyna' gwzaca'leben ca bene' ca' chesenabia' xi'in bene' gwñian' šlac bina' žin ža si'be' dan' de che xaben'. ⁴ Perw cate' bžin ža bžia Diosen' bia' gwsela' Xi'inen' yežlio nga, gwxa'n to no'ole le'. Na' Xi'in Diosen' lecze benen byen bzenague' che leyna'. ⁵ Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

⁶ Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa'". ⁷ Nachen' dan' ba non Diosen' chio' ca xi'ine' bich cheyała' soacho ca to esclavo len dan' non leyna' mandadw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

Pablon' chi' yichje' nac cheson bene' ca' chesejnilaže' Criston'

⁸ Cate' bina' gombia'le Diosen', gwyejnilaže'le da' ca' bi cheyała' šejnilaže'cho, na' legaquen gosnabian' xbab chele. ⁹ Perw na'a ba nombia'le Diosen', o še güenč nacho Diosen' ba nombi'e le'e. Na' chebančgüeda' chele dan' chebiga'le cosxanle na' da' yoble chonxenle costumbr ca' ca no'che da' ye'ej gagwcho, che ža ca', na' che cuerp chechon', na' cho'ele latje chesenabian' xbab chele la'czla' bitw zjazacan' cont yesaclenen chio'. ¹⁰ Ba chonxenle costumbr che no' ža lni, che bio' ca', che tiemp ca' na' che iz ca'. ¹¹ Chžeba' še bich chzenagle che dan' ba bsd blo'eda' le'e, le še bich chzenagle chen, ba gwžiai' dan' bena' len le'e.

¹² Bene' migw, chata'yoeda' le'e gache'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca chache'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. ¹³ Nezezele bega'anlena' le'e da' nechw dan' gocšenda' na' gwdixjue'eda' diža' güen che Criston' len le'e. ¹⁴ Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no' angl che Dios o ca šale cuin Jesucriston'. ¹⁵ Mbalaz gwzoale cate' gwzoo' len le'e cana'. Žbixchen' bich chebele xtižan' na'a? Nežda' da' leca goquēle neda' bzanele bite'teže da' de chele na' goclaže'le lente cuinle zanele gaclenle neda'. ¹⁶ Na' na'a žba chaquele chgue'eda' le'e dan' choe'lēna' le'e diža' lin'?

¹⁷ Bene' ca' chososed chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyēbeje' le'e bich gonle txen len neto', na' cont cue' yichjle legacze'. ¹⁸ Naqueczen güen yesebe' yichj bene' le'e bate'teže, gague cate'zen' zoa' len le'e, con še yesone' güen len le'e. ¹⁹ Xi'indagua', da' yoble chžaglagua' lo' lažda'ogua' neče le'e can' chžagla'o to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. ²⁰ Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

Da' Agar na' da' Saran'

²¹ Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésēn' žbina' yenele can' ža dan' nyojen? ²² Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava. ²³ Na' bin' gwzan no'ole esclavan' goljbe' dan' gwzoalen da' Abrahanna'

le', perw bi' gwzan no'ol checze', goljbe' neche Diosen' gože'ne' san no'ol chen' la'czla' naque' no'ol güiž. ²⁴ Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le Agar zaca'lebde' ca ley dan' ben Diosen' mandadw bzoj da' Moisésen'. Bzojen' par da' xozxta'o neto' bene' Israel lo ya'a Sinaí, na' bene' ca' zjazaca'lebde' ca esclavos. ²⁵ Na' doxen nación Israelen' zaca'leben ca da' Agaren' no'ole esclava che da' Abrahanna'. Diosen' bnežjue' da' xozxta'oto' ca' ley na' lo ya'a Sinaín' gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca esclavos neche chesacde' chonen byen yesa'ogüe' costumbr ca' dan' ža ley na'. ²⁶ Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža ley na'. ²⁷ Quinga ža Xtiža' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe chio', le' bina' gaco' bes che yela' sanna'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' clcl ca nita' che no'olen' ba gwzan xi'in bene' byon' gwzoalene'.

²⁸ Bene' migw, xi'in da' Abrahanna' bin' le Isaac goljbe' neche gož Diosen' Abrahanna' san no'ol chen' la'czla' goque' no'ole güiž. Na' ca'cze chio' chejnilaže'cho Criston', Diosen' none' chio' ca xi'in diaža che da' Abrahanna' bin' goljbe' neche goc dan' gož Diosen' le'. ²⁹ Bi' che da' Agaren', bin' goljbe' neche gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, bene' ca' chesa'o costumbr ca' dan' ža ley na' chosochi chososaque' chio' chejnilaže'cho Criston'. ³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' chen', le bitw gwnežjua'be' dan' gwnia' gwnežjua' bi' gwzan no'ol chio' na'." ³¹ Da'n'an' bene' migw, nezecho zaca'lebcho ca xi'in da' Saran', gague ca xi'in da' no'ole esclavan'.

5

Bi cheyala' yesa'ogüe' costumbr da' bi zjazaca'

¹ Caten' gwejnilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchonna'. Da'n'an' bi cheyala' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale seřw dan' nzi' circuncisión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. ³ Da' yoble žia' le'e, note'teze bene' soe' seřw dan' nzi' circuncisión, lecze cheyala' gone' yogo'lo' bite'teze dan' ža ley dan' bzoj da' Moisésen'. ⁴ Na' še chaquele gonle doxen can' ža ley na' cont gacle bene' güen len Diosen', ba chzoale Criston' to šla'ale še can' chaquele, na' bich chonle xbab catequen' nzi'ilaže' Diosen' chio'. ⁵ Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho bene' güen len le' cate' yežincho gan' zoe'na'. ⁶ Ca nac chio' chejnilaže'cho Cristo Jesusen', bitw bi nonen len Diosen' še ba zoacho seřw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague lježcho cont gacbia' chejnilaže'chone'.

⁷ Cana' gwzoale chonle can' chebe Diosen', perw na'a žnon' ba ben cont bich chzenagle che diža' li che Diosen'? ⁸ Dios ben' gwleje' le'e nacle xi'ine', bitw nacho le'na' chone' cont chzenagle che diža' yoble. ⁹ Le gon xbab can' ža diža' nga: "Late'ze levadura chonen cont chas doxen cuazina'." ¹⁰ Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che bene' chon cont chacžejlaže'le, note'teze naque'.

¹¹ Bene' migw, ca nac neda', šaca' ne' chsed chlo'eda' nia' yogo' bene' byo cheyala' yesezoe' seřw dan' že' circuncisión cont yesenite' binlo len Diosen', bilja chosochi chososaca' bene' Israel gualaž chian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'n'an' bi chesazlaže' xtižan'. ¹² Na' ca nac bene' ca' cheson cont chaquele bilja chebe Diosen' le'e še bi zoale seřon', yebeda' šaca' yesechog cuingaque' yelate'.

¹³ Bene' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ocho dan' ža ley cont soacho binlo len le'. Perw bitw cheyala' goncho bite'teze da' mal dan' ža lažda'ochon' goncho. Dan' cheyala' goncho, cheyala' gaclen lježcho lagüe dan' chaque lježcho tocho yetocho. ¹⁴ Na' ba zoaczcho choncho yogo'lo' can' ža ley na' še choncho can' nyojen žan: "Cheyala' gague lježcho ca chaque cuincho." ¹⁵ Perw še chacyožlen lježcho o chdillen lježcho, chžiayi'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Chnia' le'e to da' zejen, cheyala' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichlažda'ochon'. ¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho

che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'n'an' bitw choncho da' mal dan' ža lažda'ochon' goncho. ¹⁸ Na' še chzenagcho che dan' chsed chzejni' Spiritw che Diosen' chio', bich chonxenchó costumbr ca' dan' ža ley dan' bzoj da' Moisésen'.

¹⁹ Nacbia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga; chesatalene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque'; ²⁰ chesejnilaže' l'gua'a l'saca'; chosozenague' xtiža' bene' ca' chesenelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin cbi yesone' xbab nac gac che lježe'; bitw chesone' txen len lježe'; ²¹ chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaquecho ljež beňachcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež beňachcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'lol bene'; goncho bi da' si' lo na'cho goncho; ²³ gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. ²⁴ Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'. ²⁵ Spiritw che Diosen' ba benen yela' mban toli tocane checho, na' da'n'an' cheyala' soacho goncho can' chaclažen'.

²⁶ Na' bi cheyala' ga'laže'cho gaquecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

6

Cheyala' gaclen lježcho

¹ Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'. ² To tocho cheyala' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.

³ Na' še goncho xbab naccho bene' güen cate' bi naccho, chziye'ze cuinchon' še ca'. ⁴ To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clcl ca bene' yoble. ⁵ Le to tocho choglaó Diosen' checho še bencho güen o še bencho mal.

⁶ Še no chsed chlo'e chio' xtiža' Diosen', cheyala' gwnežwchone' late' bi da' šagüe' da' güen da' de checho.

⁷ Bitw güe'le latje no si'ye' le'e, bitw gac gwcaše'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." ⁸ Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocane; perw ben' chon can' chazlaže' Spiritw che Diosen', Spiriton' gonen cont bane' toli tocane. ⁹ Na' bitw cheyala' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. ¹⁰ Da'n'an' cheyala' goncho güen len yogo'lol bene' bate'teze de latje, na' chonchen byen goncho güen len bene' chesejnilaže' Criston' clcl ca len yezica'chle bene'.

Yeto čope dan' che' Pablon' legaque'

¹¹ Le na'šc letr cha'o quinga, le cuina' chzoja' le'e. ¹² Bene' ca' chesaclaže' yesone' byen soale señw dan' že' circuncisión chesacde' yesyebe bene' Israel gualaž cheto' ca' legaque' še ba bosozoe' le'e señon'. Cheseyiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neče chio' cate' gote' le'e yag cruzen'. ¹³ Bene' ca' chesene' cheyala' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesaclaže' soale señon' cont yesonxen cuingaque' lao bene' Israel gualaž cheton'. ¹⁴ Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neče chio'. Bitwbi nonen len neda' še beňachen' yesyebede' neda', le neda' bich chebeda' da' ca' chesena beňachen'. ¹⁵ Na' len chio' chejnilaže'cho Cristo Jesúsén' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'. ¹⁶ Lao Diosen' naccho dogualje bene' Israel še ba chejnilaže'cho Jesucriston'. Na' chñaba' gaclen Diosen'

yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

¹⁷ Na' na'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' bene' neda' neche chyixjue'eda' xtiža' Xancho Jesúsén'.

¹⁸ Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

CART DAN' BZOJ POSTLW SAN PABLO CHE BENE' CA' ŽE' EFESO

Pablon' bzoje' bene' chesejnilaže' Criston' ciuda Efeso

¹ Neda' Pablo naca' postlw che Jesucriston' con can' gwnalaže' Diosen'. Na' chzoja' le'e zoale Efeso le'e nacle lo' na' Diosen' da' chejnilaže'le Criston'. ² Chnabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo' len xbab chelen'.

Diosen' chaclenchgüe' chio' da' ngode'cho txen len Criston'

³ Cheyala' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba bene' chio' yogo' da' chyažje yichjlažda'ochon' cont šjayzoacho len le' yaban'. ⁴ Na' da' bnežjw cuin Criston' neče chio', da'nan' Diosen' gwleje' chio' cate' biņa' xe yežlion' cont gaccho bene' laždao' xilaže' na' bibi doła' gapcho lagüen'. ⁵ Diosen' chacde' chio' cate' biņa' soacho. Da'nan' bsi'e xņezen' none' chio' ca xi'ine' con can' gwnalaže', na' da'nan' gwsele' Jesucriston' neče chio'. ⁶ Cheyala' soaczcho gonxencho Diosen' catec nži'ilaže'de' chio', le gwsele' Jesucriston' ben' chacde' cont le' goclenchgüe' chio'. ⁷ Caten' got Criston', blalj xchene' neče da' xinjen' ben' chio' chejnilaže'chone'. Da'nan' Diosen' bezi'xene' xtoła'chon', le nži'ilaže'chgüede' chio'. ⁸ Na' chonchgüe' güen len chio', chone' chio' doxen yela' sina' na' yela' chejni' da' chyažjecho. ⁹ Na' bzejni'de' chio' da' gwnalaže' da' nono gwņeze cani' da' bžie' bia' gac. ¹⁰ Le Diosen' bžie' bia' žin ža cate' yogo' bene' že' yaba len bene' že' yežlion' yosozenague' che Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xņezen' none' chio' ca xi'ine' cont gac lo' na'cho da' chaclaže' gone' chio'. Na' Diosen' chone' cont chac dan' chsi'e xņezen' na' chone' da' nežde' naqen güen. ¹² Cani'te neto' bene' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' bene' zaca' juisyw. ¹³ Na' lecze ca' le'e, cate' benele diža' güen che Criston' dan' nac da' li' na' gwņezele chaclaže' gone' yela' mban checho toli tocane, nach gwyejnilaže'lene'. Da'nan' lecze le'e ba nacle txen len Criston', na' Spiriton' che Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'. ¹⁴ Lecze zoan lo' yichjlažda'ochon' cont nezecho žin ža gac lo' na'cho yogo' da' ca' za' gonch Diosen' chio' naccho xi'ine' cate' gone' cuerp cobe chechon'. Na' gonche' chio' da' ca' cont gonxenchone' da' naque' bene' zaca' juisyw.

Pablon' gwnabe' gwnežjw Diosen' bene' chesejnilaže'ne' yela' sina' che'

¹⁵ Da'nan' cate' benda' diža' can' chejnilaže'le Xancho Jesusen' na' can' chaquele yezica'chle bene' chesejnilaže'ne', gwzolagua' ¹⁶ choa' yela' choxclen che Diosen' neče le'e cate' chol' güiža' Diosen', na' bi chezi'laža' chona' ca'. ¹⁷ Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' chol' güiža'. Na' chnabda'ne' cue' yela' sina' chen' lo' yichjlažda'olen' na' gaclene' le'e cont gombia'chlene'. ¹⁸ Na' chnaba' šo' be'ni' che' lo' yichjlažda'olen' cont nezele bi da' güenna' zoacho lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogo' da' ca' za' gone' yesaquen che chio' chejnilaže'chone'. ¹⁹ Na' lecze chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che' ²⁰ cate' bosbane' Criston' ladjo' bene' guaten'. Na' gwde' bosbane'ne' nach znoe'ne' cuite' yaban' gan' chesenabi'e txen. ²¹ Le Criston' chnabia'che' ca note'teze angl. Chnabia'che' ca benach, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'. ²² Diosen' ba gwlo'e lo' na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. ²³ Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neče chio' chejnilaže'chone'. Na' Criston' zoe' chnabi'e doxen.

2

Diosen' chacde' chio'

¹ Na'a Diosen' ba bocobe' yichjla'azda'olen' da' chejnilaže'le Criston'. Cana' gwzoale bentezle da' malen' na' gwɔdaple doła' lao Diosen'. Da'nan' gocle ca bene' guat da' bi bzenagle che'. ² Con gwɔdaczle benle da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen benachen'. Na' ža na'aža Satanásen' ne' chnabian' yichjlaždao' bene' bi chosozenag che Diosen'. ³ Na' ca'cze gwzooa yogo'cho, gwzooatezcho bencho bi da' mal can' gwɔnac checho na' bi da' mal

da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gwchoglaon checho si'cho castigw che xtoła'chon' toli tocane, can' gac len yezica'chle bene' bi chosozenag che Diosen'. ⁴⁻⁵ Goccho ca bene' guat len yichjlažda'ochon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'ochon' cate' gwejnilaže'cho Criston', na' bene' yela' mban checho toli tocane. ⁶ Na' da' bocobe' yichjlažda'ochon', guac nacho bene' len chio' can' bene' len Cristo Jesúsén' cate' bosbane' le' ladjo bene' guat ca'. Na' da' naccho txen len Criston', mbalaz bač zoacho chbezcho len le' na'a can' soacho cate' yežincho yaban' gan' chi'ena'. ⁷ Diosen' goclene' chio' ca' cont tiempén' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsén'. ⁸ Da' nži'ilaže' Diosen' chio', ba bene' yela' mban checho toli tocane cate' gwejnilaže'cho Criston'. Con bene' to goclen, gague neče bi da' güen da' ben chio'. ⁹ Le Diosen' bi chaclaže' güe'cho diža' o gaquecho bnitlagüe' xtoła'chon' neče bi da' güen da' ba bencho. ¹⁰ Diosen' bene' chio' na' cate' gwejnilaže'cho Cristo Jesúsén' bocobe' yichjlažda'ochon' cont soacho goncho da' güen. Cate' biña' soacho, bsi'e xnezen cont soacho goncho da' güen.

Bene' Israel na' bene' bi zjanaque' bene' Israel, Criston' bozoe' legaque' binlo toe' yetoe'

¹¹ Da'nan' le gon xbab can' goc len le'e cana', le'e gollje bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosozoa bene' Israel gualaž che'to' ca' lo cuerp che bi' byo dao' ca'). ¹² Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca gwejnilaže'le Diosen' lo yežlio nga. ¹³ Perw Criston' bnežjw cuine' gosote'ne' na' blalj xchene' neče chio'. Na' na'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czła' cana' gocle bene' zito' len neto' na' len Diosen'. ¹⁴ Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont nacho toze na' ba bozoe' chio' binlo tocho yetocho. ¹⁵ Caten' bnežjw cuine' gote', bzoe' ca'ale ley da' bzoj da' Moisésén' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. ¹⁶ Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' leče nacho toze na' bich chgue'e lježcho.

¹⁷ Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. ¹⁸ Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'. ¹⁹ Da'nan' le'e bi nacle bene' Israel bich nacle ca bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca bene' lo' yo' che'. ²⁰ Chio' chejnilaže'chone' zaca'lebcho ca to yo'o' de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebto' ca lene yo'ona'. Na' Jesucriston' zaca'lebe' ca yej squin che yo'ona'. ²¹ Na' chio' naccho txen len Criston' leče zaca'lebcho ca yej da' zjancua' zjangoden' gan' chac yo'o' de yeja'. Zjangoden' txen na' zej cha' yo'ona'. Ca'ze chio' naccho txen len Xancho Criston' na' len lježcho, na' naccho ca to yo'o' gan' zoa Diosen'. ²² Le'e txen len neto' na' len note'teže bene' chesejnilaže' Criston' naccho ca to yo'o' gan' zoa Diosen', le zoa Spiritw chen' lo' yichjlažda'ochon'.

3

Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel

¹ Na' da' naquen ca', neda' Pablo choł güiža' Diosen' neče le'e. Dia' ližya nga da' chyixjue'eda' xtiža' Cristo Jesúsén' len le'e bi nacle bene' Israel. ² Chacda' ba neželjele nži'ilaže' Diosen' neda' na' bsi'e xnezen' chzejni'ida' le'e xtižen'. ³ Ba bzejni'ide' neda' da' nono gwneze, can' ba bzoja' le'e to chope diža' le'e cart nga. ⁴ Cate' gwlable cart nga gacbe'ele chejni'ida' da' nono gwejni'i cana' che Criston'. ⁵ Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. ⁶ Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neče da' chejnilaže'cho Cristo Jesúsén', na' txen naccho ca toze bene', na' txenpa' chaclen Diosen' chio' can' gwne' gone'.

⁷ La'czła' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'. ⁸ Chacda' ne late'ze bibi zaca' ladjo yogo' bene' ba gwlej Diosen' zjanaque' lo

ne'e. Bia'cze nzi'ilaze'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' guen juisyw gone' len yogo' chio' chejnilaže'cho Criston'. ⁹ Na' Diosen' gwlo'e lo na' chzejni'ida' yogo'lo' bene' da' nzie' bia' gac. Gwzolaoten cate' gwxe yežlion', nono gwneze da' nzie' bia' gac, con toz Diosen' gwnezde', Dios ben' bene' yogo'lo' bene', yogo' beyixe' na' yogo' bichle da' de. ¹⁰ Le Diosen' nzie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesache'ede' nape' yela' sina' len yogo'lo' da' chone'. ¹¹ Chone' can' bzie' bia' gone' caten' bina' xe yežlion', le can'te bsi'e xnezen' sele' Xancho Jesucriston'. ¹² Na' naccho txen len Criston' da' chejnilaže'chone'. Da'nan' bi chžebcho Diosen', san chbecho nezecho chac choe'lenchwne' diža'. ¹³ Nachen' chneyoeda' le'e bi gacžejlaze'le che da' chac chia' nga chyi chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejlaze'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' chol güiža' Xa Xancho Jesucriston'. ¹⁵ Le' bxie' yogo' diaža che chio' zoacho yežlio nga na' che bene' že' yaba. ¹⁶ Diosen' naque' bene' zaca' juisyw na' nape' la'zelagüe' yela' guac xen. Nachen' chnabda'ne' gone' ga soa Spiritw chen' lo' lažda'olen' cont soa chač laže'le len yela' guac chen. ¹⁷ Chnaba' soateze soa Criston' len le'e da' chejnilaže'lene'. Na' chnaba' soacze gaguele Diosen' na' gague lježle do yichj do laže'le, ¹⁸ cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquehgüede' chio', con bi cheyož yedo ca' chacde' chio'. ¹⁹ Le bina' šejni'icho catec chaquehgüede' chio'. Na' lecze chnaba' zej gacchle bene' guen doxen can' nac Diosen'.

²⁰ Na' Diosen' chac chone' yogo'lo', na' chone' da' gualch ca da' chnabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac čhen'. ²¹ Na' chio' chdop chžagcho chonxencho Criston', cheyala' gonxencho Diosen' na'a na' toli tocanē da' gwsele' Cristo Jesúsen' neche chio'. Na' can' gonšcaczcho.

4

Naccho toze len yogo' bene' chesejnilaže' Criston'

¹ Neda' dia' ližya nga da' chyixjue'eda' xtiža' Xancho Jesucriston'. Nachen' chneyoeda' šejšcale gonle guen can' cheyala' goncho da' gwlej Diosen' chio' naccho xi'ine'. ² Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacde' bite'teze yesone'. ³ Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczele gonle toze xbab len bene' lježle, na' gone' ba bozoe' le'e binlo tole yetole. ⁴ Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' guen len chio'. ⁵ Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis. ⁶ Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

⁷ Na' Criston' chaclene' to tocho na' none' checho gwde gwdele da' gon to tocho. ⁸ Da'nan' nyoj Xtiža' Diosen' žan:

Cate' beyepe' yaban' bebeje' bene' zan lo' na' gwxiyen' cont bechi'e legaque'.
Na' bi'e che benačhen' da' gac gon to toe'.

⁹ Na' can' žan: "Beyepe' yaban'", zejen betje' golje' benač yežlio nga na' gwden' gote' bgaše'. ¹⁰ Na' ben' betj golje' benač, lecze len' beyepe' yaban' gan' zoa Diosen', na' na'a zoe' chnabi'e doxen. ¹¹ Na' lecze len' none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' guen čhen' len bene' bina' yesenden', na' yebalcho none' checho chgüia chna'cho bene' chesonxene' le' na' chsed chlo'echo legaque'. ¹² Can' chon Criston' cont chio' naccho lo' ne'en chac choncho xšinen'. Na' chonchon cont to chio' naccho toze len le' zezech gacchcho can' chazlažen'. ¹³ Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyala' gaccho, na' gaccho bene' guen can' nac Criston'. ¹⁴ Na' še gaccho ca', bich šo'cho xbab ca che to bidao', šejcho qui šejcho ca'ale na'ochto to to yela' chejnilaže' da' chesaljaže' bene' guenlaže' na' bene' gwxiye' cont chesonlede' chio'. ¹⁵ Na' cheyala' güe'lencho bene' diža' li, perw gaccho bene' šagüe' len legaque' cont yesache'ede' le chaquechone'. Goncho ca' cont zezech gacchcho bene' šagüe' bene' guen can' nac Criston' ben' chnabi'e chio'. ¹⁶ Cate' to to cuen cuerp chechon' ngoden' na' noxe' lježen len bela' na' len žit na' len bechj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyala'. Na' ca'cze chio' chejnilaže'cho Criston' ngode'cho txen cont

to tocho goncho da' non Diosen' checho goncho, na' yogo'cho txen zej gacchcho bene' šagüe' na' zej gaquech lježcho.

Diosen' ba bocobe' yichjlaždao' chio' chejnilaže' chone'

¹⁷ Da' nga chnia' le'e, Xancho Criston' none' mandaw gwzejni'dan' le'e: bi cheyala' soacho goncho xbab ca cheson bene' bi chesejnilaže' Diosen', le bibi zacan'. ¹⁸ Nchoj yichjlažda'ogaque'. Na' bi zjanape' yela' mban toli tocañe ca da' non Diosen' chio', neca chesejni'ide' che Diosen', le zjanaque' bene' güedenag len le'. ¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. ²⁰ Le'e ba nsedle can' ža Criston' na' nezele bi cheyala' goncho ca', ²¹ le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li čhen'. ²² Nezele bich cheyala' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'. ²³ San na'a cheyala' gwaš'cho xbab da' choncho lo' yichjlažda'ochon'. ²⁴ Cheyala' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

²⁵ Da'n'an' bich gonlaže'cho, san güe'len lježcho diža' li, le ngode' lježcho naccho ca toze bene'.

²⁶ Na' cate' chža'acho bi cheyala' goncho da' xinj. Cheyala' yob yeyacxenlaže'cho na' bich ža'acho do ža. ²⁷ Na' bi güe'cho latje cont Satanás dan' chnabia' da' xigüe' ca' nbian' xbab chechon' cont goncho da' xinj.

²⁸ Na' nole še ba yolaole chbanle, bich cheyala' cuanle. Cheyala' gonle žin da' nac güen len ni'a na'le cont gata' da' gwnežjwle bene' chyažj chčhine.

²⁹ Na' bi cheyala' güe'cho bite'teze diža' zban, san güe'cho diža' šagüe' len yogo'loj bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'. ³⁰ Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyxi'e chio'.

³¹ Cheyala' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a. ³² San cheyala' gaccho bene' šagüe' na' yeyaše' lježcho tocho yetocho. Na' cheyala' yezi'xen che lježcho bite'tez da' chesonde' chio' con can' bezi'xen Diosen' checho cate' gwzejnilaže'cho Criston'.

5

Cheyala' goncho can' chon Diosen'

¹ Nachen' cheyala' soacho goncho can' chon Diosen', le naccho xi'ine' na' chacde' chio'. ² Cheyala' soacho gaque lježcho ca Criston' chacde' chio' na' bnežjw cuine' gote' neče chio'. Na' chebe Diosen' da' bene' ca', can' chebe bene' to da' chl'a žix.

³ Da' naccho lo' na' Diosen' cheyala' gue'echo da' malen'. Gwbatech cheyala' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyala' selaže'cho da' de che bene'. ⁴ Bi cheyala' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyala' soacho güe'cho yela' chožclen che Diosen'. ⁵ Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezezele bene' ca' cheson da' malen' zjanac ca' bi yesyezine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l' gua'a l'sacan'.) ⁶ Bi güe'le latje no siye' le'e len diža' güenlaže'. Diosen' chnežjue' castigw toli tocañe che bene' ca' bi chosozenag che', bene' cheson da' mal ca' ba gwnia'. ⁷ Da'n'an' bi cheyala' gaccho txen len bene' cheson ca'.

⁸ Cana' nchoj yichjlažda'ochon', perw na'a ba yo'on be'ni' che Xancho Criston', na' cheyala' soacho goncho da' güen can' chaclaže' Diosen' gon chio' nombia'chone'. ⁹ Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha. ¹⁰ Cheyala' gwsedcho cont nezecho can' chaclaže' Xancho Criston' goncho. ¹¹ Bi cheyala' goncho txen len da' malen' cheson bene' ca' zjanchoj yichjlažda'ogaque', le chesone' da' bibi zaca'. San cheyala' gwzejni'icho legaque' da' malen' chesone', ¹² le naquen da' cheto'echo güe'cho diža' che da' ca' chesone' do bagaše'ze. ¹³ Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' čhen' chzejni'in benachen' che xbab chegaque' na' bi da' chesone' še naquen güen o še naquen mal. ¹⁴ Da'n'an' nyojen quinga che note'teze bene' chon da' malen':

Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

15 Nachen' cheyala' soacho na'cho dan' choncho. Cheyala' goncho da' naquen da' sina', gague goncho ca bene' bi chejni'i. 16 Na' yogo' za cheyala' goncho can' chazlaže' Diosen', le na'a ze'chgua bene' chesone' da' malen'. 17 Bi goncho ca bene' bibi xbab nye'. Cheyala' šejni'icho can' chaclaže' Diosen' goncho cont gonchon. 18 Na' bi cheyala' gaccho bene' borrašw, le bene' chesezožde' chosožiayi' cuine'. San chio' cheyala' güe'cho latje soachgua Spiritw che Diosen' lo' lažda'ochon' n'abian' chio' len da' choncho. 19 Cheyala' gwšajlen lježcho no salmos na' gollen lježcho no himnos o bichle da' za Spiritw che Diosen' golcho. Na' cheyala' nechon na' golchon do yichj do laže'cho gonxencho Xancho Jesucriston'. 20 Yogo' ni'a cheyala' güe'cho yela' choxclen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxclen che'.

Can' cheyala' soalen bene' lo' yo'o chechon'

21 Da' chapcho Diosen' bala'an cheyala' gwzejxw yichjcho gwzenagcho tocho yetocho. 22 Na' le'e no'ole, le'e nšagna'le, to tole cheyala' gwzenagle che bene' chele, le chzenagle che Xancho Criston' cate' chzenagle chegaque'. 23 Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenhone'. Le chion' guac nacho naccho cuerp che Criston', na' le' none' chio' yela' mban toli tocaņe. 24 Na' ca chio' chonxencho Criston' cheyala' gwzenagcho che', ca'czen' le'e no'ole le'e nšagna'le, to tole cheyala' gwzenagle che bene' chele yogo' bin' chese'e le'e. 25 Na' le'e bene' byo le'e nšagna'le, to tole cheyala' gague no'ol chelen' con can' chaque Criston' chio' chonxenhwne' na' bnežiw cuine' neche chio' cate' gosote'ne'. 26 Na' cont gwlo'e chio' lo na' Diosen', beyone' lažda'ochon' xilaže' cate' gwyejle'cho xtižen'. 27 Na' bene' ca' cont yebede' chio' cate' yežincho lagüen', bibi xtol'a'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. 28 Na' con can' nži'ilaže' Criston' chio', can' cheyala' ži'ilaže' to to bene' byo no'ol chen'. Le'e bene' byo, to tole cheyala' ži'ile no'ol chelen' can' nži'ile cuerp chelen', le nži'icze cuinle cate' chonle ca'. 29 Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenhone', nži'ide' chio' na' chapši'e chio'. 30 Na' chone' ca' da' naccho ca to cuen güeje cuerp chen', ca žit da' yo'e na' ca xpele'. 31 Na' Xtiža' Diosen' nyojen žan: "Da'n'an' bene' byo le'e len xaxne'e na' si'e no'olen' gwšagna'lene' le' na' yesaque' toze." 32 Diža' quinga ba bzolja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyala' soacho len le'. 33 Na' lecze ca' le'e bene' byo le'e nšagna'le, to tole cheyala' gague no'ol chele can' chaque cuinle, na' le'e no'ole nšagna'le, to tole cheyala' gagle bala'an bene' chele.

6

1 Na' le'e bidao', le gwzenag che xaxna'le, le can' cheyala' gon chio' naccho txen len Xancho Criston'. 2 Cate' Diosen' bnežjue' xoxxta'oto' ca' ley chen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' chen, gwne': "Le gap bala'an xaxna'le" 3 cont gac güen chele na' cont banle šša lo yezlio nga."

4 Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeseloche'.

5 Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle chegaque'.

6 Le gwzenag chegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho. 7 Na' cheyala' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze. 8 Goncho ca', le nezecho bite'teže da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

9 Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'loj bene' note'teže zjanaque'.

Can' goncho cont Satanásen' bi gonen chio' gan

10 Nachen' bene' migw, da' naccho txen len Xancho Criston', cheyala' soachachcho šejnilaže'chone', le nape' yela' guac xen cont chaclene' chio'. 11 Cheyala' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyiljwlažen' siyen' chio'. 12 Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yezlio nga bene' nchol yichjlažda'ogaque' len da' malen'. Chdillencho yogo'loj spiritw mal ca' gate'teže chesašen. 13 Da'n'an' cheyala' gon cuincho gual doxen can' chaclaže' Diosen', cont Satanásen' bi soeczen chio' za cate' tilenen chio'. Na' cate' ba bencho

can' chazlaže' Diosen', nach cheyala' soačhačho len le'. ¹⁴ Na' cont soačhačho bi siye' Satanásen' chio', cheyala' güe'cho diža' li yogo' ni'a. Na' še goncho ca', gaclenen chio' ca da' chčej soldadon' cho'a li'e. Na' cheyala' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya hcue'ejen cho'alcho'e. ¹⁵ Na' cheyala' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'. ¹⁶ Na' da' zejechen ca bichle da' goncho, cheyala' soačhačho šejnilaže'cho Diosen'. Na' še soačhačho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' hcue'ejen le' len da' ca' zja'ac yeseyidjon cuerp chen'. ¹⁷ Na' cheyala' yosa'laže'cho Criston' ba bene' yela' mban checho toli tocane, cont gaclenen chio' ca chaclen lapa' de ya da' chčhin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca to spada da' chčhin soldadon'. ¹⁸ Na' do tiemp cheyala' yol güižcho Diosen' nabcho yogo' da' chzejni'i Spiritw chen' chio'. Na' cheyala' gaccho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e. ¹⁹ Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'. ²⁰ Le Diosen' gwsele' neda' ca gualaze' cont bia' xtižen', na' da'n'an' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyala' guan'.

Pablon' chone' chač laže'gaque'

²¹ Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyala' gone'. ²² Nachen' chsela'ne' cont nezele can' chac cheto' na' cont gone' chač laže'le.

²³ Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gaque lježle na' soačachle šejnilaže'lene'. ²⁴ Soašcacze Diosen' gaclene' yogo' bene' chesacde Xancho Jesucriston' sin cbi yesebeze'. Da' na'zen' chzoja'.

CART DAN' BZOJ POSTLW SAN PABLO CHE BEÑE' CA' ŽE' FILIPOS

Pablo bzoje' carten' ślac die' ližya

¹ Neda' Pablo chsela' cart nga txen len beñe' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsen'. Na' le'e nchojle chgüia chna'le beñe' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nia' le'e len cart nga. ² Chnabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'lo' yichjlažda'olen'.

Pablo chnabde' Diosen' gaclene' beñe' ca' chesejnilaže' Criston' Filipos

³ Yogo' ni'a cate' chjayze'eda' le'e, choa' yela' choxclen che Diosen' ba naccho txen chejnilaže'chone'. ⁴ Na' yogo' ni'a cate' choj güiža' Diosen', chbeda' chnaba' gaclene' le'e. ⁵ Na' choa' yela' choxclen chen' naccho txen chejle'cho diža' güen che Jesucriston', gwzolaoten cate' za' gweyjnilaže'ln'e'. ⁶ Na' da' nga nežda', Diosen' gwzolağüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. ⁷ Da' cheyałacze gona' xbab chele ca', le chacchğüeda' le'e. Na' nežda' Diosen' ba goclene' le'e can' ba goclene' neda' ślac dia' ližya nga, na' ślac ba gwđixjue'eda' diža' güen che Criston' len beñe' bi gosejle'e chen, bzejni'ida' legaque' naquen diža' li. ⁸ Diosen' nežde' chacchğüeda' yogo'le, le Cristo Jesúsen' chone' cont chacda' le'e. ⁹ Na' chnabda' Diosen' gonšque' cont gaquechln'e' na' gagueche lježle na' lecze šejni'ichle yogo'lo' da' chaclaže' Diosen' šejni'ile na' gacbe'ele bi da' naquech güen gonle cont gaclen lježle. ¹⁰ Chnaba' da' ca' cont gacbe'ele bin' chazlaže' Diosen' gonle, na' lecze cont soacze do laže'le na' bibi doła' gapple cate' žin ža yid Criston' da' yoble. ¹¹ Nach gaclen Jesucriston' le'e gonchguale da' nac güen, na' Diosen' si'e yela' bala'añ na' yezica'chle beñe' yesonxene' Diosen' can' chonlen'.

Pablon' chacde' Criston' do yichj do laže'

¹² Beñe' migw, che'nda' nezele yogo' dan' ba goc chia' ba gosaclenen cont beñe' zanch gosende' diža' güen che Criston'. ¹³ Le yogo'lo' soldadw gop ca' cheson žin che beñe' gwnabia' nga, na' yezica'chle beñe' že' do nga zjaņezde' dia' ližya neche choa' xtiža' Criston'. ¹⁴ Na' beñe' zan beñe' lježcho že' nga lecze ba chesejnilaže'chgüe' Xancho Criston' da' ba besele'ede' can' chaclene' neda' ślac dia' ližya nga. Da'n'an' legaque' lecze ba chesyeyaxjchde' cheso'e xtiža' Diosen' sin ca chesežebe'.

¹⁵ Da' li bale' chesyeyixjue'ede' xtiža' Criston' da' chesacxi'ede' neda' na' da' chesacłaze' yesacche' blaoch ca neda', perw yezica'chle beñe' ca' chesyeyixjue'eden' do laže'. ¹⁶ Na' beñe' ca' to cuen chesyeyixjue'ede' xtiža' Criston' cont yesacxen cuine', gague chesyeyixjue'eden' do laže'gague'. Chesone' xbab zoayaša' da' chesyeyixjue'eden'. ¹⁷ Na' beñe' ca' yezica'chle chesyeyixjue'eden' lagüe chesacde' Criston' na' chesacde' neda', le zjaņezde' neda' dia' ližya nga neche chzejni'ida' beñe' bi chesejle'e diža' güen che Criston', chape'gaca'ne' naquen da' li. ¹⁸ Perw bibi nonen len neda' še chesyeyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dechcze da' chebeda', ¹⁹ le nežda' yechoja' güen len da' quinga chac chia' lagüe dan' chnabe gaclen Diosen' neda' na' lagüe dan' zoa Spiritw che Jesucriston' len neda' chonen chach laža'. ²⁰ Da'n'an' zoa' lez gaclen Diosen' neda' gua' xtiža' Criston' sin cbi žeba'. Na' la'cłza' še soacha' o la'cłza' še gata', chaclaža' si' Criston' yela' bala'añ na' len da' gona' na' len da' gac chia' con can' ba gwxi'e yela' bala'añ. ²¹ Chzelaža' gacxen Criston' len bite'tez da' chona' ślac ne' mbana', na' lecze nežda' soa' mbalazchgua cate' ba gota', le šjayzoalena'ne'. ²² Perw še soacha' yežlio nga na' goncha' xšin Xancho Criston' cont šanch beñe' yesejnilaže'ne', o še gata', bi nežda' non' nac güenchen. ²³ Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. ²⁴ Perw lecze chona' xbab le'e chyažjele soacha' banča'. ²⁵ Na' da' chache'eda' chyažjele soacha', nežda' soacha' len le'e cont gaclena' soachle mbalaz da' chejnilaže'le Criston' na' soachachle šejnilaže'ln'e'. ²⁶ Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsen' cont bechoja' ližyan'.

²⁷ Na' bite'teze gac, le soa le gon da' güen can' cheyałac gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachachle len toze xbab, chonle txen len beñe' lježle, na' chonle con ca zelao

chzaque'le cont yezica'chle bene' yosozenague' xtiža' Criston' da' ba chejnilaže'le, ²⁸ neca žeble še bi yesone bene' le'e neče chesegue'ede' le'e. Še bi žeble da' yesonde' le'e, gone' cont yesache'ede' ba zoa yesebiaye'e toli tocane; lecze gone' cont yesache'ede' Diosen' gone' cont šjayzoale len le'. Yogo' da' ca' zjanaquen da' gon Diosen'. ²⁹ Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosochi yososaca' bene' le'e neče chejnilaže'lene'. ³⁰ Le'e len neda', toz can' chosochi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

2

Criston' chacxene' da' bzande' yela' zaca' che' cont bide' golje' benach

¹ Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'. ² Da'n'an' chneyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. ³ Bibi cheyala' goncho cont gac güen che cuinzcho na' bibi goncho cont gacxen cuincho, san cheyala' gwzejwlaže'cho na' goncho xbab zaca'ch bene' lježcho clel ca chio'. ⁴ Ne tocho bi cheyala' cue' yichjcho che cuinzcho, san cheyala' cue' yichjcho che dan' gaclenen bene' lježcho ca'.

⁵ Cheyala' goncho xbab ca xbab da' ben Cristo Jesüsen'. ⁶ Le la'czla' naque' Dios, bzande' yela' chnabia' che' na' yela' bala'an xen che' dan' nape' lagüe da' naque' toz len Xe' Diosen' cont bide' golje' benach. ⁷ Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benach. ⁸ Na' ba naque' benachen' bzejwlaže' cont bene' con can' gwna Xe' Diosen'. Bzenague' che' cont bnejw cuine' gosote' ne' le'e yag cruz ca chesote' bene' malchgua. ⁹ Da'n'an' Diosen' benxenghüe' le' na' bsi'e xnezen' cont Jesucriston' naque' Xan benach, angl, da' xigüe' na' yogo' bichle da' de, na' cont Jesucriston' chnabia'che' ca note'tezechle. ¹⁰ Na' žin ža cate' yogo'lol benach na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. ¹¹ Yogo'lol bene' yo'o biš grasyw yosozjwyichje' yesene' le' Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

Bene' chesejnilaže' Criston' zjazacalebde' ca be'ni'

¹² Da'n'an' bene' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nacbia' Diosen' ba bene' le'e yela' mban toli tocane, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soecho da' malen' še ba chzenagcho chen. ¹³ Na' Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin cbi gacyožlenlne', neca žeše'le che'. ¹⁵ Le gon ca' cont yesache'e bene' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca' cheson bene' laždao' mal ben' chesonchgua clele. Nach gacle ca to da' chseni' len yezica'chle bene' že' yežlio nga, ¹⁶ güe'lenle legaque' xtiža' Criston' da' nsa' yela' mban toli tocane. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'. ¹⁷ Le'e chzane cuinle chonle xšin Diosen' lagüe dan' chejnilaže'lene', na' da'n'an' zaca'leble ca to beyixe' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'n'an' zaca'leba' ca to vino da' chosolalje bene' lao Diosen' cate' chesonxene'ne'. ¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesüsen' latje yob sela' Timoteo gan' zoalen', le yebechgüeda' yenda' can' ba chonlen'. ²⁰ Le nono nochle zoa bene' sela' bene' chi'chgua yichje' gac güen chele can' chi' yichj Timoteon'. ²¹ Yezica'chle bene' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac. ²² Perw nezeczele ca zoacze Timoteon' chone' da' zaca', na' nezele can' ba goclene' neda' cont gwđixjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'. ²³ Da'n'an' zoa' lez guac sela'ne' gan' zoalen' cate' la' nezteda' nac gac chia' nga, ²⁴ na' sela'ne' la'czla' chejli'a gon Xancho Criston' cont lecze neda' yob yedena'a le'e.

²⁵ Na' lecze chacda' chonen byen yesela' bene' lježcho Epafrodito gan' zoalen', ben' gwseja'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwđi gwxcaca'to' txen. ²⁶ Che'nchgüede' yele'ede' le'e, na' leca da' chacde' gwnezele gocšende'. ²⁷ Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da'

ba goc *chia*' na' nyaše' *chgua* goc *chia*' šaca' gote'. ²⁸ Da' nan' zelaže' *cha*' yesela' ne' gan' zoalen' cont soale mbalaz yežagle da' yoble na' cont bich soayaše' le *che*'. ²⁹ Le gwlebe' *bin*' lo *chgua* da' naque' *txen* len *chio*' chejnilaže' *cho* Xancho Criston', na' le gon *xbab* ba bene' to da' zaca', na' le *ceze* ca' le gon *xbab* *che* nochle bene' *chon* can' ba benen'. ³⁰ Le *yelate*' *ze* ca' gote' da' *bzane* *cuine*' *goclene*' *neda*' *nga* len *xšin* Criston', can' *goncze* le'e šaca' *zoale* *nga* len *neda*'.

3

Soa cuezcho goncho can' chazlaže' Diosen'

¹ Na' na'a bene' *migw*, *cheyala*' soacho mbalaz da' chejnilaže' *cho* Xancho Criston'. Bi *chacda*' *zed* *chozoja*' *che* da' ca' ba *bzoja*', le *chyažjen* *gonchle* *xbab* *čen*. ² Le *gwsaca*' cont bi *gwzenagle* *che* bene' ca' *chesene*' *cheyala*' soale señw dan' že' *circuncisión* da' *yesechogue*' lo *cuerp* *chelen*', le *zjanaque*' bene' *zban* na' *chesyelalde*' *chesone*' da' mal'. ³ Le de to señw *checho* cont *nezecho* *naccho* *xi'in* Dios. Señwna' *naquen* da' ba *ben* Diosen' *chio*' *Spiritw* *čen*' cont *chaclenen* *chio*' *chonxenchone*'. *Chebechgüecho* chejnilaže' *cho* Cristo Jesúsén', na' bi *zoacho* *lez* *gata*' *bichle* da' *gaclenen* *chio*' lao Diosen', ca no señw da' *zoa* lo *cuerp* *chechon*' o *bichle* da' *goncho*. ⁴ De da' *zan* da' *guac* *gona*' *xbab* *gaclenen* *neda*' lao Diosen' šaca' *chacda*' *yebe* Diosen' *neda*' *neche* da' ba *bena*' o *nac* *naca*'. *Nono* *zoa* no *nacho* ba *benche*' da' *zan* da' *yebe* Diosen' *ca*' *neda*'. ⁵ Le *naca*' bene' Israel na' *golja*' lo *diaža* *che* da' Benjamín, na' *bosozoe*' *neda*' señw *che* *circuncisión* to *xmanzda*'. Na' *goljlena*' *diža*' *hebreo* da' *nac* *xaxna*' a bene' *chesaque*' *diža*' *hebreo*. Na' *bsedyana*' *ley* dan' *bzoy* da' *Moisésén*' con can' *chosozejni*' i bene' *fariseo* ca' len'. ⁶ Na' *leca* *gwche*' *yichja*' *diža*' *gole* *che* bene' Israel *gualaž* *chia*'. Da' nan' *bchi* *bsaca*' bene' ca' *chesejnilaže*' Criston'. Na' con ga *zelao* *gwzoeda*' *bzenaga*' *che* *yogo*' dan' *ža* *ley* *cheton*' *cheyala*' *gonto*' o bi *cheyala*' *gonto*'. ⁷ Na' *cana*' *bena*' *xbab* *yogo*' da' ca' *yesaclenen* *neda*' cont *yebe* Diosen' *neda*', *perw* na'a ba *chacbe'eda*' bi *yesaclenen*. Ba *bchojyichja*' da' ca' *cate*' *gwyejnilaža*' Criston', le *goche'eda*' bi *yesaclenen* *neda*' lao Diosen'. ⁸ Na' na'a da' *nombi*' a Xana' Cristo Jesúsén' *naquen* da' *zaca*' *chgua* len *neda*'. *Bibi* *zaca*' *yogo*' da' ca' *gocda*' *cana*' *yesaclenen* *neda*' lao Diosen'. *Yogo*' da' ca' *bebeda*' *cana*' ba *zjanaquen* ca to da' *bibi* *zaca*' len *neda*', na' *nonan*' ca to *beb* da' ba *gwcho'ona*' cont *gombia'cha*' Criston'. ⁹ Le *zelaže*' *chgua*' *gaca*' *toz* len Criston', na' *zelaža*' na Diosen' *naca*' bene' *güen* len le'. Na' *nezda*' ne' *naca*' bene' *güen* len le' da' *chejnilaža*' Criston', *gague* *lagüe* da' *chona*' bi da' *ža* *ley* dan' *bzoy* *Moisésén*' *cheyala*' *goncho*. Le con bene' *chesejnilaže*' Criston' *none*' *legaque*' ca bene' *güen*. ¹⁰ *Chaclaža*' *gombia'cha*' Criston' na' *gombi*' a *yela*' *guac* *che* da' *nape*' *lagüe* *bebane*' *ladjo* *bene*' *guaten*', na' *chzanlaže*' *cuina*' *saca*' *zi*' a can' *gwdi* *gxwaca*' le'. Na' ca Criston' *gote*' *neche* *xtolan*', *chaclaža*' *gaca*' ca to bene' *guat* len da' *malen*', *bich* *gonan*'. ¹¹ *Zoa*' *chbeza*' ca', le *cheyiljwlaža*' *nacle* *gona*' cont *yechis* *yosban* Diosen' *neda*' *ladjo* *bene*' *guat* ca' *cate*' ba *gota*'.

Pablo chaclaže' gac yichjlažda' ogüe' can' nac yichjlaždao' Criston'

¹² Bi *nia*' *bačh* *nac* *yichjlažda*' *ogua*' can' *cheyala*' *gaquen*, le *bi* *na*' *gaquen* can' *nac* *yichjlaždao*' Cristo Jesúsén'. *Perw* *chona*' con ga *zelao* *saqueda*' cont *gaquech* *yichjlažda*' *ogua*' can' *nac* *che* le', le ba *gwleje*' *neda*' *naca*' *xi'ine*'. ¹³ Bene' *migw*, *nezda*' *bi* *na*' *gac* *yichjlažda*' *ogua*' can' *cheyala*' *gaquen*, *perw* ba *bchojyichja*' *yogo*' da' ca' *gosac* da' *zaca*' len *neda*' *cana*' na' *yogo*' *bin*' ba *bena*', na' *chi*' *yichja*' da' *mbalaz* da' *chbeza*' *gac*. ¹⁴ *Chona*' con ga *zelao* *saqueda*' cont Diosen' *yebede*' *neda*' *cate*' *yežina*' *gan*' *zoen*'. Le Diosen' *gwleje*' *neda*' cont *gac* *yichjlažda*' *ogua*' can' *nac* *yichjlaždao*' Cristo Jesúsén' *lagüe* da' *chejnilaža*' ne'.

¹⁵ Na' *yogo*' *cho* še ba *zej* *chaccho* can' *chaclaže*' Diosen' *gaccho*, *cheyala*' *goncho* *xbaben*' ca', na' še *yo'ocho* *bichle* *xbab* *yoble*, Diosen' *gwzejni*' *iden*' *chio*'. ¹⁶ *Perw* na' *cheyala*' *soaczcho* *goncho* can' ba *bzejni*' i Diosen' *chio*'.

¹⁷ Bene' *migw*, le *gon* can' *chona*' *neda*', na' le *na*' can' *cheson* *yezica*' *chle* bene' *cheson* can' ba *bzejni*' *ida*' le'e, cont *gonle* can' *chesonen*'. ¹⁸ Da' *yoble* *žia*' can' ba *gwnia*' *zan* *las*, can' *zjanita*' bene' *zan*, *nacbia*' *chesegue'ede*' Criston' *ben*' *bnežjw* *cuine*' *gote*' le'e *yag* *cruzen*' *neche* *xtola*' *chon*'. Na' *chbeža*' da' *chesone*' ca'. ¹⁹ *Žin* *ža* *yesebiayi*' bene' ca' *tolj* *tocane*, le *chesyebchde*' *chese*' *ej* *chesagüe*' *clcl* ca *yesonxene*' Diosen'. *Chesaclaže*' *cheso*' e *diža*' *che* bi da' *yela*' *zto*' da' *chesone*', na' *zjachi*' *yichje*' *tlaoze* da' *chac* *yežlio* *nga*. ²⁰ *Perw* *chio*', *bich* *choncho* *xbab* *nac* *lažcho* *yežlion*', le *nezecho* *naquen* *gan*' *zoa* Xancho Jesúsriston' *ben*' *non* *chio*' *yela*' *mban* *tolj* *tocane*, na' *chbezcho* *batcan*' *yide*' da' *yoble*. ²¹ Na' *caten*' *yide*' da' *yoble*, *gone*' cont *cuerp* *checho* *quina* da' *bitec* bi *zaca*' *yesyeyaquen* da' *cobe*, na' *yesaquen* *leca* *güen* can' ba *nac* *cuerp* *che* le'. *Gone*' ca', le *nape*' *yela*' *guac* *neche* *gone*' cont *yogo*' *lol*' da' *zjade* *yosozenaguen* *che*'.

4

Cheyała' soacho mbalaz da' chejnilaže' cho Criston'

¹ Na' na' a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže' le Criston', na' zoa' mbalaz neche le'e. Le'e bene' chacda', le soachach sejnilaže' le Xancho Jesucriston'.

² Na' chñeyoeda' le' Evodia, na' lecce ca' le' Sintique, le soašca binlo na' le gac txen tole yetole da' chejnilaže' le Xancho'. ³ Na' ca nac le' bene' lježa', len' beno' xšin Diosen' do yichj do lažo' txen len neda' cana', na' chñeyoeda' gacleno' no' ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica' chle bene' lježcho ca', na' zjanyoj la yogo' bene' ca' le'e libr che Diosen' gan' zjanyoj la bene' ba zjanape' yela' mban toli tocaņe.

⁴ Le yebe yogo' te ža da' chejnilaže' le Xancho Jesucriston'. Da' yoble žia', le yebe. ⁵ Le gon cont yogo' lol bene' yesenezde' nacle bene' šagüe', le ba zoa yid Xancho' da' yoble.

⁶ Bi gacle tole bite'teže da' chac chele, san le yol güiz Diosen', nable gaclene' le'e bite'teže da' chac, na' le güe'e yela' choxcen cate' bi da' nabelene'. ⁷ Nachen' Diosen' gone' soa cuezle binlo len xbab da' yo' o lo' yichjlažda' olen' lagüe da' chejnilaže' le Cristo Jesúsén', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe' echo bixchen' zoachguacho binlo.

Cheyała' cue' yichjcho che da' zjanac güen

⁸ Na' da' la'zelagüe da' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teže da' naquen da' güenchgua na' bite'teže da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsd blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo' o lo' yichjlažda' ochon' soacze' gaclene' le'e.

Can' gosaclen bene' Filipos ca' Pablon'

¹⁰ Chbechgüeda' lao Xancho Cristo Jesúsén' da' ba chi' yichjle chaclenle neda' da' yoble. Nežda' gwzoale chonle xbab chia', perw bi bene gaclenle neda'. ¹¹ Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. ¹² Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teže chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. ¹³ Chac chona' bite'teže da' cheyała' gona', le zoa Criston' len neda' chaclene'nda'. ¹⁴ Perw benle güen gwseła'le da' goclolen neda' cont naccho txen len dan' chyi chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, benle txen len neda' cate' beza' distritw Macedonian', gwseła'le da' byažjda', na' nono nochle bene' ca' chesodop chesežag chesonxene' Criston' yež yoble goson ca'. ¹⁶ Le cate' ne' zoa' Tesalónica gwseła'le da' byažjda' zan ni'a. ¹⁷ Perw gague chzelaža' bi da' gonle neda', san chzelaža' soacze gonle güen cont yebe Diosen' le'e. ¹⁸ Ba benle doxen da' cheyała' gonle na' da' zcha'och ca'te' da' cheyała' gonle. Ba decze da' zcha'o chia' na'a. Bibi chyažjda', le ba ben Epafrodito da' gwseła'le chia'. Na' da' gwseła'le zaca'leben ca to yal da' chla' zix da' chzey bxozen' lao Diosen', le Diosen' chebede' can' benlen'. ¹⁹ Na' Dios chia' nan' goncze' yogo'te bi da' chyažjele lagüe chejnilaže' le Cristo Jesúsén', le yogo' da' de yo'on lo ne'e. ²⁰ Cheyała' gonxcho Xancho Diosen' toli tocaņe. Can' gonšcaczcho.

Pablon' zelagüe' bzede' legaque' diža'

²¹ Le gwguap tiox yogo' lol bene' Filipos ca' yo' o lo na' Diosen' da' chesejnilaže' Jesucriston'. Bene' lježcho ca' nita' nga len neda' chguapto' le'e tiiox. ²² Na' lecce yogo' bene' Roma quinga ba yo' o lo na' Diosen' chosoguape' le'e tiiox, lente bene' ca' cheson žin che rey ben' nac la'zelagüe' bene' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo' o lo' yichjlažda' olen'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' COLOSAS

Pablon' chzoje' bene' chesonxen Jesucriston' ciuda Colosas

¹ Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiox. ² Chzoja' le'e zoale Colosas, le'e chejnlaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' bene' ca' že' Colosasen'

³ Yogo' ni'a cate' chol güižto' Dios ben' nac Xa Xancho Jesucriston' choe'to' yela' choxclen che' can' chonlen'. ⁴ Le ba beneto' diža' can' chejnlaže'le Cristo Jesús'en' na' can' chaquele yogo' bene' ca' yezica'chle zjanaque' lo na' Diosen'. ⁵ Na' nezeto' chejnlaže'lene' na' chaquele legaque' lagüe da' zoale lez šjayzoale len Diosen'. Caten' gwzolaob bzenagle che xtiža' Diosen' da' naquen da' güen na' da' li, gwyejni'ile gac chele ca'. ⁶ Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaque' lecze chesone' güen ca gwzolaob le'e chonle caten' gwyejni'ile diža' li da' chzejni'in nzi'ilaže' Diosen' le'e, na' ne' chonle güen za na'aža. ⁷ Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e. ⁸ Len' ba gože' neto' ba ben Spiritw che Diosen' cont chaquele Diosen' na' chaquete lježle.

⁹ Da'n'an' caten' gwnezeto' ca güenna' chonle, gwzolaoto' yogo' ni'a cate' chol güižto' Diosen' chnabeto'ne' gaclene' le'e. Chnabto' gon Spiritw chen' le'e yogo' cuen yela' sina' na' yela' chejni'i cont nezele nacyanen' chaclaže' gonle. ¹⁰ Chnabto' soale gonle can' cheyala' gon chio' nombia'cho Xancho'n, cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'line'. ¹¹ Chnabto' gaclen Diosen' le'e len yela' guac xen che' cont soatezle šejnilaže'lene' na' gaple yela' chxenlaže' bite'tezen' chac. ¹² Na' chnabto' soale mbalaz güe'le yela' choxclen che Xacho Diosen', le le'na' ba gwleje' chio' ba nachco lo ne'e cont šjayzoacho len le' gan' yo'o be'ni' juisyw. ¹³ Bebeje' chio' lo na' gwxyien' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chadde', cont na'a gwzenagcho che le'. ¹⁴ Na' Xi'in Diosen' bnežjw cuine' gote' cont beque'e xtol'a'chon' na' chezi'xen Diosen' checho.

Criston' bozoe' chio' binlo len Diosen'

¹⁵ Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol da' de le'e yaban' na' lo yežlion'. ¹⁶ Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gaxcene'. ¹⁷ Criston' ba zoacze' cate' bina' nita' yogo'lol da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'. ¹⁸ Na' Criston' chnabi'e chio' chdop chžagcho chonxenchone'. Len' bxie' yela' mban toli' tocane che bene' chesejnlaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'n'an' naque' la'zelaogüe bene' blao na' chnabi'e yogo'lol bene' na' bica'chle da' zjade. ¹⁹ Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'. ²⁰ Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgue'elne' na' gwzoale benle' da' malen'. Perw na'a ba bozoa Criston' le'e binlo len Diosen', ²² le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. ²³ Na' še soacho šejnilaže'cho Criston' na' soačhačcho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benachen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsd blo'ede' bene' chesonxen Criston'

²⁴ Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen' le'e. Na' cate' chžaglagua' neda', guac načao

cuin Criston' chžaglagüe'. ²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. ²⁶ Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' naccho lo ne'e. ²⁷ Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'n'an' zoacho lez šjayzoacho len Diosen' gan' yo'ochgua be'ni'. ²⁸ Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. ²⁹ Da'n'an' chona' con ga zelao chzoeda' chyixjue'eda' bene' xtižen', na' chaclenchgüe' neda' len yela' guac xen chen'.

2

¹ Chaclaža' nezele chonchgua' ga zelao chzoeda' cont chaclena' le'e na' bene' lježcho že' Laodicea na' yezica'chle bene' lježcho biña' yesele'ede'nda'. ² Chaclaža' gona' chačh laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyala' gonle xbab cont šejni'ile da' ba bzejni'i Diosen' chio' che Criston' da' nono gwneze cani'. ³ Criston' nse'e doxen yela' sina' na' yela' chejni'i che Diosen' cont gwzejni'iden' chio'. ⁴ Chnia' ca' cont nono siye'e le'e len diža' da' chaquele naquen xdan. ⁵ Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyala' gonle na' zoačhachle chejnilaže'le Criston'.

⁶ Na' na'a, con can' ba gwzolaole chejnilaže'le Criston' na' ba nonlene' xanle, con can' soačhachle len le'. ⁷ Le soačhach le šejnilaže'ch Criston' can' ba bsdlena', cont gacle ca to yag da' ba gwyaz loen sitjw. Na' le soa le güe'chgua yela' choxcen che Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi zjazaca', na' bitw chosozejni'ide' che Criston'.

⁹ Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. ¹⁰ Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo. ¹¹ Na' lezda' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. ¹² Na' da' gwzoacho nis caten' gwyejnilaže'chone', zejen con can' got Criston' neche xtoła'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lezce zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. ¹³ Cana' gwxcacalebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtoła'chon'. ¹⁴ Bi bencho yogo'lol can' žaley che Diosen' cheyala' goncho, na' bencho da' žan bi cheyala' goncho. Da'n'an' gota' xya checho len ley na' na' nchoglaon checho saca'zi'cho toľi tocaņe. Perw Criston' bnežjw cuine' bosode'ene' le'e yag cruza' neche doľa' xya chechon', na' da'n'an' nezecho Diosen' ba bnitlagüe' xtoła'chon'. ¹⁵ Criston' cate' gota' le'e yag cruza' beque'e yela' gwnabia' che da' xigüe' ca' na' blo'ede' benachen' ba blej bšošen'.

Cue' yichjcho che da' ca' zjazacan' len Diosen'

¹⁶ Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža ľni, o bene' chesena qui ca' goncho cate' naquen bio' che'eņ, o bene' chesena ža ni ža na' nac ža che Dios. ¹⁷ Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'. ¹⁸ Bi gwzenagle še no bene' chzejni'ide' cheyala' gon cuinle ca to da' bibi zaca' cont soale binlo len Diosen', o bene' chzejni'ide' cheyala' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljaže' zaca'chguan, len bitw bi zacan', ¹⁹ le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bečj bnia' ca' zjanoxen' len con ca non Dios čegaquen.

²⁰ Chio' naccho txen len Criston', guac ñacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyala' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyala' gonle na' da' ca' chesene' bi cheyala' gonle? ²¹ Chesene': "Bi goxe'le da' nga", "Bi ye'ej gagwle da' na'", "Bi canle da' na'". ²² Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chinchinon, na' dan' chesene' cheyala' goncho len da' ca', con xbab chegaczen'. ²³ Guacte goncho xbab nac da' sina' da' chesene' cheyala' goncho, na' goncho xbab gaclenen chio' gonxencho Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

3

¹ Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyala' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'. ² Na' cheyala' yebecho da' naquen da' zaca' len Diosen', gague da' naquen da' zaca' len benachen'. ³ Le guac ñacho Criston' ba none' chio' ca to bene' guat len da' malen' cont da' malen' bich ñabian' chio', na' mbancho len Criston' ña'a cont naccho txen len Diosen'. ⁴ Criston' none' chio' yela' mban toli tocañe. Na' cate' le' yide' da' yoble, šjayzoacho txen len le' gan' yo'ochgua be'ni'.

Can' bencho cana' na' can' cheyala' goncho na'a

⁵ Da'nan' cheyala' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' ñeca yebecho bi da' nac da' yela' zto'. Bitw selaže'cho goncho bite'teze da' mal, ñeca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnilaže' l' gua'a šsaca' ca'. ⁶ Žin ža cate' Diosen' gone' cont bene' cheson da' ca' yesezaca'zi'e toli tocañe. ⁷ Le'e lecze gwzoale cana' benle da' mal ca' ba gnwina'. ⁸ Perw na'a cheyala' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw ñele che lježle, na' bitw güe'le diža' zban. ⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyala' gwzenagle chen da' yoble. ¹⁰ Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chach xbab chechon' can' nac chen'. ¹¹ Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisiön o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'ni', na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

¹² Diosen' gwleje' chio' cont naccho lo ne'ena' na' chacde' chio'. Da'nan' cheyala' yeyaše'cho bene' na' gaccho bene' šagüe' len yogo'lol bene'. Bi cheyala' ga'laže'cho, san gaccho bene' chzejwlaže' na' gapcho yela' chxenlaže' len yogo'lol bene'. ¹³ Na' cheyala' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' checho. ¹⁴ Na' yeto da' zejechen goncho ca' yogo' da' ca', cheyala' gague lježcho, le še chaque lježcho gaclenen goncho yogo' da' ca' can' cheyala' gonchon. ¹⁵ Diosen' gwleje' chio' cont soa cuezcho binlo, na' cheyala' gwzenagcho che Criston' na' gacbe'echo yogo'cho naccho toze cont soa cuezcho binlo. Na' lecze cheyala' soacho güe'cho yela' choxclen che Diosen'.

¹⁶ Cheyala' soacho goncho xbab che tūža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyala' golcho no salmos, no himnos, na' bichle da' ža Spiritw che Diosen' golcho, na' güe'cho yela' choxclen che Diosen' lo' yichjlažda'ochon'. ¹⁷ Na' bite'teze da' goncho na' bite'teze diža' güe'cho, cheyala' ñabcho gaclen Xancho Jesúsen' gonchon can' chazlaže', na' güe'cho yela' choxclen che Xacho Diosen' con can' chaclen Xancho Jesúsen' chio' chonchon'.

Can' cheyala' goncho len lježcho

¹⁸ Le'e no'ole nšagna'le, to tole le gwzenag che bene' chele, le can' cheyala' gon chio' chejnilaže'cho Xancho Criston'. ¹⁹ Na' le'e bene' byo nšagna'le, to tole le gague no'ol chele na' bi gonle znia len legaque'. ²⁰ Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle. ²¹ Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele. ²² Na' le'e chonle xšin bene', le gwzenag yogo'lol can' ža xan žinña' gonle. Bitw gonlele xan žinña' gonle ca' bene' chonchgua žin cate'zen' chñe'e le'e, san le gon žinña' do yichj do laže'le da' chejnilaže'le Diosen'. ²³ Na' bite'teze da' gonle, le gonon do yichj do laže'le cont yebe Xancho

Criston' gague contze yebe bene'. ²⁴ Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' za Xancho Criston'. ²⁵ Na' note'tezcho še bi choncho can' cheyała' goncho, Xancho Diosen' gone' saca'zi'cho neče dan' ba bencho. Na' toz can' chon Diosen' len yogo'loł bene'.

4

¹ Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

² Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxcen che', na' bi cheyała' güedcho yol güižcho Diosen'. ³ Na' le nabe Xancho Diosen' gone' cont gac güe'lento' bene' xtiža' Criston' da' bina' yesejni'ide', le neče dan' ba bia' xtiže'nan' dia' ližya nga. ⁴ Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

⁵ Cheyała' soacho goncho güen len bene' bina' yesejnilaže' Criston' na'a šlac de latje. ⁶ Na' cheyała' güe'cho diža' šagüe' diža' da' zejen len yogo'loł bene', na' cheyała' goncho xbab nac yoži'icho xtiža' yogue'.

Pablo chguape' bene' migw che' ca' tiox

⁷ Bene' lježcho Tíquico ye'e le'e yogo'loł can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'. ⁸ Ba gwseła'ne' gan' zoalen' cont nezele can' chac cheto' na' cont gone' chach laže'le. ⁹ Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaque' yese'e le'e yogo' da' ba chac nga.

¹⁰ Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'. ¹¹ Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yičhlažda'ogaquen'. Ba gosonchgüe' chač laža' can' ba gosaclene' neda'. ¹² Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' choł güiže' Diosen' chnabchgüe' gwzejni'i Diosen' le'e yogo'loł da' chaclaže' gonle cont soačhačle gonlen na' gacle cayanen' chazlaže' Diosen'. ¹³ Che'nda' nezele zoateze' choł güiže' Diosen' neče le'e chejnilaže'le Criston' le'e nita'le Colosas, Laodicea na' Hierápolis. ¹⁴ Nach Lucas ben' chon rmed, ben' chaquecho, chguape' le'e tiox na' lecze ca' Demas.

¹⁵ Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'. ¹⁶ Na' cate' yeyož gwlabl cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwseła' che bene' Laodicean'. ¹⁷ Na' le ye' Arquipo chneyoeda'ne' gwza'lagüe' gone' dołol xšin Diosen' da' gwlo'o Xancho Criston' lo ne'e gone'.

¹⁸ Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' na'a.

CART NECHW DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablo bzoje' beñe' Tesalónica ca' ben' chesonxene' Jesucriston'

¹ Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda olen'.

Bene' Tesalónica bosolo'ede' chesejle'e che Jesucriston'

²⁻³ Yogo' ni'a cate' chol güižto' Xacho Diosen' choe'to' yela' choxclen che' par yogo'le. Na' cate' chol güižto'ne' chjayza'laže'to' yogo'lo' da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto. ⁴ Nezet' beñe' migw, Diosen' chacde' le'e na' ba gwleje' le'e cont nacle lo ne'e. ⁵ Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nezeto' diža' dan' bzejni'ito' le'e naquen da' li. Na' nezele can' bento' da' güen šlac gwzoato' len le'e cont goclento' le'e.

⁶ Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. ⁷ Na' da' zoale chonle da' güenna', beñe' ca' chesejnilaže' Jesucriston' distritw Macedonia na' distritw Acaya ba zjanežde' naquen cheyala' yesone'. ⁸ Doxen ba bzenele beñe' xtiža' Xancho Jesucriston', gague beñe' že' Macedonia na' Acaya na'zen'. Na' ca'cze yogo'ze beñe' ba zjanežde' can' chejnilaže'le Diosen', na' da'nana' bi chyažjen güe'to' diža' chele. ⁹ Na' beñe' zan cheso'e diža' ca' güen beñe len neto' caten' bedena'to' le'e na' cheso'e diža' can' beñe gwlejyichjle chich chejnilaže'le l' gua'a lsaca' chele ca', san na'a ba chejnilaže'le ben' nac dogualje Dios ben' zoa toli tocañe. ¹⁰ Na' cheso'e diža' can' chbezle yetj Xi'ine' Jesús'en' yaban' yide' yežlio nga yeto, ben' bosban Diosen' ladjo bene' guaten'. Na' dan' chejnilaže'cho Jesús'en' ba bosle' chio' cont bi saca'zi'cho cate' žin ža beñe' bi chosozenague' che Diosen' yesale'chgüede' toli tocañe.

2

Pablon' gwzoe' Tesalónican'

¹ Beñe' migw, le'e nezele dan' bedena'to' le'e goclenchguan le'e. ² Na' nezele can' gwdi gwzaca'to' cate' gwyejto' Filipos, na' can' gosezi'diža' beñe' ca' neto' dan' gwdixjue'eto' che Jesucriston'. Perw Diosen' goclene' neto' cont bi bžebto' gwdixjue'eto' diža' güen che' len le'e la'czla' beñe' zan bosožone' chixjue'eton'. ³ Dan' gota'yoeto' le'e gwzenagle che Diosen' bitw nacho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e. ⁴ San zoato' choe'to' diža' can' chazlaže' Diosen' ben' ba gwleje'nto' par chyxijue'eto' diža' güen che'na'. Na' chyxijue'eton' gague cont yebe beñe', san cont yebe Diosen' ben' neze bin' yo'o lo' yichjlažda'ochon'. ⁵ Nezele can' bento', ne tni'aze biña' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuiñ Diosen' nežde' can' naquen. ⁶ Na' neca chejyljwlaže'to' nacle gonto' cont yesonxen beñe' neto'. Neca nacho chaclaže'to' gonxen neto', na' neca chaclaže'to' yezica'chle beñe' yesone' ca'. Zaca'to' gonto' ga gwzenagle cheto' la fuers da' gwseja' Criston' neto' choe'to' xtiže'na', perw bitw chonto' ca'. ⁷ Nži'ito' le'e cacze no'ole šagüe nži'ide' xi'ine' bi' chosgol choscha'ogüe'. ⁸ Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaque'to' cont goclento' le'e, le chaqueto' le'e. ⁹ Za'laže'czle beñe' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwdixjue'eto' le'e diža' güen che Diosen'.

¹⁰ Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna napt'o do'la. ¹¹ Nezele can' gota'yoeto' le'e gonle da' güen na' can' bento' chač laže' to tole gonlen. Bento' can' chon to beñe' byo len xi'ine'. ¹² Bento' mandadw gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

¹³ Bate'teze choe'to' yela' choxclen che Diosen' dan' bzenagle xtiže'na' caten' gwdixjue'eton' le'e. Zache'le bi naquen xtiža' benač, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. ¹⁴ Na' bene' migw,

ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž chegaque' bosochi bososaque' legaue', na' lecze can' bosochi bososaca' bene' gualaž chelen' le'e. ¹⁵ Na' bene' Israel ca' gosote' Xancho Jesucriston' con can' gosote' da' bene' gosoe'lene' legaue' xtiža' Diosen' cani'. Na' lecze can' gosone' bosolagšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lol benachen', ¹⁶ le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocaņe. Can' chesone' do tiemp chosozanch xtoł'gaquen' na' Diosen' ba chža'achgüe' legaue'.

Pablo goclaže' šjayne'e bene' nita' Tesalónica

¹⁷⁻¹⁸ Na' neto' bene' migw, cate' zoato' ga bi chle'e lježcho, chjayze'eto' le'e. Da'nan' cate' ba goc sša biņa' le'e lježcho ba chaczējaže'to' chele na' goclaže'to' yedena'to' le'e. Na' to chop ni'a godca' yida', perw Satanás dan' chnabia' da' xigüe' ca' bi benen latje. ¹⁹⁻²⁰ Chebeto' chonchguale güen na' da'nan' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

3

¹⁻² Na' bich gwzoeto' dan' bi chle'e lježchon'. Da'nan' bechoglaže'to' gwseła'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwseła'to'ne' bedey-ata'yuede' le'e bi soayaše'le na' bedeyene' chach laže'le cont zoachachle chejnilaže'chle Criston'. ³ Gwseła'to'ne' gan' zoalen' cont ne tole bi gaczējaže'le bixchen' chy chzaca'le. Ba nezele chio' chejnilaže'cho Criston' cheyala' saca'zi'cho lo yežlio nga. ⁴ Caten' gwzoalento' le'e bzeneto' le'e leca yosochi yososaca' bene' chio'. Na' nezele ba chac can' gwnato'na'. ⁵ Na' dan' bi gocxenlaža' dan' biņa' la' rson chelen', nachen' gwseła' Timoteon' gan' zoalen' cont nezda' še do laže'le chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, cont bendadzeto' xšin Diosen' len le'e še ca'.

⁶ Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'lol bene'. Na' lecze gwne' chjayze'ele neto' na' zelaže'le yežagcho da' yoble lecze can' chaclaže' neto'. ⁷ Ca'czen' bene' migw, chžaglaoto' na' chy chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'. ⁸ Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'. ⁹ Na' da'nan' leca chbeto' lao Diosen' can' chonle na' leca choe'chguato' yela' choxclen che' can' chonlen'. ¹⁰ Leca choł güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

¹¹ Chnabeto' Xacho Diosen' len Xancho Jesucriston' yesone' latje yedena'to' le'e. ¹² Na' chnabeto' Xancho' gone' cont gaquech lježle tole yetole na' gone' ga gaquechle yogo' benachen' con catezen' chaqueto' le'e. ¹³ Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cibili doła' gaple cate' yid Xancho Jesúsén' da' yoble nche'e yogo'lol bene' ba gwlej Diosa' cont zjanaque' lo'ne'e.

4

Pablon' bzejni'ide' can' che'ne Diosen' yesezoa yesebeze'

¹ Na'a bene' migw, bač bsed blo'eto' le'e gonle can' chazlaže' Diosen', na' bač zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

² Ba nezczele bica' da' ca' bento' mandadw gonle na' zjanaquen con ca' ža Xancho Jesúsén'. ³ Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho. ⁴ Chaclaže' neze tole naquen' cheyala' soalen xo'ollen' sin cbi gaple doła' na' gonelene' ca' bene' zaca'. ⁵ Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. ⁶ Ne tole bitw gonle da' bi cheyala' gonle na' siye' bene' lježle na' soalenle no'ol che'. Ba be'czto' diža' bosniseto' le'e can' gon Xancho Diosen' cont yesezaca'zi'chgua bene' cheson bite'tez da' xinjen' zjanac ca'. ⁷ Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'. ⁸ Da'nan' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

⁹ Bitw chyažjen gwzoja' le'e can' cheyala' gaque ljež chio' chejnilaže'cho Jesucriston'. Dios nan' ba bsedde' le'e cont chaque lježle tole yetole. ¹⁰ Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaquech legaue'. ¹¹ To tole le'yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia

na'le bi cheson bene' yoble. ¹² Le gon can' ba gwnia' cont bene' bi zjanaque' txen len chio' yesache'ede' chonle' güen, na' lecce cont bibi gac falt še bi dan' chyažj chçhinele.

Can' gac cate' yid Criston' da' yoble

¹³ Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca cheson bene' bi nita' lez šjasyezoe' len Jesucriston'. ¹⁴ Nezecho gosot bene' Jesúsen' na' bebane' ladjo bene' guat ca'. Lecze nezecho Diosen' gone' cont yid Jesúsen' da' yoble nche'e bene' ca' ba gosat con bene' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesúsen' mandadw gwzeneto'. Chio' mbancho na'a chejnilaže' chone', še ne' mbancho cate' yide' da' yoble, bitw nacho yobch yežagchone' clcl ca bene' ca' ba gosat. ¹⁶ Na' ca nac Xancho Jesúsen', cuine' yetje' le'e yaban', na' ne' zižje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'. ¹⁷ Na' ca yeyoža', chio' chejnilaže' chone' še ne' mbancho yežlio nga, gon Diosen' cont yeyepcho txen len legaque' le'e yaban' to lo' bejw na' yežagcho Xancho Jesúsen' le'e yaban'. Nach šjayzoacho len le' toli' tocañe. ¹⁸ Da'nan' le gon chaçh laže' lježle tole yetole güe'le diža' can' gaca'.

5

¹⁻² Bene' migw, bitw chyažjen gwzoja' cont gwzenda' le'e bi ža bi hor yid Xancho Jesúsen' yeto. Nezele cont yalzelaže'le žin ža žin hor can' chžin bene' gwban bene' chda šeže'le. ³ Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca'czen' zjayalzelaže' yesebiayi' bene' ca' bi chesejnilaže'ne'. Bitw gac yosoxnje'. ⁴ Perw chio' bene' migw, bi nçhole yichjlažda'ochon', da'nan' bitw gac checho can' chac che bene' chzenyal gwbanna' le'. ⁵ Diosen' ba bzejni'ide' chio' nombia'chone' na' be'ni' chen' ba chsenin' len chio'; da'nan' bitw nçhole yichjlažda'ochon'. ⁶ Cheyala' gonyañe'cho xbab naquen' chaclaže' Diosen' goncho na' nabia' cuincho goncho can' chazlaže'na'. ⁷ Bene' ca' cbi chosozenag che Diosen' zjazaca'lebe' ca bene' zjantas na' ca bene' chesezože. ⁸ Perw ba bzejni'i Diosen' chio' cont bi goncho can' chesone'na'. Da'nan' cheyala' nabia' cuincho goncho can' chazlažen'. Cheyala' šejnilaže'cho Diosen' na' gaque lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca' soldadw ben' nyaze' to de ya da' chçue'ejen le' cont bibi chac che' cate' chdile' len bene'. ⁹ Gague gwlej Diosen' chio' cont saca'zi'cho che xtola'chon'. Gwleje' chio' cont šejnilaže'cho Xancho Jesucriston' na' šjayzoacho len le'. ¹⁰ Na' Jesucriston' bnežjw cuine' neçhe chio' cate' gosot bene' le' cont šjayzoacho len le' la'cžla' še mbancho o še ba gotcho cate' yide' da' yoble. ¹¹ Da'nan' le gonch can' ba chonle, le gon chaçh laže' lježle tole yetole na' le gaclen lježle cont soaçhçhle šejnilaže'le Jesucriston'.

Pablon' bzejni'ide' bene' chesejnilaže' Jesucriston' can' cheyala' yesone'

¹² Chata'yoeto' le'e bene' migw, gapple bala'an' bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyala' soa cuezle. ¹³ Gapchualne' bala'an' na' gaquechgüele legaque' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca'cze bene' migw, le tile bene' bi chesaclaže' yeson žin, le gon chaçh laže' bene' chesacde' zdebe chosozenague' che Jesucriston', na' le gaclen bene' bina' yesejni'ide' naquen' cheyala' yesone'. Le soa le gap yela' chxenlaže' len yogo'lo' bene'.

¹⁵ Še bi da' mal cheson bene' len le'e, le gon byen bi yoži'ile da' mal len legaque'. Le yeyilwlaže' naclen' gonle güen len lježle tole yetole na' len note'ez bene'.

¹⁶ Do timp le yebe. ¹⁷ Le soateze le soa le yol güiž Diosen'. ¹⁸ Le güe' yela' choxclen che Diosen' bite'tez da' chac chele, le da'nan' chaclaže' gon chio' chejnilaže'cho Cristo Jesúsen'.

¹⁹ Bitw gwžonle gon Spiritw che Diosen' can' chaclažen' gonen len le'e o len bene' yoble. ²⁰ Bi gwzoale ca'ale dan' chesena bene' cheso'e diža' dan' ba gož Diosen' legaque'. ²¹ Na' le gonyañe' xbab che yogo'lo' diža' da' cheso'e cont soale gwzenagle che da' nac güen. ²² Na' bitw gonle bite'tez da' nac da' mal.

²³ Diosen' chone' ca' chzoa chbezcho binlo len xbab dan' yo'o lo' yichjlažda'ochon'. Na' chnabda'ne' gone' cont lažda'olen' gacyañen' xilaže'. Na' lecce gonšque' cont bibi da' mal gonle len yichjlažda'olen' neca len cuerp chelen' cont bibi doła' gapple caten' yid Xancho Jesucriston' yeto. ²⁴ Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

Pablon' gwñabe' gaclen Diosen' bene' Tesalónican'

²⁵ Bene' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nacbia' chaque lježle.

²⁷ Chona' mandadw gwlabl cart nga ga yesene yogo' lo' be'ne' lježcho ca' nita' gan' zoalna',
le can' chaclaže' Xancho Jesucriston' gonle.

²⁸ Na' soateze Xancho Jesucriston' gaclenšque' le'e. Da' na'ze chzoja' na'a.

CART GWCHOPE DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablon' bzoje' bene' Tesalónican' bene' chesonxen Jesucriston'

¹⁻² Neda' Pablo chzoja' le'e chdop chžagle chonxenle Xancho Jesucriston' Tesalónica' na' nacle t xen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuzle binlo len xbab dan' yo'o lo' yichjlažda' olen'.

Cate' yid Criston' da' yoble Diosen' gwnežjue' da' yesezaca'zi' bene' bi chosozenag che'

³ Bene' migw, neto' cheyala' soateze soato' güe'to' yela' choxclen che Diosen' che dan' chonlen'. Cheyala' gonto' ca' da' zejle chejnilaže'chle Diosen' na' zej chaquech lježle. ⁴⁻⁵ Da'n'an' chbeto' choe'to' xtiža'len' len yezica'chle bene' ba gwlejš Diosen' na' chesežague' chesonxene' Jesucriston' ga yoble. Choe'to' diža' ca' güen chonle dan' chycho chejele chejnilaže'le Jesucriston' la'cžla' da' zan da' chac chele na' chosoči chososaca' bene' le'e. Da'n'an' nezecho Diosen' zejzce' to' licha da' nchogbi'e zaca'le par yeyejle yaban' gan' zoe' chnabi'e.

⁶ Na' Diosen' zeje' to' licha da' gone' cont yesezaca'zi' bene' ca' chosoči chososaque' le'e. ⁷ Na' lecze zeje' to' licha da' gwcueze' yogo'te dan' chy chzaca'chon'. Gwcuezen' cate' le'echo yetj Xancho Jesúsén' le'e yaban' len angl che' ca' bene' zjans'e yela' guac che'. Yetje' nychjđe' yi' beļ. ⁸ Na' gwnežjue' da' yesezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'. ⁹ Legaque' yesezaca'zi'e toli tocaņe. Gwbat šjasjenite' len Xancho Jesucriston' ben' nac bene' zaca' juisyw na' nape' yela' guac xen. ¹⁰ Cate' žin žan' yid Jesucriston' da' yoble, chio' chejnilaže'chone' na' naccho lo' ne'e gwlo'echo naque' bene' zaca' juisyw na' yebanecho catec bene' güen naque'. Nacto' t xen len le'e da' ba chejle'le che diža' dan' be'lento' le'e.

¹¹ Da'n'an' zoateze zoato' chnabeto' Diosa' gaclene' le'e gonle güen cont yebede' ba gwlejš le'e par nacle xi'ine'. Na' chnabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. ¹² Chnabto' gonle cont Xancho Jesucriston' gacxene', na' le' gone' ga gacxenle t xen len le', le Dios chechon' na' Xancho Jesucriston' nita'cze' chesaclene' le'e.

2

Choj ben' gonchgua güedenag len Diosen'

¹ Bene' migw, da' yoble chnia' le'e ca' gac cate' yid Xancho Jesucriston' yeto, yotobe' chio' šjayzoacho t xen len le'. ² Chneyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwsela' neto', žan ba bžin ža yid Jesucriston'. ³ Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesúsén' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo' yi' gabilen'. ⁴ Gague' bene' ya'laže' na' gue'ede' Diosen' na' lecz ca' gue'ede' bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca' Dios cont yesonxen bene' le'.

⁵ Žbi za'laže'le cate' gwzoo' len le'e bzejni'ida' le'e can' gac cate' yid Jesucriston' da' yoble? ⁶ Na' na'a nezecze bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'. ⁷ Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'. ⁸ Cana'chen' choj bene' blaon' ben' gonchgua güedenag len Diosen'. Nach Xancho Jesúsén' yide' nychjhcgüede' be'ni', na' cate' bene' blaon' le'ede' le' nach Xancho' güe'e diža' na' ši'en goten le'. Can' gone' yonitlagüe'ne'. ⁹ Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'. ¹⁰ Yogo'te da' mal gone' gonlede' bene' ba naquen yesebiaye'e toli tocaņe. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban chegaque' toli tocaņe. ¹¹ Na' da'n'an' Diosen' güe'e latje yeseziye'e legaque' cont yosozenague' diža' güenlaže'. ¹² Nach yesezaca'zi'e toli tocaņe da' bitw gosejle'e diža' li' che Xancho' san besyebede' da' malen'.

Diosen' chbeje' bene' na' chone' cont gac šjasjenite' len le' toli tocaņe

¹³ Bene' migw, chaque Xancho Jesucriston' le'e. Na' neto' cheyała' soatez soato' güe'to' yela' choxclen che Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li che Diosen' nach gwsele' Spiritw čhen' chonen cont nacle bene' laždao' xilaže'. ¹⁴ Neche da'nan' gwlej Diosen' le'e, na' dan' gwyjele'le diža' güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'nan' bene' migw, le soa čhačh le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'. ¹⁶⁻¹⁷ Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nzi'ilaže'de' chio'. Na' čhñabda' cuin Xancho Jesucriston' len Xacho Diosen' yesone' čhačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

3

Gwnab Pablon' yosoł güiže' Diosen' gaclene' le' len bene' lježe' ca'

¹ Na'a bene' migw, yol güižšcale Diosen' gaclene' neto' cont yob šjadixjue'to' che Xancho Jesucriston' doxen, na' cont bene' yezica'chle yesebede' yosozenague' can' ba ben le'e.

² Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. ³ Xancho Jesucriston' zoatez zoe' chone' can' že' gone', na' gaclene' le'e cont soačhačhle šejnilaže'lene'. Na' lecze gwcuas gwcue'eje' le'e len da' malen'.

⁴ Na' nezeto' chaclencze' le'e cont chonle da' ba bento' mandadw gonle na' cont nita'czle gonlen. ⁵ Čhñabda' Xancho Jesucriston' gone' cont nezele catec chaque Diosen' chio'. Na' lecze čhñabda'ne' gone' cont gwyo gwčhejle len da' chyj chzaca'le can' gwzoa Criston' byo bčeje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyała' gonle txen len note'tez bene' lježchon' bene' bi chesacłže' yesone' žin, le bi chesone' ca nac da' bsd blo'eto' legaue'. ⁷ Neto' benczto' žin cate' gwzoato' len le'e, na' da'nan' nezele can' cheyała' gonle. ⁸ Cuent čheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwnabeto' le'e da' byažje bčhineto'. ⁹ Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyała' gonle. ¹⁰ Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." ¹¹ Perw na' ba beneto' diža' chesene' balle bitw bi žin chonle, con čhdale chacle diža'. ¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen. ¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. ¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwnabde' Diosen' gaclene' bene' Tesalónica

¹⁶ Na' čhñabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonščacze' cont soa cuezle ca' yogo'te ža bite'teze da' chac. Len' soaščacze' len yogo'le.

¹⁷ Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chseła' cont nachbia' nedan' chselan', le ba nombia'le letr čhian' can' chzojan'. ¹⁸ Xancho Jesucriston' gaclenšque' yogo'le. Da' na'zen' chzoja' na'a.

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

¹ Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandawd chona' xšinen'. Dios nan' none' chio' yela' mban toli tocanē na' Xancho Jesucriston' chone' cont zoacho lez šjayzoacho len le' toli tocanē. ² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo' lo' yichjlažda'oguan'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwya'a Macedonian' gwneyoeda' le' cont bega'ano' Efeson' neche nita' bal' bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xozxta'ocho ca' na' cheso'e zan cuent che legaque'. Na' da' yoble chneyoeda' le' gono' mandawd bich yosozejni'ide' che da' ca'. Dan' chosozejni'ide' chonen ga yesaczejlaže' bene', na' bi chaclenen yesone' dan' gwlo'o Diosen' lo na'cho gon chio' ba chejle'cho xtižen'.

⁵ Na' gono' mandawd yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'. ⁶ Bene' ca' chosozejni'ide' diža' güenlaže' bi chesone' ca', na' da'nana' cheso'e diža' da' bibi zaca'. ⁷ La'czla' chesacraže' yosozejni'ide' ley dan' bzoj Moisésen', bi chesejni'ide' dižan' cheso'e na' nēca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwchinchon can' cheyała' gwchinchon. ⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandawd goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an' nēca chesonxene'ne', na' bene' chesot no xaxna'gaque', na' len nochle bene' güet bene'. ¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'. ¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo na' chyixjue'edan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nana' gwleje'nda' gonan'. ¹³ Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bēna' ca', Diosen' beyaše' beži'ilaže'de' neda', le' biña' šejnilaža'ne' ca' hora' na' biña' gacbe'eda' chona' clele. ¹⁴ Nach Xancho Jesucriston' nči'ilaže'chgüede' neda' na' goclene'nda' cont gwejnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe' gwyanch xtoła'. ¹⁶ Na' la'czla' naca' bene' la'zelagüe' gwyanch xtoła', Jesucriston' beyaše'de' neda' na' bezi'xene' chia' cont blo'e naphgüe' yela' chxenlaže'. Bene' ca' cont bene' za' za'ac yesache'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocanē. ¹⁷ Cheyała' gonxencho Diosen' ben' nac Rey chechon' toli tocanē. Gague da' te chen'. Zoacze' la'czla' bi chle'echone' na' naque' la'zelagüe' bene' sina'. Totc le' zaque' gonxencho na' gapchone' bala'an' toli tocanē. Na' can' gonšcaczcho.

¹⁸ Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czla' še gacdo' zdebe gonon'. Soachacho' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. ¹⁹ Bal' bene' chesonteze' da' malen' la'czla' zjanēztede' lo' lažda'ogüe' bi cheyała' yesonen', na' da'nana' ba gosebejyichje' bich chesejnilaže' Diosen'. ²⁰ Can' goc che Himeneo na' che Alejandro. Da'nana' ba gwñabda' Diosen' yesaque' lo na' Satanás dan' chnabia' da' xigüe' ca', na' gonon con ca chaclažen' len legaque' cont yesache'ede' bi cheyała' yeseneye'e che Diosen'.

2

Dan' cheyała' nabecho Diosen' gone'

¹ Na' dan' nac da' žialao xen gon chio' chonxencho Diosen': cheyała' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' chočlen che Diosen' che bi da' güen da' chesac che yogüe'. ² Cheyała' nabecho Diosen' gaclene' bene' gwnabia' ca', no rey, no gubernador na' nochle bene' ca' chesenabia', cont soa cuezcho binlo na' bibi gwžon gonxencho Diosen', neca gata' da' gwžon goncho bichle da' cheyała' goncho. ³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' none' chio' yela' mban toli tocanē. ⁴ Le chaclaže' gwnežjue' yela' mban toli tocanē che yogo'lol bene' na' chaclaže' yesejni'ide' diža' li che'. ⁵ Toz Diosen' zoa bene' zaca' yesonxen yogo'lol bene', na' lecz toz ben' chozoe' chio' binlo len Diosen', le'na' Jesucriston' ben' golje benač. ⁶ Jesucristw nan' bnežjw cuine' gote' neče da' mal da' goson yogo'lol benač, na' cate' bžin ža Diosen' bžie' bia', cana' bene' cont goseneze benačen' che'. ⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' t xen, gwleje'nda' cont chzejni'ida' bene' ca' bi zjanac bene' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosoł güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' a' yosošašlene' bene'. ⁹ Na' ca' nac no'ol ca' chesonxen Jesucriston', bi cheyała' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. ¹⁰ San cheyała' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. ¹¹ Na' no'ol ca' lecze cheyała' nite' šize yosozenague' che bene' ca' chososed chosolo'ede' xtiža' Diosen', na' yesone' con da' yese'ene'. ¹² Neda' bi chona' latje cont no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyała' yesenite' šize, ¹³ le cate' Diosen' bene' benačen' zgua'tec bene' Adánna' na' gwdechle bene' Evan'. ¹⁴ Na' cate' Satanás dan' chnabia' da' xigüe' ca' gwxoayaguen bene' newch ca' gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nana' beyaque' bene' güen da' xinj. ¹⁵ Perw na' la'czla' no'ol ca' chesežaglagüe' chesezan xi'ingaue', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle bene', na' še zjanite' chesone' can' chazlaže' Diosen' len yela' sina' da' ba bnežjue' legaue'.

3

Can' yeson bene' ca' yosogüia yeseže'e yezica'chle bene' chesonxene' Diosen'

¹ De to diža' da' zaca' šejle'cho da' žan: "Bene' chesaclaže' yosogüia yeseže'e yezica'chle bene' chesonxene' Diosen', chesaclaže' yesone' to da' güen, še ca'." ² Na' bene' gwłane' gone' žin dan' nac ca' cheyała' soateze' gone' da' güen yogo' ža sin cbi gone' da' zaca' tilchone'. Cheyała' soa toz no'ol che', na' cheyała' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej toli cont bene' yoble yesape' le' bala'an. Cheyała' yebede' gwlebe' bene' liže', na' cheyała' gague' bene' chac chzejni'ide' xtiža' Diosen' binlo. ³ Bene' chzože bi gac gwłane' žinna'. Bi cheyała' gague' bene' yolao chdiče chšaše'. Cheyała' gague' bene' šagüe' bene' chon güen len yezica'chle bene', na' bi cheyała' gague' bene' chon znia, neca selaže'chgüe' gone' gan mechw. ⁴ Na' cheyała' gague' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. ⁵ Le še bi nezde' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. ⁶ Bi cuejle bene' za' chzoloa chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. ⁷ Na' bene' cuejle cheyała' soe' gone' cont bene' ca' bi zjanac t xen yeseže'ne' chone' güen, le še gone' da' malen' yeseže'ne' che' na' Satanásen' co'oyelan' le' gonche' da' malen'.

Bene' ca' yeson žin bixjw

⁸ Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaue' bala'an. Lecze cheyała' yesaque' bene' chesoe' diža' li da' šejle'cho, bene' bi zjyolagüe' chesezožde', na' bene' bi yesezelaže' yesejni'e che xšin Diosen' dan' yesone'na'. ⁹ Cheyała' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yeseže'ne' lo' yichjlažda'ogüe' chesone' can' chazlaže' Diosen'. ¹⁰ Na' cate' za' cuejle bene' ca' yeson žin bixjwna', le na'yañe' can' chesonen', na' še gata'bia' chesonen' binlo bibi chesečhoe', nachen' cuejle legaue'. ¹¹ Na' no'ol ca' yeson xšin Diosen' lecze cheyała' yesone' cont gapchone'

bala'an. Bi cuejle no'ole chñie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. ¹² Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. ¹³ Le še bene' ca' cheson žin bixjon' yesone' bin'lo dan' yo'o lo na'gaque' yesone', nach yesejnilaže' chgüe' Jesucriston' sin cbi yesežebe', na' yezica' chle bene' yesape' legaque' bala'an.

Da' chejni'icho che Diosen' dan' nono gwneze cana'

¹⁴ Chzoja' le' da' quinga da' cheyala' gon'le la'czla' zoa' lez yob yida' gan' zon', ¹⁵ cont še šeda' ba neздо' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocaņe. Na' chio' chdop chžagcho chonxencho' yo'o lo na'cho choncho cont chesombia' bene' diža' li che Diosen'. ¹⁶ Da' licze da' zaca'chgua dan' ba bzejni'i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' benač,

na' Spiritw che Diosen' blo'en naque' bene' güen juisyw.

Na' bene' ca' zjanac angl che Diosen' bedeseņe'e le'.

Na' bžin ža Diosen' bene' cont beyepe' yaba gan' yo'ochgua be'ni'.

Na' bene' ca' cheso'e xtižen' ba goseyixjue'eden' len bene' že' naciön zito',

na' zan bene' že' lo yežlion' ba chesejle'e che'.

4

Žin ža bal bene' yesebeyichje' diža' li che Diosen'

¹ Na' Spiritw che Diosen' ba ben' diža' li cont šejni'icho žin ža cate' bal bene' yesebeyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesexoayaguen' legaque'. ² Da' xigüe' ca' yesonen cont nita' bene' yosozejni'ide' diža' güenlaže' da' siyen' na', na' bene' ca' yosozejni'ide' diža' güenlažen' bibi yesacde' lo' yichžlažda'ogüe' caten' yeseziye'e bene'. ³ Yosožone' yosošagna' bene' na' yosožone' ye'ej gagwcho bal yela' guagw, la'czla' Diosen' bene' cont zjade yela' guagw ca' cont chio' chonxencho Criston' na' nombia'cho diža' li chen' gagwchon na' güe'cho yela' choxclen che'. ⁴ Yogo' dan' ben Diosen' naquen güen na' bi naquen da' gue'echo, con še güe'cho yela' choxclen che' caten' gagwchon. ⁵ Na' nezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choxclen che' cate' gagwchon.

Can' gon Timoteo xšin Diosen'

⁶ Ca nac bene' ljež chio' chonxencho Jesucriston', cheyala' gwzejni'ido' legaque' da' quinga ba gwnia' le' cont gacleno' legaque' can' chazlaže' Jesucriston', le gwleje' le' cont gwzejni'ido' bene'. Lecz gonen' chachlažo' še gwzejni'ido' bene' xtiža' Diosen' dan' chejle'cho, le naquen to diža' güen, na' ba bzenago' chen do yichj do lažo'. ⁷ Bi gwzenago' che diža' güenlaže' dan' chesaljlaže' bene' bi chesonxene' Diosen'. Ben byen soaczo' gono' can' chazlaže' Diosen'. ⁸ Nezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho bin'lo na' na' lecz ca' cate' šjayzoacho len le' toli tocaņe. ⁹ Can' ža to diža' dan' zaca' šejle'cho na' dan' zaca' gwzenagcho chen do yichj do laže'cho. ¹⁰ Na' cont choncho can' chazlaže' Diosen', da'n'an' chonchguacho xšinen' na' chyo chchejlaže'cho cate' chzi'diža' bene' chio', le nezecho Diosen' zoe' toli tocaņe na' zoacho lez gone' güen len chio'. Le' chaclaže' gwnežjue' yela' mban toli tocaņe che yogo' benač, na' can' nacczen gone' len bene' chesejnilaže' Jesucriston'.

¹¹ Da'n'an' bzejni'i bene' da' ca' ba gwnian' na' ben mandadw yosozenague' che yogo'czen. ¹² Bi go'o latje yosozaa bene' le' šla'ale lagüe da' naco' bene' xcuide'. Len xtižo' na' len da' chono' ben güen cont yogo' bene' chesejnilaže' Criston' yesape' le' bala'an. Len xtižo' na' len da' chono' blo'e legaque' ca cheyala' yesacde' Diosen' na' bene' lježgaque', ca cheyala' yesenita'čhače' yesejnilaže'ne' na' ca cheyala' yesaque' bene' laždao' xilaže'. ¹³ Na' na'a šlac biña' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. ¹⁴ Bi gatlažo' dan' gwlo'o Diosen' lo nao' gono' caten' gosexo na' bene' blao ca' yichjon', bene' ca' chosogüia cheseņe'e ljež chio' chonxencho Diosen', bosozende' le' gwlej Diosen' gono' xšinen'.

¹⁵ Cheyala' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. ¹⁶ Na' gwsaco' can' soa cuezo' cont soačhačo' gono' con can' chazlaže' Diosen' na' soačhačo' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalen'le Diosen' cate' žin ža.

5

Can' cheyała' gon Timoteo len yezica'chle bene' chesejnilaže' Criston'

¹ Še no bene' byo gole chone' bi da' mal, bi tiło'ne', san gwñeoyede' cuejyichjen', con ben xbab naque' xao'. Na' še no bene' xcuide' chone' bi da' mal, gwñeoyede' cuejyichjen', con ben xbab naque' bene' bišo'. ² Na' še no no'ol gole chone' bi da' mal, gwñeoyede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwñeoyede' cuejyichjen', con ben xbab naque' bene' zano'. Cheyała' gwsaco' cont gaco' bene' laždao' xilaže' len legaue'.

³ Chio' chdop chžagcho chonxenko Criston' cheyała' gwnežjwcho da' cheseyaže no'ol ca' ba gosat bene' chegaue' še da' li zjanaue' bene' chyažj chchine. ⁴ Perw še nita' no xi'ingaque' no xesoagaue', bzejni'ide' legaue' cheyała' yosonežjue' da' cheseyaže no'ol ca', le no'ol ca' ba bosogole' legaue', na' Diosen' chaclaže' yesone' güen len legaue' cont yosolo'e chesejnilaže'ne'. ⁵ No'ol ca' nono zoa bene' gwnežjw legaue' da' cheseyažje' na' zjanaue' dogualje güezebe, yesenite' lez gaclen Diosen' legaue' na' do ža do yel yesenite' yesenabde'ne' gaclene' legaue'. ⁶ Perw no'ol güezeb ca' chesacde' yesone' con ca žan chegaue', len Diosen' yičijlažda'ogaquen' naquen ca che to bene' ba got la'czła' ne' zjambane'. ⁷ Ben mandadw neče bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tiłe legaue'. ⁸ Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho čen, na' malech chone' ca bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

⁹ Quinga nezdo' no no'ol güezeb ca' cheyała' gwchelo' le'e yiš cont bene' ca' chesedop chesežag chesonxene' Jesucriston' yosogü'e'j yosogü'e'ne' na' yosonežjue' bichle da' cheseyažje'. Cuejle no'ol gol ca' bene' ba gwde gayon iz, no'ole goc toze bene' che'. ¹⁰ Cuejle con no'ol ca' zjažeze bene' ba gosonchgüe' da' güen, ca no da' quinga: še bosgole' bi' che' binlo, še blebe' bene' liže', še goclene' yezica'chle bene' chesonxene' Diosen', še goclene' bene' ca' cheseyi chesezaue', o še ba bene' bite'tezechle da' güen.

¹¹ Bene' ca' chesedop chesežag chesonxene' Jesucriston' bi cheyała' yesego'o lo' na'gaue' yosogü'e'j yosoguaue' no'ol güezeb xcuide' ca'. Le no'ol ca', gwžin ža yesaclaže' yosyošagne' da' yoble, ¹² na' yesape' doła' še yesebejyichje' xšin Criston' dan' gosechebe' yesone'. ¹³ Na' lecz no'ol güezeb xcuide' ca' bi naquen güen gwco'olaochwne' yeselaže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž bene' yesezi'diže' bi chac, le bi cheyała' yesone' dan' nac ca'. ¹⁴ Da'nan' chaclaža' no'ol güezeb xcuide' ca' yosyošagne' da' yoble na' yesezanche' cont yosyosgole' xi'ingaque' na' yosogüia' yeseña' ližgaquen' binlo, na' bi yesone' cont bene' ca' cheseague'ede' chio' yesene' chesone' da' mal. ¹⁵ Chnia' ca' le nita' bał no'ol güezeb xcuide' ca' ba gosebejyichje' Criston' na' chosozenague' che Satanásen'.

¹⁶ Note'tez bene' chejnilaže' Criston', še nita' no'ol güezeb lo' diaža chegaue', cheyała' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaue', legacze' cheyała' yesego'o lo' na' bene' ca' chesedop chesežag chesonxene' Criston'.

¹⁷ Na' ca' nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyała' yesacxene', na' cheyała' gwnežjwchone' da' yesacbande'. Na' zaca'che' yesacxene' še chesejyichje'ede' xtiža' Diosen' na' chosozejni'ide' bene' bi zejen. ¹⁸ Cheyała' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'ñ cont ca gagwba' cate' chlej chšošjba' trigon' neče choj xen'." Na' lecz nyojen žan: "Bene' güen žin cheyała' si' laxjue'."

¹⁹ Bi gono' cuent cate' no bene' gagw xya che to bene' blao bene' nchoj chgüia chne'e bene' lijež' chesonxene' Criston' še bi zoa yeto bene' o yechope bene' co' da' bałi. ²⁰ Na' še da' li ba bene' da' malen', cheyała' tiło'ne' lao bene' ca' chesedop chesežag chesonxene' Criston' cont yezica'chle bene' ca' yesežebe' yesone' da' malen' nac ca'. ²¹ Na' toze can' cheyała' gono' len note'teze bene', bitw nacho bał bene' gonxenchgüachone' na' yebale' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjažeze' chona' mandadw gono' yogo' da' ca' ba gwnia' nga. ²² Bitw yob cuejo' bene' güia ne'e lijež' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

²³ Na' dan' tolize chac li'o, bi ye'ejo' toze nis, san güe'ej late' güeje vino.

²⁴ Bał bene' nachbia' chesone' da' mal na' yogo'ze bene' zjažeze' can' chesonen' la'czła' bina' žin ža yesezi'e castigw čen. Na' bał bene' chesone' da' malen' dan' ngaše' na' da' bi nachbia', perw žin ža gwlo'elaon. ²⁵ Na' lecz ca' naquen len bene' ca' cheson da' güen, nachbia' še da' güenna' chesone', na' la'czła' gague nla' da' güenna' chesone', bi nacho yega'anče bagaše'ze dan' chesonen'.

6

¹ Na' bene' ca' chesejnilaže' Criston', bene' zjanac esclavos, cheyala' yesache'ede' bene' ca' zjanaque' xan zin chegaquen' zjazaque' cont yosozenague' chegaque'. Cheyala' yesape' legaue' bala'an cont nono ne yela' ya' che Diosen', neca no ne che dan' chzejni'ichon'. ² Bene' ca' zjanac esclavos, še xangaque' lecze chesejnilaže' Criston', bi cheyala' yesone' xbab bi yosozenague' chegaque' neche zjanaque' txen chesonxene' Criston', san nachle cheyala' yesone' zinna' do laže'che' na' cheyala' yesacde' xan zin ca' ca bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyala' yesone' na' gwneyoe bene' yosozenague' chen.

Cheyala' soacho mbalaz len da' de checho

³ Nita' bene' chosozejni'ide' xbab chegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. ⁴ Bene' ca' chosozejni'ide' dan' zej clele chesonxen cuingaque', chesacde' zjanезде' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaue'. ⁵ Con bi cheyož chedo chesedił chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwñi'a. Bi gono' txen len ben' cheson' ca'. ⁶ Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho. ⁷ Ga'alcho bla'cho yežlion' na' ga'alcho cate' yeza'cho. ⁸ Na' še de da' che'ej chagwcho na' še de xalana'cho da' chyažjecho, cheyala' soacho mba len da' ca'. ⁹ Bene' ca' chesezelaže' yesaque' bene' gwñi'a chosozenague' che da' malen' na' cheselažoe' lo' na' gwxiyen'. Chesezelaže' da' zan da' gata' chegaque' da' yesede' chen, na' da' ca' chesezelaže' chesonen mal len legaue' na' zin ža yesebiaye'e. ¹⁰ Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

Cheyala' cuec yichj Timoteon' gone' xšin Criston'

¹¹ Na' ca nac le' Timote' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soachačo' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. ¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocañe, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'. ¹³ Dios ben' chnežjo yela' mban che yogo' benačen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaue' zjanезде' chona' mandadw ¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. ¹⁵ Le cate' zin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'. ¹⁶ Totec Dios nan' bi nacho zin ža gate'. Na' catec yo'ochgua be'ni' gan' zoen', nono gac bigue' gała'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyala' gonxenchone' le chnabi'e toli tocañe. Na' can' gonšcaczccho.

¹⁷ Na' ca nac bene' ca' chesejnilaže' Criston', bene' zjanac bene' gwñi'a lo yežlio nga, gože' bi yesaque' bene' ya'laže'. Na' yo'o legaue' bi yesone' xbab yesenite' mba lagüe zjanaque' bene' gwñi'a, le yob te che bite'tez da' de chegaque'. Yo'o legaue' yesezoe' lez yesenite' mbalaz len Dios ben' zoe' toli tocañe. Toga le' chone' chio' yogo' da' güen da' chyažjecho na' da' chbecho. ¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaque' cont yesaclene' bene' na' yesebede' yesone' ca'. ¹⁹ Še yesone' ca', na' gaquen ca to yela' gwñi'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocañe še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj' diža' da' bibi zaca', ne che dan' chesene' bene' dan' bi zej lebe len diža' li che Diosen'. Chesonlaže' chesene' cheso'e diža' sina'. ²¹ Bene' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'.

Chnabšca' gaclen Diosen' le'. Da' na'zen' chzoja'.

CART GWCHOPE DAN' BZOJ POSTLW SAN PABLO CHE TIMOTEO

Pablon' chzoje' Timoteon'

¹ Neda' Pablo naca' postlw che Jesucriston', le Diosen' gwnalaze' gwsele' neda' chyixjue'eda' can' gwne' gone' cont note'teze bene' yesejnilaže' Jesucriston' gata' yela' mban chegaque' toli tocañe. ² Na' chzoja' le' Timoteo, ba nona' le' ca xi'ina'. Chñaba' lao Xancho Diosen' na' lao Xancho Jesucriston' yesaclensque' le' na' yesyeyaše' laže' de' le', na' yesonšque' ca so' binlo len xbab da' yo'o lo' yichjlažda' oguon'.

Cheyała' güe'cho diža' che Jesucriston'

³ Chonxena' Diosen' do yichj do laža' can' goson da' xoxxta'ogua', na' ñezda' lo' yichjlažda'ogua' chona' can' chazlaže' Diosen'. Na' yogo' ni'a cate' chol güiža' Diosen', lagüe ža na' šeže'le, choa' yela' choxcen che dan' chonon'. ⁴ Chjaza' laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'. ⁵ Na' chona' xbab can' chejnilažo' Diosen' do yichj do lažho' can' zgua'tec goson taguo' Loida na' xña'o Eunice, na' ñezda' le'c ca' chono' le' na'a.

⁶ Da'n'an' chñeyoeda' le' da' yoble, güe' lažo' gono' da' gwlo'o Diosen' lo' nao' gono' caten' gwxo'a na'ton' yichjon'. ⁷ Diosen' bene' chio' Spiritw chen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'. ⁸ Da'n'an' chñeyoeda' le', bi yeto'edo' chixjue'edo' xtiža' Xancho Jesucriston', na' ñeca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyała' gono' can' chonon' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'. ⁹ Diosen' ba none' chio' yela' mban toli tocañe na' gwleje' chio' cont naccho lo' ne'en. Na' bene' ca' da' nži'ilaže' de' chio', gague ñeche bi da' güen bencho. Cate' bina' xe yežlion' bsi'e xneze sele' Jesucriston' cont gaclene' chio'. ¹⁰ Na' na'a Diosen' ba blo'e nži'ilaže' de' chio', le ba gwsele' Jesucriston' ben' chon yela' mban chechon' toli tocañe. Na' žin ža gwceuz Jesucriston' yela' goten' na' gone' cont chio' chejle'cho diža' güen chen' šjayzoacho len le' toli tocañe.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel. ¹² Na' dan' chona' ca', chžaglagua' da' quinga chac chia', perw bi cheto'eda' chon, le nombi'a Diosen' ben' chejnilaža'. Ba ben cuina' lo' ne'e, na' ñezda' nape' yela' guac gone' cont ñe' soačhača' šejnilaža'ne' caten' žin ža yid Jesucriston' da' yoble.

¹³ Soačhačo' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'. ¹⁴ Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

¹⁵ Ñezdo' Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'. ¹⁶ Na' chñaba' gaclensca Xancho Diosen' Onesiforo len bene' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga. ¹⁷ Cate' bide' Roma nga, bene' byen beyiljue' neda' con cate'ch beželde'nda'. ¹⁸ Nezdol' lecze da' zan bene' goclene' neda' cate' gwzoo' Efeso. Chñaba' lao Xancho Diosen' gacšca güen che' cate' žin ža yid Xancho Jesucriston' da' yoble.

2

Cheyała' gwyo gwchejcho len da' saca'zi'cho

¹ Xi'indagua', chñaba' soačhačo' šejnilažo' Jesucriston' lagüe' da' nži'ilaže' de' le'. ² Na' yogo' da' ba bendo' gwdixjue'eda' lao bene' zan, da' ca' bsd blo'en bene' yosozenag chen do yichj do laže'gaque', bene' ca' guac yosozejni'iden' bene' yoble.

³ Na' byo bchej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'. ⁴ Nezecho bene' zej yela' soldadon' bi chac gon xšine' šlac zeje' lao gwdila', san chbejyichjen' cont gone' bin' ža ben' nac xan soldadw ca'. ⁵ Na' nezecho bene' chja'ac lo' güitj cheyała' yesone' cayanen' ba bosoxi'e yesone' cate' yeseyitje', cont gac yesezi'e da' yesone' gan. ⁶ Na' leze nezecho bene' chela'le chone' žin yixe' chzi'e da' nechw da' chbia lao coseš chen'. ⁷ Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab che Jesucristw ben' beyas bebane' ladjo bene' guaten', ben' nac xi'in diaža che da' rey Davin'. Che len' chzejni'ida' cate' chyixjue'eda' diža' güen che'. ⁹ Na' da' chyixjue'eda'

diža' güen chen' chosoçhi chososaque'nda' na' dia' ližya nga ca to no bene' mal juisyw. Perw nezda' bibi gac yesone' cont bi gas lalje xtiža' Diosen' lo yežlion'. ¹⁰ Da'n'an' chzanlaže' cuina' gac bi da' gac çhia' lagüe' da' chyxijue'eda' xtiža' Diosen', le chaclaža' yezica'chle bene' ba gwleje' cont gata' yela' mban chegaque' toli tocaņe yesejnilaže' Jesucriston', na' žin ža šjasyezoe' len le' toli tocaņe gan' chac da' güen juisyw. ¹¹ Diža' quinga zjanaquen da' li:

Še chejnilaže'cho Criston' ben' got neçe xtoła'chon',

chio' lezce naccho ca to bene' guat len da' xinjen' cont bich gonchon.

Na' con can' bosban Diosen' Criston' ladjo bene' guaten',

lezce ca' bocobe' yichjlaždao' chio' cont šjayzoacho txen len le'.

¹² Na' še soaçhaçho šejnilaže'chone' bite'teže chac checho, lezce gone' cont nabia'cho txen len le'.

San še cuejyichjcho Criston', lezce le' cuejyichje' chio'.

¹³ Na' la'czla' še chio' bi goncho can' gwnacho goncho,

Diosen' zoe' chone' con da' ba gwne' gone',

le Diosen' bi gac gwše'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnisdo' legaue' naquen mal len Xancho Diosen' yesedil yosošašen lježe' che bize diža'. Bibi zejen yesone' ca', le cate' bene' chesende' chesedil chosošaše', chonen cont bi yesejle'e che xtiža' Diosen'. ¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to licha. ¹⁶ Bi gono' txen len bene' chesoe'chgüe' bite'teže diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal. ¹⁷ Dižan' nac ca' chžiyin' bene' ca' to yižgüe' mal. Can' ba goc che Himeneo na' Fileto, ¹⁸ gosebejyichje' diža' li da' chzejni'in che Criston'. Chosod chosolo'ede' chesene' bi soacho lez žin ža yebancho ladjo bene' guaten', le chesene' ba gwde che da' ca'. Na' bał bene' ba chesejnilaže' Criston' chesaczējaže' na'a neçe xtiža' bene' ca'. ¹⁹ San chio' zoaçhaçho chzenagcho diža' li che Criston' na' Diosen' chone' cont bi chbejyichjchon. Da'n'an' zaca'lebcho ca' to lene yo'o da' nac da' gual. Na' nyojce Xtiža' Diosen' žan: "Diosen' nezde' no bene' zjayo'o lo ne'e." Na' lezce nyojen žan: "Note'tez bene' že' chejnilaže' Xancho Diosen', cheyała' cuejyichje' bich gone' da' mal."

²⁰ Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Lezce de yeso' xguag de gona', na' de no batia na' bichle de yag da' chesonen žin da' bitec zjazaca'. ²¹ Can' naquen len chio', note'težcho še cuejyichjcho da' malen', nach Xancho Diosen' gwçhine' chio' neçe goncho da' zan da' güen da' chaclaže' goncho. Na' še goncho ca', saca'lebcho ca' to tas o to xguag de oro da' zaca'chgua.

²² Na' ca' nac le', cheyała' cuejyichjo' bite'teže da' mal da' chzelaže' lažda'oguoñ gono', da' ca' chesezelaže' note'teže bene' güego' yesone'. Beyiljwlaže' nac gono' cont gaco' bene' güen len Diosen' na' cont soaçhaço' šejnilažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'. ²³ Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'. ²⁴ Chio' choncho xšin Diosen' bi cheyała' tile gwšašlencho bene'. Cheyała' gaccho bene' šägüe' len yogo'ze bene', cheyała' nezecho naquen' gwzejni'icho legaue' che Diosen', na' cheyała' gapcho yela' chxenlaže' len legaue'. ²⁵ Na' cate' güe'cho consejw che bene' bi chesaclač'e' yosozenague' diža' li che Criston', cheyała' güe'lencho legaue' diža' šägüe', na' cuezcho gaclen Diosen' legaue' yosoša' xbab chegaquen' cont yosozenague' che diža' li chen'. ²⁶ Can' goncho cont Diosen' gwnežjue' legaue' to xbab šägüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

3

Naquen' yeson bene' cate' ba zoa yid Xancho Jesucriston' da' yoble

¹ Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. ² Bene' zan yesonxen cuingaque', na' zane' yesebec yichje' gata' da' zcha'o xmechwgaque'. Zane' yeso'e diža' ca' güenna' chesone' na' yesaque' bene' ya'laže'. Yeseneye'e che Diosen'. Bi yosozenague' che xaxna'gaque'. Bi yeso'e yela' choxclen che Diosen' na' bi yesape' le' bala'an'. ³ Bi yesacde' bene', bi yesyexen che lježe', yesene' mal che bene' yoble, con yesontez'e' bite'teže da' mal da' žan chegaque', yesacchgüe' bene' znia, na' yesegue'ede' bite'tez da' nac da' güen. ⁴ Yosode lježgaque' lo na' bene' chesegue'ede' legaue', bi yesežebe' yesone' bite'ze da' mal, yesone' xbab zjazaca'chgüe', na' yesaclač'e' yesone' con da' chpe legacze' na' bi yesaclač'e' yesone' xbab che Diosen'. ⁵ Lezce da' zan da'

yesone' cont yesaque bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'. ⁶ Bene' ca' cheson ca' chja'aque' liž no'ole bene' chesjele'daze', na' chesonlede' legaque' len diža' da' cheso'e. No'ol ca' zjادهchgua xtoła'gaque', le chesonteze' da' mal can' ža lo' lažda'ogaquen'. ⁷ No'ol ca' chosozenague' che note'teze' že' gwzejni'ide' legaque', perw na' bi chžin ža yeseni'ide' diža' li che Diosen'. ⁸ Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nčoł yichjlažda'ogaque' yela' güen da' mal chegaquen', na' gague da' li chesejnilaže' Diosen'. ⁹ Bi gac yesonlede' bene' sša, le yob gac chegaque' can' goc che da' Janes na' da' Jambres, žin ža cate' yezica'chle bene' yesache'ede' chosozejni'ide' clele yela' bi chejni'i chegaque'.

Consejw da' zelagüe' da' bnežw Pablon' Timoteon'

¹⁰⁻¹¹ Na' le' Timoteo, nezczedo' can' ba bzejni'ida' le' na' can' zoa' chona' da' güen. Nezd' ch' yichja' gona' yogo'loł da' ža Diosen'. Nezd' zoachacha' chejnilaža' Diosen' bite'tez da' chac chia'. Na' nezd' napa' yela' chxenlaže' len ljež benacha' na' zoacza' chacda' legaque'. Nezd' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' nezd' da' ca' gosonde' neda' cate' gwzoa' ciuda Antioquia' na' cate' gwya'a yež Iconio len yež Listra, na' can' gwdi gwxcaca'. Na' nezd' Xancho Jesucriston' bosle' neda' lo' yogo' da' ca' da' goc chia'. ¹² Da' li yesenita' bene' yosochi yososaque' note'tez chio' chejnilaže'cho Cristo Jesús'en', chio' ch' yichjcho chzenagcho che'. ¹³ Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yesjele'e che diža' güenlaže' da' yesoe' bene' yoble.

¹⁴ Na' le' Timoteo, cheyala' soachacho' gwzenago' che da' ca' chejni'ido' che Criston'. Nezd' naquen diža' li, le bzejni'iton' le'. ¹⁵ Cate' nactio' bidao' ba nombi'o Xtiza' Diosen' da' nyojen. Na' Xtize' nan' chzejni'in chio' cheyala' šejnilaže'cho Cristo Jesús'en' cont gata' yela' mban checho toli tocan'. ¹⁶ Cuiñ Diosen' bzejni'ide' bene' ca' bosozoj Xtizen' cont bosozoje' xbab chen'. Da'n'an' doxen Xtiza' Diosen' dan' nyojen zaca'chguan da' chzejni'in chio' che Diosen', chdilen chio' cate' choncho da' xinj, na' chzejni'in chio' nac goncho cont na' Diosen' choncho da' güen. ¹⁷ Na' chio' chejnilaže'cho Diosen', Xtizen' chzejni'in chio' yogo'loł da' cheyala' nezecho cont soacho goncho yogo' da' güen.

4

¹ Yid Xancho Jesucriston' da' yoble cont gone' yela' justis che yogo' benačh, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjañezde' chona' mandaw gono' da' quinga: ² Chixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwdił legaque' che da' malen' chesone' cont yesyetinjen', na' gwđap yela' chxenlaže' bzejni'ide' da' cheyala' yesone'. ³ Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaque' diža' yoble da' yesazlaže' legacze'. ⁴ Yesebejyichje' bich yosozenague' che diža' lin' na' yosozenagche' che diža' da' chesaljaže' bene'. ⁵ Perw ca' naco' le', cheyala' gaco' bene' yo'o xbab, na' gwđap yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo' nao' gono'.

⁶ Na' ca' nac neda', ba zoa yesote' neda', da' li ba chžin ža šjayzoa' len Diosen'. ⁷ Na' chebeda' guac nia' do yichj do laža' ba gwdiłlena' da' chgue'e Diosen'. Ba bena' yogo'loł da' gwlo'o Diosen' lo' na' gona' na' ba gwzoachacha' chejnilaža' Jesucriston' na' ne' zoachachca'. ⁸ Na' cate' šjayzoa' len Diosen', gone' cont soa' mba da' bena' güen šlac mba'na'. Xancho Jesucriston' zeje' to licha, na' cate' žin ža choglagüe' nac gac che yogo'loł bene', gague neda'zen' gone' soa' mba, san yogo' nochle bene' chesyebede' chesebeze' baten' yide' da' yoble, lecze gone' cont legaque' yesenite' mba.

Da' chaclaže' Pablon' gon Timoteon'

⁹ Ben byen con ga zelao saque'do' yob yido' nga. ¹⁰ Ben ca', le Demas ba gwlejyichje'nda' na' ba zjaye' yež Tesalónica da' ch'chgua yichje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia. ¹¹ Yetoga Lucas nga'anlen neda' nga. Na' che'sco' Marcos cate' yido', cont gaclene' neda' len xšin Dios da' chona'. ¹² Ca' nac Tíquicon', ba gwšela'ne' ciuda Efeso. ¹³ Na' chaclaža' goxo' xadon chia' da' bucu'a'ana' yež Troas liž Carpo cate' yido', na' lecze goxo' libr ca', na' da' žialaoch goxo' yid ca' da' ba zjanyoj.

¹⁴ Alejandro bene' güečhač yan' ba benchgüe' mal len neda'. Xancho Diosen' gwnežjue' le' castigw che da' malen' bene'. ¹⁵ Na' gwsaco' len le', le chonchgüe' clele len xtiža' Diosen' da' chyxjue'echo.

¹⁶ Cate' bosodie' neda' lo na' justis ca' da' nechw, nono gwzoa no gaclen neda', yogo' bene' ca' gocda' yesaclen neda' gosebejyichje'nda'. Diosen' yezi'xene' chegaque' da' bi gosaclene'nda'. ¹⁷ Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' goten'. ¹⁸ Na' nezda' yoslacze Xancho Jesucriston' neda' lo yogo' da' mal da' gac chia', na' guaclencze' neda' šlac žin ža šjayzoalena'ne' gan' zoe' chnabi'e. Cheyala' gonxenchwne' toli tocañe. Can' gonščaczcho.

Pablo chguape' tiox yeto chope' na' chñablaže' gaclen Diosen' legaque'

¹⁹ Gwguapšco' tiox Prisca na' Aquila na' lecz ca' bene' lo' yo'o che Onesíforo. ²⁰ Erasto bega'ane' ciuda Corinto, na' bocua'aña' Trófimo yež Mileto, le gocšende'. ²¹ Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

²² Chñaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

CART DAN' BZOJ POSTLW SAN PABLO CHE TITO

Pablon' bzoje' cart nga

¹ Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yesenezde' can' ža diža' li che Diosen'. Na' diža' li chen' chzejni'in can' goncho da' chazlaže', ² na' chzejni'in zoacho lez šjazyocho len Diosen' toli tocane. Za' xe yežlion' Diosen' gwne' bene' yesejnilaže' le' šjasyenite' len le' toli tocane, na' Diosen' bi chonlaže' bite'teže da' že'. ³ Na' na'a ba chac da' bžie' bia' gac da' ba chzejni'ida' bene' xtižen', le Dios ben' none' yela' mban checho toli tocane gwlo'e lo na' chyixjue'eda' bene' xtižen'. ⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' none' yela' mban checho toli tocane yesaclenšque' le'e na' yesyeyaše'de' le'e na' yesone' cont soa cuezle binlo len xbab chelen'.

Da' chon Titon' gan' nzi' Creta

⁵ Cate' bocua'ana' le' gan' zoa yežlio da' nzi' Creta dan' chi' lo nisdaon', gwnia' gwzožo' gono' dan' chona' cate' gwzoa' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'. ⁶ Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejnilaže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinj, ca bene' nac ca' cheyała' cuejo' güia na' lježe'. ⁷ Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw. ⁸ Bene' cuejo' cheyała' gague' bene' chbede' chlebe' bene' zito' ližen'. Cheyała' gague' bene' zoateze' chone' da' güen na' bene' chon xbab, bene' chon da' zej to licha, bene' chon da' chazlaže' Diosen' na' bene' chon con ga zelao chzaque' de' cont chone' bi da' ža Diosen'. ⁹ Cheyała' gague' bene' zoachache' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chachlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clen' chesone'.

¹⁰ Chnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gague' da' chosozejni'ide', con chesonlede' bene'. ¹¹ Na' da' zjachi' yichjgague' yesone' gan mechw, da'nan' chosozejni'ide' da' zej clele. Cheyała' gonle cont yesenite' šize bich yosozejni'ide' diža' güenlažen', le clen' chesone'. Na' bene' zan len bene' lo' yo'o chegaque' chesacžejlaže' che xtiža' Diosen' neche xtiža'gaguen'.

¹² Cana' gwzoo to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teže zjanaque' bene' güenlaže' na' zjanaque' ca' bež znia' yela' güen da' xinj chegaquen'. Lecze zjanaque' bene' lia na' bene' xagüed." ¹³ Na' da' li can' gwmen'. Da'nan' tilo' legaque' che da' xinjen' chesonen' cont nita'chache' yesejle'e xtiža' Criston'. ¹⁴ Gono' ca' cont bich yosozenague' che diža' güenlažen' chesaljlaže' bene' Israel gualaž chia' ca', na' neca yosozenague' che nochle bene' ba gosebejyichje' diža' li che Diosen'.

¹⁵ Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'. ¹⁶ Chesene' zjanombi'e Diosen', perw nacbia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

2

Xtiža' Diosen' da' chsed chlo'echo bene' naquen güen

¹ Na' le', cheyała' gwzejni'ido' bene' yesone' can' ža diža' li che Diosen'. ² Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyała' yesenabia' cuine' cont yesenite' yesone' da' güen, na' bzejni'i legaque' cheyała' yesenita'chache' yesejnilaže' Diosen'. Cheyała' yesacde' bene' na' yesape' yela' chxenlaže' bite'teže da' chac. ³ Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyała' yesenite' yesone' da' güen cont yeseneze bene' yezica'chle can' cheyała' yesone'. ⁴ Na' no'ol gol ca' cheyała' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' chegaque'

ca'. ⁵ Na' yosozejni'ide' legaque' cont toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' chegaque'. No'ole xcuide' ca' cheyala' yesone' güen can' ba gwnian' cont nono ne mal che xtiža' Diosen'.

⁶ Na' lecze cheyala' neyoedo' bene' byo xcuide' ca' cont toe' yesenabia' cuine' na' yesone' da' cheyala' yesone'. ⁷ Na' le', bite'teže da' gono', ben con da' nac güen cont yesache'e bene' yoble naquen' cheyala' yesone'. Cate' chsed chlo'edo' bene', bzejni'i' legaque' do lažo', benen cont nachia' chapo' Diosen' bala'añ. ⁸ Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyēelde' bi da' mal yesene' checho.

⁹ Gož bene' güen žin ca' yosozenague' che xangaquen' na' yesone' bite'teže da' yesene' sin chi yosyoži'e xtiža'gaquen'. ¹⁰ Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesache'ede' güenna' nac xtiža' Diosen', Dios ben' none' yela' mban checho toli tocane.

¹¹ Diosen' nži'ilaže'de' chio' benač na' ba blo'e chaclaže' gone' yela' mban toli tocane che yogo'cho. ¹² Na' da' none' ca' chzejni'in chio' cheyala' cuejyichjo yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyala' soa cuezcho nabia' cuincho cont goncho da' nac da' zaca'. Na' cheyala' goncho da' zej to liča; na' cheyala' soacho gonxencho Diosen' yežlio nga. ¹³ Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none' yela' mban checho toli tocane, na' zaca'chgüe'. ¹⁴ Len' bnežw cuine' neče chio' cate' gosote'ne' cont bñitlagüe' xtoła'chon', na' beya' beyibe' yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

¹⁵ Can' cheyala' gwzejni'ido' bene'. Na' cheyala' gono' chač laže' yesone' da' güen na' toli' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaque'. Bi go'o latje yosozoe' le' to šla'ale.

3

Can' cheyala' gon chio' chejnilaže'cho Jesucriston'

¹ Da' yoble yozzendo' bene' chesejnilaže' Jesucriston' cheyala' yosozexjwyichje' yosozenague' che justis ca' na' che bene' gwnabia' chegaque' ca' na' bate'teže cheyala' yesone' da' güen. ² Yozzendo' legaque' bi cheyala' yesene' mal che note'teže bene'. Bi cheyala' yesedił yosošaše', san cheyala' yesaque' bene' šagüe' na' yesape' yela' chxenlaže' len yogo'lol bene'.

³ Chio' lecze bi gwejni'icho cana' na' bencho güedenag len Diosen'. Gwejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho. ⁴ Perw bžin ža Dios ben' none' yela' mban checho toli tocane blo'ede' chio' catec bene' šagüe' naque' na' catec chacde' chio' benač. ⁵ None' chio' yela' mban toli tocane gague neče bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzoloa chejnilaže'chone', na' Spiritw čen' bocoben yichjlažda'ochon'. ⁶ Diosen' gwsele' Spiritw čen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocane gwñabde'ne' selen'. ⁷ Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocane.

⁸ Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' čen. Le bene' ca' ba chesejnilaže' Diosen' cheyala' yesebec yichjgaque' yesone' da' güen. Na' da' quinga ba gwnia' žjazaca'čguan na' yesaclenen note'teže bene'. ⁹ Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diaža che da' xozxta'ocho ca'. Bi gono' txen len bene' chesedił chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

¹⁰ Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale. ¹¹ Le da' bi chosozenague' nachen' nezecho zjambiaje'e na' zjanape' dola' che da' xinjen' chesone'.

Can' cheyala' gon Titon'

¹² Cate' seła' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'aña' na' tiemp zag. ¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde'

chanez. ¹⁴ Beṇe' lježcho ca' chesejnilaže' Criston' cheyaḷa' yesoe'laže' yesone' da' nac güen na' yesaclene' beṇe' chyažj chḡhine. Le cheyaḷa' gaccho beṇe' chon da' zaca'.

Beṇe' ljež Pablon' chosoguape' Titon' tiox

¹⁵ Yogo' beṇe' cheson xšin Diosen' txen len neda' nga chosoguape' le' tiox. Na' chṇaba' gwguapšco' tiox beṇe' ca' zoaleno' na', beṇe' ca' chesacde' chio' da' naccho txen chejni-laže'cho Criston'. Diosen' gaclenšque' yogo'le. Da' na'zen' chzoja'.

CART DA' BZOJ POSTLW SAN PABLO CHE FILEMÓN

Pablo chzoje' carten'

¹ Neda' Pablo dia' ližya nga da' chyixjue'eda' xtiža' Cristo Jesúsen'. Chzoja' le' Filemón, na' t xen len bene' lježcho Timoteon' chguapto' le' tiox. Chaqueto' le' da' naccho t xen choncho xšin Diosen'. ² Na' lēcze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca bene' zanto', na' le' Arquipo, chono' neto' t xen choncho xšin Diosen', lēcze chguapto' le'e tiox. ³ Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacde' bene' lježe'

⁴ Na' le' Filemón, yogo' ni'a cate' chjayze'eda' le' šlac choł güiža' Diosen', choa' yela' choxclen che' can' ba chono'. ⁵ Ba benda' diža' can' chejnilažo' Xancho Jesucriston' na' can' chacdo' lježcho bene' lēcze chesejnilaže' Jesucriston'. ⁶ Na' chnaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chnaba' gaclene' legaque' cont yesacbe'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. ⁷ Bene' migw, leca chbeda' na' chac chačh laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwnabe' yezi'xen Filemónna' che Onésimo

⁸⁻⁹ Dan' chacdo' Criston' na' chacdo' bene' lježo' ca', da'n nan' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwčhina' yela' chnabia' da' yo' o lo na'. Perw bi žan gona' ca'. Neda' Pablo ba naca' bene' gole na' lēcze na'a ba dia' ližya nga da' chyixjue'eda' xtiža' Jesucriston'. ¹⁰ Na' chnaba' goclen laguon' par Onésimo ben' ba nona' ca' xi'ina'. Le šlac dia' ližya nga bsed blo'eda'ne' cont chejnilaže' Jesucriston'.

¹¹ Cana' bi goque' mos güen chio', san na'a ba naque' mos güen chio' na' lēcze ca' chia' neda'. ¹² Ba chezsela'ne' laguo', na' chneyoeda' le' yolebo'ne' na' yezi'xeno' che', le leca chacda'ne'. ¹³ Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'. ¹⁴ Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gončhi'on. ¹⁵ Diosen' be'e latje beza' Onésimon' ližon' šlož cont soale t xen toli tocanē. ¹⁶ Na' na'a bich naque' mos chio' na'ze san naque' ca' bene' bišo' da' naque' t xen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca' chacdo' note teze benach, san can' chacdo' bene' lježo' chesejnilaže' Xancho'.

¹⁷ Da'n nan' še da' li naccho t xen chejnilaže'cho Jesucriston', yolebo'ne' cacze chlebo' neda' cate' chedena'a le'e. ¹⁸ Na' še bi da' mal bende' le' o še bi da' chale' chio', neda' chixjuan'. ¹⁹ Cuinca' neda' Pablo chzoja' da' nga, neda' chixjua' bi da' chala'. Na' bibi chnia' che da' chalo' le' chia' neda' da' ba de yela' mban chio' toli tocanē. ²⁰ Bene' migw, da' chaquecho Xancho Jesucriston' chaclaža' gono' dan' chnaba' nga ca to goclen chia'. Benšca ca soa' mbalaz, le naccho t xen len Criston'.

²¹ Zoa' lez gwzenago' chia' na' goncho' güen clel ca dan' žia' le', da'n nan' chzoja' le'. ²² Na' yeto da' chnaba', chaclaža' yedesoa' ližon' cate' yida' gan' zoalen'. Le zoa' lez yob gac yedyena'a le'e can' chnabile lao Diosen' cate' choł güižlene'.

Bene' ca' nita' len Pablon' chosoguape' Filemónna' tiox

²³ Epafras die' ližya nga t xen len neda' da' chyixjue'ede' xtiža' Cristo Jesúsen'. Na' le' chguape' le'e tiox. ²⁴ Na' lēc ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclenšcacze' le'. Da' na'zen' chzoja'.

CART DAN' NYOJ CHE BEÑE' HEBREO CA'

Diosen' gwsele' Xi'ine' cont be'lene' benachen' diža'

¹ Cani' Diosen' be'lene' da' xozxta' ocho ca' diža' len bene' gwsele' goso'e xtižen'. Zan las gosoe' da' bene' ca' xtižen' na' nža'te ca goso'en to toe'. ² Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaze' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'. ³ Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanłaze' cuine' gote' cont bexi beyach chio' len xtola'chon'. Na' beyož bene' ca' beyepe' yaban' zjajchi'e cuit Xe' Diosen' ben' nac bene' zaca' juisyw na' chnabi'e txen len le'.

Xi'in Diosen' zaca'che' ca angl ca'

⁴ Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'. ⁵ Diosen' bina' ye'e ne to angl ca dan' gože' Xi'inen', gože'ne': Len' naco' Xi'ina':

na'aža ba blo'a zoaczo'.

Na' bina' güe'e diža' che note'teze angl can' bi'e diža' che Xi'inen', gwne':

Neda' gona' cont gacbia' naca' Xe',

na' gona' cont gacbia' naque' Xi'ina'.

⁶ Na' da' nac Xi'in Diosen' la'zelagüe bene' zaca', da'n'an' cate' Diosen' gwsele'ne' yežlio nga gwne':

Yogo'lol angl chia' cheyala' yesonxene' le'.

⁷ Na' che angl ca' gwne':

Chona' cont angl chia' ca' bene' chesone' žin chia' chesaque' ca be' dan' chechj na' chesaque' ca yi' bel.

⁸ Perw che Xi'inen' be'e diža', gwne':

Len' naco' Dios na' nabi'o toli tocanē.

Na' leca güen chnabi'o, chono' con da' zej to licha.

⁹ Chebedo' da' zej to licha na' chgue'edo' da' malen'.

Da'n'an' neda' Dios ben' chonxeno' ba bena' cont zoacho' mbalazech ca note'teze bene'.

¹⁰ Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

¹¹⁻¹² Na' gwžin ža cate' te che yogo' dan' chle'echo le'e yaban' na' lo yežlion',

perw le' bi te chio'; soaczo' toli tocanē.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozeczē can' gaco' toli tocanē, gwbat žin ža te chio'.

¹³ Diosen' bina' ye'e ne to angl ca dan' gože' Xi'inen', gože'ne':

Gwche'edo' cuita' nga nabi'a'cho txen,

na' gona' cont yogo' no chesegue'e le' yosozexjw yichje' yosozenague' chio'.

¹⁴ Na' ca nac angl ca', yogue' zjanaque' bene' cheson xšin Diosen', na' chsele' legaque' chesaclene' chio' ba gwleje' šjayzoacho len le'.

2

Cheyala' gwzenagcho che Diosen' cont yeque'e xtola'chon'

¹ Na' da' nac Xi'in Diosen' bene' zaca'ch ca angl ca', do yichj do laže'cho cheyala' gwzenagcho xtižen' da' ba benecho. Le še bi gwzenagcho chen do yichj do laže'cho, guanłaze'chon na' cuejyichjchon. ² Diosen' goclaže' yosozenag da' xozxta' ocho ca' che ley che' dan' goseyixjue'e angl ca'. Da'n'an' Diosen' bnežjue' castigw da' cheyala' si' to toe' bate'tez bi bosozenague' chen, con ca nac da' mal da' gosone'. ³ Gague da' yelacho bi si'cho castigw še bi gwzenagcho xtiža' Xancho Jesúsen' da' gwduxjue'ede' že' chaclaže' gone' yela' mban checho toli tocanē. Da' zaca'chgua da' ben Xancho Jesúsen' cont gata' yela' mban checho toli tocanē. Cuine' gwduxjue'eden' da' nechw, na' bene' ca' gosodalen le' bosolo'ede' chio' le naquen da' li. ⁴ Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na'

yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

Jesucriston' goque' can' nac chio' beṇaḥ

⁵ Na' gague angl can' yesenabia' cate' žin ža gata' yežlio cobe dan' choe'cho diža' čhen. ⁶ Na' de late' Xtiža' Diosen' gan' nyoj diža' da' be'len to bene' Diosen', gwne':

žBixčhen' nži'ilažo' neto' beṇaḥ? le bitec bi zaca'to'.

Na' žbixčhen' chi' yichjo' chacleno' neto'?

⁷⁻⁸ Beno' cont beṇačhen' zjanaque' blao, na' con angl ca'ze zjanaqueh blao ca beṇaḥ.

Na' beno' cont beṇačhen' naque' bene' zaca' na' cont chaxene'.

Beno' cont yogo'lo' da' zjade yesaquen lo na' beṇaḥ, na' len yogo'lo' beyixe' yesacha' lo na'gaque'.

Na' da' ben Diosen' cont yogo'lo' da' de yesaquen lo na' beṇačhen' na' yogo' beyixe' yesacha' lo na'gaquen', bibi bocua'an Diosen' da' bi gwlo'e lo na' beṇačhen', la'czla' na'a bina' le'echo yesac yogon' na' yogo'ba' lo na' beṇačhen'. ⁹ Perw yogo'lo' ba yo'ocze lo na' Jesúsen', la'czla' šlac gwzoe' yežlio nga angl ca' gosacche' blaoch ca le'. Perw na'a da' bzanlaže' cuine' gote', da'nana' Diosen' bene' cont chaxenche' ca'legaue' na' cont nachbia' naque' bene' zaca' juisyw. Le da' nži'ilaže' Diosen' chio' beṇaḥ, da'nana' bžie' bia' got Jesúsen' cont gac yeque'e xtoła' to to beṇaḥ.

¹⁰ Diosen' bene' beṇaḥ, bene' beyixe' ca' na' bite'tezechle da' zjade cont chaxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgna be'ni', na' güenna' bene' bžie' bia' gwxcaca'zi' Jesúsen' cont gac gone' yela' mban toli tocaṇe che chio' beṇaḥ. ¹¹ Jesúsen' ba gwlo'e chio' lo na' Diosen' na' txen len Jesúsen' naccho xi'in Dios. Da'nana' bi cheto'e Jesúsen' ne' naccho biše' lježe'. ¹² Quinga gwna Jesúsen' gože' Diosen':

Gwzejni'ida' bene' biše' lježa' ca' can' nac yichjlažda'oguoñ,

na' txen len bene' ca' zjandop zjanžag chesonxene' le' gola' gonxena' le'.

¹³ Nach Jesúsen' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca' xi'ine'.

¹⁴ Chion' ba gwca'a Diosen' ca' xi'ine' naccho bene' bela' chen, na' da'nana' Jesúsen' lecze golje' goque' bene' bela' chen cont bnežjo cuine' gosote'ne'. Na' da' got Jesúsen', da'nana' gwzoede' bzoe' šla'ale Satanás dan' chnabia' da' xigüe' ca' na' dan' chonen yela' got che beṇačhen'. ¹⁵ Jesúsen' bene' cont bich chžebcho gatcho, can' chesežeb yezica'chle beṇaḥ šlac de yela' mban čhegaque', chesežebe' yesate'. ¹⁶ Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'. ¹⁷ Na' da'nana' benen byen goc Jesúsen' doxen can' nac chio' beṇaḥ cont naque' bžox blao čecho lao Diosen'. Na' bnežjw cuine' bñitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bñitlagüe' xtoła'chon', zaca'lebde' ca' bžox blao che naciön Israel čechon' ben' gwyej lao Diosen' beṇue' chen che beyixe' cont gwnabe' yezi'xen Diosen' xtoła'gaquen'. ¹⁸ Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nana' nezde' naclen' gaclene' chio' cate' chgo'oyela' gwxiyen' chio' goncho da' mal.

3

Jesúsen' zaca'che' ca da' Moisésen'

¹ Bene' migw, Diosen' ba gwleje' chio' naccho lo ne'e, na' cheyala' goncho xbab che Cristo Jesús ben' gwsele'. Naque' bžox blao čecho na' ben' chejnilaže'cho. ² Jesúsen' bene' cayanen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ochó ca' cani', bene' ca' gosac diaža che Dios. ³ Perw Jesúsen' zaca'che' ca da' Moisésen', le len' bžxie' diaža che Diosen', na' da' Moisésen' naque' con to bene' za' lo diaža che Diosen'. ⁴ Gwnita' beṇaḥ bene' bžxie' to to diaža yežlio nga, san ca' nac Diosen', len' bžxie' yogo'te da' zjade. ⁵ Da' Moisésen' goque' ca' xmos Diosen' cate' bene' con can' gwna Diosen' cont goclene' da' xozxta'ochó bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' beṇačhen' ca' tiempa'. ⁶ Perw Criston' bi goque' ca' to mos dan' gwzoe' bene' can' gwna Diosen', san da' naque' Xi'in Diosen' da'nana' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoačhačcho chejnilaže'chone' na' chebecho nezecho gac güen čecho.

Guac soacho mbalaz len Diosen'

⁷ Da'nana' cheyala' gwzenagcho can' ža Spiritw che Diosen' len da' nga da' nyojen, žan: Še Diosen' nie' le'e na'a,

⁸ bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle'e še leda' dan' goša' legaque' gwnežjua' da' yesezaca'zi'e neche xtola'gaquen'.

Bi gosejle'e chia' cate' gosaše' latje dašen', la'czla' choa iz besele'ede' can' bena' len' legaque'.

¹⁰ Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže',

na' bi chosozenague' chia' cont yesone' can' chazlažan'.”

¹¹ Nachen' bža'a legaque' na' da' baļi gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

¹² Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toļi tocanē. ¹³ Na' šlac na'a ne' decze latje gwzenagcho che Diosen', le neyoe lježe' tža tža cont ne tole bi gonle'xbaben' clele, gaquele bibi nonen gontezle da' xinj. ¹⁴ Da' li naccho Criston' txeñ še ne' zoacho chejnilaže'chone' cate' žin ža gatcho, con can' gwzolaochō chejnilaže'chone'.

¹⁵ Nyoj Xtiža' Diosen' che chio', žan:

Še Diosen' nie' le'e na'a,

bi gonle' güedenag can' goson da' xozxta'ole cani' cate' besyedabague' Diosen'.

¹⁶ Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. ¹⁷ Da'nan' choa iz Diosen' bže'e legaque' neche gosone' da' xinjen', na' gosat ben' besyedabague' Diosen' šlac ne' zjalaže' latje dašen'. ¹⁸ Na' legaque', da' bi bosozenague' che Diosen', da' baļi gwlo'e, gwne' bi güe'le latje yesenite' mbalaz yesyezi'laže' can' chezi'laže' Diosen'. ¹⁹ Na' nacia' da' bi gosejle'e che Diosen', da'nan' bi goc nite' mbalaz yesyezi'laže' can' chezi'laže' le'.

4

¹ Na' ca' nezecho lecze neche chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyala' gwsaca'cho cont bi goncho güedenag len' le'.

² Chio' ba benecho diža' güen cont gac soacho mbalaz ca' diža' dan' gosene da' xozxta'ocho ca' cani', perw diža' da' gosende' bi goclenen' legaque', le bi gosejle'en. ³ Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaque' na' gwlo'a da' baļi, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzologüe' chezi'laže' cate' beyož bxie' yaban' na' yežlion' na' bichle da' bene' ža gwlaste. ⁴ Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

⁵ Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

⁶ Na' ne' naquen da' li bal bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca' gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yela' güedenag chegaquen'. ⁷ Na' gwdechle gwne Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a,

bi gonle' güedenag.

⁸ Da' Josué gwchi'e da' xozxtao' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'nan' Diosen' be'e diža' gwdele, gwne' gwžin ža yesenite' mbalaz yesyezi'laže'. ⁹ Na' da'nan' bene' ba gwlej Diosen' cont yesaque' lo' ne'e, legaque' guac yesenite' mbalaz yesyezi'laže' ca' mbalazen' gwzoo le' cate' gwzologüe' chezi'laže'. ¹⁰ Na' bene' ca' ba nita' mbalaz chesyzezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'nan' žacho zjanite' mbalaz chesyzezi'laže' can' zoa Diosen' mbalaz chezi'laže' da' beyož bxie' yogo' da' zjade. ¹¹ Da'nan' cheyala' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len' xtižen' can' goson da' xozxta'ocho ca'.

¹² Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nłachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che caincho, na' chzejni'in chio' che xbab da' yo'o lo' yichjlažda'ochon' na' len' yogo' da' chzelaže'cho še naquen güen o naquen

mal. ¹³ Bibi de da' bi neze nle'e Diosen', ne to benach, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

Jesúsen' naque' b'xoz gwnabia' checho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b'xoz blao checho bene' la'zelagüe' zaca'. Da'n'an' cheyala' soachachcho šejnilaže'chone' can' ba be'cho diža' goncho. ¹⁵ Jesús ben' nac b'xoz blao chechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. ¹⁶ Na' dan' zoe' naque' b'xoz blao chechon' ben' cheyaše'de' chio', da'n'an' cheyala' yol'güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chacbe'echo chyažjecho gaclene' chio', le nži'ilaže'de' chio'.

5

¹ Yogo' bene' ca' ba gosaque' b'xoz blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtoła' da' xozxta'ochoc'a'. ² Na' b'xoz ca' gosape' yela' chxenlaže' len bene' bina' yesejni'i can' cheyala' yesone' na' len bene' ba n'xoayag da' malen' legaque', le lecze benach bene' güen da' xinj legaque'. ³ Da'n'an' benen byen b'xoz ca' gosote' beyixe' na' bosolalje' xchemba' cont gosenabe' yezi'xen Diosen' xtołen' lente xtoła' yezica'chle bene'.

⁴ Na' ne to b'xoz ca' bi benxen cuine' neca gwlej cuine' cont gaque' b'xoz blao, san Diosen' gwleje' to toe' gosaque' b'xoz blao can' gwleje' da' Aarón. ⁵ Na' ca'cze goc len Criston', bitw beyiljue' nac gone' cont gacxene', neca gwlej cuine' cont naque' b'xoz blao checho, san Diosen' gwleje'ne' na' gože'ne':

Len' naco' Xi'ina',

na'aža ba bena' cont nacbia' zoaczo'.

⁶ Na' ga yoble nyoj yeto da' gwne':

Naco' b'xoz tołi tocañe can' nac b'xoz ben' le' Melquisedec.

⁷ Na' Criston' šlac gwzoe' yežlion' boł' güiže' Xe' Diosen' ben' nape' yela' guac cont yosle' le' bi gate', gwne' ziže' na' gwcheže' gwnabe' gaclene' le'. Na' da' bzezjw yichj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yela' goten'.

⁸ Na' la'czla' Criston' naque' Xi'in Dios, bžaglagüe' yogo'lol da' ca' goc che' cate' bzenague' che Diosen' cont gwejni'ide' can' chac che chio' benach. ⁹ Na' beyož goc che' yogo'lol da' goclaže' Diosen', nach ba guaquer' gwnežjue' yela' mban tołi tocañe che yogo' bene' yosozenague' che'. ¹⁰ Can' naquen, Diosen' gwleje' le' cont naque' b'xoz blao checho, na' naque' ca' b'xoz Melquisedec.

Gwsaca'cho cont bi cuejyichjcho xtiža' Diosen'

¹¹ Na' ne' de da' zan da' chaclaža' nia' le'e che da' ngan', perw naquen zdebe nian' ca šejni'ilen, le bich chebele šejni'ilen. ¹² Ba gole' gwzejni'ile bene' xtiža' Diosen', perw gualaz da' gonle' ca', chyažjele no yozejni'i le'e da' yoble da' ca' bsdle da' nechw. Da'n'an' zaca'leble ca to bidao' bina' gac gagw na' con chaže'be'. ¹³ Na' bene' žjancac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'. ¹⁴ Na' dan' ža xtiža' Diosen' da' naquech zdebe, zaca'leben ca yela' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjajolagüe' chosozenague' che Diosen'.

6

¹⁻² Cana' betinjecho xtoła'chon', gwejniilaže'cho Criston', na' bsdedcho diža' güen che'. Goccho ca to bene' guat len yichjlažda'ochon' neče da' choncho da' xinj, perw ba betinjecho xtoła'chon' na'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' ch'xoa na'cho yichj bene' na' chnabcho gaclen Diosen' legaque'. Bich chyažjen gwsedchcho can' gac cate' yechis yosban Diosen' bene' guat ca' o caten' choghbi'en yezezaca'zi' bene' ca' ba goson da' xinj. Ba nsedcho da' ca', na' na'a bač cheyala' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. ³ Lenna' goncho na'a še Diosen' goņšque' latje.

⁴ Nita' bene' ba gwo'o be'ni' che Criston' lo' yichjlažda'ogaque', na' ba chesacbe'ede' can' nac yela' mban da' choñ Criston', na' ba zoa Spiritw che Diosen' lo' yichjlažda'ogaque'. ⁵ Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'. ⁶ Na' še žin ža bich yesejniilaže' Criston' na' yesebejyichje' xtižen', bich gac yesyetingde' che dan' ba gosebejyichje'ne', le lo' yichjlažda'ogaque' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesege'ede'

le'. ⁷ Cheyala' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyažje bene' chesazen'. Na' nacbia' Diosen' chebede' yežlion' nac ca'. ⁸ Bi gaccho ca to yežlio gan' chla' yag yeše' na' bichle yixe' da' nono chagw. Yežlion' nac ca' bibi zacan', na' ba zoa cuejyichj xanen len na' yixe' da' chla' lagüen žin ža šeyen.

Nezecho šjayzoacho len Diosen'

⁹ Le'e bene' migw, chacda' le'e, na' la'czla' ba bia' dižan' ca', nežda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. ¹⁰ Diosen' zeje' to liča, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquele Diosen'. ¹¹ Na' chaclaža' to tole soatezle gonchle ca' do yichj do laže'le šlac bina' žin ža gatle, cont nezele šjayzoale len Diosen'. ¹² Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'.

¹³ Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' baļi gac can' gwnen', le nono zoa bene' napch yela' gwnabia' ca Diosen'. ¹⁴ Gwne': "Da' li goncza' cont gac güen chio' na' cont yesac xi'in diaža chio' bene' zan." ¹⁵ Na' Abrahamna' gwdape' yela' chxenlaže' šlac gwleze', nach bžin ža gwzolao chac can' gwna Diosen'. ¹⁶ Benachen' zjayolagüe' chosozoe' Diosen' cue'e da' baļi che bi dan' chesene', le Diosen' chnabia'che' ca legaque'. Chesone' ca' cont bene' ca' chesacyože' len legaque' yesejle'e na' yesyexxenlaže'. ¹⁷ Na' Diosen' bzoa cuine' cue'e da' baļi cont neze bene' ca' zjanac xi'in diaža che da' Abrahamna' gague da' te che dan' gwne' gonen'. ¹⁸ Diosen' bene' čhope da' qui: gwne' can' gone' na' lecze bzoa cuine' cue'e da' baļi gac can' gwnen', na' gague da' te bi gac can' gwnen'. Chaclaže' chio' ba betinjje xtoļa'chon' yebecho nezecho šjayzoacho len le'. Na' Diosen' bi chac güe'le diža' güenlaže'. ¹⁹⁻²⁰ Na' da' nezecho šjayzoacho len Diosen', bi soa xbab chechon' quile ca'le. Jesúsen' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' bžoz blaoc checho toļi tocaņe, na' naque' ca bžoz Melquisedec.

7

Jesúsen' naque' ca bžoz Melquisedec

¹ Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blaoc gwleje' le' cont goque' bžoz. Na' goquen' Abrahamna' zeze'e lao gwdile gan' bene' gan' gayo' rey, na' Melquisedequen' jašague'ne' na' gwdixjue'ede' gac da' güen che da' Abrahamna'. ² Ca horen' Abrahamna' zeze'e zonse'e yogo'loļ da' jaytobe' da' bene' gan' lo yela' gwdilen', na' gwlequen' ši cuen na' bnežjue' to cuen che bžoz Melquisedequen'. Na' Melquisedec zejen diža' "rey bene' zej to liča". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo". ³ Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'nan' žacho Melquisedequen' zaca'lebde' ca Xi'in Dios ben' zoa toļi tocaņe naque' bžoz checho, le bi golje' Melquisedequen' lo diaža che nochle bžoz, na' neca gwzoa nochle bene' lo diaža che' bene' tie' gwłane' xlatje'.

⁴ Le gon xbab catec bene' blaoc goc bžoz Melquisedequen'. Da'nan' da' xozxta'ocho Abrahamna' gwleje' to cuen lo ši cuen da' ca' jaytobe' lo na' rey ca' na' bnežjue' bžoz Melquisedequen'. ⁵ Na' da' xozxta'ocho bene' ca' gosaljje lo diaža che da' Leví, ben' besyeyale' gosaque' bžoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahamna', bžoz ca' na' bene' yezica'chle. ⁶ Perw Melquisedequen' la'czla' bi golje' lo diaža che da' Leví, Abrahamna' bnežjue'ne' to cuen lo ši cuen da' ca' jaytobe', na' Melquisedequen' gwñabde' Diosen' gac güen che da' Abrahamna' ben' gwna Diosen' yesac xi'in diaža che' bene' zan. ⁷ Na' nezecho bene' chac chñabde' Diosen' gac güen che bene' yoble zaca'che' ca' ben' gac che' da' güenna'. ⁸ Na' bene' ca' zjanac bžoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' bžoz ca' zjanaque' con ljež benachcho bene' chesat. Na' che bžoz Melquisedequen' ben' gwxi' to cuen lo ši cuen da' jaytob da' Abrahamna', Xtiža' Diosen' choen' diža' che' ca to bene' ne' zoacze. ⁹⁻¹⁰ Na' da' bnežjo Abrahamna' le' da' ca', guac nacho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahamna', na' Leví nan' goque' xozxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

¹¹ Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson bħoz ca' bene' gosaljē' lo diaža che da' Levín'. Perw bħoz ca' bi goc yesone' cont yichjlaždao' benačen' yesaquen xilaže' len Diosen'. Da'n'an' byažjecho bid Jesúsen' naque' bħoz checho toli tocaņe, na' le' naque' ca bħoz Melquisedequen', gague ca da' bħoz Aarón. ¹² Na' cont goc zoa Jesúsen' naque' bħoz chechon', byažjen bža' ley da' nonen mandadw non' gac bħoz. ¹³ Le Xancho Jesúsen' ben' nac bħoz chechon' bi golje' lo diaža che da' Leví, na' noch no na' choj lo diaža che Jesúsen' bene' naque' bħoz. ¹⁴ Nezczecho Xancho Jesúsen' golje' lo diaža che da' Judá, na' da' Moisésen' bi bzoje' le'e leyna' ga nan bene' galje' lo diaža che da' Judán' guac yesaque' bħoz.

¹⁵ Na' nachbia' ba bža' leyna', le ba zoa Jesúsen' naque' bħoz cobe chechon' na' naque' ca bħoz Melquisedequen'. ¹⁶ Bito golje' lo diaža che da' Leví can' gosac bħoz ca' bene' goson žin can' ža ley da' bzoj da' Moisésen', san naque' bħoz da' bi gwzoe yela' goten' le' na' zoe' toli tocaņe. ¹⁷ Quinga nyoj da' gwna Diosen' che', žan:

Naco' bħoz toli tocaņe, can' nac bħoz ben' le' Melquisedec.

¹⁸ Na' bħoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benačen' to ši'i. ¹⁹ Na' leyna' lecze bi goc gonon cont yesac yichjlaždao' benačen' xilaže' len Diosen'. Perw na'a ba chaquech güen checho, le ba zoa bħoz checho bene' ba beca'a xtoła' chon' to ši'i cont zoacho binjo len Diosen' na' chac chnelenchone'.

²⁰ Na' cont nezecho Jesúsen' naque' bħoz checho, Diosen' bzoa cuine' gwlo'e da' baļi le soacze Jesúsen' gague' bħoz chechon'. ²¹ Bene' ca' gosaque' bħoz can' bzoj da' Moisésen', Diosen' bitw bzoa cuine' cue'e da' baļi cont šejle'cho zjanaque' bħoz. Perw nyoj can' gože' Jesúsen', žan:

Diosen' bzoa cuine' gwlo'e da' baļi na' bi gwše'e can' ba gože'ne' gone':

"Naco' bħoz toli tocaņe can' nac bħoz ben' le' Melquisedec."

²² Na' da'n'an' zoa Jesúsen' chone' cont nezecho Diosen' gaclene' chio' toli tocaņe can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'.

²³ Na' bene' ca' gosaque' bħoz can' ža ley dan' bzoj da' Miosésen', gosaque' bene' žan, le cate' gosat tgüje tgüje, la' benita'te bene' yoble. ²⁴ Perw Jesúsen' zoe' toli tocaņe, na' da'n'an' naque' bħoz checho toli tocaņe. ²⁵ Da'n'an' chac chone' yela' mban toli tocaņe che chio' chnabcho yezi'xen Diosen' checho, le zoacze' toli tocaņe chnabe' goclen lao Diosen' che chio' chejnilaže' chone'.

²⁶ Na' Jesúsen' nacyane' bene' chyažjecho gague' bħoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len benač bene' cheson da' xinj. Jesúsen' ba beyepe' zoe' gan' zoa Diosen', na' chnabi'e txen len le'. ²⁷ Nža'le naque' len bħoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła' gague', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezi'ca'chle bene' Israel gualaž checho ca'. Perw Jesúsen' šni'aze bnežjw cuine' neče xtoła' benačen' cate' gosote'ne' le'e yag cruzen', na' bi byažjde' gote' beyixe' can' goson bħoz ca' tža tža neče xtoła' gague' na' neče xtoła' bene' yezi'ca'chle. ²⁸ Bene' gosac bħoz blao can' ža ley da' bzoj da' Moisésen' gosaque' bene' güen da' xinj can' zjanac yezi'ca'chle bene'. Na' cate' ba goc žan iz bzoj Moisésen' leyna', Diosen' bzoa cuine' gwlo'e da' baļi zoacze Xi'ine' Jesúsen' naque' bħoz blao checho. Na' Xi'ine' Jesúsen' zoacze' toli tocaņe na' nac yichjlaždagüen' cayanen' chazlaže' Diosen'.

8

Jesúsen' bene' cont gwzolao chac da' cobe da' gwna Diosen' gone' cont gaclene' chio'

¹ Da' nga zejehen lao yogo' da' ba gwnia': zoa bħoz blao chechon' ben' nac cayane' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'. ² Chone' žin gan' zoa Xancho Diosen', gague lo' yo'o dan' goson benač cont yesonxene' le'. ³ Na' yogo' bħoz blao che bene' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsen' bħoz blao checho, benen byen bnežjw cuine' blalj xchene' neče xtoła'chon'. ⁴ Na' šaca' ne' zoe' yežlio nga bi naque' bħoz, le nita' bħoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'. ⁵ Na' bene' ca', chesone' bi da' chesone' lo' yodao' da' naquen ca l' gua'a šsaca' che yaban' gan' zoa Diosen'. Na' nezecho naquen ca l' gua'a šsaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' goson bħoz ca' žin che Diosen' cani', Diosen' gože'ne': "Yogo' da' ba gwnia' gonle, le gonon cayanen' blo'eda' le' caten' gwzoacho lo ya'an." ⁶ Na' da' chon Jesúsen', da' xen zaca'chen ca da' cheson bħoz che bene' Israel

gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neche xtoła'chon', lece da' xen zaca'chen ca dan' gože' da' xozxta'ochó ca' caní'.

⁷Le Diosen' gože' da' xozxta'ochó ca' gac güen chegaque' še yesone' can' ža ley chen', perw bi bosozenague', na' da'nán' byažjen gwdixjue' to da' cobe. ⁸Na' Diosen' bi bebede' legaque', san gwne':

Gwžin ža cate' nia' to da' cobe da' gona' gaclena' le'e nacle xi'in diaža che bene' ca' gosonite' Israel,

na' len le'e nacle xi'in diaža che bene' ca' gosonite' Judá.

Neda' naca' Xanle Dios žia' ca'.

⁹Nža' can' goša' da' xozxta'ole gona' gaclena' legaque' caní', bži'ilaže'da' legaque' na' bena' cont besyechoje' lo na' bene' nación Egipto.

Legaque' bi gosone' can' goša'ne' cont gac güen chegaque'.

Na' da'nán' gwleza' bich goclena'ne', neda' Xanle Dios žia' ca'.

¹⁰Na' quinga gona' gaclena' xi'in diaža che le'e nacle bene' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación chia'.

¹¹Na' bi yažjen yosozejni'i lježe' cont yesombi'e neda',

neca yažjen yosozejni'i no bene' biše' lježe',

le cana' yogo'lole' yesombi'e neda',

bi' bixjw lente bene' nac bene' gole.

¹²Canan' yezi'xena' xtoła'gaquen', na' bich gona' cuent še bi da' malen' ba gosonen'.

¹³Na' Diosen' be'e diža' che da' cobe da' gwne' gone' gaclene' nación chechon', na' da'nán' nezecho ba bzoe' to šla'ale da'na' gože' da' xozxta'ochó ca' caní'. Na' da' gole da' ba bzoe' to šla'ale ba zoa yeniten.

9

Yodao' da' zoa yežlion' na' dan' zoa yaba gan' zoa Diosen'

¹Caní' Diosen' gože' da' xozxta'ochó ca' gaclene' legaque' na' gac güen chegaque' še yesone' can' ža ley chen'. Na' šlac ne' chon žin da' nechw da'na' gože' legaque' caní', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga. ²Gosone' yodao' da' nsan' chope cuart. Na' lo' cuart nechon' bosozoe' to candeler na' to mes gan' bosocue'e yetextil da' naquen che Dios. Na' cuartna' bososi'en Latje che Dios. ³Na' bosozie' to lache' lo' yo'ona' cont bchojen chope cuart, na' cuart gwchopen' bososi'en Latje ga Zoa Dios. ⁴Na' lo' cuart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguazje' oro doxenen. Na' lo' cajan' gosegüe'e to yeso' de oro gan' gosegüe'e late' yela' guagw da' nzi' maná, na' gosegüe'e carrot che da' Aarón dan' bexeje. Lece lo' caj nan' gosego'ošagüe' yej ta'a ca' gan' byoj yogo' dan' bžia' bia' Diosen' yesone' cont gaclene' legaque'. ⁵Na' cože' cajan' bosonite' chope l' gua'a lsaca' bene' gosone' ca' angl bene' bososi'e querubines, cont nachia' zoa Diosen' gan' žia' cajan' na' naque' bene' zaca' juisyw. Na' cože' cajan' ladjo angl ca' gan' nžiljo xilgaquen', bosozie' xchen beyixe' cate' gosenabe' yezi'xen Diosen' xtoła' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

⁶Na' beyož gosone' yodaon' na' bosonite' yogo' da' ca' lo'enna', nach yogo' ža bžoz ca' goso'e lo' cuart nechon' na' gosone' can' bžia' bia' Diosen' gosone' gosonxene' le'. ⁷Na' cuart gwchopen', toz bžoz blao goc gwyo'e lo'enna' tni'a tğüz. Na' cate' gwyo'ena' benen byen bežoe' chen che beyixe' bži'en lo' cajan' cont Diosen' bezi'xene' xtole' na' bezi'xente' xtoła' yezi'ca'chle bene' Israel gualaž checho neče da' xinj da' gosone' sin cbi gosacbe'ede'. ⁸Na' da' bi de lsens šo' nochle bene' lo' cuart gwchopen', Spiritw che Diosen' chzejni'in chio' biña' gac šo' beňachen' gan' nac latje ga zoa Diosen' šlac ne' chon žin yodao' nechua' lo yežlion'. ⁹Na' yodaon' len yogo' da' cheson bžoz ca' lo'enna' chlo'en chio' zoacho na'a can' chac yaban' gan' zoa Diosen'. Na' la'cžla' da' zan chesoe' bene' Diosen' na' be zan beyixe' chesote' chesonxene' le', bibi yela' guac zjansa' da' ca' cont yesenezde' bibi doła' zjanape' len Diosen'. ¹⁰Na' da' ca' cheson bene' gualaž chechon' lo' yodaon' naquen costumbr che no nis yela' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' biña' gwše'e costumbr ca' len da' coben'.

¹¹Na' na'a Criston' naque' bžoz blao checho na' ba bžin ža bžie' costumbr güen ca'. Na' zoe' yaban' naque' bžoz checho lao Diosen', na' gan' zoen' zaca'chen ca' yodao' da' goson beňachen' yežlio nga. ¹²Na' bi bežoe' chen che no šib no go'ñ dao' cate' gwyo'e

gwɔnabe' cont Diosen' bezi'xene' xtolá'chon', san da' bnežjw cuine' gosote'ne' na' blalj xchene' neche xtolá'chon' tñi'aze le'e yag cruzen', da'nán' goc gwyo'e gan' zoa Diosen' na' ba beque'e xtolá'chon' toli tocané. ¹³ Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bxozen' legaue' xchen no šib no go'n na' nchixen len de da' chega'an cate' chosozeye' to vaca' dao'. ¹⁴ Na' xchen Criston' da' bedelalje' neche xtolá'chon' zaca'chen ca xchen beyixe' ca', le xchenen' cheyonen' yichjlažda'ochon' xilaže' len da' xinj da' ba bencho. Da'nán' bich nchoglaon checho gatcho neche xtolá'chon', san soaczcho gonxencho Diosen' ben' zoa toli tocané. Spiritw che Diosen' goclennen Criston' bnežjo cuine' beque'e xtolá'chon', na' bibi xtolá' Criston' gota'.

¹⁵ Criston' bedelalj xchene' cont gwzolao chac da' coben' dan' gwna Diosen' gone' cont soacho binlo len le'. Na' ba bxie' da' coben' cont balteze bene' ba gwlej Diosen' šjasyenite' len le' toli tocané. Na' da' got Criston' bedelalj xchene', da'nán' gwnitlao xtolá' bene' ca' gosejnilaže' Diosen' šlac ne' chon žin dan' gwdixjue' da' nechw dan' gwne' gone' cont chio' bene' Israel soacho binlo len le'. ¹⁶ Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. ¹⁷ Le to testament bi gac can' žan šlac ne' mban ben' ben len. Cate'ch ba goté' canan' gac can' žanna'. ¹⁸ Na' goc ca' len da' nechon' da' gož Diosen' da' xoxxta'ochó ca' gone' gaclene' legaue'. Da'nán' bžie' bia' bosolalje' xchen beyixe' cont gwxen. ¹⁹ Cate' da' Moisésen' beyož be'lene' da' xoxxta'ochó ca' diža' che yogo' dan' bžia' bia' Diosen' yesone' can' ža ley chen', nach Moisésen' bžie' e' legaue' xchen go'n dao' na' xchen šib dao' na' nis. Bžie' e' legaue' da' ca' len late' yiša' xa xila' da' mben color xna na' len to xis yixe' dao' da' nzi' hisopo. Lecze bžie' en lao libren' gan' nyoj ley chen'. ²⁰ Na' da' Moisésen' gože' legaue': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." ²¹ Na' lecz ca' bene' bžie' e' chenna' yodaon' na' yeso' ša' ca' bosochine' gan' gosonxene' Diosen'. ²² Ley dan' bzoj Moisésen' nžian bia' gwže'e bxozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še bina' lalj chen, Diosen' bi yezi'xene' xtolá' benachen'.

Criston' gote' blalj xchene' cont beque'e xtolá' bene' chesejnilaže'ne'

²³ Can' goc benen byen bosožie' xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l' gua'a lsaca' da' chzejni'in can' nac yaban'. Perw da' de yaban' byažžen to chen da' zaca'ch. ²⁴ Na' gan' gwyo'o Criston' gague naquen to yodao' da' naquen con to l' gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. ²⁵ Bxoz blao che bene' Israel gualaz checho ca' cheso'e yodaon' tñi'a tgiüz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ni'a gosote'ne'. Tñi'aze blalj xchene' neche xtolá' benachen'. ²⁶ Šaca' byažžen blalj xchene' zan ni'a, ba gote' zan ni'a gwzolaon cate' gwxxete yežlion', perw bi benen byen gac che' ca'. Bedelalj xchene' tñi'aze cate' gwna Diosen' ba bžin ža che', cont chac cheque'e xtolá' benačh. ²⁷ Na' can' chac che benachen', žin ža gat to toe' na' te yesate' nach na Diosen' che to toe' še yesezaca'zi'e o še yesenite' mbalaz. ²⁸ Na' can' yesat benachen' tñi'aze, ca'cze bnežjw cuin Criston' tñi'aze gosote'ne' cont chac cheque'e xtolá' benachen'. Nach žin ža yide' da' yoble perw gague cont yeque'e xtolá' benachen', san cont yeche'e bene' ca' chesebeze' batcan' yide' nach ñite' mbalaz len le'.

10

¹ Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. ² Šaca' yichjlažda'ogaue' beyaquen güen cate' gosote' beyixe' ca' na' cate' bxoz ca' bosožie' e' legaue' xchemban' neche xtolá'gaquen', ba gwnitlao xtolá'gaquen' to šize šaca', na' bich bi yesacde' lo' yichjlažda'ogüen' che da' xinjen' chesonen'. ³ Perw da' chesote' beyixe' ca' na' bichle da' chesone' neche xtolá'gaquen' to to iz, bi chac yesanlaže' zjanape' dola'. ⁴ Le xchen no go'n dao' no šib dao' bi gac yeca'an xtolá' benačh.

⁵ Da'nán' cate' Criston' bide' yežlio nga gože' Diosen': Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'nán' beno' cont golja benačh.

⁶ Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtolá'gaquen', gague da' can' chbedo'.

⁷ Da'nán' gwnia' can' nyojle'e libr gan' žan: "Dios chia', za'a nga zedeyena' con can' chazlažo'."

⁸ Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtolá'gaquen', gague da' can'

zelažo' na' gague da' can' chbedo'”, la'czla' leyna' nžian bia' yogo' da' ca'. ⁹ Nach Criston' gože' Diosen': “Za' na nga zedeyena' con can' chazlažo'”. Da'nan' nezecho ba bzo'e' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'. ¹⁰ Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tni'aze cani', da'nan' ba beyac yichjlažda' ocho xilaže' lao Diosen', chio' chejnilaže' chone'.

¹¹ To to bħoz che bene' Israel gualaz checho ca' con nita'cze' chesotcze' beyixen' tža tža na' chosoži'e' xchemba' can' ža leyna' cheyala' yesone', la'czla' xchen beyixen' bi gac yeca'an xtoła' benachen'. ¹² San Criston' tni'azen' bnežjw yela' mban che' na' zaca'czen cont yeca'an xtoła' benachen' toli tocane. Na' beyož bnežjw cuine' zjyachi'e' gan' chnabi'e' txen len Diosen'. ¹³ Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. ¹⁴ Na' da' bnežjw cuin Criston' tni'aze cani', bene' cont chio' naccho lo na' Diosen' beyac lažda'ochon' xilaže' toli tocane. ¹⁵ Na' Spiritw che Diosen' lecze benen cont nezecho naquen ca', le nyojen, žan:

¹⁶ Quinga gona' gaclena' legaque' cate' žin ža,
gona' cont šo' yichjgaque' da' nžia' bia' yesone',
na' gona' cont yesyebeden' lo' yichjlažda'ogaquen',
can' ža Xancho Diosen'.

¹⁷ Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaque' ba gota'.

¹⁸ Na' cate' ba gwnitlao xtoła'chon' bich chyažjen gotcho no beyixe' neche xtoła'chon'.

Cheyala' soacho gonxencho Diosen' neca žebcho

¹⁹ Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'. ²⁰ Guac nacho gwsaljue' to nez cobe, to da' chonen' chio' yela' mban toli tocane, le da' bnežjw cuine' gote' neche chio', guac šo'cho gan' zoa Diosen' na' bich naquen ca' part yodaon' da' ngaše' len lache' da' ze gan' nono gac šo'. ²¹ Na' zoa bħoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže' chone'. ²² Da'nan' cheyala' soacho gonxencho Diosen' do yichj do laže'cho neca žebcho, na' cheyala' soacho šejle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže' chone'. ²³ Na' can' gwzolaacho be'cho diža' gwnacho šjayzoacho len Diosen', ca'cze cheyala' goncho bate'teze, na' da' li šjayzoaczcho len Diosen', le zoacze' chone' con can' gwnen'. ²⁴ Lecze cheyala' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen. ²⁵ Na' bi cuejyichjcho da' chdop chžagcho txen chonxencho Diosen' ca' chesebeyičjij bał bene'. Cheyala' neyeho lježcho soaczcho šejnilaže'cho Criston', na' gonchcho ca' na'a ba nachbia' ba zoa te che yežlion'.

²⁶ Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. ²⁷ Na' cheyala'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'. ²⁸ Cani' da' xozxta'ochcho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' čhope o šone' bene' toz can' goso'e' diža' che da' xinjen' none'. ²⁹ Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolao chac da' cobe da' gwna Diosen' gone' gaclene' bene' yesejnilaže'ne'. ³⁰ Nombia'cho Diosen' na' nezecho len' gwne': “Neda' yoži'a che da' mal da' chesone' na' neda' gona' cont yesezaca'zi'e.” Na' lecze nyojen žan: “Xancho Diosen' čhogbi'e' nac gac che bene' ca' ba gwque'e ca' xi'ine'.” ³¹ Na' leca naquen da' žebcho še cuejyichjcho Diosen' ben' zoa toli tocane, le gone' cont saca'zi'cho toli tocane.

³² Perw le šjajza'laže' can' bchejele da' zan da' gwdi gwxcacale cate' beyož gwyo'o be'ni' che Criston' lo' yichjlažda'olen'. ³³ Tgüejje gosezi'diže' le'e lao yogo' bene' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. ³⁴ Beyaše'le bene' lježcho ca' bene' gosata' ližya na' godlen'e' legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. ³⁵ Da'nan' bi cuejyichjle da' chejnilaže'le Diosen', neca žeble, le žin ža cate' soachgualo mbalaz. ³⁶ Cheyala' gwyo gwchejle cont yeyož gonle yogo' lo' da' chnalaze' Diosen', na' tena' gone' cont soale mbalaz toli tocane can' gwne'. ³⁷ Can' nyoj Xtiža' Diosen', žan:

La' žinte ža yid ben' sela' gan' zualen', bich šede'.

³⁸ Na' xi'ina' bene' zjanac bene' güen len neda' yesata' yela' mban che' toli tocane da' chesejnilaže' neda'.

Na' še bich yesejnilaže' neda', bich yebeda' legaque'.

³⁹ Perw chio' bi naccho ca bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjazyoacho len Diosen' toli tocaņe.

11

Da' chejnilaže'cho Diosen' naquen to da' zejen

¹ Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biņa' le'echo. ² Baļ bene' gwlas ca' bebe Diosen' legaque' da' gosejnilaže'ne'.

³ Da' chejnilaže'chone' chejle'cho con gwnie' na' goc yaban' len yežlion'. Na' bibi bĉhine' da' le'echo cate' bene' yogo' da' ca' chle'echo.

⁴ Cani' da' xozxta'ocho Abel gwejnilaže' Diosen' na' da'nān' bnežjue' Diosen' to da' goch da' güen ca da' bnežjw bene' biše' Caīn. Na' dan' bebe Diosen' dan' bnežjw Abelen' le', da'nān' gwneze Abelen' naque' bene' güen len Diosen'. Na' la'czla' ba got Abelen', da' gwzoe' gwejnilaže' Diosen', naquen ca to da' chņeyoen chio' soaczcho šejnilaže'cho Diosen'.

⁵ Na' lecze da' xozxta'ocho Enoc gwzoe' gwejnilaže' Diosen', na' da'nān' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtīža' Diosen', žan Diosen' bebede' Enocuen' šlac gwzoe' yežlion'. ⁶ Na' Diosen' bi chebede' note'teze bene' bi chejnilaže'ne'. Le' note'tez bene' yoļ güiže' Diosen' cheyaļa' šejle'e zoacze Diosen' na' šejle'e gwnežjue' yela' mban toli tocaņe che note'tez bene' nabden' le' do yichj do laže'.

⁷ Na' ca nac da' Noé, lecze gwejnilaže' Diosen', na' cate' Diosen' bosnisde' le' can' za' gac, gwejle' Noén' can' gož Diosen' le', na' do bžebe' bene' to barcw gan' gwyo'en len bene' lo' yo'o ĉhe' ca' cont bi gosate' lo nisen'. Na' da' gwejle' Noén' can' gwna Diosen', blo'ede' yezica'chle bene' že' na' zjanape' doļa' da' bi bosozenague' ĉhe Diosen'. Na' lecze da' gwejnilaže' Diosen', goc gwna Diosen' naque' bene' güen len le'.

⁸ Da' Abrahanna' lecze gwejnilaže' Diosen'. Da'nān' bzenague' cate' boļ güiž Diosen' le' na' gože'ne' šeje' ga de to yežlio zito' da' gaquen ĉhe'. Na' gweje' la'czla' bi nombi'e latjen'. ⁹ Na' Abrahanna', da' gwejnilaže' Diosen' jasoe' laž bene' zito' da' gwna Diosen' gac ĉhe' na' gac ĉhe' xi'in diaža ĉhe'. Gwzoe' lo' yo'o de lache'ze na' lecze lo' yo'o de lache'ze gwnita' xi'ine' Isaaquen' na' xi'in xesoe' Jacob bene' lecze gož Diosen' gac yežlion' ĉhegaque'. ¹⁰ Abrahanna' gwzoa gwleze' ca' lo yežlion', le gwnezde' žin ža šjazyoe' gan' zoa Diosen' gan' naquen to ciuda güen da' bi te ĉhen, ciuda da' ben Diosen'.

¹¹ Na' Saran' no'ol nac no'ol ĉhe Abrahanna', la'czla' naque' bene' güiž na' naque' bene' gole par soa xi'ine', Diosen' bene' to yela' guac cont gwzoa xi'ine', le gwejle'e gon Diosen' con can' gwne' gone'. ¹² Ca' goquen' gwzoa bi' ĉhe da' Abrahanna' la'czla' goque' bene' gole par soa xi'ine', nachen' xi'in diaža ĉhe' gosaque' bene' zan can' zjanac beljw ca' na' can' nac yox da' ĉi' cho'a nisaon' da' nono ĉac gwlab.

¹³ Yogo' bene' ca' ne' ĉhejnilaže' Diosen' cate' bžin gosate'. Na' la'czla' biņa' gac lo na'gaque' dan' gože' legaque' gac ĉhegaquen', bi gosacžejaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. ¹⁴ Na' da' goso'e diža' bibi lažgaque' de yežlion', nacia' gosezelaže' yesyežine' ga yoble gan' gac lažgaque'. ¹⁵ Šaca' gosone' xbab ĉhe yežen' gan' gosaljen' naquen lažgaque', gota' latje jaya'aque' šaca', perw bi gosone' xbaden' ca'. ¹⁶ Gosezelaže' yesyežine' yaban', le gosejle'e na'len' nac lažgaque', na' gosenezde' nacchen güenĉ ca yežlion'. Da'nān' Diosen' bi ĉeto'ede' ĉhegaque' že' naque' Dios ben' ĉesonxene', na' ba benšagüe' to ciuda gan' zjanite'.

¹⁷ Na' Abrahanna' da' gwejnilaže' Diosen' da'nān' bzenague' cate' Diosen' bene' le' prueba gože'ne' cheyaļa' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czla' gwnezde' Diosen' gože'ne': ¹⁸ "Gona' cont nita' xi'in diaža ĉio' bene' yesac xi'in diaža ĉhe Isaaquen'." ¹⁹ Da' Abrahanna' beĉhoglaže' gote'be', le gwnezde' Diosen' ĉac ĉhosbane' bene' guat. Perw na' Diosen' bi be'e latje gote'be'. Da'nān' guac naĉo bosbane'be' ladjo bene' guaten', la'czla' gague gotbe'.

²⁰ Gwdechle Isaaquen' gwejnilaže' Diosen'. Da'nān' gwñabde' Diosen' gone' güen len xi'ine' Jacob na' Esaū. ²¹ Lecze da' Jacoben' gwejnilaže' Diosen'. Da'nān' cate' ba zoa gate', gwñabde' Diosen' gone' güen len xi'in xesoe' ca' bin' gosac xi'in da' Josē. Na' bĉheque' yichje' benxene' Diosen' nĉiše'teze' carrot ĉhe'. ²² Na' da' Josēn' gwejnilaže' Diosen', na' gwejle'e žin ža yesyehoj bene' gualaž ĉhe' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit beñat ĉhen' cate' yesyeya'aque'.

²³ Cate' golje da' Moisésen', da' leca gosejnilaže' xaxne'en Diosen', bi besežebe' yesyed-abague' dan' bžia bia' reyen' yesone', gwne' cheyaļa' yesote' bi' byo ĉhegaque' ca'. Šone bio' bosocuaše'be' ližgaquen', le gosacde' nacĉguabe' xdan. ²⁴ Nach bi' no'ol ĉhe rey beque'ebe' bosĉha'ogüe'be'. Perw cate' ba gwĉa'o da' Moisésen' bžone' yesone' le' ca' xi'in bi' no'ol ĉhe rey ĉhe Egipton', le gwejnilaže' Diosen'. ²⁵ Da'nān' gwyazlaže'che' bžaglagüe' txen len bene'

gualaž che' ca' yogo' dan' bososaca'zi' bene' Egipto ca' legaque', cled ca gone' txen len bene' Egipto ca', le goche'ede' yob te che yela' chebe che da' xinj ca' cheson legaque'. ²⁶ Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac che' yogo' yela' gwni'a da' de che bene' Egipto ca', le gwnezde' gwžin ža gon Diosen' cont soe' mbalaz. ²⁷ Na' da' gwejnilaže' Diosen', bi bžebe' rey cate' bžin ža besyechoje' Egipton' la'czla' reyna' bža'achgüe' legaque', con gwzoacze' bzenague' che Diosen'. Gwnezde' zoacze Diosen' la'czla' bi chle'echone'.

²⁸ Nach Moisésen' da' gwejnilaže' Diosen' bžie' bia' da' xoxxta' ocho ca', bene' že' to to yo'o gosote' to xila' dao' na' bosožie' xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. ²⁹ Na' da' xoxxta' ocho ca' gwnita' cani', da' gosejnilaže' Diosen' da' nan' Diosen' bene' cont Nisdao' Xnan' goquen chople, na' bla' yo biž gacholen cont goc goselaguen'. Perw bene' Egipto ca' cate' gosaclaže' leze yeselague' nisdaon', bocuaše' nisa' gan' chesedien', na' gosate' gose'eje' nisen'.

³⁰ Lecze da' gosejnilaže' da' xoxxta' ocho ca' Diosen', da' nan' Diosen' bene' cont bebix ze'e da' gwychj doxen ciuda Jerico cate' gosechje' ze'en yogo' ža lao gaže ža. ³¹ Na' da' no'olen' le' Rahab, no'olen' goque' no'ol zle', lecze gwejnilaže' Diosen', na' da' nan' bi gwžiaje'e txen len yezica'chle bene' Jerico bene' bi bosoznague' che Diosen', le blebe' chop da' xoxxta' ocho ca' ližen' cate' jasegüia jasene' lažen'.

³² Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che da' rey David, che da' Samuel, na' che yezica'chle bene' goso'e xtiža' Diosen' cani'. ³³ Da' gosejnilaže' Diosen' besechoje' gosone' gan cate' gosedile' len no rey, na' bałe' gosaque' bene' gwnabia' na' gosone' byen goson bene' yoble da' güen, yebale' besele'ede' ben Diosen' bi da' güen da' gwne' gone' len legaque', yebale' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e'legaque' gan' že'ban'. ³⁴ Lecze da' gosejnilaže' Diosen', bałe' bi goseye' cate' bene' bosozale' legaque' lo yi', yebale' besyele' cate' bene' gosaclaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'. ³⁵ Na' gwnita' no'ol ca' da' gosejnilaže' Diosen' da' nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da' nan' gosate', bi gosaclaže' yesyele' lo na' bene' mal ca'. Goso'e latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo bene' guat ca' cont yesenite' len le'. ³⁶ Gwnita' yebał bene' leca gosezi'diža' bene' legaque' na' leca goseyine' legaque', na' bosochjeje' legaque' gden na' goseyixjue' legaque' ližya. ³⁷ Na' bene' ca' besegue' legaque' gosote' legaque', bałe' bosochele' legaque' yej, yebale' bosozoxje' cuerp chegaquen' len sier, yebale' gosote' len spada. Na' bał bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. ³⁸ Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga bi zjazaque' yesenite' txen len legaque'. ³⁹ Diosen' bebede' yogo' bene' ca' da' gosejnilaže' le', perw šlac gosenite' biña' gone' yogo' da' güen da' gwne' gone' che xi'ini diaža che da' Abrahanna'. ⁴⁰ Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

12

Cheyała' soacho goncho xbab che Jesúsen'

¹ Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da' nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjo bi da' xinj da' choncho, le da' xinjjen' chziye'czen chio'. Na' cheyała' soatezcho goncho can' ža Diosen' sin cbi yeche'echo. ² Jesúsen' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintocho gan' zoe'na'. Na' cheyała' soacho goncho xbab ca' Jesúsen' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsen' ba chi'e chnabi'e txen len Diosen'.

³ Cheyała' goncho xbab can' byo bchejlaže' Jesúsen' len yogo' da' ca' gosone bene' mal ca' le' na' bene' can' gwna Diosen'. Na' ca'cze cheyała' gwo gwchejlaže'cho goncho can' chazlaže' Diosen' la'czla' še chaquechon zdebe; bi cheyała' yeche'echo. ⁴ Da' zan da' ba bžaglaole chdillenle da' malen', perw biña' lalj xchenle na' biña' yesote' le'e. ⁵ Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,

na' bi gaco' tole cate' chdi'e' le'.

⁶ Le Xancho Diosen' chzejni'ide' yogo' bene' chacde',

na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

⁷ Cheyala' gwo gwchejlaže'cho cate' Diosen' chone' chio' da' saca'zi'cho, le chonde' chio' ca benachen' chonde' xi'ingaque'. Le yogo'ze bedao' chnežjo xaben' lebe' castigw cate' chontezbe' da' xinj. ⁸ Na' še bi choñ Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yesezaca'zi'e cate' chesontezte' da' xinjen'. ⁹ Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyala' yesone'. Nacchxe cheyala' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocanē. ¹⁰ Na' xaxna'chon' to chop izzen' šlac bososgole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdi'e' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'. ¹¹ Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to liča na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'nan' le soa le gon can' chazlaže' Diosen' sin chi yeche'ele. ¹³ Le soa le gon da' güen cont gaclenē bene' ca' ne' chesacžjlaže' naquen' yesone' cont legaque' yosozenagche' che Diosen' na' bi yesebejyichje' xtižen'.

¹⁴ Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. ¹⁵ Le gaclen lježe cont ne tole bi ganlaže'le catequen' nži'ilaže' Diosen' chio', le cate' chzolocho choncho güedenag len Diosen', bedao' chča'o chxenen na' guacte gonen cont bene' zan yesonche' da' xinj. ¹⁶ Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. ¹⁷ Nezele gwdechle goclaže' yeyac lo ne'e da' bdie' lo na' bene' biše', perw bich bi goc bi gone' cont yeyaqwen lo ne'e la'czla' gwcheže' catec gwzelažen'.

¹⁸ Nža'le chac che chio' na'a na' can' goc che da' xozxta'ochon' can' cate' Diosen' bnežjue' legaque' ley chen'. Cate' betje' lo ya'a Sinai' gwyechj yi' bej ya'ana', gwxoan žen, beyaqwen choj, na' gwyechjchgua be'. ¹⁹ Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'. ²⁰ Besežebchgüe', le Diosen' ba gožle' legaque' še noe' yesebigue' lo ya'an cheyala' yesote'ne' yosochele'ne' yej, na' lecz ca' yesone' še len beyixe'. ²¹ Da' zaca' žebocho goc lo ya'an, lente da' Moisésen' gwne': "Leca chaž chžeba' can' chaquen'."

²² Perw chio' chejnilaže'cho Criston' ba naccho txen len Diosen' ben' zoa toli tocanē na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nan' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. ²³ Na' naccho txen len yogo'lojte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' goñ Diosen' chio'. Na' naccho txen len Diosen' bene' choglaogüen' che yogo' benach še de xtol'a'gaque'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. ²⁴ Na' naccho txen len Jesús ben' blalj xchene' cont gwzoloac hac da' coben' da' gwna Diosen' gone' gaclene' benachen'. Na' blalj xchenen' cont ba bnitlao Diosen' xtol'a' chio' chejnilaže'chone'. Da'nan' xchen Jesús'en' zaca'chen ca xchen da' Abelen' da' gwlalj caten' betw bene' bišen' le'.

²⁵ Da' mal juisyw še goncho güedenag len Diosen' cate' chne' chio'. Bene' cont gosezaca'zi' da' xozxta'ochon' ca' cate' gosone' güedenag len xtižen' da' gwne'lene' legaque' lo yežlion' can', na' gonche' da' saca'zi' chio' še goncho güedenag len xtižen' da' choe'lene' chio' lo' lažda'ochon' zoe' yaba na'ate. ²⁶ Leca gwxo' cate' Diosen' betje' lo ya'a Sinain' cont be'lene' da' xozxta'ochon' ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." ²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. ²⁸ Da'nan' cheyala' güe'cho yela' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyala' gache'echo bene' zaca'chgua nac Diosen' cont gonxenchone' do yichj

do laže'cho can' chazlažen'. ²⁹ Cheyała' gwzenagcho chen', le Dios chechon' leca chgue'ede' da' malen' na' sele' lo'yi' gabil bene' ca' bi yesyetingde' che da' xinjen', da'nan' zaca'lebbe' ca' yi' bel.

13

Da' chazlaže' Diosen' goncho

¹ Bitw gwsanle gaque lježle, le yogo'cho chejnilaže'cho Jesucriston' naccho ca biše' lježcho. ² Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Bał xozxta'ochcho ca' cate' bosolebe' bene' zito' ližgaquen' bosolebe' angl bene' gwsela' Diosen' neca gosache'ede'.

³ Cheyała' gonle xbab che bene' lježcho ca' chesata' ližya cont gaclenle legaque'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosochi chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

⁴ Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

⁵ Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." ⁶ Da'nan' bibi de da' žebcho, na' to tocho guac nacho:

Xana' Diosen' zoe' chaclene' neda'.

Bi žeba' bi da' gone benachen' neda'.

⁷ Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosache'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gaque' toli' tocañe. ⁹ Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bale'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca nac da' ca' chesene' cheyała' ye'ej gagwcho cont yebe Diosen' chio', biña' yesaclenen bene' ca' chesene' cheyała' gagwchon, na' neca gaclenen chio'.

¹⁰ Xancho Jesucriston' bnežjw cuine' gosote'ne' neche chio', na' da' chejnilaže'chone' ba gwnitdao xtoła'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'. ¹¹ Nezecho tni'a tğüz bene' nac bxož blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chnabde'ne' yezi'xene' xtoła' yogo'loł gague'. Nach jezica'chle bxož ca' chosozeye' cuerp che beyixe' ca' cho'a yežen'. ¹² Na' ca ca'le goc che Jesüsen' dan' gosote'ne' cho'a ciuda Jerusalenna' cate' bnezjw cuine' cont beque'e xtoła'chon' len xchene' dan' blaljen'. ¹³ Da'nan' cheyała' šejnilaže'cho Jesüsen' na' cuejyichjcho costumbr gol ca', la'cžla' yesegue'e bene' chio' da' choncho ca'. ¹⁴ Gate'tez zoacho lo' yežlio nga da' te chen, perw chbezcho šjayzoalencho Diosen' lo' ciuda da' bi te chen. ¹⁵ Da' ba beca'a Jesucriston' xtoła'chon' cheyała' güe'cho yela' choxclen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. ¹⁶ Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

¹⁷ Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zibebe, le še gonle güedenag len legaque', bibi da' güen chga'ñ chele še ca'.

¹⁸ Le nab cont gaclen Diosen' neto'. Nezeteto' chonto' can' chazlaže' Diosen' na' chaclaže'to' gonto' con da' naquen güen. ¹⁹ Na' leca chata'yoeda' le'e yol güižle Diosen' nable yob gac yidcha' gan' zoalen'.

Chnabe' gaclen Diosen' legaque'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebbe' ca' to bene' güeye' xila' bene' chon da' güen juisyw len be che' ca'. ²¹ Na' chnabda' Diosen' gaclene' le'e bite'tez da' chyažjele cont soale gonle yogo'te da' güen can'

chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocañe. Na' ca' gonšcazcho.

²² Bene' migw, chñabšca' bi gaquele zed da' ba bzoja' le'e chñeyoeda' le'e nga, le bitec naquen da' toñe. ²³ Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedena'a le'e.

²⁴ Ca nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejnilaže' Diosen'. Bene' lježcho ca' za'ac Italia lecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

CART DAN! BZOJ SANTIAGO

Santiagon' chguape' tiox bene' ca' zjanaslas zan yež

¹ Neda' Santiago naca' bene' güen žin che Diosen' na' che Xancho Jesucriston'. Chguapa' le'e tiox, le'e nacle šižinw cue' xi'in diaža che da' Israel, le'e chejnilaže'le Jesucriston' na' naslasle yežlion'.

Nac nezecho can' che'ne Diosen' goncho

² Bene' migw, cheyala' yebechgüecho cate' chac bite'teze da' chac checho. ³ Cate' chac bi da' chac checho chonen chio' prueba še gonchachlaže'cho šejnilaže'cho Diosen'. Na' nezecho cate' chonchachlaže'cho chejnilaže'chone', chaclenen chio' cont gapchcho yela' chxenlaže' len bite'teze da' chac checho. ⁴ Na' da'nan' cheyala' gaple yela' chxenlaže' bite'teze dan' chac chele na' gonchachlaže'le šejnilaže'le Diosen' cont gacle can' chaclaže' le'.

⁵ Note'tezcho cate' bi nezecho naquen' chaclaže' Diosen' goncho, cheyala' nabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabechone' gaclene' chio'. ⁶ Perw cate' chnabechone' gwzejni'ide' chio', cheyala' šejle'cho chzenagcze' chechon' na' bitw gacžejaže'cho. Bena' chacžejaže' še chzenag Diosen' che', zaca'lebde' ca nisdao' dan' chas chata' cate' chechj be' lagüen' na' chjatan' nile na'le. ⁷ Ben' chacžejaže' še chzenag Diosen' che', bitw cheyala' soe' lez gwnežjw Diosen' le' bite'teze da' chnabe'. ⁸ Na' ben' chon ca' bitw nezde' bi xbab chone', con šayichj šayen chaque' len bite'teze dan' chonen'.

⁹ Na' bene' migw, le'e chejnilaže'le Diosen', še nole nacle bene' yaše', le soa mbalaz, le nacle bene' zaque' len Diosen'. ¹⁰ Na' bene' migw, še nole nacle bene' gwni'a, le soa mbalaz dan' ba chacbe'ele lao Diosen' bitw zaca'chle clel ca yezica'chle bene'; na' yob te che yela' gwni'an' can' chde che yej ca' zjaze yiže'. ¹¹ Cate' chna'chgua gwbižen' chesecquad yiže' ca', na' cheseyinj laga' che yejen' na' bich chosolo'en xdan. Can' chac len yej ca', lezce can' gac len bene' gwni'a ca', yeyol yenite' lao xšinen'.

Cheyala' soateze soacho šejnilaže'cho Jesucriston' bite'teze dan' chac checho

¹² Še chyo chchejaže'cho len da' chac checho na' chonchachlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocanē can' gwne' ban yogo'cho chaquechone'. ¹³ Na' note'tezcho cate' žan goncho da' malen', bitw gac nacho Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. ¹⁴ Yela' chzelaže' checho dan' yo'o lo' yichjlažda'cho chonen cont chzelaže'cho choncho da' mal. ¹⁵ Na' še ba choncho can' ža yela' chzelaže' dan' yo'o lo' yichjlažda'ochon' na' zoacho choncho da' malen', nach gwžin ža cate' cuejyichj Diosen' chio' na' bitw šjayzoacho len le'.

¹⁶ Bene' migw, bitw siye' cuinle gonle xbab Dios nan' chgo'oyele' le'e cont gonle da' malen'. ¹⁷ Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. ¹⁸ Gwyazlaže' Diosen' bocobe' yichjlažda'ochon' cate' gwyejle'cho che diža' li čhen'. Na' ba bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

Can' goncho cont yebe Diosen' chio'

¹⁹ Bene' migw, nezele cheyala' yebecho gwzenagcho che diža' güen, na' cheyala' goncho xbab cate' za' necho, na' neca la' ža'atecho. ²⁰ Cate' chža'acho, bitw chac goncho güen can' chaclaže' Diosen' goncho. ²¹ Da'nan' cheyala' cuejyichjcho yogo'lo' da' xinjen' ba benchon' na' yogo'lo' da' chgue'e Diosen' da' gwcha'o gwxnen lo' yichjlažda'ochone' cate' bina' šejnilaže'chone'. Cheyala' gwzejxw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata' yela' mban checho toli tocanē.

²² Na' cheyala' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. ²³ Ben' chene diža' li che Diosen' na' bi chone' can' žanna', zaca'lebde' ca to bene' chna' cho'alagüen' lo spejw, ²⁴ le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. ²⁵ Perw bene' zoacze' chzenague' xtiža' Diosen' do yichj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

²⁶ Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen',

bitw chebede' bite'tez dan' choncho še ca'. ²⁷ Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

2

Toze can' cheyala' goncho len yogo' bene'

¹ Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyala' goncho len note'teze bene', bitw nacho balze bene' gonxenchguachone' na' yebale' gonechone' nacteze. ² Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyala' goncho len chope'. ³ Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo". ⁴ Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

⁵ Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyēzine' gan' zoen' chnabi'e, can' gwna Diosen' gac che note'teze chio' chaquecho le'. ⁶ Perw na' chonle bene' yaše' ca' ca' bene' bibi zjzaca'. Na' bene' gwni'a ca' chongaclene' ca' bene' zjazaca'chgua; len legaquen' chosochi chososaque' le'e na' cheseche'xoxje' le'e lao justis ca'. ⁷ Lecze legaquen' chosožie' yela' ya' che Jesucriston' ben' nacho txen, ben' naque' bene' zaca'.

⁸ Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benačle ca' chaque cuinle." Še da' licze chonle can' žanna' chonzle güen. ⁹ Perw ley che Diosen' chchoglaon chele nape doła' še chonxenle bal bene' na' yebale' chongaclene' ca' bene' bibi zaca'. ¹⁰ Can' naquen, note'teze bene' zoe' chone' doł can' ža leyna', perw na' še ba gwchoe' to da' dao', len doxen leyna' chape' doła' še ca'. ¹¹ Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leczen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba nacho bene' güet bene', bia'cze napcho doła' len leyna'. ¹² Xtiža' Diosen' chaclenen chio' cont bi gwzenagcho che da' malen'. Na' cheyala' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. ¹³ Diosen' gwnežjwchgüe' da' saca'zi' bene' ca' bi cheseyaše' chesyēži'ilaže'de' ljež benačle'. Perw bene' ca' chesyeyaše' chesyēži'ilaže'de' ljež benačle', Diosen' yeyaše' yeži'ilaže'de' legaue'.

Bitwbi zejen še con žacho chejnilaže'cho Jesucriston'

¹⁴ Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocañe še con žaze' ca'. ¹⁵ Bal bene' lježcho bene' chesejnilaže' Jesucriston' bi de da' yese'ej yesagüe' na' bi de xalana'gague'. ¹⁶ Na' še bitw gaclencho' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen", bitwbi zejen dan' con nacho ca'. ¹⁷ Da'n'an', še con žacho chejnilaže'cho Jesucriston' perw bitw choncho da' nac da' güen, bitw tze bi zejen dan' žacho chejnilaže'chonen'.

¹⁸ Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesache'e bene' le chejnilaže'chonen'. ¹⁹ Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben. ²⁰ Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žacho chejnilaže'chone'. ²¹ Da' xozxta'ocho Abrahanna' blo'e le gweyjnilaže' Diosen' dan' bzenague' che Diosen'. Da'n'an' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'n'an' Diosen' gwne' che' le naque' bene' güen len le'. ²² Na' nezecho can' ben da' Abrahanna', gague con gweyjnilaže'ze Diosen', san lecze bzenague' che'. Na' dan' bene' ca' blo'e le gweyjnilaže' Diosen'. ²³ Da'n'an' goc can' nyoj Xtiža' Diosen' che', žan: "Abraham gweyjnilaže' Diosen' na' da'n'an' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'n'an' že' naccho bene' güen len le'. ²⁵ Na' da' Rahab goque' no'ole zle' no'ol con gwyej len note'teze bene' byo, perw bzenague' che Diosen' cate' blebe'

bene' ca' chope jasegüia jaseñe'e laže'na'. Na' blo'ede' legaque' yetole nez ga jaya'aque' cont bi jasyexen soldadw che rey legaque'. Na' dan' goclene' bene' ca', blo'e gwyejnilaže' Diosen'. Na' gwna Diosen' naque' bene' güen len le'. ²⁶ Quinga naquen: Še to bene' bich nye'e biš grasyw, nachbia' naque' bene' guat. Ca'czen' naquen, še bitw choncho da' güen nachbia' bitw chejnilaže'cho Diosen' la'czla' žacho chejnilaže'chone'.

3

Choncho da' xinj len xtiža'cho

¹ Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'n'an' žia' le'e, gague la' si'te lo na'le gwsed gwlo'ele bene' yoble xtiža' Diosen'. ² Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzoeczde' nabile' doxen cuerp chen' še ca'. ³ Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. ⁴ Na' lecze bene' ca' chososa' barcw xen ca' chosochine' yag da'oze dan' chosose'eden' cont chejen con gate'teze chesende', la'czla' še chžiga' to be' guallegaquen'. ⁵ Ca'czen' naquen len lože'chon'. Toze da' dao' rizen' naquen lao cuerp chechon', perw chac chñelenchon diža' da' zjazaca'. Na' ca' nac to yi' dao' riz, guac gwzeyen to ya'adao' xen, ca'czen' naquen len lože'chon' cate' chñelenchon diža' mal. ⁶ Lože'chon' naquen to da' chnabia' chonchguan da' xinj juisyw lao doxen cuerp chechon'. Lože'chon' naquen ca' to yi' bej da' chla'an chca'an nile na'le chzeyen bite'teze da' de, le še choe'cho diža' malen' chyała'ch yogo'lojte da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'. ⁷ Chac chnabia'cho yogo'te beyixe', be žia tap ni'a na', be žia xil, be chda noxobe le'e, na' be ca' že' lo' nis. Ba gwnita' bene' gosenabi'eba'. ⁸ Perw ne to chio' bitw soecho lože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca' venen che to bej znia'. ⁹ Len xtiža'chon' chonxencho Dios ben' naque' Xacho. Na' lecze len xtiža'chon' chžiacho yela' ya' che ljež benačcho bene' ca' ben Diosen' can' nac le'. ¹⁰ Na' cho'acho na' chchoj diža' šagüe' cate' chonxencho Diosen' na' lecze chchoj diža' mal cate' chžiacho yela' ya' che ljež benačcho. Bene' migw, bitw choncho ca' cheyała' goncho. ¹¹ Nezecho ga chal nis bitw žia nis sia na' nis zbapj toz bej. ¹² Na' lecze ca' bene' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' lecze ca' ga chal nis, bitw chchoj nis sia to bej ga žia nis zbapj.

Can' goncho še Diosen' ba bene' chio' yela' sina' chen'

¹³ Še note'tezle žale nacle bene' sina' na' chejni'ile xtiža' Diosen', cheyała' gonle yogo'lol can' chazlaže' Diosen'. Cheyała' gonle da' güen sin cbi gonxen cuinle cont nachbia' nacle bene' sina'. ¹⁴ Perw še chgue'e lježle na' chzelaže'le gacchle bene' blaoch ca' bene' lježle, bitw cheyała' nale nacle bene' sina', le con chonlaže'len' še ca'. ¹⁵ Na' še chgue'e lježle na' chzelaže'le gacle bene' blaoch ca' bene' lježle, bitw nacle bene' sina', san xbab chelen' zan' che Satanás dan' chnabia' da' xigüe' ca', na' con chonle da' xinjen' can' ža lažda'olen' na' can' cheson bene' ca' bi zjanombia' Diosen'. ¹⁶ Še chgue'e lježcho na' chzelaže'cho gaccho bene' blaoch ca' legaque', bitw zoacho binlo len legaque' še ca', na' choncho yogo'te da' xinj. ¹⁷ Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binlo len lježcho na' naccho bene' xenlaže' na' chzexjw yichjcho cont chzenag che lježcho. Na' lecze cheyaše' cheži'ilaže' lježcho na' choncho da' güen len legaque', na' toz ca' choncho len note'tez bene'. Na' bite'tez da' choncho, chonchon do laže'cho. ¹⁸ Nach še chebecho yesezo'a yesebez bene' binlo na' chaclencho bene' yezica'chle cont yesezo'a yesebeze' binlo, na' chaclenen cont yeson bene' da' güen.

4

Bitw gac goncho can' cheson bene' bi zjanombia' Diosen'

¹ Chdišle chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca' žan chele. ² Chzelaže'chguale bi da' gata' chele na' chdišle chšašlen lježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chñabele Diosen' gone' cont gata' dan' chyažjelen'. ³ Na' cate' chñabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. ⁴ Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca' cheyała'. Zaca'lebcho ca' to no'ole nzoa xto, no'ole ben' bich chacde' bene' che'. ⁵ Chonljale xbab Xtiža' Diosen' bitw

bi zacan' gan' nyojen žan: “Spirituw che Diosen' dan' zoan lo' lažda'ochon' chzelaže'chguan gwzenagcho che toz Diosen'.”⁶ Diosen' chaclenchgüe' chio' cont chzenagcho che toz le'. Da'nan' nyoj Xtiža' Diosen' žan: “Diosen' chone' contr beñe' ca' chesonxen cuingaque', perw chaclene' beñe' ca' chesache'ede' bi chosozenague' che' ca cheyala'.”⁷ Da'nan' cheyala' gon cuincho lo na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuaseczen ca'ale.⁸ Le soa le yol' güiz Diosen', nach soe' gaclene' le'e. Cheyala' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', clelen' chonle xbaben' še ca', na' cheyala' güe'le latje yeyon Diosen' yichjlažda'olen' xilaže'.⁹ Bi cheyala' yebele, san cheyala' yegüine'le neče da' xinjen' ba benlen' na' yeto'ele chen.¹⁰ Cheyala' gwzexjw yichjle lao Xancho Diosen', nach Diosen' gone' cont gacxenle.

Bi cheyala' nacho che lježcho nape' dola'

¹¹ Beñe' migw, bi cheyala' nelaocho che lježcho. Ben' chnelagüe' che lježe' o chosbaguede' lježe', benan' chñe' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca beñe' zaque' cont že' che beñe' lježe' nape' dola', chone' ley che Diosen' ca to da' bibi zaca'.¹² Toz Dios nan' gwđixjue' leyna', na' toz le'na' zaque' choglagüe' che to chočo še napcho dola'. Na' toz le' zaque' gone' cont bi šjaya'ac beñe' lo yi' gabilen', na' lecze zaque' cont yesele' beñe' lo yi' gabilen'. Perw chio' bitw zaca'cho nacho che beñe' lježcho zjanape' dola'.

Bitw nezecho bin' gac gwxe güizj

¹³ Na' le gwzenag da' nga: Balle chhogbia'len šejle to ga šejle gonle negosyw cont gonle gan. Na' chbejle to ža cate' šejle na' chhogbia'len yega'anle na' tgüiz,¹⁴ neca chache'ele bi nezecho bin' gac checho o nac goncho gwxe güizj. Yela' mban chechon' zaca'leben ca to bejw, le bejon' šložze chle'echon na' cheyasen.¹⁵ Cheyala' nacho: “Še Xancho Diosen' gone' latje bancho, na' goncho to da' goncho.”¹⁶ Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'.¹⁷ Na' še nezecho cheyala' goncho da' nac güen na' bi chonchon, napcho dola' lao Diosen'.

5

Da' malchgua gac che beñe' gnwi'a ca' beñe' bi chosozenag che Diosen'

¹ Na' ca nac le'e beñe' gnwi'a, le'e bi chzenagle che Diosen', le soayaše' na' le cuežyaše', le leca za' saca'zi'le.² Lao Diosen' dan' de chele naquen ca to da' ba chbiayi', na' lache' šagüe' chelen' naquen ca to da' ba chle'e belžila'.³ Na' mechw chelen' dan' nac de oro na' de plata, len Diosen' naquen ca to da' ba chzen xche'en. Da'nan' žin ža žaglaochgualo lo yi' gabilen'. Ba gwche' yichjle tlaoze btoble da' scha'o xmechwlen', la'czla' ba zoa gon' Diosen' da' saca'zi'le.⁴ Cheyala' gonle xbab can' benle len beñe' güen žin chele ca', beñe' yaše' ca' besyelpal coseš chelen'. Benlele legaue' dan' bitw gwđixjwlene' ca cheyala'. Na' dan' bi bnežjwle laxjwgaquen' ca cheyala', chlo'en nacle beñe' güen da' xinj. Diosen' chzenague' che beñe' güen žin ca' dan' chesyegüine'de', Dios ben' nape la'zelagüe yela' guac xen.⁵ Zoatezle che'ej chagwšagüe'le na' chonditjele dan' de chele chonle con ca žan chele, na' bi chache'ele ba zoa gon' Diosen' da' saca'zi'le. Na' lagüe dan' chonle ca', zaca'leble ca to beyixe' ben' chgüe'ej chguagwšagüe'cho cont ba chañe'ba' cate' žin ža gotchoba'.⁶ Na' gan' chi'le chonle yela' justisen', ba gwchoglaolen yesote' beñe' goson da' güen, beñe' bibi gosonde' le'e.

Cuezcho batcan' yid Xancho Jesucriston' da' yoble na' yol' güizcho Dios

⁷ Ca nac le'e beñe' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Beñe' ca' chesaz, chesenite' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe' cosešen'.⁸ Da'nan' bite'teze dan' chyi chzaca'le, cheyala' gaple yela' chxenlaže' na' gonchachlaže'le šejnilaže'le Xancho Jesucriston', le ba zoa yide' da' yoble.⁹ Beñe' migw, bitw yosbaga' lježle še bin' chac chele. Še bin' yosbaga' lježle, ba zoa yid Xancho' da' yoble na' choglagüen' chele naple dola'.¹⁰ Le gon xbab che da' beñe' ca' goso'e xtiža' Xancho Diosen' cani'. Leca bosochi bososaca' beñe' legaue', perw bia'cze bosoyo bosochije', can' cheyala' gonle.¹¹ Da' li mbalaz beñe' ca' gwnita'teze' gosonchachlaže' gosejnilaže' Diosen' la'czla' besežlagüe'. Na' ba benele xtiža' da' Job can' benchachlaže' gwejnilaže' Diosen', la'czla' da' zan da' gwđi gwxaque'. Perw na' cate' gwde dan' gwđi gwxaquen', Diosen' bene' cont gwzoache' mbalazch ciel can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Beñe' migw, da' naquen da' žialao, gwbat gwzoale no co' da' baļi che bite'teze. Bitw nale yaban' co'on da' baļi choe'le diža' li, neca nale yežlio nga co'on da' baļi choe'le diža' li,

neca bite'tezechle. Cheyała' güe'cho diža' li da' šejle' bene' cont Diosen' bi choglagüen' checho saca'zi'cho.

¹³ Note'tezcho cate' chac bi da' chac checho, cheyała' yoł güižcho Dios. Na' note'tezcho cate' zoacho mbalaz, cheyała' gołcho gonxenchone'. ¹⁴ Note'tezcho cate' chacšenecho, cheyała' gaxcho bene' ca' gwlejcho cont chosogüia chesene'e chio' chdop chžagcho chonx-encho Jesucriston'. Na' yosotope' yichjcho late' set, na' yosoł güiže' Dios, yesenabe' yeyauecho len yela' guac che Xancho Jesucriston' lagüe' da' chejnılaže'chone'. ¹⁵ Na' chio', cate' chol güižcho Xancho Diosen', cheyała' šejle'cho le chzenagcze' checho cont yeyone' ben' chacšenen', na' še ba bene' da' xinj, güezi'xencze Xancho' che'. ¹⁶ Da'nan' cheyała' xoadola'cho lao bene' lježcho na' yoł güižcho Dios tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' chol güižchone' na' chone' da' zan da' güen dan' chnabechone' gone'. ¹⁷ Le gon xbab che Elías ben' be' xtiža' Diosen' cani'te. Goque' beṇač cayanen' nac chio'. Na' cate' boł güiže' Diosen' do yichj do laže' gwnabe' bi gac yejw, na' Diosen' bzenague' che' na' bitw goc yejon' lao šon iz yogašjo. ¹⁸ Na' yetni'a cate' boł güiže' Diosen' gwnabde'ne' sele' yejon' da' yoble, nach Diosen' gwsejen'. Na' goc coseš che bene' ca' da' yoble.

¹⁹ Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheyała' gaclenchone' cont yetinjde' xtole'na'. ²⁰ Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' ṇa'a.

CART NECHW DAN' BZOJ POSTLW SAN PEDRO

Pedro chzoje' cart nga che bene' ca' zjanaslas chesejnilaže' Criston'

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga. ² Con can' bsi'e xnezen' gwllalte, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochga len xbab chelen'.

Zoacho lez šjayzoacho len Diosen'

³ Cheyała' gonxenko Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'. ⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'. ⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biña' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachguale mbalaz la'czla' chonen byen da' zan da' chyi chzaca'le šlož güeje na'a. ⁷ La'czla' da' te che oron', benačen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen cled ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'an xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biña' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele. ⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in' legaque' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedya'ne' na' besyeyiljwyože' non' seła' Diosen' gaclene' chio' na' batcan' yide'. ¹² Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyała' gac lažda'ochon' xilaže' len yogo' da' choncho

¹³ Da'nan' cheyała' soale len toze xbab na' gonle con ga zelao saque'le cont gonle can' chazlaže' Diosen'. Cheyała' soale yebele gon Diosen' gacchgua mba chele caten' yid Jesucriston' da' yoble. ¹⁴ Na' da' nacle xi'in' Dios cheyała' gwzenagle che', na' bich gwzenagle che da' malen' can' gwna lažda'olen' gonle cana' cate' biña' šejni'ile che Diosen'. ¹⁵ Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyała' gaccho bene' laždao' xilaže' len yogo' da' choncho. ¹⁶ Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

¹⁷ Chio' choj güižcho Diosen' che'chone': "Xato' Dios". Na' Diosen' chchoglagüen' che to to chio' benač še nocho napcho doła' ca nac da' choncho, na' toz can' chone' len note'tezcho. Da'nan' cheyała' žecho goncho da' bi chazlaže' Diosen' šlac zoacho yežlio nga. ¹⁸ Nezecho Diosen' ba bebeje' chio' lo da' ca' bosozojni'i da' xoxzta'ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede chen, bi goc yesyebjen chio' lo da' ca' choncho da' bibi zaca'. ¹⁹ San byažjen gwseła' Diosen' Criston' blalj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca' to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž cheton' cont bezi'xen Diosen' xtola'gague'. ²⁰ Za' xe yežlion' Diosen' gwleje' Criston' cont bnežjw cuine' neche xtola'chon'. Na' Diosen' gwsele'ne' nga na'a ba zoa te che yežlion' cont chaclene' chio'. ²¹ Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

²² Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyała' goncho, cheyała' gague lježcho do yichj do laže'cho, gague gaguechone' de diža'ze. ²³ Xaxna' chio' zoacho yežlio nga zjanaque' bene' chesat, perw gague neche da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gweyjele'cho xtižen'. Na' xtižen' zoan toli tocaņe, gague da' te čen. ²⁴ Chac can' nyojen, žan:

Yogo' benach chesede che' ca chesede che no yixe' dao',

na' yogo' da' chebe benachen' yežlio nga da' chesacde' zaca'čgvan, zaca'leben ca yej da' žia yixe'.

Chesebiž yixe' ca' na' chesecvad chesebiž yej da' zjažia yixe'.

²⁵ Perw xtiža' Diosen' zoan toli tocaņe, gague da' te čen.

Na' xtiže' nan' diža' gūen da' ba gwdixjue'eto' len le'e.

2

¹ Da'nan' cheyała' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' gūen, bi xi'acho bene', bi necho diža' mal che bene'. ² Na' ca bi' che'eñ dao' žan yesaže'be' xiže'gacbe', can' cheyała' selaže'cho yenecho xtiža' Diosen', le naquen da' gūenchgua, na' cate' chzenagchon chaclenen chio' cont choncho can' cheyała' gon chio' ba de yela' mban checho toli tocaņe. ³ Le ba chache'echo na'a Xancho Criston' naque' bene' šagūe'.

Criston' zaca'lebde' ca to yej squin che yo'o

⁴ Cheyała' gwzenagcho che Xancho Jesucriston' ben' chon' chio' yela' mban toli tocaņe. Bene' zan chesegue'ede' le' la'czla' Diosen' gwleje'ne' cont chaclene' chio' na' zaca'čgūe' len Diosen'. Da'nan' Jesucriston' zaca'lebde' ca to yej gūen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šla'ale. ⁵ Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bžoz bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. ⁶ Na' Xtiža' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwejynilaže'ne'.

⁷ Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojca da' nga čegaque', žan:

Yej da' bi gosaclaže' bene' gūen yo'o ca' yosočhine',

len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' bene' na' ca to yej da' chgo'o ni'e na' chjasebiže'.

Nyojen žan chesečhegūe' le bi chosozenague' xtiža' Diosen'; na' Diosen' bžie' bia' yesac čegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bžoz. Gwleje' chio' cont naccho nación che', na' nactecho diaža' che', le chaclaže' čixjue'echo catec da' gūen juisyw chone'. Le'na' bebeje' chio' lo da' malen' bencho na' gwlo'e be'ni' xen čen' lo' yichjlažda'ochon' cont soacho goncho da' gūen. ¹⁰ Cana' le'e bi gwejynilaže'le Diosen' na' bi gogle nación che', perw na'a ba nacle nación che'. Cana' bina' yeyaše'de' le'e, san na'a Diosen' ba beyaše' beži'ilaže'de' le'e.

Cheyała' goncho can' chazlaže' Diosen'

¹¹ Chacda' le'e bene' migw, na' chņeoyeda' le'e le gon xbab le yežlio nga bi naquen laže. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'. ¹² Le soa le gon da' gūen cont bene' ca' bi chesejnilaže' Diosen' yesele'ede' da' gūen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' gūen na' yesonxene' Diosen' cate' žin ža čoghbi'en nac gac che to toe'.

¹³ Da' chejnilaže'le Xancho Criston', le gwzenag che yogo' bene' ba bosozoa benachen' cont yeseñabi'e le'e. Le gwzenag che rey ben' chnabia' doxen gan' zoachon', ¹⁴ na' lecze le gwzenag che bene' gwnabia' ca' chsela' reyen'. Le nac lo na'gague' yesone' castigw che bene' ca' cheson da' xinj na' yesonxene' bene' cheson can' cheyała' yesone'. ¹⁵ Diosen' chaclaže'

goncho da' güen cont bene' ca' bi chesejni' che', ben' zjanchoḷ yichjlažda'ogaque', bi žel diža' da' yesene' yosocuiše' chio'.

¹⁶ Cheyala' soa cuezcho mbalaz da' bich yo'ochō lo na' gwxiyen', perw bi goncho xbab guacte goncho bi da' xinj. San cheyala' soa cuezcho mbalaz da' yo'ochō lo na' Diosen', na' yo'ochō lo ne'en cont goncho con dan' chazlaže' goncho. ¹⁷ Cheyala' gapcho bala'an yogoḷ lo bene'. Na' cheyala' gaque bene' lježcho bene' chesonxene' Jesucriston'. Cheyala' žebcho goncho da' bi chazlaže' Diosen'. Na' cheyala' gapcho bene' gwnabia' chechon' bala'an.

Criston' byo bcheje' dan' gwxcaca'zi'ena'

¹⁸ Le'e chonle žin che bene', le gwzenag che xan žin chele da' chaple legaque' bala'an. Gague tloaze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia. ¹⁹ Še bibi da' mal nonle na' bia'cze chosoči chososaque' le'e, chebe Diosen' chyo chchejle len da' chesonde' le'e lagüe nezele chaclaže' Diosen' goncho ca'. ²⁰ Perw bibi zacan' še ba benle bi da' xinj na' chyo chchejle cate' chesebaže' le'e. San še chosoči chososaque' le'e cate' chonle da' güen na' chyo chchejle len da' chesonde' le'e, nachle chebe Diosen' le'e. ²¹ Le Diosen' gwleje' chio' cont gwyo gwchejcho len bi da' yosochi yososaca' bene' chio', na' Criston' gwxcaca'zi'e neče chio' na' byo bcheje' len da' goc che' cont nezecho ca'czen' cheyala' goncho. ²² Bibi da' xinj ben Criston', ne to diža' güenlaže' bi be'e. ²³ Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque' ne', bi gwne' yebi'e mal len legaque'. Ben cuine' lo na' Diosen', le gwneze' Diosen' chogbi'en yesezaca'zi' bene' ca' con can' cheyala' gac chegaque'. ²⁴ Criston' bnežjw cuine' neče xtolā'chon' cate' gosote'ne' le'e yag cruzen'. Da'nān' cheyala' cuejyichjcho da' xinjen' choncho na' soacho goncho da' güen. Gwxcaca'zi'e cont bozoe' chio' binlo. ²⁵ Goccho ca xila' be gosacžeje, perw na'a ba nachcho ca be yo'o lo na' xamba' cont chyoeba', le Criston' chgüia chne'e chio' na' yo'o lo ne'e lažda'ochon' chcuas chcue'ejen' len da' malen'.

3

Can' cheyala' yeson bene' zjanšagna'

¹ Na' lecze le'e no'ole nšagna'le, to tole cheyala' gwzenagle che bene' chele. Bale' bina' yosozenague' xtiža' Diosen', na' še gwzenagle chegaque', yesacbe'ede' xtiža' Diosen' naquen da' güen la'czla' bibi ye'ine'. Na' yosozenague' che Diosen' ² cate' yesele'ede' chaple legaque' bala'an na' chi' yichjle soa cuezle cont lažda'olen' gaquen xilaže' len Diosen'. ³ Na' le'e no'ole, bi nācho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'. ⁴ Dan' nac da' žialao, gac lažda'olen' güen, la'czla' nono chle'e len. Zaca'chgvan len Diosen' gaccho bene' nexjwlaže' na' bene' xenlaže', le bi te che yichjlažda'ochon'. ⁵ Gosenita' no'ole cani' no'olen' gosejni'laže' Diosen' na' goson cuine' lo ne'e. Legaque' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. ⁶ Da' Sara, no'ol che da' xozxta'oto' Abrahamna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

⁷ Na' le'e bene' byo nšagna'le, lecze cheyala' gacle bene' šagüe' len no'ol chele na' gaplene' bala'an, le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' none' chio' yela' mban toli tocaṇe, ca'tezeczen' ba none' len legaque'. Nachen' cheyala' goncho güen len legaque' cont bibi gwžon gwzenag Diosen' checho cate' choḷ güižchone'.

Can' goncho še yosochi yososaca' bene' chio' la'czla' choncho da' güen

⁸ Yogo'cho cheyala' goncho toze xbab na' cheyala' yeyaše'cho lo' lažda'ochon' še bi da' chac che bene' lježcho. Cheyala' gaque lježcho do laže'cho ca bene' biše' lježcho, na' cheyala' gaccho bene' šagüe' len bene' lježcho na' bi gon cuincho bene' xen. ⁹ Še bi da' mal cheson bene' len chio', bi nācho lecze da' mal yebi'cho len legaque'. Na' še bene' chesezi'diže' chio', bitw yoži'icho dižan' nac ca' len legaque', san nābcho gac da' güen chegaque'. Le Diosen' ba gwleje' chio' cont goncho ca' na' cont gone' latje soacho mbalaz. ¹⁰ Goncho ca' le nyojen, žan: Bene' chaclaže' soa cueze' mbalaz,

cheyala' gwsaque' bich güe'e bite'teze diža' mal,
na' gwsaque' bich güe'e bite'teze diža' güenlaže'.

¹¹ Cheyala' cuejyichje' yogo' da' mal na' gone' da' güen.

Cheyala' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to liča,
na' chzenague' chegaque' cate' chosoḷ güiže'ne'.

San bene' ca' cheson da' xinj, Diosen' ngüie' gone' cont yesezaca'zi'e.

¹³ Na' nono zoa no gone chio' mal še zoatezcho choncho da' güen do yichj do laže'cho. ¹⁴ Na' la'czla' še tgüej cate' yosochi yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyala' žebcho bene', neca gaczejlaže'cho. ¹⁵ San cheyala' gonxencho Criston' lo' lažda'ochon', le naque' Xancho. Na' bate'teze cheyala' soacho probnidw cont yoži'icho xtiža' bene' še yesenabde' chio' bixčhen' zoacho lez šjayzoacho len Diosen' toli tocañe. Na' cheyala' gapcho legaque' bala'an na' güe'lenchone' diža' šägüe'. ¹⁶ Tža tža cheyala' goncho cont nezecho lo' yichjlažda'ochi bibi dola' napcho len Diosen'; nachen' cate' yesezi'diže' chio' da' chejnilaže'cho Criston', yesacbe'ede' le choncho güen na' yesacde' zto'. ¹⁷ Yejni'a saca'zi'cho neče choncho da' güen, še can' chaclaže' Diosen' gac checho, clcl ca saca'zi'cho neče choncho da' xinj.

¹⁸ Le Criston' lecze gwdi gwxaque'. La'czla' gwyejczte' to licha len Diosen', bnejzw cuine' gote' neče xtoła' benač tni'aze, na' da' bene' ca' zaca'czen' toli tocañe. Gote' cont ba bozoe' chio' binjo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw chen'. ¹⁹ Na' len Spiritw chen' gwyeje' jatixjue'ede' xtiža' Diosen' len bene' ca' ba zjanyeyw gan' yesezaca'zi'e toli tocañe. ²⁰ Legaque' bi bosozenague' che Diosen' ža gwlaste, la'czla' gwdape' yela' chxenlaže' len legaque', gwleze' yosozenague' šlac da' Noén' bene' to barcw xen. Na' to choppa bene' gos'o lo' barcon' na' bi gosebiaye'e lo' nisen', con xono'gue' besyela. ²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocañe. Na' gague gwzoacho nisen' cont beyaccho xilaže' len cuerp chechon', san gwnabecho Diosen' beyone' lažda'ochon' xilaže' cont nezecho bibi dola' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. ²² Na' na'a Jesucriston' ba beyepe' yaban' gan' chnabi'e txeñ len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' gon to tocho cont chaclen lježcho

¹ Criston' goque' bene' bela' chen na' gwxcaca'zi'e yežlio nga, da'n'an' chio' cheyala' gončhačlaže'cho bi gaczejlaže'cho cate' saca'zi'cho. Goncho ca', le cate' ba gwzaca'zi'cho chaclen bich chzenagcho che da' malen'. ² Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' benač, san soa cuezcho goncho can' chazlaže' Diosen'. ³ Cana' gwzoale benle can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzozele, benle no žaš len lni' chelen' na' güe'ejchguale, na' gwyejnilaže'le l' gua'a lšaca' da' ca' gwna Diosen' bi cheyala' šejnilaže'chon. ⁴ Na' bene' ca' ne' cheson ca' chesyebande' bich chonle txeñ len legaque' can' chesaše' chosožiai' cuingaque', nach chesezi'diže' le'e. ⁵ Perw žin ža cate' Diosen' nabyožde' legaque' che yogo'loł da' ba gosone', Dios ben' chbeze' čhogbi'en nac gac che bene' zjamban len bene' ca' ba gosat. ⁶ Le da'n'an' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocañe' can' zoa le', la'czla' nchoglagüen' de yela' got che yogo' benač yežlio nga.

⁷ Ba zoa te che yežlion'. Da'n'an' cheyala' soacho len toze xbab na' goncho byen goncho can' chazlaže' Diosen' cont bibi gwžon soacho yoł güižchone'. ⁸ Na' da' nac da' žialaoch, cheyala' gague lježcho do yichj do laže'cho, le cate' chaque lježcho chezi'xencho chegague' bite'teze da' chesonde' chio'. ⁹ Na' cheyala' gwlebcho bene' lježcho cate' yeside' ližchon' sin cbi bixjwcho. ¹⁰ Con can' ba goclen Diosen' to tocho da' none' chio' grasyw che bi da' chac choncho, can' cheyala' gaclen lježcho len dan' choncho. Cheyala' gwčhincho bite'teze grasyw da' noñ Diosen' chio' can' chaclaže' gwčhinchon, le nža' nža'te da' none' che to tocho choncho. ¹¹ Še Diosen' ba none' checho čixjue'echo xtižen', le xtiže' na'zen' cheyala' čixjue'echo. Na' še ba none' checho gaclencho bene', cheyala' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gaxcen Diosen' da' gwsele' Jesucriston' len chio'. Zaca'cze' gonxenchone' toli tocañe na' zaca'cze' nabi'e toli tocañe. Can' gacšca.

Guata' da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'. ¹³ Cheyala' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxcaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw. ¹⁴ Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoan chaclen le'e. Bene' ca' chosoči chososaque' le'e chesene' mal che Criston', san le'e chonxenle'. ¹⁵ Na' še saca'zi'le, yejni'a gaquen neče chonle da' güen, gague neče

da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'. ¹⁶ Le še saca'zi'le neče chejnilaže'le Criston', bi cheyala' gaquele zto' can' chac chele, san cheyala' gonxenle Diosen' da' ba chejnilaže'le'.

¹⁷ Ba bžin ža Diosen' ba chone' cont chyi chzaca' chio' naccho xi'ine' neče bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yezezaca'zi' bene' ca' bi chosozenag diža' güen chen'. ¹⁸ Na' ca nac bene' zja'ac to licha, nacchguaze yeseye' bi yezezaca'zi'e toli tocañe, nach bene' bi chesejnilaže' Diosen' na' chesonteze' da' xinj, gague bi de da' yosla legaque'. ¹⁹ Da'n'an' cate' chsi' Diosen' xnezen' chyi chzaca'cho, cheyala' soacho gonczcho da' güen na' gon cuincho lo na' Diosen', le len' bene' chio' beñach na' zoacze' chaclene' chio'.

5

Can' cheyala' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choelena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca le'e šjayzoalen'ne'. ² Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen. ³ Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesache'ede' lecze can' cheyala' yeson legaque'. ⁴ Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyala', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyala' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdillene' bene' zjanac ya'laže',
san chaclene' bene' chosozexjwlaže' lagüen'.

⁶ Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho. ⁷ Na' cheyala' gwcua'ancho yogo'lo' da' chi' yichjcho chen lo na' Diosen', le len' chgüia chne'e chio'.

⁸ Cheyala' goncho byen goncho da' nac da' zaca', na' cheyala' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyljwlažen' nac gonen gwžiajin' chio', ca to bež znia chosya'aba' chdaba' chyljwba' be gagwba'. ⁹ Cheyala' soachachcho bi gwzenagcho che Satanásen' na' soachachcho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'. ¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. ¹¹ Cheyala' soacho gonxenchone' toli tocañe da' naque' bene' zaca' juisyw, na' nabiache' ca note'tezechle. Can' gonšaczccho.

Pedron' chguape' tiox bene' ca' yosolab carten'

¹² Bene' migw checho Silvano, ben' chacda', zoateze' chone' can' cheyala' gone', na' ba bzoje' xtiza' le'e cart dao' nga. Na' le'e cart nga chneyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'n'an' cheyala' soaczle šejnilaže'le'.

¹³ Bene' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. ¹⁴ Cate' chdop chžagle txen le gwnopa' na' lježle cate' gwguap lježle tiox cont gacbia' chaque lježle.

Na' chnaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.

CART GWCHOPE DAN' BZOJ POSTLW SAN PEDRO

Pedron' bzoje' cart nga che bene' chesonxen Jesucriston'

¹ Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocane le zejzce' to licha. Na' da' zaca'chguan chejnilaže'chone'. ² Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'line' na' nombia'le Jesús ben' nac Xanchon'.

Can' cheyala' gon chio' chejnilaže'cho Jesucriston'

³ Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocane na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'. ⁴ Na' da' naque' bene' zaca' bene' šagüe', da'nan' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nan' yichjlažda'ochon' chesyeyaqueu güen can' nac yichjlažda'ogüen', na' chac chbejyichjcho da' mal da' chžiyain' bene' bi chesejnilaže' Diosen', lagüe chesone' con ca žan chegaque'. ⁵ Na' da'nan' chio' chejnilaže'cho Jesucriston' cheyala' goncho con ga zelao saque'cho cont gonchcho da' güen, na' cont šejni'ichcho. ⁶ Na' cheyala' goncho con ga zelao saque'cho cont bi nabia' da' malen' chio'. Cheyala' soachachcho šejnilaže'cho Diosen' caten' chyí chzaca'cho, na' cheyala' soaczcho gonxenchone'. ⁷ Na' cheyala' ži'icho bene' lježcho ben' chesejnilaže' Jesucriston', na' lecze cheyala' gaquecho yogo'ze bene'. ⁸ Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen. ⁹ Na' note'tez bene' bi chon da' ca' ba gwnia' cheyala' goncho, nchol' yichjlažda'ogüe' na' biña' šejni'išagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'. ¹⁰ Da'nan' bene' migw, cheyala' goncho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho, ¹¹ na' mbalazchgua gwleb Diosen' chio' cate' šjajzoacho len Xancho Jesucriston' gan' chnabi'e toli tocane, Jesucristw ben' none' yela' mban checho toli tocane.

¹² Da'nan' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjajze'ele, la'czla' ba nezele can' gwnian' na' zoachachle chejnilaže'le diža' li che Diosen' dan' nombia'le. ¹³ Nan' chacda' šlac ne' mbana' cheyala' gona' cont šjajze'elen. ¹⁴ Le nežda' yob žin ža gata', con can' ba bzejni'i Xancho Jesucriston' neda'. ¹⁵ Da'nan' gona' con ga zelao saque'da' cont šjajze'ele can' gwnia' che da' quinga cate' ba gata'.

Postlw ca' besele'ede' cate' Diosen' blo'ede' yela' zaca' che Criston'

¹⁶ Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'. ¹⁷ Ble'eto'ne' cate' Xacho Diosen' bnežjue'ne' yela' bala'an xen na' cate' Dios ben' nac bene' zaca' juisyw bene' cont gwyechje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'." ¹⁸ Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

¹⁹ Napcho Xtiza' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwšenin' lo' yichjlažda'olen' ca to yi' da' chseni' ga nac chol. Bi cheyala' yeche'echo gwzenagcho chen tža tža šlac žin ža yid Criston' da' yoble na' co'oche' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. ²⁰ Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gac šejni'ichon to gualazcho, ²¹ le ne toz da' ca' bosozoje' bi zan' che xbab chegacze'. San bene' gosaque' lo na' Diosen' gosenie' dan' gož Spiritw che Diosen' legaue' na' bosozojen'.

2

Bene' ca' chosozejni'ide' xtiža' Diosen' clele

¹ Cani' lecze besechoj bal bene' gualaž cheto' bene' gosonlaže' gosone' chesyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiyain' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocane. Perw žin ža yesebiaye'e yalzelaže'. ² Bene' zan yosozenague' chegaque'

na' yesone' da' xinj dan' nac da' yela' zto' can' yeson legaque'. Na' neche yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'. ³ Na' bene' güenlaže' ca' yesezelaže' yeseque'e xmechwle. Da'n'an' yosozejni'ide' le'e diža' da' yesaljaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

⁴ Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yesezaca'zi'e toli točane. ⁵ Neca bezi'xen Diosen' che bene' ca' že' lo yežlion' bene' bi bosozenag che' caten' gwzoa da' Noé. Gwsele' yejw sio' juisyw da' bžiyain' legaque'. Na' Noén' gwzoe' gwduxjue'ede' can' cheyala' yesone' da' zej to licha. Da'n'an' Diosen' bosle' le' len yegaže bene' lježe'. ⁶ Na' Diosen' lecze bechoglaže' bžiyai'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'an. Na' bene' ca' cont chosnide' bene' za' za'ac gwnežjue' castigw chegaque' še bi yosozenague' che'. ⁷ Na' cate' Diosen' bžiyaye' ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'. ⁸ Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyala' yesone' na' bende' diža' che da' malen' gosone'. ⁹ Can' naquen, Xancho Diosen' nezde' nac gone' yosle' chio' chejnlaže'chone' lao da' ca' yesonen cuejyichjhone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na'a na' cate'ch žin ža chogbi'en yesezaca'zi'e toli točane.

¹⁰ Diosen' gwnežjwchgüe' da' yesezaca'zi' bene' ca' chesonteze' da' yela' zto' can' chesezelaže' lažda'ogaquen' yesone' len cuerp chegaquen'. Bene' ca' bi chesape' Xancho Diosen' bala'an' cont yosozenague' che'. Bitw chesežebe' chesone' cont bi žan chegaque', na' neca chesežebe' chesezi'diže' no angl bene' zaca' na' no da' xigüe'. ¹¹ San ca' nac angl che Diosen', zjanaque' bene' gualch ca' chio' benač na' zjanapche' yela' chnabia' xench ca' chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

¹² Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca' beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benačen' legacba' na' yesote'ba'. Na' ca'cze yesebiayi' bene' ca' chosozejni'i diža' güenlažen', ¹³ yesezaca'zi'e da' chosochi chososaque' bene' yoble. Chesazlaže' chesaše' chese'ej chesagwaxtate' tža tža. Na' cate' chesedobe' t xen len le'e cont che'ej chagwle, bi chesacde' zto' da' chesezožde' na' chesagwaxate' catec chziye' da' malen' legaque'. Da'n'an' zjazacalebde' ca' to da' bzigüe' da' dope to lo lache' šiš o ca' to yiz xen da' žia cho'alao bene'.

¹⁴ Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chese'go'oyele' bene' bi'na' yesenita'čhače' len Jesucriston' cont yesone' da' xinjen' t xen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgue'ede' yogo' da' chesone'. ¹⁵ Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseyixjue'ne' len mechw cont nabe' gac da' mal che bene' Israel. ¹⁶ Na' Diosen' bene' cont xpurren' be bi chac chneba' gwneczba' ca' to benač na' gwdiłba' le' che yela' tont čhen', gožba' le' cueze' bich gone' da' xinjen' nac ca'.

¹⁷ Bene' ca' chosozejni'ide' diža' güenlažen' zjazacalebde' ca' bej gan' bibi nis žia na' ca' bejw da' nžiga' to be' gual. Ba nchoglaon chegaque' yesezaca'zi'e gabil toli točane ga nacchgua chol. ¹⁸ Le cheso'e'chgüe' diža' chesonxen cuingaque' na' chese'go'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp chegaquen' can' chesoncze bene' ca'. ¹⁹ Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan chegaque', la'czla' zjanaque' ca' to esclavo len da' nac da' yela' zto'. Le note'tezcho naccho ca' to esclavo len da' xinjen' cate' choncho con can' žan goncho. ²⁰ Na' bene' ba zjanombi'e Xancho Jesucriston' ben' none' yela' mban čecho toli točane, ba besyechoje' lo' da' xinj ca' dan' nac da' yela' zto' dan' gosone' cate' bi'na' yesombi'ene', na' še soe da' xinjen' legaque' na' da' yoble yeso'e latje nabian' legaque' cont yesonchen', da' malch gac chegaque' clel ca' caten' bi'na' yesyechoje' lo da' xinjen' da' nechua'. ²¹ Yejni'a šaca' bi gosombi'e xnez Diosen' da' zej to licha clel ca' gosebejyichje' nez güen da' nžia bia' Diosen' šejlencho. ²² Ba goc chegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bačh bguazjichoba' cheyo'oba' lo gonan' da' yoble."

3

¹ Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le. ² Le šjayze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjayze'e dan' nžia' bia' Xancho Jesucriston' goncho, Jesucristw ben' noņe' yela' mban checho toli tocaņe. Lenņa' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te che yežlion', na' yesechoj bene' yesone' che xtiža' Diosen' na' yesenite' yesone' con can' ža xbab mal chegaquen'. ⁴ Na' yesone' che Diosen' yesene': "žBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža ņa'aža lecze can' goc cate' gwnita' da' xozxta'ocho ca', na' lecze ca'czen' goc caten' gwxe yežlion'." ⁵ Bene' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyechj mbi'in doxen, na' bchine' nisen' cate' benen'. ⁶ Nach bžin ža cate' da' ca' bene' džiaye'en len yejw sio' juisyw da' goc cate' bexoa nisen' lo yežlion'. ⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen ņa'a cate' žin ža gac juisyw. Cana' yeseyen cate' gone' yesezaca'zi' bene' mal ca' toli tocaņe.

⁸ Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca nac to ža o to mil iz, bi naquen sša len le'. ⁹ Baļ bene' chesacde' ba chže Xancho Diosen' da' bina' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' beñač na' chbeze' da' bi chaclaže' cuiayi' note'tezcho. Chaclaže' yogo'cho yetinje xtola'chon'.

¹⁰ Na' Xancho Jesucriston' yide' da' yoble cate' bi naņe'laže' bene', can' chac cate' cho'o gwban liž bene' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

¹¹ Na' da' ņezecho yesyenit yogo' da' ca' can' ba gwnia', cheyaļa' gon cuincho lo na' Diosen' na' soaczcho gonxenchone' do yichj do laže'cho. ¹² Na' cheyaļa' soa cuezcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. ¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' güen da' zej to liča yesenita' cana'.

¹⁴ Da'nan' bene' migw chia', šlac chbezcho gac da' ca', cheyaļa' goncho con ga zelao saque'cho cont soacho binlo len Diosen' cont bibi doļa' de da' gwchenen yichjlažda'ochon'. ¹⁵ Na' cheyaļa' gacbe'echo nape Xancho Diosen' yela' chxenlaže' len chio' beñač cont gwzenagcho che' na' gone' yela' mban checho toli tocaņe. Lecze can' ba bzoj postlw Pablon' checho ben' chaqueocho, cho'e dižan' len yela' sina' da' bnežjw Diosen' le'. ¹⁶ Na' yogo' cart che' ca' chesoen' diža' che da' quinga ba bzoja', la'czļa' bzoje' baļ da' nac zdebe šejni'icho. Na' bene' biņa' yesejni'i xtiža' Diosen' binlo na' biņa' yesezoachače' yesejni'laže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' žjangüe'e nez da' gwžiajin' legaque'.

¹⁷ Chacda' le'e bene' migw chia', na' ba ņezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačač le gwzenag che Diosen'. ¹⁸ Na' zej gacbe'echle catec chaque Xancho Jesucriston' le'e na' zej gombia'chlne', Jesucristw ben' noņe' yela' mban checho toli tocaņe. Cheyaļa' soacho gonxenchwne' ņa'na' toli tocaņe. Can' gonščaczcho.

CART NECHW DAN' BZOJ POSTLW SAN JUAN

Jesucriston' chenežjue' yela' mban toli tocane che bene chesejnilaže'ne'

¹ Chyixjue'eda' le'e che ben' nzi' Xtiža' Dios, ben' chnežjue' yela' mban toli tocane che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'. ² Len' golje' beňach na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' beňach. ³ Chyixjue'eto' le'e che bena' ble'eto' na' che bena' bzenagto' xtižen' cont gonle' neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'. ⁴ Chzojto' le'e cart nga cont soale yebechğüe.

Diosen' naque' la'zelagüe bene' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'. ⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li. ⁷ Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol xtoła'chon'.

⁸ Še žacho bibi xtoła'cho de, chziye'ze cuinchon' na' bi choe'cho diža' li. ⁹ Perw na' še chxoadola'cho lao Diosen', chezi'xene' doła' chechon' na' chnitlagüe' yogo'te da' xinj da' choncho, le chone' con can' že' na' chone' da' zej to li. ¹⁰ Še žacho bibi da' mal na' goncho, choncho Diosen' ca to bene' güenlaže' na' biña' šejle'cho diža' li čhen'.

2

Criston' chnabe' gaclen Xacho Diosen' chio'

¹ Xi'inda'ogua', chzoja' le' cart nga cont cbi gonle' da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chnabe' yezi'xen Xacho Diosen' checho. ² Jesucriston' blalj xchene' neche xtoła'chon' cont yozoe' chio' binlo len Diosen', na' gague neche xtoła' chio'zen' blalj xchene' san neche xtoła' yogo'lol beňach.

³ Na' še choncho can' ža Diosen' nachen' guac nacho ba nombia'chwne'. ⁴ Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biña' šon' yichjlažda'ochon'. ⁵ Ba chaquecho Diosen' ca cheyla' gaquechone' še choncho con can' že'na', na' še ba choncho ca, nezecho ba nacchone' txen. ⁶ Na' note'tezcho še žacho naccho Diosen' txen, cheyla' soacho goncho da' güen can' ben' Jesucriston'.

Dan' ža Diosen' cheyla' goncho

⁷ Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejnilaže'le Jesucriston', le naquen diža' da' ba benele. ⁸ Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len beňachen' na' ba chzolaole chde che yogo' da' ca' da' chgue'e Diosen'. Na' dan' chona' mandadw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

⁹ Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol'lo' lažda'ochon'. ¹⁰ Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo' da' xinjen'. Lo' yichjlažda'ochon' ba naquen ca to da' yo'o be'ni'. ¹¹ Na' note'tezcho še chgue'e lježcho nac chol'lo' lažda'ochon' na' zejcho ca to bene' lchol'bene' bi chache'e galen' yeque'e, le bi chache'echo can' cheyla' goncho.

¹² Ba bzoja' da' quinga par le'e xi'inda'ogua', le Diosen' ba bezi'xene' chele dan' chejnilaže'le Jesucriston' do yichj do laže'le. ¹³ Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bach gwzoole bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. ¹⁴ Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nan' ba gwzoole bi chzenagle che Satanásen'.

¹⁵ Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. ¹⁶ Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesalaže'. Na' yogo' da' ca' chesone' bi

naquen che Xacho Diosen', naquen che da' mal dan' de yežlio nga. ¹⁷ Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocaņe.

Nezecho bin' nac da' li

¹⁸ Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'. ¹⁹ Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bačh besyechoje' nacbia' bi zjanaque' chio' txen.

²⁰ Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'. ²¹ Chzoja' le'e da' nga le bačh nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca' nchiže diža' li che'na'.

²² Bene' güenlaže' ben' ža Diosen' bi gwsele' Jesucriston' golje' benačh. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. ²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejnilaže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. ²⁵ Na' da' gwna Jesucriston' gone' checho, gone' yela' mban toli tocaņe.

²⁶ Ba bzoja' le'e da' nga bia' diža' che bene' ca' chesaclaže' yesonlede' le'e. ²⁷ Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyala' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'nan' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyala' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuase'chone' cate' le'echo ba ble'e. ²⁹ Na' nezecho Criston' zeje' chone' con can' cheyala' gone', lecze ca' nezecho yogo'czecho še zejcho choncho can' cheyala' goncho nacho xi'in Dios.

3

Naquen' goncho še naccho xi'in Dios

¹ Le gon xbab catec chaquegüe Xacho Diosen' chio' da' chne' naccho xi'ine', na' da' liče xi'ine' chio'. Bene' bi chesejnilaže' Diosen' bi chesejni'ide' naccho xi'in Dios, le bi chesabe'ede' non' nac Diosen'. ² Xi'inda'ogua', chio' chejnilaže'cho Jesucriston' bačh naccho xi'in Dios. Na' biņa' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. ³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho. ⁵ Nezczecho Jesucriston' bide' yežlio nga cont beque'e xtoła' chio' benačh, na' ca' nac Jesucriston', le bibi da' xinj none'. ⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biņa' šejni'icho che' na' biņa' gombia'chone'. ⁷ Xi'inda'ogua', bi güe'le latje no siye' le'e, še choncho da' güen can' cheyala' goncho, zejcho to liča can' zej Jesucriston'. ⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxcete yežlion'. Na' bi Xi'in Diosen' yežlio nga par gwcuze' dan' chon Satanásen'.

⁹ Note'tezcho še Diosen' ba gwque'e chio' ca' xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. ¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

Cheyala' gaque lježcho

¹¹ Na' da' nga ba beneczecho cate' gwzolaochi chejnilaže'cho Jesucriston': cheyala' gaque lježcho tocho yetocho. ¹² Bi gaccho ca' goc da' Caın, goque' xi'in Satanásen' na' beyote' bene' biše'. ¿Nezele bichen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

¹³ Da'nan' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e. ¹⁴ Nezecho bich mbiayi' yichjlažda'ochon', san ba de yela' mban checho toli tocaņe le ba chaque lježcho. Na' še bi chaque lježcho, ne' mbiayi' yichjlažda'ochon'.

¹⁵ Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yela' mban che' toli tocane. ¹⁶ Bzane cuin Jesucriston' neche chio' gosote'ne' dan' leca chacde' chio', da'nan' nezecho can' cheyala' gaque lježcho. Na' ca'cze chio' cheyala' zane cuincho gatcho cont gaclen lježcho še chonen byen. ¹⁷ Na' cate' de da' de checho na' nezecho bene' lježcho chyažden', še bi cheyaše' chone' bi gac nacho chaquecho Diosen'. ¹⁸ Xi'inda'ogua', bi cheyala' gaque lježcho de diža'ze. Cheyala' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. ²⁰ Na' še zoa cate' choncho xbab bi zaca'cho par na' Diosen' xi'ine' chio', Diosen' zaca'che' ca' xbab chechon' na' nezde' yogo'lol. Da'nan' cheyala' gwzenagcho can' žen', gague con can' ža xbab chechon'. ²¹ Le'e bene' chacda', še lo' yichjlažda'ochon' chache'echo bitw napcho doła', nachen' bich chžebcho Diosen'. ²² Na' bite'tez dan' chnabechone' chonczen', le choncho da' nžie' bia' goncho na' can' chaclažen'. ²³ Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'. ²⁴ Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon'.

4

Spiritw che Diosen' na' dan' chon contr Criston'

¹ Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen' da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. ² Na' quinga guac nezecho še Spiritw che Diosen' bzejni'in' legaque' dižan' cheso'e: yogo' bene' cheso'e diža' chesene' Jesucriston' naque' Dios golje' benač, nezecho yo'o Spiritw che Diosen' lo' yichjlažda'ogüe'. ³ Na' bene' cheso'e diža' chesene' Jesucriston' bi naque' Dios golje' benač, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

⁴ Xi'inda'ogua', ba nacle Diosen' txen na' da'nan' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in' le'e, na' Spiriton' chnabia'chen ca' Satanásen' dan' zoa len bene' ca' bi chosozenag che Diosen' yežlio nga. ⁵ Bene' ca' bi chosozenague' che Diosen' cheso'e diža' che dan' chac yežlio nga, na' da'nan' bene' lježe' ca' chosozenague' chegaque'. ⁶ Ca' nac chio', ba naccho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in' le' diža' li na' no bene' chzenague' diža' güenlaže' dan' chzejni'i Satanásen' le'.

Diosen' chacde' benač

⁷ Le'e bene' chacda', cheyala' soacho gaque lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacia' naccho xi'in' Dios na' nombia'chone'. ⁸ Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benačen', le con can' nac yichjlažda'ogüe'. ⁹ Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocane še chejnilaže'chone' do yichj do laže'cho. ¹⁰ Bi goquecho Diosen'; lelen' godce' chio' na' gwsele' Xi'ine' Jesucriston' cont bnitlagüe' xtoła'chon'.

¹¹ Le'e bene' chacda', dan' chaque Diosen' chio' lecz ca' cheyala' gaque lježcho tocho yetocho. ¹² Nono zoa bene' ba ble'ede' Diosen'. Perw na' še zoacho chaque lježcho tocho yetocho, nacia' Diosen' zoacze' len chio' na' ba chaquechone' can' cheyala' gaquechone'. ¹³ Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'. ¹⁴ Na' neto' postlw ba ble'eto' na' choe'to' diža' nezeto' gwsela' Xacho Diosen' Xi'inen' cont gwnitlagüe' xtoła' note'tez bene' šejnilaže' le'. ¹⁵ Na' note'tezcho še chejle'cho na' choe'cho diža' žacho Jesucriston' naque' dogualje Xi'in' Dios, Diosen' zoe' len chio' na' lecz zoacho txen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' benačen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. ¹⁷ Diosen' zoacze' chačlene' chio' cont chaquechone' can' cheyala' gaquechone' na' chaque lježcho can' cheyala' gaque lježcho, na' Diosen' chone' ca' cont bi žebcho cate' žin ža gone' yela' justis che

yogo' beṇach. Na' bi žebcho še zoacho chaque lježcho yežlio nga can' chon Jesucriston'. ¹⁸ Še chaquecho Diosen' ca cheyała', bibi de da' žebcho. Caten' chžebchon' naquen ca to castigw len chio', na' še ne' chžebcho biṇa' gaquecho Diosen' can' cheyała' gaquechone'.

¹⁹ Chio' chaquecho Diosen' le len' gocde' chio' da' nechw. ²⁰ Note'tezcho še chgue'e lježcho, la'czła' žacho chaquecho Diosen', con chonlaže'chon'. ²¹ Nacxe goncho gaquecho Diosen' ben' bi chle'echo še bi chaque lježcho bene' chle'etecho? ²¹ Na' ba bene' mandadw can' cheyała' gon chio' chaquechone', že' lecz cheyała' gaque lježcho.

5

Gwcuascho da' malen'

¹ Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'. ² Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. ³ Še chaquecho Diosen', choncho can' nžie' bia' goncho. Na' dan' nžie' bia' goncho, bi naccho, bi naccho zdebe gonchon. ⁴ Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'n' chzoecho chcuascho da' xinjen' dan' de yežlion' bi chonchon. ⁵ Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuae' da' xinjen'.

Diosen' cho'e diža' že' Jesucriston' naque' dogualje Xi'ine'

⁶ Quinga ben Jesucriston' šlac bide' yežlio nga, bnežjw cuine' gwzoe' nis na' blaj xchene'. Bi nacho con gwzoaze' nis, san lecz blaj xchene'. Na' Spiritw che Diosen' choen' diža' bene' ca', na' Spiriton' choen' pur diža' li. ⁷ Na' nita' šone bene' chesegüe'e da' bałi yaban' cheso'e diža' che Jesucriston': Xacho Diosen', len Jesucriston' ben' nzi' Xtiza' Dios na' len Spiritw che Diosen'. Na' toz can' cheso'e diža' che Jesucriston'. ⁸ Lecz de šone da' chesego'on da' bałi chesoen' diža' che Jesucriston' yežlio nga: Spiritw che Diosen', na' dan' gwzoe' nis na' dan' blaj xchenen'. Na' toz ca chesoen' xtižen'. ⁹ Chejle'cho xtiža' beṇachen', na' nach xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'. ¹⁰ Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'. ¹¹ Na' xtiža' Diosen' chzejni'in chio' guata' yela' mban che beṇachen' toli tocanē še yesejnilaže' Xi'ine' Jesucriston'. ¹² Quinga naquen, de yela' mban checho toli tocanē še chejnilaže'cho Jesucriston', na' bi de yela' mban checho toli tocanē še bi chejnilaže'chone'.

Can' beyož cart nga da' bzoj Postlw San Juan

¹³ Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocanē.

¹⁴ Na' bitw chžebcho chol güižcho Diosen', le nezecho chzenague' checho cate' chnabcho lagüen' da' chazlaže'. ¹⁵ Na' cate' nezecho chzenague' checho bite'tez dan' chnabechone', lecz nezecho gone' da' ca' ba gwñabechone'.

¹⁶ Na' še chache'echo bene' lježcho chone' bi da' xinj da' bi zaca' sela' Diosen' le' lo yi' gabil, cheyała' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bał bene' zacan' sela' Diosen' legaque' lo yi' gabil. Bi žia' nable gaclen Diosen' bene' ca'. ¹⁷ Napcho doła' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'n' bi soen gwžiyain' chio'.

¹⁹ Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

²⁰ Na' nezecho ba biđ Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocanē che bene' chejnilaže' le'. ²¹ Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

CART GWCHOPE DAN' BZOJ POSTLW SAN JUAN

Chio' nombia'cho diža' li che Diosen' cheyała' gaque lježcho

¹Neda' naca' bene' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' bene' yezica'chle bene' zjanombia' diža' li che Diosen' chesacde' le'e. ²Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocane. ³Ūacho Diosen' na' len Xi'ine' Ūancho Jesucriston' yesaclene' le'e, yesyeyaše' le'e, yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

⁴Leca gwbeda' cate' gwnezda' bal'bi' chio' ca' ba nita'be' chesombe' can' ža diža' li che Ūacho Diosen' can' bžie' bia' goncho. ⁵Dan' cheyała' goncho, no'ole, cheyała' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. ⁶Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyała' gaque lježcho.

Chas' bene' chesonlede'

⁷Bene' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' benačh. Note'tez bene' chon ca' naque' bene' gwxiye' na' chone' contr Criston'. ⁸Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni'i'bene' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Ūacho Diosen' len Xi'ine' Criston' nite' len chio'. ¹⁰Na' še no bene' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. ¹¹Cheyała' gonelene' ca', le še gwlebelene' zejen txen chonlenine' da' xinjen'.

Goclaže' šjan'e' legaque'

¹²De da' zan da' űia' le'e perw bich chaclaža' gwzojan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

¹³Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' űa'a.

CART GWYONE DAN' BZOJ POSTLW SAN JUAN

Postlw San Juanna' cho'e diža' güen che ben' le Gayo

¹ Neda' naca' beñe' gole blao, na' chzoja' cart nga par le', xmigua' Gayo. Da' li chacda' le'.

² Beñe' migw, chñaba' lao Diosen' gac güen chio' na' so' güen ca güenna' ba zoa lo' yichjlažda'oguo'. ³ Leca bebeda' cate' besela'ac to chope beñe' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'. ⁴ Len neda' le'e nacle ca xi'ina', na' bich bi de da' chbechda' ca chbeda' chñezda' chzenagle diža' li che Diosen' do yichj do laže'le.

⁵ Beñe' migw, chono' güen dan' chacleno' beñe' lježcho ca' beñe' zjanac beñe' zito'.

⁶ Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'šco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'. ⁷ Ba gosa'ac laže' cont cheso'e xtiža' Criston' na' bibi goclen chesezi'e che beñe' ca' bi chesejle'e che Criston'. ⁸ Da'nana' cheyalā gwlebocho beñe' ca', gadlenchwne' na' gonchone' txen cont yesombia' beñe' diža' li che Diosen'.

Diótrefes chone' da' mal

⁹ Baç bzoja' le'e chdop chžagle chonxenle Jesucriston', perw na' Diótrefes chaclaže' gague' la'zelaoze beñe' blao len le'e na' bi chzenague' cheto'. ¹⁰ Da'nana' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chne' cheto'. Na' gague' da' na'zen' chone', lecz bi chlebe' beñe' lježchon' liže' beñe' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

¹¹ Beñe' migw, bi gono' txen len beñe' ca' cheson da' xinjen', san ben txen len beñe' ca' cheson da' güen. Note'tez beñe' zoateze' chone' da' güen, nachbia' nombi'e Diosen', na' note'tez beñe' zoateze' chone' da' xinjen', nachbia' biña' gombi'e Diosen'.

Demetrimon' chone' da' güen

¹² Yogo'ze beñe' cheso'e diža' güen che Demetrio na' nachbia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

Can' beyož carten'

¹³ Dech da' zan da' godda' nia' le'e, perw bich chaclaža' gwzojan' le'e yiš. ¹⁴ Zoa' lez yob yežagcho cont güe'cho diža' cho'a cate' soacho txen.

¹⁵ Soago' binlo len xbab dan' yo'o lo' yichjlažda'oguoñ. Beñe' migw chion' nita' nga chosoguape' le' tiox. Na' chñaba' gwguapšco' tiox to to beñe' migw cheto' ca' nita' gan' zoalen'. Da' na'zen' chzoja' na'a.

CART DAN' BZOJ SAN JUDAS

San Judas chzoje' bene' ca' zjanaque' lo na' Diosen'

¹ Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. ² Chnaba' gon Xacho Diosen' cont gache'echle cheyaše' cheži'ilaže'chgüede' le'e, na' gone' cont soa cuezechle binlo len xbab da' yo'o lo' y'chjlažda'olen', na' gone' gache'echle chacchgüede' le'e.

Bene' ca' chososed chosolo'ede' diža' güenlaže'
(2 Pedro 2:1-17)

³ Bene' migw, chacda' le'e, na' ba goclaze'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocañe. Perw na'a ba chonen byen chzoja' chñeyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en. ⁴ Nita' bal' bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyala' yosozenag yogo' benačhen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtoła'gaquen'.

⁵ Na' la'czla' ba gwnezele yogo' can' goquen', chaclaža' gona' cont šjayza'laže'le Xancho Diosen' bosle' da' xoxta'o neto' bene' Israel lo na' bene' Egipto ca', perw gwdechle bžiaye'e balteze' bi gosjele'e che'. ⁶ Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyehoje' gan' bžia Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocañe cont yesezaca'zi'e cate' žin ža gac juisyw. ⁷ Na' lecze ca' bene' gwmita' ciuda Sodoma na' ciuda Gomorra len yezica'chle ciuda ca' zjanyechj jzambi'in legaquen, gosonchgüe' da' nac yela' zto' len cuerp chegaquen', le gosatalene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiiyi'tecczen'. Na' da' bene' ca', chosnisde' chio' benač gata' castigw lo yi' gabil' toli tocañe che bene' bi yosozenag che'.

⁸ Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua. ⁹ Perw nža'le cheson angl che Diosen', le cani' gwzao to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclazen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' ti'e le'." ¹⁰ Perw bene' quinga chesezi'diže' bite'teze da' bi chesejni'ide'. Na' chesenteze' da' ca' ža cuerp chegaquen' yesone', ca' cheson beyiže' be bi chesejni'i, na' da' ca' chesonen' chosožiiyin' legaque'.

¹¹ Nyaše'chgua gac chegaque'. Zjanite' chesegue'e lježgaque' can' ben da' Caín, na' lecze cheso'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e legaque' cacze güedenag ben da' ben' gože' Coré can', na' can' gwžiiyi' da' Corén' neche yela' güedenag chen', lecze ca' yesebiaye'e. ¹² Na' cate' le'e che'ej chagwle txen cont chlo'ele chaque lježle, legaque' chesagwxatteze' con nacteze žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'nan' zjazaca'lebde' ca' bzigüe' da' dope to le'e lache' šiš, na' lecze zjazaca'lebde' ca' bene' gieye' xila' bene' chna' cuine' na' bi chñe'e xila' ca'. Lecze zjazaca'lebde' ca' bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen' na' chbižen' lo yo. ¹³ Na' neche yela' zton' cheson bene' ca', zjazaca'lebde' ca' nisdao' da' chas chata' na' checho'onen bžina' ga nac lo yo cho'a nisdaon'. Na' zjazaca'lebde' ca' bejw da' bich žajžian xišne'en gan' cheyala' yesebian, le Diosen' bžie' bia' yesezaca'zi'e toli tocañe gan' nac leca chol.

¹⁴ Gwzolaon cate' gwzao da' Adán bžinten cate' gwzao da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca' ¹⁵ cont chogbi'en yesezaca'zi' yogo' bene' zjanape' doła'. Yogo' bene' ca' bi bosozenag che' yesezaca'zi'e toli tocañe neche da' gosone' da' mal juisyw yela' güedenag chegaquen' na' neche da' gosone' diža' ya' che'." ¹⁶ Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesenteze' bite'teze

žan čhegaque'. Len xtiža'gaquen' chesonxen cuingaque' na' chosopede' beñe' yoble cont yesone' gan mechw o cont yesaclen beñe' legaque'.

San Judas che'e beñe' chesonxen Jesucriston' can' cheyała' yesone'

¹⁷ San le'e beñe' migw, beñe' chacda', cheyała' šjayze'ele diža' nga gosena postlw ca' beñe' ca' gwlej Xancho Jesucriston'. ¹⁸ Gosene': "Tiempen' cate' ba zoa yid Xancho Jesucriston', nita' beñe' bi yesejle' che Diosen' na' yesonle' che' na' yesonteze' con da' žan čhegaque' da' nac yeła' zto'." ¹⁹ Na' na'a beñe' ca' chesone' cont le'e chejnilaže'le Criston' bi chonle toze xbab, san nža' nža'te ca žale. Chesone' xbab che da' chnalaže' cuerp čhegaque', le bi yo'o Spiritw che Diosen' lo' yichjlažda'ogaquen'.

²⁰ Perw le'e beñe' migw, chacda' le'e, na' chneyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yol güiž Diosen' ye'ln'e' da' chzejni'i Spiritw čhen' le'e. ²¹ Na' le soa le gon cont gacbe'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjayzoalenchone' toli tocañe. Da'n'an' le soa le cueze batcan' gone' ca'.

²² Bał beñe' chesacžejaže' še cheyała' yesone' can' ža Diosen'. Le gwzejni'i legaque'. ²³ Na' beñe' ca' ba chesezolagüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaque' nez güenna'. Na' yebał beñe' chesonchgüe' da' xinj, na' lecze cheyała' yeyaše'cho legaque', perw do chaž chžebcho, do chgue'echo dan' chesonen' na' cheyała' gwsaca'cho cont bi goncho txen len da' xinjen' chesonen'.

Judasen' chonxene' Diosen'

²⁴⁻²⁵ Cheyała' gonxencho toz Dios ben' zaca' gonxencho, ben' none' yeła' mban čecho toli tocañe. Dios nan' naque' beñe' sina' juisyw. Chac chone' cont bi lažo'cho goncho da' xinj, na' chac chone' cont bibi xtola'cho gata' cate' yežincho lagüen' gan' yo'ochgua be'ni'. Leca yebecho cana'. Diosen' naque' la'zelagüe beñe' zaca' beñe' blao, na' zaque' chnabi'e doxen. Naque' Xan yogo' beñač na' yogo' bica'chle da' de. Len' gocxene' cate' biña' xe yežlion' na' cheyała' gonxenchone' toli tocañe dan' gwsele' Xancho Jesucriston' chaclene' chio'. Ca'šca gac. Da' na'zen' chzoja'.

JESUCRISTON' BZEJNI'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. ² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' zanna'.

Juanna' chzoje' bene' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' bina' xe yežlion', na' soacze' toli tocañe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. ⁵ Na' Jesucriston' lezce soa'sque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabi'a' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtoła'chon'. ⁶ Nach ba gwleje' chio' cont nabi'a'cho t xen len le' ca no rey na' cont soacho gonxencho Diosen' ca no bžoz, Dios ben' nac Xe' na' lezce naque' ben' chxonene'. Cheyała' gonxenchone' toli tocañe, le zoacze' chnabi'e toli tocañe. Can' gonšcaczcho.

⁷ Jesucriston' yide' da' yoble to lo' bejw, na' yogo' loł bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gašca.

⁸ "Neda' naca' Dios ben' ben yežlion' len yogo' bichle da' de, na' naca' ben' gon cont te chen. Da'nana' zaca'lebd'a' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yela' guac xen juisyw, ben' ba zoacze' cate' bina' xe yežlion' na' soacze' toli tocañe.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho t xen chzenagcho che Jesüsen' cont Diosen' chnabi'e yichjlažda' ocho, na' toz can' chosoči chososaca' bene' chio' neče xtižen', na' t xen chaclen Jesucriston' chio' cont chyo chchejcho len yogo' da' chac checho. Da' ba gwduxjue'eda' xtiža' Diosen' na' ba bia' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisaon'. ¹⁰ Na' to ža dmigw Spiritw che Diosen' benen cont ble'edaogüeda', na' benda' Jesucriston' chne' cožan' žižjehgwa ca ga chbež trompeta. ¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te chen. Da'nana' zaca'lebd'a' ca letr nechw da' nzi' A na' letr bzebe da' nzi' Z. Bzój to le'e yiš da' quinga le'edo', na' sełon' lao bene' ca' nita' gaž yež che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwychja' gwna'a non' chne' na' ble'eda' gaže candeler de oro. ¹³ Na' gachol candeler ca' gaže, ble'eda' to bene' nac ca to benach perw gocbe'eda' bi naque' benachze. Nyaze' to lache' ton' da' bžinte lo ni'e na' nchej cho'alcho'en ca to bant de oro. ¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosacitčen ca to yi' da' chala'nin. ¹⁵ Ni'e ca' ble'edan' ca to de bronca da' nłachgua cate' naquen ya'alj xoan lo yi'. Na' ši'en nenen žižjehgwa ca chžiž yegw cate' dechgwa nis. ¹⁶ Na' noxe' gaže beljw len ne'e ličan' na' lo' cho'en chchojen ca to spada da' nła chop la'an. Na' cho'alagüen' goctitčen ca gwbiž cate' chna'chgwan.

¹⁷ Na' cate' ble'eda'ne' gwbiža' xni'en gottia' šlat. Nach bli' ne'e ličan' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te chen. ¹⁸ Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocañe. Na' naquen lo na' nia' bat yesat to to bene' na' nac gac chegaque' cate' bach gosate'. ¹⁹ Na' na'a bžoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac. ²⁰ Na' da' nono na' neže che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop

chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

2

Da' gwna Jesucriston' che bene' ca' chesonxen le' lo ciuda ca' gaže: Da' gože' bene' Efeso ca'
¹ Bzój ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' l'ichan' na' chda' gachol' candeler de oro ca' gaže, na' yo'one' nedan' chapa'ne' diža' quinga: ² "Neze nle'eda' ca' güenna' chonle, can' chchejlaže' le zoale chonchguale xšinan'. Nezda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chache'ele bi zjanaque' dogualje postlw. ³ Ba byo bchejle len yogo' dan' ba goc chele na' ba benchguale xšinan' na' bi jaxaque' laže' le. ⁴ Perw da' nga bi chazlaža' can' chonle, da' bich chaquele neda' can' goquele neda' cana'. ⁵ Da'n'an' le gon xbab can' gwzoale goquele neda' na' can' gwzoale bzenagle chia' na' yetinje xtoła' le cont da' yoble gonle güen can' benle cana'. Na' še bi yetinjele xtoła' len', yedeyena' cont bich gacle candeler chia'. ⁶ Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezechle da' xinj, le neda' lecze chgue'eda' can' chesonen'. ⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagna' da' chbia lo yag yela' mban da' zoa latje xdan che Diosen'."

Da' gože' bene' Esmirna ca'

⁸ Na' na'a bzój ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: ⁹ "Neze nle'eda' ca' güenna' chonle. Nezda' chy chzaca'le. Nezda' nachguale bene' yaše', la'czla' de chele da' zaca'ch clel ca' yela' gwni'an'. Na' ca' nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' t xen chosozenague' che Satanásen dan' chnabia' da' xigüe' ca'. ¹⁰ Bi žeble da' ca' za' gac chele, le Satanásen' gonen cont yeseyixjue' bale' ližya cont gata'bia' še soen gonen cuejyichjle xtižan'. Na' lo to chope ža yosochi yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocaņe. ¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocaņe dan' žacho yela' got gwchope."

Da' gože' bene' Pérgamo ca'

¹² Na' bzój ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: ¹³ "Neze nle'eda' ca' güenna' chonle. Na' nezda' zoale lo ciuda gan' chnabia' chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' naca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'. ¹⁴ Perw de to chope da' chonle da' bi chazlaža'. Le nita' bale' chzejni'i lježe guac gontezle da' xinj. Ca'cze nac dan' bzejni'i da' Balaam da' rey Balac cani'. Da'n'an' gwsele' no'ole gosego'oyele' bene' Israel ca' cont gosagüe' yela' guagw da' nac che l'gua' la'saca' gosejnilaže' bene' zito' ca' na' cont gosone' da' yela' zto' len cuerp chegaque'. ¹⁵ Na' lecze nita' bale' chzenagle che dan' chgue'eda' dan' chososed chosolo'e bene' ca' zjanzi' nicolaítas. ¹⁶ Da'n'an' le yetinje che da' xinjen' chonle. Na' še bi yetinjele xtoła' len', la' yiditia' yedetillena' nole chonle da' xinjen' len spada dan' chchoj choan'. ¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca' maná, na' gona' to yej šiš che to tole gan' yoj lala da' naquen to lala da' cobe da' nono nombia', lete le'e gaquen lo na' le gombia' len."

Da' gože' bene' Tiatira ca'

¹⁸ Na' bzój ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca' to yi' da' chala'nin na' ni'a ca' chesaquen ca' bronca da' cheyac ya'alj cate' xon lo yi'. Yo'one' neda' chapa'ne' diža' quinga: ¹⁹ "Neze nle'eda' ca' güenna' chonle, nezda' zoale chaquele neda', chejnilaže'lenda', chonchguale xšinan' na' chchejele bite'teze chac chele, na' nezda' chonchle güen na'a clel can' benle cana'. ²⁰ Perw de to da' chonle da' bi chazlaža', le choe'le latje zoa to no'ole naque' t xen len le'e, no'olen' zaca'lebe ca' da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bale' chesone' da' nac da' yela'

zto' len cuerp chegaquen' na' lecze chesagüe' yela' guagw da' chesena bene' naquen che l' gua'a l'saca' chesejnilaže'. ²¹ Ba gwleza' cont yetinjde' che yela' zto' dan' chonen', perw bi chaclaže' yetinjden', na' bina' cuejyichje' yela' zton' chonen'. ²² Da'n'an' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesale' chgüede' še bi yesebejyichje' da' ca' chzejni' ide' legaque' yesone'. ²³ Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesache'ede' nombi'a yogo'te xbab da' yo'o lo' yichjlaždao' beñačh, na' gona' cont to toe' soe' mbalaz o saca'zi'e con ca' nac da' ba bene'. ²⁴ Na' le'e zoale Tiatiran' le'e bi chonle can' chsed chlo'e no'ole güenlažen' na' neca nseidle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle. ²⁵ Con soaczle gonle da' güen can' chonle tza tza, cont ne' chonle güen caten' yida' da' yoble. ²⁶ Note'tezle še soele bi cuejyichje' xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabia'le nación ca' txen len neda'. ²⁷ Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca' žan bene' nación ca' yosozenague' chegaque', na' bene' ca' bi chosozenag, yosožiaze'e legaque' ca' to bene' chzoxj to no yeso' xguague. ²⁸ Na' gwnežjua' legaque' beljw xsilen'. ²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

3

Dan' gože' bene' Sardis ca'

¹ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca' gaže spiritw, na' noxa' beljw ca' gaže, na' neda' chapa'ne' diža' quinga: "Neze nle'eda' yogo'lo' dan' chonle. Nezda' nacle ca' bene' guat la'czla' chze chele napple yela' mban toli tocañe. ² Le gon xbab can' chonle na' le šejnilaže'ch neda' na' le gwzenag chia' šlac bina' yeyož cuiayi'le, le dan' chonlen' bi naquen can' chebe Dios ben' chonxena'. ³ Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjle xtola'len'. Na' še bi gonle xbab yetinje xtola'len', žin ža yedexenyala' le'e na' gona' castigw chele ca' chzenyal to no bene' gwban cate' chbane'. Bi nezele bi ža bi hor. ⁴ Bia'cze nita' balle bene' Sardis bina' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš čazle na' talenle neda', le zaca'le cont gonle neda' txen. ⁵ Note'tezle še soele bi cuejyichje' xtižan', žin ža gona' lache' šiš čazle, na' gwbat yoxia' lalen' le'e libr' chia' gan' nyoj la yogo' bene' zjanape' yela' mban toli tocañe, na' güe'lana' Xan' diža' na' len bene' zjanac angl' che' ca' yapegacane' nacle neda' txen. ⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' bene' Filadelfia ca'

⁷ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gnwia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: ⁸ "Neze nle'eda' ca' güenna' chonle. Nach ba gwsaljua' ca' to puert che le'e da' nono gac yosejyw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e. ⁹ Bal' bene' Israel že' gan' zalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabi'a' da' xigüe' ca'. Na' ca' nac legaque', gona' cont žin ža yesape' le'e bala'an' cate' yesache'ede' chacda' le'e. ¹⁰ Ba byo bchejle len yogo' dan' gwdi gwxacale' na' bene' can' nona' mandadw, na' da'n'an' gona' yechojle güen cate' žin ža saca'zi' yogo' beñačh. Cana' gata'bia' che to to beñačh še yosozenague' chia' o še bi yosozenague'. ¹¹ Ba zoa yida' da' yoble. Le soachačh le šejnilaže'nda' na' gwzenagle chia' cont bibi gwžon soale mbalaz toli tocañe. ¹² Note'tezle še soele bi cuejyichje' xtižan', žin ža gona' gacle ca' bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlen'ne' toli tocañe. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. ¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' bene' Laodicea ca'

¹⁴ Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' beñačh na' yogo'lo' bichle da' de le'e yaban' na' lo yežlion'. Yo'one' neda' chapa'ne' diža' quinga: ¹⁵ "Neze nle'eda' ca' chonle, bi načo chgue'ele

neda' na' nēca chaquele neda'. Yebechda' šaca' chgue'ele neda' o šaca' chaquele neda'. ¹⁶ Na' da' bi chonle cuent gaquele neda', da'nān' ba zoa cuejyichja' le'e bich gona' le'e ca xi'ina'. ¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca bene' zban nacle len Diosen'. Bi chacbe'ele nacle ca to bene' bi chle'e o ca to bene' laže' ga'alyid da' bi chejni'ile xtižan' nēca chzenagle čhen. ¹⁸ Da'nān' chnia' le'e cheyala' si'le da' gona' le'e, le naquen da' zaca'ch ca oro dan' ba bosozeye' cont bega'an' da' dogualje. Si'le da' gona' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyala' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gache'ele da' chaclaže' Diosen' gonle. ¹⁹ Note'teze bene' chacda', chdila'ne' na' chnežjua'ne' castigw cate' chone' da' xinj. Da'nān' cheyala' cuec yichjele yetinjele xtoła'len'. ²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'te zle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. ²¹ Na' note'te zle še soele bi cuejyichjele xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lēna'ne' chnabi'a'to' txen. ²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

4

Ben' že' yaban' chesonxene' Diosen'

¹ Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw žizžechgua cacze žizže chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. ³ Na' ble'eda' ben' chi' chnabian' chactite' ca chactit yejese, yej da' nzi' jaspe na' da' nzi' cornalina. Na' to da' nac ca to pita' gwyečhjen gan' chi'e chnabi'en, na' chactiten ca chactit to yej da' nzi' esmeralda. ⁴ Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. ⁵ Na' gan' chi' Diosen' chnabi'e chep yes na' chac sšag na' chašw chtin. Na' lagüen' nita' gaže yi' da' čala'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. ⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. ⁷ Bene' nechw naque' ca to león, na' bene' gwchope ca to go'n, na' bene' gwyoņe nac cho'alagüe' ca che beňach, na' bene' gwdape naque' ca to bsia be ze lo be'. ⁸ Na' dapte bene' ca' to toe' žia xop güejje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chosane' chesene':

Lēca bene' laždao' xilaže' juisyw nac Xancho Diosen' ben' nape la'zelagüe yela' guac xen. Ba zoacze' cate' za' xe yežlion', na' soacze' toli tocaņe.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabi'a, ben' zoacze toli tocaņe, yogo' ni'a cate' chesonxene' le' cheso'e yela' choxclen che', ¹⁰ bene' tapechoa ca' gwlej Diosen' cont zjanaque' blao chosoza xibe' lao Dios ben' zoa toli tocaņe chesonxene' le' gan' chi'e chnabi'e na' chosonite' corona čhegaquen' xni'en, chesene':

¹¹ Xanto' Dios, zaco' gonxento' le',

na' soato' le' bala'an' na' güe'to' diža' che yela' guac xen čhion',

le len' beno' yogo'loł da' de,

na' beno' yogo'lołen con ca gwnalažo'.

5

Jesucristw ben' zaca'lebe ca xila' daon' gosot bene' Israel ca' neche xtoła'gaque'

¹ Na' ble'eda' Dios ben' chi' chnabi'a, len ne'e liča noxe' to yiš da' ndobyoyen na' nyoj chop la'aten na' nyeyjon nyišen' gaže seyw. ² Na' ble'eda' to angl gual gwne' žizže gwne':

—čNon' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' nēca yaban' na' ne yežlion' na' nēca gan' že' bene' guat ca'. Ne to nono bžel bene' la'ch le'ezden' nac naquen. ⁴ Na' gwchežchgua' da' nono zoa bene' zaca' gwzaše' yišen' gwlaben' na' nēca zaque' na'ze' nac naquen. ⁵ Nach to bene' gwlej Diosen' cont naque' blao gože'nda':

—Bitw cuežo'. Gwṇa'šc, na' zoa Jesucristw ben' golje lo diaža che da' Judá, naque' rey can' nac da' xozxta'ogüe' David, na' da' nape' yeḷa' chnabia' xen zaca'lebde' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac ṇitlao xtola' benachen'.

⁶ Nach ble'eda'ne' zeche' gan' chi' ben' chnabian' na' ladjo beṇe' ca' tap ben' zjažia xil, do gachol beṇe' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'. ⁷ Nach ben' ble'eda' ca to xila' dao' jaxi'e yiš dan' noxe' ben' len ne'e liča gan' chi'e chnabi'en. ⁸ Na' cate' jaxi'e yišen' beṇe' ca' tap lente beṇe' blao ca' tapechoa bosozoa xibgaque' lagüen'. Na' to to beṇe' blao ca' zjanoxe' to arpa na' to barser de oro gan' chey yal, na' yalen' zejen xtiža' beṇe' ca' zjanac lo na' Diosen', dižan' chesoe'lene' le' caten' chosol güiže'ne'. ⁹ Nach beṇe' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen',
le bnežjw cuino' gosote' le'.

Blalj xčheno' cont bnitlaguo' xtola'to',

na' gwxi'o neto' cont nacto' lo na' Dios,

neto' nacto' beṇe' to to naciön, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey,

na' zoato' chonxento' Dios četon' ca bṅoz,

na' žin ža nabia'to' lo yežlion'.

¹¹ Nach gwṇa'a na' ble'eda' beṇe' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' že' beṇe' ca' tap na' beṇe' blao ca' tapechoa.

¹² Na' benda' cheso'e dižan' zižje chesene':

Jesucriston' bnežjw cuine' neče xtola' benachen',

na' da'nan' zaca'lebde' ca xila' daon' gosot beṇe' Israel cont gwṇitlao xtola'gaque'.

Na' Jesucriston' zaca'cze' gonxenčhene',

le chnabi'e doxen, na' yo'o lo ne'e yogo'te da' zjade.

Naque' beṇe' sina' gual, na' nape' yeḷa' guac xen.

Cheyaḷa' güe'chone' yeḷa' bala'aṇ,

na' güe'cho diža' naque' beṇe' zaca' juisyw.

¹³ Na' lecze benda' yogo' beṇe' že' yaban' na' yežlion' na' beṇe' že' latje che beṇe' guat, na' bene' zjanita' lo nisdao', cheso'e diža' chesene':

Toḷi tocaṇe chonxencho Dios ben' chi' chnabia'

na' Jesucriston' ben' zaca'lebde' ca xila' daon' gosot beṇe' Israel cont gwṇitlao xtola'gaque'.

Zjanape' yeḷa' bala'aṇ, na' zjanaque' beṇe' zaca' juisyw,

na' zjanape' yeḷa' guac xen juisyw toḷi tocaṇe.

Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach beṇe' ca' tap ben' zjažia xil gosene':

—Ca'šcacle gac.

Na' beṇe' blao ca' tapechoa bosozoa xibgaque' gosonxene' Dios ben' zoa toḷi tocaṇe.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot beṇe' gualaž četo' neče xtola'gaque' bzojje' seyw nechon'. Nach beṇe' ca' tap zjažia xil, to'e gwṇe' zižje, ca zižjen' chašjw čhtin yi' gwzio', gwṇe':

—Da, na' gwṇa' da' nga.

² Na' cate' gwṇa'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neče da' ba bene' gan lo gwdiḷe, na' na'a ba zeje' da' yoble cont tiḷlene' nochle beṇe' chesegue'ede' le' na' gone' gan legaque'.

³ Na' ben' zaca'lebde' ca xila' dao' be gosot beṇe' gualaž četo' neče xtola'gaque', cate' bzojje' seyw gwchope benda' gwṇe yeto ben' žia xil, ben' nac beṇe' gwchope, gwṇe':

—Da, na' gwṇa' da' nga.

⁴ Nach bchoj yeto cabayw, na' bena' nacba' be xṇa. Na' ben' žie' cože'ban' gwyo'o lo ne'e gone' cont beṇe' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot beṇe' gualaž četo' neče xtola'gaque' bzojje' seyw gwyoṇe, benda' gwṇe beṇe' gwyoṇe ben' žia xil, gwṇe':

—Da, na' gwṇa' da' nga.

Nach gwña'a na' ble'eda' to cabayw gasj na' ben' zie' cože'ban' noxe' to xigonz. ⁶ Na' benda' gwne' to bene' do gan' že' bene' ca' tap ben' zjažia xil, gože' ben' zia cože' cabayw gasja', gwne':
—Gwyey jažiayi' trigw na' cebada cont yesaquew gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzojxe' seyw gwdape, benda' gwne' bene' gwdape ben' zia xil, gwne':

—Da, na' gwña' da' nga.

⁸ Nach gwña'a na' ble'eda' to cabayw be gaše, na' ben' zie' cože'ban' lie' Yeła' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlaw yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzojxe' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiza' Diosen' na' lagüe dan' gosoe' diža' gosone' chesejnilaže' Jesucriston'. ¹⁰ Na' bene' guat ca' gosone' zižje gosone':

—Xanto' Dios, le' naco' bene' laždao' xilaže' juisyw na' zoaczo' chono' con ca' zo'. ¿Batcan' gono' yeła' justis che bene' ca' že' yežlion' ben' gosot neto'? ¿Batcan' gono' cont yesezaca'zi'e da' bosolalje' xchenton'?

¹¹ Nach Diosen' bnežjue' to to bene' guat ca' tgüeje xagaque' da' šiš da' gosaze'. Na' gože' legaque' yesyezi'laže'che' yeto chop ža šlac yeseza' bene' cheyała' yesat can' gosate' lagüe da' chesonxene' Criston', bene' zjanac ca' biše' lježe'.

¹² Nach ben' zaca'lebde' ca xila' daon' be gosot bene' gualaž cheto' neche xtoła'gaque', cate' bzojxe' seyw gwxoje, gwña'a na' leca gwxo'. Na' gwbižen' beyaquen gasj ca lache' gasj da' chesaz bene' cheseğüne', na' doxen bion' beyaquen xna ca chen. ¹³ Na' beljw ca' besejynjen besežinten lo yežlion' can' chyiñj no yixgüigw da' zia lo xyaguen cate' chečhj to be' gual da' chtan len. ¹⁴ Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'. ¹⁵ Nach yogo'lol bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. ¹⁶ Na' gosene':

—Che'šca bđinj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neche xtoła'gaque' bi gone' saca'zi'cho. ¹⁷ Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

7

Bene' Israel ca' bene' zjanyiše' seyw che Diosen'

¹ Gwdena' ble'eda' tap angl zjazeche' tap squin che yežlion' bosozague' ben' cont bi gwyechjen lo yežlion', lo nisdaon' o gan' ze yag ca'. ² Na' ble'eda' yeto angl bene' za' gan' chla' gwbiž na' noxe' to da' gwčhine' gwčhiše'de' seyw che Dios loxga bene' ca' chesonxen le', Dios bene' zoa toli tocaņe. Na' anglen' gwne' zižje bol güiže' angl ca' tap ben' zjanac lo ne'e yesone' gac yeła' zi' lo yežlion' len lo nisdaon'. ³ Gože' legaque':

—Bi gwžiayi'le yežlion', ne nisdaon', ne yag ca' šlac biña' gwčhiša' seyw che Dios checho loxga bene' ca' chesonxen le'.

⁴ Na' benda' gwne' bal bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. ⁵ Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, ⁶ na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés, ⁷ na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, ⁸ šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

Bene' zan zjanyaze' lache' šiš

⁹ Na' gwdena' gwña'a da' yoble na' ble'eda' zjaze bene' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot bene' Israel neche xtoła'gaque'. Na' nono goc yosolab bal bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin. ¹⁰ Na' chesyebede' bososye'e gosone':

Xanto' Dios ben' chi' chnabia' na' Jesucristw ben' zaca'lebde' ca xila' daon' be gosot bene'
Israel neche xtolá'gaque',

legaque' ba gosone' yela' mban checho toli tocaṇe.

¹¹ Nach yogo'loḷ angl ca' zjaze' cue'ej cuite' gan' chi'e chnabi'e, na' bene' blao ca' tapechoa na'
bene' ca' tap zjažia xil, yogo'lóle' jasechaze' coscho'ale lo yon' gosonxene' Diosen', ¹² gosene':
Chac can' cheyaḷa' gac, Dios cheto'.

Zaca'czo' gonxento' le' toli tocaṇe,

le naco' bene' zaca' juisyw,

naco' la'zelagüe bene' sina',

zaco' güe'to' yela' choxcen chio' na' güe'to' yela' bala'an chio' toli tocaṇe,

chnabi'o doxen, na' napo' la'zelagüe yela' guac xen.

Can' nacczen.

¹³ Nach to bene' blao ben' nac txen len bene' tapechoa ca' gože'nda':

—¿Nezdo' no zjanac bene' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' bene' gole, bi nezda' neda'.

Nach gože' neda':

—Bene' quinga ba gosale'de' da' ba gosac chegaque' yežlion'. Na' baḅ gwnitlao
xtola'gaque' na' ba zjanyaže' lache' šiš, le chesejnilaže' Jesucristw ben' blalj xchene' ca xila'
dao' be gosot bene' Israel cont bezi'xen Diosen' xtolá'gaque'. ¹⁵ Da'n'an' nite' lao Diosen'
gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape'
legaque'. ¹⁶ Bich yesebiḷ yesedone', na' gwbižen' bich gwzeyen legaque', neca yesacde' zeye'.
¹⁷ Le Jesucristw ben' zaca'lebde' ca xila' daon' ben' gosot bene' Israel neche xtolá'gaque', len'
chgüia chñe'e legaque'. Ze' lao Diosen' gachol gan' chi'e chnabi'e na' gone' cont nita'chgüe'
mbalaz. Gone' cont bich yesebeže' neca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebde' ca xila' daon' be gosot bene' gualaž
cheton' bzožje' seyw gaže da' nyiše' yiša', na' cate' bzožjen' gocži yaban' do gašj hor. ² Na'
ble'eda' gaže angl ca' zjazeche' lao Diosen', na' bnežjue' legaque' tgüeje trompeta. ³ Na' yeto
angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' bene'
ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to
barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene'
ca' cont naquen txen len ši'i bene' ca' chesonxene' Diosen' bate'teže chosoḷ güiže'ne'. ⁴ Nach
gwyas žen che yala' noxe' anglen' gwloen lao Diosen' len xtiža' bene' ca' chesonxene' le'.
⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na'
gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta chen', na' gwche'chgua yej lo yežlion' na' nchixen yi' na'
chen. Na' da' zcha'o yežlion' gwžiai'y', yelate'ze ca goc gašje yo da' de lo yežlion' gwyyen,
lente yag da' ze lagüen goseyen, na' lecze yeto ca'ate' yixe' ga' da' de lo yežlion' goseyen.

⁸ Nach angl gwchope bcuež trompeta chen', na' to da' nac ca to ya'a xen blažon' lo' nisdaon'
chala'ninen. Na' yelate'ze ca goc gašje nisdaon' beyaquen chen. ⁹ Na' yelate'ze ca goc gašje
be ca' že' lo' nisdaon' gosatba', na' leze yeto ca'te' barcw ca' chaš lo nisen' gosebiayin'.

¹⁰ Nach angl gwyone bcuež trompeta chen' na' to beljw xen blažon' le'e yaba chala'ninen
ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc
gašje yegw ca' na' ga chal nis dan' zjade yežlion' gan' jago'onen'na'. ¹¹ Na' beljon' nzin' Da' Žla',
na' nisen' gan' jago'onen'na' beyaquen žla' na' bene' zan gosat dan' gose'eje' nisen'.

¹² Nach angl gwdape bcuež trompeta chen' na' yelate'ze ca goc gašje gwbižen' gwžiai'yin',
lecze yeto ca'te' bion' gwžiai'yin' na' lecze yelate'ze ca goc gašje beljw ca' gosebiayin'. Na' da'
ca' gosebiayin' bich bososenin'. Da'n'an' gwdena' goc chol yelate'ze ca goc gašj ža gašj yel, na
goc ca' yogo' ža yogo' yel.

¹³ Nach gwṇa'a na' ble'eda' chda lo be' to angl do gachol le'e yaban' na' benda' gwṇe' žižje,
gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta
chegaquen'!

9

¹ Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua dan' nac lo gabil'. ² Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc chol' le'e yaban' can' chac cate' chi'chgua žendao', lao gwbižen' len lo be' goquen chol' catec gwche' ženŋa'. ³ Gan' gwyas ženŋa' besežaš biše'zo zan gwyasba' lo yežlion', be yeseyižba' bene' can' cheson bežjoni' be chaš yežlio. ⁴ Diosen' gože'ba' bibi yesoneba' yiže' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey che Diosen' loxgagaque'. ⁵ Na' bi be'e latje yesotba' legaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežaglagüe' can' chžaglaochi cate' chyiž bežjonin' chio'. ⁶ Na' cate' žin ža yesomba' ca', bene' že' yežlion' yesenablaže' yesate', perw bi yesate'; yesaclaže' bich yesenite', perw bi gac can' yesaclažen'. ⁷ Ca nac biše'zo ca', ble'eda' zjanacba' ca cabayw be šja'ac lo gwđile. Yichjgacban' zjazoa da' nac ca corona de oro. Cho'alaoban' naquen ca cho'alao beŋač. ⁸ Žjažiaba' yiša' da' nac ca yiša' yichj' no'ole. Łayban' zjanaquen ca lay bež znia be nzi' león. ⁹ Na' zjanyazba' to da' nac de ya da' chcue'ejen cuerp chegacban'. Na' sšag da' chesomba' len xilgacban' chñin ca chñin cate' chesa'aces cabayw zan zja'acba' lo gwđile zjanxobba' carret. ¹⁰ Na' lo xban biše'zo ca' zjazoa liba' zjanaquen ca xban bežjoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaque'. ¹¹ Angl ben' beyac da' xigüe' dan' chnabia' gabilen' naquen xan biše'zo ca'. Lenŋa' nzi' Abadón diža' hebreo na' lecze nzin' Apolión diža' griego, na' zejen diža' Da' Chžiyain'.

¹² Ba gwde yela' zi' nechon' na' za' za'ac yechopen.

¹³ Nach bcuež angl gwxopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. ¹⁴ Na' bol' güiže' angl gwxop ben' noxe' trompetan', gože'ne'.

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

¹⁵ Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' beŋač, na' caten' gosaše', yelate'ze ca goc gašje bene' že' yežlion' gosote'. ¹⁶ Na' gwnita' chop gayoa millón soldadw chegaque' zjažie' cože' cabayon'.

¹⁷ Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chñan' ca color che yi' na' chñan' da' azul na' da' gaše. Na' yichj' cabayw ca' zjanaquen ca yichj' bež znia be nzi' león, na' chchoj yi' cho'agacba' len žen na' len azufre da' čala'ñin. ¹⁸ Yelate'ze ca goc gašje bene' že' yežlion' gosat len yi' na' len žen na' len azufre da' bchoj lo cho'agacba'.

¹⁹ Na' bosochin cho'agacba' na' len xbangacba' cont gosotba' beŋač, na' xbangacban' gosaquen ca bel' na' zjansa' yichjen cont goseyi'inen bene'.

²⁰ Na' bene' ca' besyega'an bi gosat cate' gwyas' cabayw ca' lo yežlion', legaque' bi besyetinjde' che da' mal ca' chesone', neca bososane' da' chesonxene' da' xigüe' ca' na' l'gua'a l'saca' chegaque' ca' da' zjanac de oro, de plata, de bronce, de yej o de yag, la'czla' l'gua'a l'saca' ca' bi chesele'en, neca chesenen, na' neca chac yesa'aquen. ²¹ Na' neca besyetinjde' cont yesebejyichje' bichle da' mal da' chesone', ca dan' chesote' bene', da' chesone' txen len no bene' guaza', da' chesone' da' yela' zto' len cuerp chegaquen', na' da' chesebane' da' de che bene'.

10

Angl bene' noxe' yiš dao' ndobyoyen

¹ Nach ble'eda' yeto angl gual gwze'e yaban' betje' lo yežlion'. To bejw nyechjen le' na' zoa to pita' yichjen'. Cho'alagüen' chna'titen ca gwbiž, na' yen'i'e ca' ble'edan' zjanaquen ca bdope da' čala'ñin. ² Anglen' noxe' to yiš dao' da' ba beyašen. Na' bzoa šla'a ni'e liča lo nisdaon' na' yešla'an bzoe' lo yežlion'. ³ Na' bosye'e zizje' ca zizje' chosya'a be nzi' león. Na' cate' bosye'e gwne gwzio' gaž ni'a na' to gwzion' zoa da' gosenan. ⁴ Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda'.

—Bi gwzojo' dižan' bendo' šlac gwne gwzion', san gwđapen lo' yichjlažda'oguo'.

⁵ Nach angl ben' zoa šla'a ni'en lo nisdaon' na' yešla'an lo yežlion' gwłis ne'e ličan' yabale. ⁶ Na' gwlo'e da' balj' gac can' ža Dios ben' zoa toli' tocaŋe, ben' ben' le'e yaba len yogo'te da' chle'echo le'enŋa', bene' yežlion', beŋač, beyiže', na' bite'tezechle da' de lo yežlion', na' bene' nisdaon' len be ca' na' da' ca' že' lo'enŋa'. Gwne':

—Bich cuež Diosen' gone' can' ba nžie' bia' gone'. ⁷ San cate' žin ža gwcuež angl gažen' trompeta chen', cana'ch gac da' nžia Diosen' bia' gac, can' ba gože' bene' ca' goso'e txižen', da' nono gwneze cani'.

⁸ Nach da' yoble ben' zoa yaban' ben' ba benczedá' gwñie' neda', gwne':
—Gwyey jaxi' yiš dao' dan' ba beyaš dan' noxe' angl ben' zecha zoa šla'a ñi'en lo nisdaon' na' yešla'an lo yežlion'.

⁹ Da'nán' gwyá'a gan' zoa anglen' janaba' yišen'. Na' anglen' gože'nda':
—Bexon' gwdagon'. Lo' cho'on gacdon' zix ca šina' beser, perw lo' li'on yeyaquen zla'.
¹⁰ Nach bexo'a' yišen' noxe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. ¹¹ Nach anglen' gože' neda':
—Da' yoble cheyała' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

11

Chope bene' goso'e xtiža' Diosen'

¹ Nach anglen' bene' neda' to ya ca nac da' chosočhine' cate' chosočhixe' yo'o, na' gože'nda':
—Gwyey jachiže yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bał bene' že' chesonxene' le'. ² Perw bi gwchixo' chy'o'on, le ba naquen lo na' bene' bi zjanac bene' Israel bene' bi chesejniłaže' Diosen' cont yesone' nacteze chesacłaže' lo ciuda che Dios lao chopeyon bio'. ³ Na' seła' chope bene' yeso'e xtiža', na' yesaze' lache' gasj ca to bene' chegüine' na' yeseyixjue'ede' xtižan' lao to mil chop gayoa gayon ža.

⁴ Bene' ca' chope zjazaca'lebe' ca yag olivos ca' chope na' ca candeler ca' chope da' zjazoa lao Diosen' ben' nac Xan yežlio. ⁵ Na' še no chaclaže' gonxi'e legaque', choj yi' cho'a bene' ca' yeso'e xtižan' na' gwzeyen bene' chgue'ede' legaque'. Can' gac yesat note'teze bene' chende' gonxi'e bene' ca' chope. ⁶ Na' bene' ca' yeseyixjue'ede' xtižan', gac lo na'gaque' yesone' cont bi gac yew žlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesacłaže', yesone' gac bite'tezechle da' yesežagłao bene' že' yežlion'. ⁷ Perw cate' yeyož yeso'e xtižan', nach choj lo' gabił gan' nac yechw zitiwchgua to bež xigüe' niza' legaque' na' gotteba' legaque'. ⁸ Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto. ⁹ Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yesegaše'. ¹⁰ Bene' ca' že' yežlion' yesyebede' da' gosat bene' ca' chope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len' legaque', le leca zed chesacden'. ¹¹ Na' ble'edaogüeda' gwde šone ža yogašje Diosen' bosbane' bene' ca' chope na' gosezeche' da' yoble. Na' yogo' bene' besele'e legaque' besežebchgüe'. ¹² Nach bene' ca' gosoe' xtiža' Diosen' gosende' gož Diosen' legaque' zižje:
—Le yeda, le yeyep nga.

Nach bene' ca' chesegue'e legaque' besele'ede' besyeyepe' yaban' to lo' bejw. ¹³ Šlac chesyeyepen' leca gwxo' na' gwžiyai' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

¹⁴ Ba gwde yela' zi' gwchopen' na' za' gac da' gwyone.

Can' goc cate' angl gaže bcueže' trompeta čhen'

¹⁵ Nach angl bene' gažen' bcuež trompeta čhen' na' benda' bał bene' ca' že' yaban' gosene' zižje, gosene':

Doxen yela' chnabia' che yežlion'

bač naquen lo na' Xancho Diosen' na' lo na' Cristo ben' gwleje' cont chnabi'e.

Na' Diosen' zoacze' chnabi'e toli tocañe.

¹⁶ Nach bene' blao ca' tapechoa ben' zjachi' cue'ej cuit Diosen', jasechaze' cosčo'ale lo yon' gosonxene' Diosen', ¹⁷ gosene':

Chonto' yela' choxclen čhio' Xanto',

le naco' Dios ben' nap yela' guac xen.

Ba zoaczo' cate' biña' xe yežlion',

na' soaczo' toli tocañe.

Na' ba gwzolao chnabi'o len yela' guac xen čhion' cont gac can' chazlažo' doxen.

¹⁸ Bene' nación ca' že' yežlion' beseže'e le',

perw ba bžin ža gono' yesezaca'zi'e.

Ba bžin ža čhoglaguo' che yogo' bene' ca' ba gosat še noe' nap doła'.

Na' gono' cont bene' güen xšino' ca' bene' ca' goso'e xtižon' yesenite' mbalaz,

len yogo' bene' gwlejo' cont zjanaque' lo nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Lece ba bžin ža yesebiayi' bene' ca' bosožiyai' ljež beñache' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaž cheto' ca' yesone' cont gaclene' legaque'. Na' šlac gwña'a, gwyep yes, gocchgua sšag, gošj gwtin, gwxo' na' gwche'chgua yej.

12

No'olen' na' beļ be zoa gaž yichj

¹ Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca xe'. Nleje' lo bion' na' zoa to corona yichje' da' žian šižinw beljw. ² No'olen' no'e bdao' na' chosye'e, le chaque' bes che yela' sanna'. ³ Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca to beļ be žia gaž yichj, be xen juisyw. Nachba' be xna na' žia ši lozba' na' zoa tgüeje corona to to yichjban'. ⁴ Na' bta xbamban' cont bchinjen zan beljw ca' žia le'e yaban' na' beselažon' lo yežlion', yelate'ze ca' goc gašje beljw ca' zjažia le'e yaban' bchinj xbamban'. Na' gwlezba' xni'a no'olen' ba zoa sanna' cont yebba' bdao' čhen' cate' sane'be'. ⁵ Nach no'olna' gwxxane' to bi' byo bi' nabia' nación ca' na' žan ca žan yosozenague' čhebe'. Nach Diosen' beyo'ebe' gan' chi'e chnabi'e. ⁶ Nach no'olen' boxonjde' belen', na' gwyeye' to latje daš da' benšagüe' Diosen' čhe', gan' yeso'ene' da' ye'ej gagüe' lao to mil čop gayoa gayon ža.

⁷ Gwde na' goc to gwdile yaban', le angl blao ben' le' Miguel na' soldadw čhe' ca' gosedilene' beļ ben' žia gaž yichj lencze angl čhe belen' bene' ca' besyeyac da' xigüe'. ⁸ Na' belen' len da' xigüe' ca' bi' gosezoen angl ben' zjanac bene' čhe Dios, na' bich bi' latje gota' čhe belen' yaba, neca čhe da' xigüe' ca' zjanac leba' txen. ⁹ Angl čhe Diosen' bosozale'ba' lo yežlion'. Na' lecze bosozale' da' xigüe' ca' lo yežlion'. Beļnan' ben' zoa ža gwlaste nachba' gwxiye' na' leba' Satanás, na' ne' zoaczba' na'a chziye'ba' yogo' beñaç.

¹⁰ Nach benda' to bene' zoa yaban' gwne' zižje gwne':

—Bač bžin ža ben Dios čechon' cont bene' ca' chesejnilaže'ne' zjanite' len le'. Bač bžin ža nachbia' Dios čechon' nape' yela' guac xen. Ba bžin ža chnabi'e cont gac con da' čheyał'cze gac. Na' ba bžin ža Criston' ben' gwleje' cont nabi'e bač chnabi'lene' le'. Gac da' čheyał'cze gac, le Satanás dan' ba gwzoa lao Diosen' do ža do yel bcuižen bene' chesejnilaže' Criston', bač besyebjen'. ¹¹ Na' bene' gosejnilaže' Criston' na' ba gosate', gosezoede' bi' bosozenague' čhe Satanásen', le gosejle'e Jesucriston' blaj xčhene' neče xtola'gaque' na' gos'o'e diža' chesejnilaže'ne'. Bene' ca' ba gosat gosache'ede' yejni'a yesate' clel ca' yesebejyichje' Jesucriston'. ¹² Yaban' čheyał' gosya'an yela' čhebe čhen, na' le'e že'le gan' zoa Diosen' čheyał' yebele, perw nyaše'chgua gac čhe le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj čhen.

¹³ Nach cate' belen' gočhe'eba' bosozale'ba' lo yežlion', blagsesba' no'olen' gwxxan bi' byo daon'. ¹⁴ Perw Diosen' bnežjue' čop xile' da' xen ca xil bsiadao' cont gwyeye' latje daš gan' bi' goc žin belen', latje gan' benšagüe' čhe' gan' yeso'ene' da' ye'ej gagüe' šon iz yo gašje. ¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'. ¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'. ¹⁷ Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' čhe Diosen', chesone' con da' že' na' zjanita'čhače' chesejnilaže' xtiža' Jesucriston'.

13

Čhope bež xigüe' be ble'e Juan

¹ Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. ² Ble'eda' bežen' nachba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach beļ ben' žia gaž yichj bnežjwba' bežen' yela' guac na' yela' chnabia' čheban' cont gwnabi'ba' na' cont gosenita' beñaç bosozenague' čheba'. ³ Ble'eda' to yichj bežen' nacchguan güe', ca to da' gatlemba', perw beyacha'. Na' yogo'loł beñaç besyebande' dan' beyachan' na' bosozenague' čheba'. ⁴ Yogo'ze bene' gosonxene' belen' dan' bemba' cont gwnabi' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

⁵ Lecze nono bžon gwna bežen' zaca'chba' ca Dios, na' gwnaba' yela' ya' čhe Diosen'. Na' goc lo na' bežen' gwnabi'ba' čhopeyon bio'. ⁶ Na' gwnechguaba' yela' ya' čhe Diosen' na' čhe yaba gan' zoe' na' len čhe yezica'chle bene' ca' že' yaban'. ⁷ Na' gwyo'o lo na' bežen' gwdillemba' bene' ca' gosejnilaže' Diosen' na' bi' gosezoede'ba'. Bibi goc yesone' cont yesyechoje' lo na'ba'. Gwnabi'ba' yogo' nación, yogo' yež, yogo' diaža na' bene' chesac gwde

gwdele diža' da' de lo yežlion'. ⁸ Na' yogo' bene' že' yežlion' bene' bi zjanyoj lagaque' le'e libr che Jesucriston', gosoxene' bežen'. Le cate' gwxete yežlion' Jesucriston' bzoje' le'e libr che' la yogo' bene' nezde' gata' yela' mban čhegaque' toli tocanē, Jesucristw ben' zaca'lebde' ca xila' dao' be gosot bene' gualaž četo' neče xtoła'gaque'.

⁹ Note'tez le'e žia nagle da' chene, le gwzenag da' nga nia' le'e. ¹⁰ Bene' yeseyixjue' ljež benače' ližya, decze de ližya yesata' legaue'. Na' bene' yesot ljež benače' len spada, decze de gac čhegaque' ca'. Da'nan' chonen byen soačhač chio' ba gwlej Diosen' cont naccho lo ne'e, gwyo gwčhejcho len bi da' gac čhecho na' soačhačcho šejnilaže' chone'.

¹¹ Gwdena' ble'eda' yeto bež xigüen' be bchoj lo' yo. Na' žia čop lozba' da' nac ca loz xila', perw be'ba' diža' can' choe' beļ ben' žia gaž yichjen' diža'. ¹² Na' bež nechon' bemba' cont bež gwchopen' gwnabia'ba' par leba' na' bež gwchopen' bemba' cont yogo' bene' že' yežlion' gosoxene' bež nechon' ben' beyaque len güe' dan' naquen ze da' got leba'. ¹³ Na' bež gwchopen' bemba' zan da' bebanchgüe bene' len yela' guac čheban', na' bemba' cont besele'ede' yi' le'e yaban' na' beselažon' lo yežlion'. ¹⁴ Na' da' bemba' da' can' gan' zoa bež nechon', gwziye'ba' bene' že' yežlion' cont bosozenague' čeba'. Nach bemba' mandadw gosone' to l' gua'a lsaca' da' nac ca bež nechon' da' gosoxene', bež ben' goc yichjban' güe' len spada, güe' da' naquen ze da' got leba' perw beyačba'. ¹⁵ Na' goc lo' na' bež gwchopen' bemba' cont l' gua'a lsacan' gwyo'on biš grasyw. Na' goc gwpen, benen mandadw gosote' yogo' bene' bi gosoxenen'. ¹⁶ Na' bež gwchopen' lecze bemba' byen gosezoa yogo' bene' señw che bežen' le'e na'gaue' licha o loxgagaue', bene' gole len bi' bixjw, na' bene' gwni'a len bene' yaše', na' bene' cheson xšin bene' yoble ca beyixe' len yezica' chle bene'. ¹⁷ Na' note'teze bene' še bi zoe' señw che bežen' o laba' o número da' zejen laba', bi goc bi si'e neca goc bi gote'. ¹⁸ Chyažjecho yela' sina' cont šejni'icho da' nga. Bene' chejni'i guac gwlabē número čheban', le naquen número da' chchin benač, na' número čheban' naquen xop gayoa gayon xop.

14

Da' gosol' bene' ca' to gayoa tapeyon mil gosoxene' Diosen'

¹ Na' gwna'a na' ble'eda' Jesucristw ben' zaca'lebde' ca xila' dao' be gosot bene' gualaž četo' neče xtoła'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xe' Diosen' loxgagaue'. ² Na' benda' česoļ bene' zan bene' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' bene' zan chosogole' arpan' to ši'ize. ³ Na' gosole' to da' cobe lao Diosen' na' lao bene' ca' tap zjažia xil na' lao bene' blao ca' tapechoa gan' chi' Diosen' chnabi'e. Noch no bene' yoble goc goļ len, con bene' ca' to gayoa tapeyon mil na'ze gosac bososedē dan' gosolen' cont gosoxene' Diosen', legacze' bebej Criston' lo na' Satanásen' šlac ne' nite' yežlion'. ⁴ Bene' ca' gosolen' zjanaque' bene' bi gosata'lene' no'ol bi nac xo'olgaue', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaue' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca' to tlacw coseš da' bnežjw bene' Israel gualaž četo' ca' lo na' Diosen'. ⁵ Gwbat gosoe' diža' güenlaže' na' bibi doļa' zjanape' lao Diosen' ben' chi'e chnabi'e.

Da' gosena šone angl

⁶ Nach ble'eda' yeto angl le'e yaban' chde' lo be'. Na' gwduxjue'ede' diža' güen che Diosen' da' bi te čhen len bene' že' yežlion', len bene' zjanac to to naciön, to to yež, to to diaža, na' bene' česac gwde gwdele diža' da' de yežlion'. ⁷ Gwne' zižje gože' legaue':

—Le žeb Diosen' na' le gonxene', le ba bžin hor gone' yela' justis che benač. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' že' yogo' naciön cont chesone' güedenag len Diosen'.

⁹ Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l' gua'a lsaca' čeba' na' cheso'e latje chesezoa señw che beža' loxgagaue' o taca'gaue', ¹⁰ Diosen' ba nžie' bia' yesesaca'zi'chgua bene' ca'. Yesezaca'zi'e gan' chala' yi' len azufre lao angl che Diosen' na' lao ben' zaca'lebde' ca xila' dao' ben' gosot bene' Israel neče xtoła'gaue'. ¹¹ Toli tocanē čhas žen che yi' gan' yesezaca'zi'en. Na' bene' ca' chesonxen bežen' len l' gua'a lsaca' čheban', na' bene' zjazoa señw che bežen' loxgagaue' o taca'gaue', bi gac yesyezi'laže' len da' yesezaca'zi'en ne chel ne lagüe ža. ¹² Da'nan' chonen byen soačhač chio' ba gwlej Diosen' cont naccho lo ne'en, gwyo gwčhejcho len bi da' chac čhecho, chio' chzenagcho che da' non Diosen' mandadw goncho na' bi chbejyichjcho dan' chejnilaže' cho Jesúsen'.

¹³ Nach benda' to bene' zoa yaban' gwne':

—Bzoy da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teže.”

Na' Spiritw che Diosen' žan:

—Da' li nite' mbalaz, le yesyezi'laže' len xšingauen', na' gacbia' yogo' da' güen da' ba gosone'.

Yotob Diosen' bene' bi chosozenague' che' cont yesezaca'zi'e

¹⁴ Nach gwna'a da' yoble na' ble'eda' to bejw šiš le'e yaban' na' cože' bejon' chi' to bene' nac ca to beñach. Na' zoa to corona de oro yichjen' na' noxe' to da' nzi' hoz da' nłachgua.

¹⁵ Na' yeto angl bchoj lo' gan' chesonxene' Diosen' yaban' na' gwne' žiže gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nłachgua. ¹⁸ Na' lecze bezchoj yetoe' ben' yo'o lo' ne'e yi' da' čala' lo' mes gan' chesonxene' Diosen'. Na' angl nga gwne' žiže boł güiže' angl gwchopa' ben' lecze noxe' hoz, gože' ne':

—Ba güe uvas da' žia lo' yežlion'. Bečoguen len hoz čion' dan' nłachgua cont yotobchon.

¹⁹ Nach anglen' bechogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e. ²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayoa mil metr.

15

Angl ca' zjayo'o lo' na'gaque' gaže yela' zi' da' zelao yesac

¹ Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo' na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

² Lecze ble'eda' to da' nac ca to nisdao' de vidrw da' nchixen yi'. Na' cho'a nisdaon' zjazecha bene' ca' gosezoede' bi gosonxene' bežen' na' l' gua'a lsaca' dan' nac ca leba', na' bi goso'e latje yosozoe' legaque' señw čheba' o número da' zejen laba'. Na' zjanoxe' tgüeje arpa da' bnežjw Diosen' legaque'. ³ Na' ble'eda' legaque' chesonxene' Diosen' česołe' to da' bsede da' Moisésen' bene' Israel gualaž četo' ca', Moisés ben' ben xšin Diosen' cani'. Lecze česołe' da' naquen to da' bsede Jesucriston' legaque', Jesucristw ben' zaca'lebde' ca xila' dao' be gosot bene' gualaž četo' neče xtoła'gaque'. Quinga žan:

Xanto' Dios, yogo' da' ba beno' len yela' guac xen čio'

naquen da' güen juisyw na' da' zaca' yebanecho.

Yogo' da' chono' zejen to liča na' naquen da' zaca'.

Len' chnabi'o nación ca'.

⁴ Nono zoa bene' bi cheyała' žebe' le' Xanto', da' chono' castigw che da' malen'.

Nono zoa bene' bi cheyała' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejczen to liča.

⁵ Gwde benda' da'na' nach gwna'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. ⁶ Na' ble'eda' gaž angl ca' zjayo'o lo' na'gaque' yesone' gac gaž yela' zi' lo' yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alčo'e to bant de oro. ⁷ Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo' yežlion', na' zejen Diosen' ben' zoa toli' tocañe chlocchgüe' da' cheson bene' bi chosozenag che'. ⁸ Na' doxen gan' chesonxene' Diosen' yaban' gwche'chguan ca žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac bina' yeyož yesac yela' zi' ca' gaž da' zjanac lo' na' gaž angl ca'.

16

Tas ca' gaže na' yela' zi' ca' gosac cate' bososčo'en

¹ Na' benda' gwne' Diosen' žižjehgua, zoe' gan' chacxene', gože' angl ca' gaže:

—Le šja'ac le šjalal' dan' yože lo' tas čelen' lo' yežlion', da' zejen leca chloca' da' xinj cheson bene' ca' bi chosozenag čhia', na' gona' ga yesezaca'zi'chgüe'.

² Nach angl nechon' gwyeje' jalalje' da' yože lo' tas chen' lo' yežlion' gan' nac yo biž, na' yogo' bene' ca' zjazoa seŋw che bežen' na' chesonxene' l' gua' la'saca' da' nac ca leba', gosebie' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo' nesdaon' na' nesdaon' beyaquen chen ca chen che bene' guat, na' gosat yogo' be ca' ze' lo' nisen'.

⁴ Nach angl gwyonen' jalalje' dan' yože lo' tas chen' lo' yegw ca' na' gate'ze chal nis na' lecze besyeyaquen chen. ⁵ Nach benda' gwne angl ben' chape' nisen' da' de lo' yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczjo' licha can' ba gwchoglaguo' chac da' quinga, ⁶le bene' že' yežlion' ba gosote' bene' ca' goso'e xtižon' na' gosote' nochle bene' gosac lo' nao'. Da'nan' ba beno' cont yese'eje' chen neče da' bosolalje' xchen bene' ca'. Na' da' chac chegaque' naquen da' cheyal'a'cze gac.

⁷ Nach benda' gwne to bene' do cho'a mes gan' bene' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chchogbi'o che bene'.

⁸ Nach angl gwdapen' jalalje' dan' yože lo' tas chen' lo' gwbižen', na' gwbižen' bzeyen beŋach. ⁹Yogüe' leca goseye', perw bi besyetingjde' xtoła'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezac'a'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac choł doxen gan' chnabia'ban'. Na' beŋachen' gosagwxejte lože'gaquen' catec gosesezac'a'zi'e.

¹¹ Na' gosene' yela' ya' che Dios ben' zoa yaban' neče dan' chesezac'a'zi'en na' neče güe' xen dan' zjažia lo' cuerp chegaquen', perw ne ca' bi besyetingjde' che da' mal dan' gosonen'.

¹² Nach angl gwxopen' jalalje' dan' yože lo' tas chen' lo' yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca blož. Ton bchojen cho'a beł be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'. ¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teže lo' yežlion' cont yesedillene' Dios ben' nap la'zelagüe yela' guac xen cate' žin ža gac ca'. ¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teže bene' nita'teže' chesebeze' neda' cate' yida' na' chesezaquede' bibi da' mal chesone', le yesacde' zto' še biŋa' yesyetingjde' xtoła'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas chen' lo' be', na' benda' gwne Diosen' ziže, gan' zoe' chesonxene' le' yaban' gan' lecze chi'e chnabi'e, gwne':

—Bač goc da' cheyal'a' gac.

¹⁸ Nach gwyep yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' beŋachen' lo' yežlion'. ¹⁹ Na' ciuda da' nac la'zelagüe blao lo' yežlion' gwžiajin' bchojen šonle, na' lecze gosebiayi' yezica'chle ciuda da' zjachi' lo' yežlion'. Diosen' bich gwleze' bene' cont goseyi' gosezac'chgua bene' že' ciuda Babilonia che da' mal da' ba gosontequē', le blocchgüe' yela' mal chegaquen'. ²⁰ Na' catequen' gwxo' besyeniitteczje yogo' yež da' zjachi' lo' nesdaon' na' yogo' ya'a ca'. ²¹ Na' gwche'chgua yej ži'a lo' yežlion', yej ži'i da' cha'a do tapa rob güeje beselažon' cože' bene'. Na' bene' že' yežlion' gosene' yela' ya' che Diosen' neče dan' besežaglachgüe' len yej dan' gwchen'.

17

Diosen' be'e castigw che ciuda blao da' zaca'lebe ca to no'ole zle'

¹ Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo' nesdaon' ca', no'olen' nac no'ol zle'. ² Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebchde' le' cled ca Diosen', guac nacho gosezožde' da' ba gose'eje' vino da' bnežjue' legaque'.

³ Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. ⁴ No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. ⁵ Na' loxgue' nyoj diža' da' žan naquen' naque', diža' da' bi gosejni'i

benach, zan: "Naca' ciuda Babilonia na' nacchgua' blao. Naca' no'ole zle', le chona' cont bene' ze' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'." ⁶ Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnilaže' Jesusen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. ⁷ Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. ⁸ Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabi'ba' yežlož, na' techle yeyo'oba' na' saca'zi'ba' toli tocañe. Cate' gwxe yežlion' Diosen' bzoje' la bene' ca' zjanape' yela' mban toli tocañe le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

⁹ Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. ¹⁰ Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e. ¹¹ Na' bež ben' gwzoa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocañe.

¹² Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gaque' yesenabi'e txen len bežen', perw šložze. ¹³ Na' yogo'te bene' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. ¹⁴ Na' yesedillene' Jesucristw ben' zaca'lebbe' ca xila' dao' ben' gosot bene' gualaž cheto' neche xtola'gaque', na' Jesucriston' gone' gan lo gwđilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chače' yesejnilaže'ne' bite'teže da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža' da' de lo yežlion'. ¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yeseque'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an' da' bi yesagüe'. ¹⁷ Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'. ¹⁸ Na' no'olen' bach ble'edo', naque' ciuda blaohgua da' chnabian' bene' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. ² Na' anglen' gwne' zizje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e benach. ³ Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

⁴ Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', ⁵ le dechgua xtola' bene' Babilonia ca', na' bich cuez Diosen' gwnežjue' castigw chegaque'. ⁶ Yesezaca'zišque' lagüe dan' bosochi bososaque' bene', na' yesežaglaosque' da' xench ca dan' bosochi bososaque' bene' yoble. Gacšca chegaque' castigw gualch ca da' gosone' che bene'. ⁷ Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosene': "Gwbat te yela' chnabia' cheton'; gwbat soato yela' güine', neto' že'to' ciuda blao nga." ⁸ Da'n'an' lo toze ža gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebil yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neche xtola'gaque'.

⁹ Bene' gwnabia' ca' ze' lo yežlion' bene' bosozenag che bene' Babilonia ca' cont bosozoe' Diosen' ca' ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'. ¹⁰ Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—jNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach bene' güen delgens ca' ze' yežlion'a yesebeže' na' yesegüine'de' cate' cuiayi' ciudan', le noch no si' dan' yesoten'. ¹² Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xna. Nono žel bene' si' da' yesote' da' nac de yag da' chl'a zix' o de bichle yag zaque', de marfil, de ya na' de mármol. ¹³ Nono žel bene' si' canel, no set zix', no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no benačh bene' yesote' ca beyixe'. ¹⁴ Na' bene' güen delgens ca' yesene' che ciudan':

—Ba gwde che yogo' da' zix' ca' na' yogo' bichle da' ca' gosazlaže' bene' Babilonia ca' yesezi'e lo yela' gwni'a chegaquen'. Gwbatech yesezi'e da' ca'.

¹⁵ Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwni'a chegaque' neche bene' Babilonia ca', yeseze' zito'le yesežebchgüe' che dan' chesežagla'o bene' Babilonian'. Na' yesebeže' na' yesegüine'de', ¹⁶ na' zižje yesene':

—jNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Bene' gwže' ciudan' gosazchgüe' lache' šagüe' lache' zaque', no lache' moradw na' no lache' xna. Gosonchgua cuingaque' xdan len oro, len yej zaca' da' chesactiten, na' len perlas. ¹⁷ Perw na'a zejzenez gwžiyai' yogo' da' šagüe' chegaquen'.

Yogo' xan barcw ca', yogo' bene' ca' chja'ac lo' barcw ca', len bene' ca' cheson žin lo' barcon' na' nochle bene' cheson žin lo' nisaon', yogüe' yeseze zito'le yesene'e. ¹⁸ Na' yesele'ede' chas žen cate' šey ciudan' na' yesene':

—Biņa' gata' yeto ciuda yoble doxen lo yežlion' da' žinlaže' ca ciuda nga len yela' gwni'a yela' šagüe' chen.

¹⁹ Na' yosožia yo bište yichjgaque' da' yesyegüine'de', na' yesebežyaše', yesene':

—jNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwni'a che bene' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' na'a zejzenez gwžiyai' ciudan'.

²⁰ Perw le'e že'le yaban', le yebe. Le'e gwseła' Diosen' gocle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi' bososaque' le'e.

²¹ Nach to angl gual bcose' to yej xen ca dan' chon žin gan' chi' molin xen, na' bzalen' lo' nisaon', gwne':

—Can' gac che ciuda Babilonian', yeniten can' benit yej xen dan' bzala' lo' nisaon', na' gwbatech le'echon da' yoble. ²² Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinlaže' da' chosochine', neca yenecho sšag che bene' chesot len molin lo ciudan'. ²³ Gwbatech le'echo be'ni' che lámpara, na' gwbatech yenecho bene' cheson lni' che yela' güešagna'. Yesebiayi' bene' güen delgens che ciudan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' güaža' chegaquen'.

²⁴ Bene' Babilonia ca' gosote' bene' goso'e xtiža' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezica'chle bene' gosot bene' doxen lo yežlion'.

19

¹ Gwdena' benda' bene' zan juisyw bene' že' yaban' chesonxene' Diosen', na' nen zižje, chesene':

Bene' güen juisyw nac Dios chechon'.

Ba bene' cont chio' chejnilaže' chone' zoacho len le'.

Naque' bene' zaca' juisyw, na' nape' yela' guac xen.

² Zejcz'e to licha na' chone' can' cheyala'cze gac dan' chchoglagüe' yesezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudan' gosego'oyele' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala'cze yesezaca'zi'e da' gosote' bene' ca' gosonxen le'.

³ Nach da' yoble gosene':

—Beñe' güen juisyw nac Diosen'. Tołi tocañe çhas žen gan' šey ciudan'.

⁴ Nach bene' blao ca' tapechoa na' bene' ca' tap bene' çia xil jasechaze' cosçho'ale lo yon' gosonxene' Diosen' gan' chi'e chnabi'e, gosene':

—Can' cheyała' gac. Beñe' güen juisyw nac Diosen'.

⁵ Na' benda' gwne to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyała' gonxençhone', chio' chzenagcho çhe', chio' naccho bene' gole na' chio' naccho bene' xcuide' na' bi' bixjw.

Yela' güešagna' çhe ben' zaca'lebde' ca xila' daon' gosot bene' Israel neçhe xtoła'gaque'

⁶ Nach benda' be xne çhe bene' zan juisyw çesonxene' Diosen'. Na' xtiža'gaquen' nenen ca çac ga çhiž yegon' cate' deçhguan na' ca nen cate' leca çhašjw çhtin, çesene':

ıBeñe' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebeçgüeçho na' zoachguacho mbalaz çonxençhone'.

Le ba bžin ža gac yela' güešagna' çhe ben' zaca'lebde' ca xila' dao' be gosot bene' Israel neçhe xtoła'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' çon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoy da' nga: “Mbalaz bene' ca' ba goxe' cont yesenite' cate' gac lni çhe yela' güešagna' çhe ben' zaca'lebde' ca xila' dao' be gosot bene' Israel neçhe xtoła'gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi çesebejyichje' xtiža' Jesúsen' da' çesejle'e. Benxen Diosen'.

Na' note'teze bene' çeso'e diža' li çhe Jesúsen', zoa Spiritw çhe Diosen' chzejni'in legaque' cont çeso'e xtižen'.

Bene' žia cože' cabayw šiš

¹¹ Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože'ba'.

Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejçze' to liça can' çhçoglagüe' saca'zi' bene' bi çhosozenag çhe' na' can' çhdillene' da' malen'. ¹² Na' ble'eda' yejlagüe' ca' çesactiten ca to yi' da' çala'nin, na' zjazoa zan corona yiçhje'. Na' ble'eda' nyoj yeto le' loxguen' da' nombia' toze le'. ¹³ Ble'eda' nyaze' to lache' da' dope çen, na' le' Xtiža' Dios. ¹⁴ Na' ble'eda' bene' zan bene' zjanac soldadw çhe Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüeje cabayw šiš. ¹⁵ Cho'a ben' le' Xtiža' Dios çhçoj to spada da' nłachgua da' gwçhine' çhine' nación ca' bi çhosozenag çhe'. Le nabi'e nación ca' na' žan ca žan yosozenague' çhe'. Na' gone' yezezaca'zi'çhgua bene' ba goson da' malen', le Dios ben' nap la'zelagüe yela' guac xen çhlocçgüe' can' ba gosonen'. ¹⁶ Na' le'e xcamise' na' le'e xichje' nyoj diža' quinga žan: “Naca' Rey ben' çhnabia' yezica'çhle rey na' naca' Xan yezica'çhle bene' gwnabia'.”

¹⁷ Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' çesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle. ¹⁸ Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹ Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw çhegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw çhe' ca'. ²⁰ Na' bež nechon' goçba' lo na' Jesúsen'. Na' leçze ca' goc çhe bež xigüe' gwçhope ben' çhoe' diža' güenlaže' na' bemb'a yela' guac cont benaçhen' bosozenague' çhe bež nechon', cont gosonxene' l' gua'a lšaca' çheba' na' cont gosezoe' señw çheba'. Çopteba' gosacba' lo na' Jesúsen', na' ca' zjambamba' bosozale'ba' lo' yi' gabił gan' çala'nin azufre, yi' xen da' nac ca to nisdao'. ²¹ Nach bene' ca' yezica'çhle, Jesúsen' ben' žia cože' cabayw šišen' betue' legaque' len spada da' çhçoj çho'en', na' yogo' šod ca' gosagwçatba' xpela'gaquen'.

20

Can' gac lo to mil iz

¹ Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen. ² Na' anglen' be'oe' be' ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bcheje'ba' gdenña' to mil iz. ³ Nach beyož bcheje'ba', na' bzale'ba' lo' yechw gabilen' na' la' bseyjwite' cho'a yechon' na' bchišen' to seyw. Bene' ca' cont bich siye'ba' be'nač šlac biña' te to mil iz. Na' cate' ba gwde to mil izen', cana'ch yeseže'ba' gdenña' cont yechojba' yešlož dao'.

⁴ Nach ble'eda' bene' ca' gwlo'o Diosen' lo' na'gaque' gosone' yela' justis che be'nač zjachi'e gan' chesenabi'e. Na' lecze ble'eda' bene' bi gosonxene' bež xigüen' len l' gua'a lsaca' cheba' neca goso'e latje yosozoe' señw cheba' loxgagaque' o taca'gaque'. Gosenita'chache' goso'e diža' chesejnilaže' Jesúsen' na' goseyijue'ede' xtiža' Diosen'. Da'n'an' bene' ca' besegue'ede' Diosen' gosote' legaque' gosečogue' yengaque'. Perw Diosen' bene' cont besyebane' ladjo bene' guat ca', na' t'xen len Criston' gosenabi'e to mil iz. ⁵ Cate'ch ba goc to mil iz besyeban bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. ⁶ Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo' ne'e. Bi yesac chegaque' can' gac che bene' ca' yesežagläüe' neče xto'la'gaque' toli' tocañe, da'n'an' žacho yela' got gwchope. San yesenite' yesonxene' Diosen' na' yesonxene' Criston', na' da'n'an' guac nacho yesaque' b'xoz. Legaue' yesenabi'e len Criston' to mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo' gabil' gan' bseyjuen'. ⁸ Na' yechojen na' da' yoble siyen' bene' že' yogo' nación ca' že' lo' yežlion'. Na' siyen' bene' ca' zjanzi' Gog na' Magog, gwtoben' legaque' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab. ⁹ Nach ble'edagüe'da' bene' zan juisyw ca', gosa'aque' doxen lo' yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo' ne'e. Na' cate' gosečje' ciudan', Diosen' bene' cont bchoj yi' le'e yaban' bzeytecczen legaque'. ¹⁰ Na' ca' nac Satanás dan' gwziye' bene' ca' že' yežlion', angl che Diosen' bosozalen' lo' yi' gabil' gan' čala' azufre, yi' xen da' nac ca' to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen be'načen' bež nechon'. Na' yesežaglaon do ža do yel toli' tocañe.

Goc yela' justis che bene' ca' ba gosat

¹¹ Nach ble'eda' chi' Diosen' to lo' siy xen da' nac da' šiš, chi'e chnabi'e. Na' chña'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. ¹² Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lo' da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli' tocañe. Na' bene' yela' justis chegaque' con ca' gosone' šlac gosebane', le yogo' da' gosone' zjanyojen le'e libr ca'. ¹³ Yogo' bene' gosat lo' nisdao'n' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lägüe' cont bene' yela' justis che to toe' con ca' gosone' šlac gosebane'. ¹⁴⁻¹⁵ Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bñitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli' tocañe, bosozale' legaque' lo' yi' gabil' da' nac da' xen ca' to nisdao'. Na' dan' goc chegaque', lenña' yela' got gwchope chegaque'.

21

Yežlion' na' le'e yaban' besyeyaquen da' cobe

¹ Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'. ² Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo' yežlion'. Ba nonen' xdan ca' to no'le bene' ba bpa'a cuine' cont naque' xdan cate' gwšagne'ye. ³ Na' do gan' chi' Diosen' chnabi'e benda' gwne' to bene' zižje, gwne':

—Gwña'šc, Diosen' ba betje' zosalene' be'nač. Soateze' len legaque', le gwleje' legaque' cont zjanaque' yež che', na' yesonxene'ne'. ⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' chen. Nono gat, nono šey la, le ba gwde che yogo' da' ca' gota' lo' yežlio nechon'.

⁵ Nach Dios ben' chi' chnabi'e gwne':

—Da' li' ba chocoba' yogo'lo' da' de.

Lecze gwne':

—Bzoj diža' quinga ba bendo', le naquen diža' li' na' gac can' gwnian'.

⁶ Nach gože' neda':

—Bačh goc da' cheyała' gac. Neda' naca' ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z. Note teze bene' chaclaže' si'e da' gwnežjua'ne', gwnežjua'ne' yela' mban toli tocaņe da' zaca'lebe ca nis ya'a da' che'ejcho cate' chbilecho, na' bi sia' laxjuen. ⁷Na' bene' chesejnilaže' neda', še ba gosezoede' bi yesebejyichje' xtižan', gac čhegaque' yogo' da' šagüe' da' ba bia' diža' chen, na' yesonxene' neda', na' gwlo'a zjanaque' xi'ina'. ⁸Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež benače', bene' cheson da' nac da' yela' zto' len cuerp čhegaque', bene' cheson txen len bite'teze yela' guaža', bene' chesejnilaže' l' gua'a l'saca', na' yogo' bene' cheso'e diža' güenlaže', yogo' bene' ca' yesezaca'zi'e toli tocaņe lo yi' xen da' nac ca to nisdao', yi' gabil' gan' čala' azufren'. Na' da' gac čhegaquen', lenna' žacho yela' got gwchope.

Ciuda Jerusalén da' nac da' cobe

⁹Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neče xtoła'gaque', guac načo le' si'e no'olen'.

¹⁰Nach Spiritw čhe Diosen' benen cont gwya'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda čhe Dios. Ble'eda' gwzoan yaba gan' zoa Diosen' na' čhetjen lo yežlion'. ¹¹Na' ciudan' goctichguan len be'ni' da' nsa' Diosen', na' ble'eda' čactitcen ca to yej da' zaca'chgua, ca yej da' nzi' jaspe da' chle'echo ca vidrw. ¹²To ze'e xen da' nac sibe nyechjen ciudan', na' nita' šižinw puert čhen, na' to to cho'a puerten' zecha tgüejje angl. Na' le'e puert ca' zjanyoj la šižinw bene' ca' bosoxie' šižinw cuen diaža čhe neto' nacto' bene' Israel. ¹³Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen. ¹⁴Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw čhe Jesucristw ben' zaca'lebde' ca xila' dao' ben' gosot bene' gualaž čheto' neče xtoła'gaquen'.

¹⁵Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', čhe ze'e chen na' čhe puert ca'. ¹⁶Ciudan' naquen da' cuadradw, toze ca naquen zлага' len ton. Anglen' bchixe' ciudan' len ya chen' na' goquen čhope mil čhope gayoa kilómetros to to šla'an, ca'te' ndonen, ca'te' zlagan' na' ca'te' siben'. ¹⁷Nach bchixe' ze'e dan' nyechj ciudan' na' geyquen gayontap metr yela' sib čhen, metr da' nombia' benačh, le lenna' bchin anglen' gwxi'e medidon'.

¹⁸Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'. ¹⁹Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactitcen. Da' nechon' naquen de jaspe; da' gwchope de zafiro; da' gwyoņe de ágata; da' gwdape de esmeralda; ²⁰da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. ²¹Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

²²Bibi yodao' ble'eda' lo ciudan', le bene' ca' ze' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž čheto' neče xtoła'gaque'. Legaque' chesonxen bene' lo ciudan'. ²³Bene' ca' ze' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. ²⁴Na' be'ni' čhe Diosen' gwswenin' len bene' za'ac yogo' nación bene' chesejnilaže' Diosen', na' bene' gwnabia' ca' ze' yežlion' yesonxene' Diosen' yosonežjue'ne' bi da' zaca' da' šagüe' da' de čhegaque', len no yela' bala'an da' de čhegaque'. ²⁵Bitw šeyjw puert ca' zjanita' ciudan' lagüe' ža, na' gwbat gac šeže'le. ²⁶Can' ba gwnia', yela' zaca' yela' xdan' zjade yogo' nación len yela' bala'an da' zjade čhe bene' gwnabia' čhe nación ca' yosonežjuen' Diosen' lo ciudan'. ²⁷Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue' Diosen' o bene' choe' diža' güenlaže'. Con bene' zjanyoj lagaque' le'e libr čhe Jesucriston' gan' zjanyoj la bene' zjanape' yela' mban toli tocaņe, legacze' gac yeso'e na'.

22

¹Nach anglen' blo'ede' neda' yegw gan' yože nis da' chnežjon benačhen' yela' mban toli tocaņe. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž čheto' neče xtoła'gaquen'. ²Na' gachol' nez yo xen čhe ciudan' na' chop la'a cho'a yegon' ze yag

da' chnežjon beñačen' yela' mban toli tocaņe. Na' yogo' bio' chesebian frut, šižinw ni'a chesebian lao tgüiz, na' bene' nación ca' yosoçhine' xlaguenna' ca rmed cont yesenite' güen. ³ Gwbat gata' bi da' chgue'e Diosen' lo ciudan', le ciudanan' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque', na' yogo' bene' že' ciudan' yesonxene' le'. ⁴ Yesenite' yesele'ede' cho' alao Diosen', na' yoj la Diosen' loxgagaque'. ⁵ Gwbatech gac šeže'le lo ciudan'. Na' bene' že' lo ciudan' bi yeseyažide' be'ni' che no lámpara o che gwbiž, le be'ni' da' nyechj Xancho Diosen' gwsen'in' len legaque'. Na' yesenabi'e len le' toli tocaņe.

Ba zoa yid Jesucriston' da' yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gacbe'ele da' ca' za' gac.

⁷ Nach gwna Jesúsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'. ⁹ Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

¹⁰ Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'. ¹¹ Na' bene' cheson da' mal, yesonhcze' da' malen' chesonen'. Na' bene' cheson da' yela' zto', yesonhcze' da' yela' zton' chesonen'. Na' bene' cheson da' chazlaže' Diosen', yesonhcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ncze'.

¹² Nach Jesúsen' gozne':

—Da' li ba zoa yida' da' yoble, na' yedeyena' gac güen che to to beñaç o saca'zi'e con can' ba ben to toe'. ¹³ Neda' naca' ben' ben yežlion' len yogo' bichle da' de, na' naca' ben' gon cont te çen. Da'n'an' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te çen.

¹⁴ Mbalaz bene' ca' nita'teže' chesenabe' yeca'a xtoła'gaque' cont yesaque' txen len bene' ca' ba ble'edo' ben' ba besyeyach xala'na'gaque'. Legaque' gac yesagüe' frut dan' chbia yag yela' mban toli tocaņe, na' gac yeso'e cho'a puert che ciudan'. ¹⁵ Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp chegaque', bene' chesot ljež benache', bene' chesejnilaže' l' gua' lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda çian'.

¹⁶ —Neda' Jesús ba gwseła' angl çhian' cont ba bzende' le' yogo' da' ca' ba bzojon'. Na' cheyala' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonxencho Jesúsen' chñablaže'cho yob yidšca Jesúsen' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'sque' yide' da' yoble.

Na' note'teže bene' chaclaže' si'e da' gwnežjw Jesúsen' le', cheyala' yedenaben', na' gwnežjue'ne' yela' mban toli tocaņe da' zaca'lebe ca nis ya'a da' che'ejcho cate' chbiļecho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yela' zi' dan' zjanyoj le'e libr nga. ¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr çhen' gan' nyoj la bene' ca' zjanape' yela' mban toli tocaņe na' gone' cont bi gac šo'le lo ciuda çen', neca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenšcacze' yogo'le. Da' na'zen' chzoja'.